

T I T I
L I V I I


HISTORIARUM
VOLUMEN QUINTUM.



L O N D I N I:
Ex Officinâ J. & R. T O N S O N,
& J. W A T T S.

M D C C X L I X .

C U M P R I V I L E G I O .





T. LIVII
HISTORIARUM
LIBER TRIGESIMUS.

E P I T O M E.

V, VI. **I**N Africa Scipio Carthaginienses, & eundem Syphacem Numidarum regem, Asdrubalemque pluribus prœliis vicit, adjuvante Masinissa : binæque hostium castra expugnavit, in quibus quadraginta millia hominum ferro ignique consumpta sunt. XI, XII, &c. Syphacem per C. Lælium & Masinissam cepit. Masinissa Sophonisbam, uxorem Syphacis, filiam Asdrubalis, captam statim adamat, & nuptiis factis uxorem habuit : castigatusque à Scipione, venenum ei misit. quo hausto illa decessit. XX, XXV. Effectumque est multis Scipionis victoriis, ut Carthaginienses, in desperationem acti, in auxilium publicæ salutis Annibalem ex Italia revocarent. XXX, &c. Isque, anno decimosexto Italia discedens, in Africam trajecit, tentavitque per colloquium pacem cum Scipione

pine componere : XXXV. Et, quum de conditionibus pacis non convenisset, acie victus est. XXXVII. Pax Carthagenensibus data est petentibus. Annibal Gisgonem, pacem dissuadentem, manu sua detraxit: excusata deinde temeritate facti, ipse pacem suavit. XIX. Mago, qui bello in agro Insuadium cum Romanis conflixerat, vulneratus, dum in Africam per legatos revocatus reverteretur, ex vulnere mortuus est. XLIV. Masinissæ regnum restitutum est. XLV. Reversus in urbem Scipio amplissimum nobilissimumque egit triumphum, quem Q. Terentius Culleo senator pileatus secutus est. Scipio Africanus (incertum militari prius favore, an populari aura ita cognominatus) primus certè hic imperator victæ à se nomine gentis nobilitatus est.

I.  N. Servilius Cæpio, & C. Servilius Geminus consules (sextusdecimus is annus belli Punici erat) quum de republica belloque & provinciis ad senatum retulissent, censuerunt Patres, ut consules inter se compararent, fortirenturve, uter Bruttios adversus Annibalem, uter Etruriam ac Ligures provinciam haberet. cui Bruttii evenissent, exercitum à P. Sempronio consule acciperet. P. Sempronius (ei quoque enim proconsuli imperium in annum prorogabatur) P. Licinio succederet: is Romam reverteretur, bello quoque bonus habitus ad cetera, quibus nemo ea tempestate instructior civis habebatur, congestis omnibus humanis à natura fortunaque bonis. Nobilis idem ac dives erat: forma viribusque corporis excellebat: facundissimus habebatur, seu causâ oranda, seu in senatu & ad populum suadendi ac dissuadendi locus esset; juris pontificii peritissimus. Super hæc bellica

licæ quoque laudes consulatus compotem fecerant. Quod in Bruttiiis provinciâ, idem in Etruria ac Liguribus decretum. M. Cornelius novo consuli tradere exercitum iussus : ipse prorogato imperio Galliam provinciam obtinere cum legionibus iis, quas prætor L. Scribonius priore anno habuisset. Sortiti deinde provincias. Cæpioni Bruttii, Servilio Geminio Etruria evenit. Tum prætorum provinciæ in sortem conjectæ. Jurisdictionem urbanam Pætus Ælius, Sardiniam Cn. Lentulus, Siciliam P. Villius, Ariminum cum duabus legionibus (sub Lucretio Spurio eæ fuerant) Quintilius Varus est sortitus. Et Lucretio prorogatum imperium, ut Genuam oppidum à Magone Pœno dirutum exædificaret. P. Scipioni non temporis, sed rei gerendæ sine, donec debellatum in Africa foret, prorogatum imperium est. decretumque ut supplicatio fieret, quòd is in Africam provinciam trajecisset, ut ea res salutaris populo ipsique duci atque exercitui esset.

II. In Siciliam tria millia militum sunt scripta. &, quia quod roboris ea provincia habuerat in Africam transectum fuerat, ne qua classis ex Africa trajiceret, quadraginta navibus custodiri placuerat Siciliae maritimam oram. Tredecim novas naves Villius secum in Siciliam duxit : ceteræ in Sicilia veteres resectæ. Huic classi M. Pomponius prioris anni prætor prorogato imperio præpositus, novos milites ex Italia advectos in naves imposuit. Parem navium numerum Cn. Octavio prætori item prioris anni cum pari jure imperii ad tuendam Sardiniae oram Patres decreverunt. Lentulus prætor duo millia militum dare in naves iussus. Et Italiae ora, quia incertum erat, quò missuri classem Carthaginienses forent (videbantur autem quicquid nudatum præfidiis esset petitori) M. Marcio prætori prioris anni cum totidem

navibus tuenda data est. tria millia militum in eam classē ex decreto Patrum consules scripserunt, & duas legiones urbanas ad incerta belli. Hispaniæ cum exercitibus imperioque veteribus imperatoribus, Lentulo & L. Manlio Acidino, decretæ. Viginti omnino legionibus, & centum sexaginta navibus longis res Romana eo anno gesta. Prætores in provincias ire iussi. Consulibus imperatum, priusquam ab urbe profiscerentur, ludos magnos facerent, quos T. Manlius Torquatus dictator in quintum annum vovisset, si eodem statu respublica staret. Et novas religiones excitabant in animis hominum prodigia ex pluribus locis nunciata. Aurum in Capitolio corvi non lacerasse tantum rostris crediti, sed etiam edisse. Mures Antii coronam auream arrosere. Circa Capuam omnem agrum locustarum vis ingens, ita ut unde advenissent parum constaret, complevit. Equuleus Reate cum quinque pedibus natus. Anagninæ sparsi primum ignes in cœlo, dein fax ingens arsit. Frusinone arcus solem tenui linea amplexus; circulum deinde ipsum major solis orbis extrinsecus inclusit. Arpini terra campestri agro in ingentem sinum consedit. Consul alteri primam hostiam immolanti caput jecinoris defuit. Ea prodigia majoribus hostiis procurata. editi à collegio pontificum Dii quibus sacrificaretur.

III. Iis transactis, consules prætoresque in provincias profecti. omnibus tamen (velut eam fortitis) Africæ cura erat. seu quia ibi summam rerum belli-que verti cernebant: seu ut Scipioni gratificarentur, in quem tum omnis versa civitas erat. Itaque non ex Sardinia tantum, (sicut ante dictum est) sed ex Sicilia quoque & Hispania vestimenta frumentumque, & arma etiam ex Sicilia & omne genus commeatus eò portabantur. Nec Scipio ullo tempore hiemis belli opera remiserat, quæ multa simul undique eum circum-

cumstabant. Uticam obsidebat. castra in conspectu Asdrubalis erant. Carthaginienses deduxerant naves. classem paratam instructamque ad commeatus interceptiendos habebant. Inter hæc ne Syphacis quidem reconciliandi curam ex animo miserat: si fortè eum satias amoris in uxore ex multa copia cepisset. Ab Syphace magis pacis cum Carthaginiensibus conditiones, ut Romani Africa, Pœni Italia excederent, quàm, si bellaretur, spes ulla desciturum afferebatur. Hæc per nuncios magis equidem acta crediderim, (& ita pars major auctores sunt) quàm ipsum Syphacem, ut Antias Valerius prodit, in castra Romana ad colloquium venisse. Primò eas conditiones imperator Romanus vix auribus admisit. postea, ut caussa probabilis suis commeandi foret in castra hostium, molliùs eadem illa abnuere: ac spem facere, sæpius ultro citroque agitantibus rem conventuram. Hibernacula Carthaginiensium, congesta temere ex agris materia exædificata, lignea ferme tota erant. Numidæ præcipuè arundine textis storeaque pars maxima textis, passim nullo ordine, quidam, ut sine imperio occupatis locis, extra fossam etiam vallumque habitabant. Hæc relata Scipioni spem fecerant castra hostium per occasionem incendendi.

IV. Cum legatis, quos mitteret ad Syphacem, calonum loco primos ordines spectatæ virtutis atque prudentiæ servili habitu mittebat; qui, dum in colloquio legati essent, vagi per castra alius alia, aditus excitusque omnes, situm formamque & universorum castrorum & partium, quæ Pœni, quæ Numidæ haberent, quantum intervalli inter Asdrubalis ac regia castra esset, specularentur: moremque simul noscerent stationum, vigiliarumque: nocte, an interdiu opportuniores insidianti essent. & inter crebra colloquia alij atque alij de industria, quò pluribus omnia nota essent,

mittebantur. Quum sæpius agitata res certio-
rem spem pacis indies & Syphaci & Carthaginien-
sibus per eum faceret; legati Romani vetitos se reverti ad
imperatorem aiunt, nisi certum responsum detur.
Proinde seu ipsi staret jam sententia, seu consulendus
Asdrubal & Carthaginenses essent, consuleret. Tem-
pus esse, aut pacem componi, aut bellum naviter
geri. Dum consulitur Asdrubal ab Syphace, ab As-
drubale Carthaginenses; & speculatores omnia vi-
sendi, & Scipio ad comparanda ea, quæ in rem erant,
tempus habuit: & ex mentione ac spe pacis, negli-
gentia, ut fit, apud Pœnos Numidamque orta cavendi,
ne quid hostile interim paterentur. Tandem relatum
responsum, quibusdam (quia nimis cupere Romanus
pacem videbatur) iniquis per occasionem adjectis,
quæ peropportunè cupienti tollere inducias Scipioni
causam præbuere. ac nuncio regis, quum relaturum
se ad consilium dixisset, postero die respondit, *Se uno
frustra tendente, nulli alii pacem placuisse. Renunciaret
igitur, nullam aliam spem pacis, quàm relictis Cartha-
ginien-sibus, Syphaci cum Romanis esse.* Ita tollit indu-
cias, ut libera fide incepta exsequeretur. deductisque
navibus (& jam veris principium erat) machinas tor-
menta-que, velut à mari aggressurus Uticam, imponit.
Duo millia militum ad capiendum, quem antea te-
nuerat, tumultum super Uticam mittit: simul ut ab
eo quod parabat, in alterius rei curam converteret
hostium animos: simul ne qua, quum ipse ad Sypha-
cem Asdrubalemque profectus esset, eruptio ex urbe,
& impetus in castra sua relictæ cum levi præsidio
fieret.

V. His præparatis advocatoque consilio, edicere
exploratoribus iussis quæ comperta afferrent, Masi-
nissæ-que, cui omnia hostium nota erant; postremò,
quid ipse pararet in proximam noctem, proponit.

Tribunis

Tribunis edicit, ut, ubi prætorio dimisso signa concinnissent, extemplo educerent castris legiones. Ita, ut imperaverat, signa sub occasum solis efferrî sunt cœpta. ad primam ferme vigiliam agmen explicaverunt: media nocte (septem enim millia itineris erant) modico gradu ad castra hostium perventum. Ibi Scipio partem copiarum Lælio, Masinissamque ac Numidas attribuit: & castra Syphacis invadere, ignesque conjicere jubet. Singulos deinde separatim, Lælium ac Masinissam seductos obtestatur, ut, *quantum nox providentiæ adimat, tantum diligentia expleant curaque. Se Asdrubalem Punicaque castra aggressurum. Ceterum non ante cœpturum, quàm ignem in regis castris conspexisset.* Neque ea res morata diu est. nam ut proximis casis injectus ignis hæsit, extemplo proxima quæque, & deinceps continua amplexus, totis se passim dissipavit castris. Et trepidatio quidem, quanta necesse erat in nocturno effuso tam latè incendio, orta est. ceterum fortuitum, non hostilem ac bellicum, ignem rati esse, sine armis ad restinguendum incendium effusi, in armatos incidere hostes; maximè Numidas, ab Masinissa notitia regionum castrorum ad exitus itinerum idoneis locis dispositos. Multos in ipsis cubilibus semisomnes hausit flamma: multi in præcipiti fuga, ruentes super alios alii, in angustiis portarum obtriti sunt.

VI. Relucentem flammam primò vigiles Carthaginiensium, deinde excitati alii nocturno tumultu quum conspexissent, ab eodem errore credere & ipsi sua sponte incendium ortum. & clamor inter cædem & vulnera sublatus, an ex trepidatione nocturna esset, confusus, sensum veri adimebat. Igitur pro se quisque inermes, ut quibus nihil hostile suspectum esset, omnibus portis, quæ cuique proximum erat, ea modò quæ restinguendo igni forent portantes, in agmen

Romanum ruebant. Quibus cæsis omnibus, præterquam hostili odio, etiam ne quis nuncius effugeret, extemplo Scipio neglectas, ut in tali tumultu, portas invadit. ignibusque in proxima tecta coniectis, effusa flamma primò veluti sparsa pluribus locis reluxit: dein per continua serpens uno repente omnia incendio hausit. Ambusti homines jumentaue fœda primum fuga, dein strage obruerant itinera portarum. Quos non opprefferat ignis, ferro absumpti: binaque castra clade una deleta. Duces tamen ambo, & ex tot millibus armatorum duo millia peditum, & quingenti equites semiermes, magna pars faucii, afflaticque incendio effugerunt. Cæsa aut hausta flammis quadraginta millia hominum sunt: capta supra quinque millia; multi Carthaginiensium nobiles, undecim senatores: signa militaria centum septuaginta quatuor; equi Numidici, supra duo millia septingenti; elephanti sex capti, octo flamma ferroque absumpti: magnaue vis armorum capta. Ea omnia imperator Vulcano sacrata incendit.

VII. Asdrubal ex fuga cum paucis Afrorum urbem proximam petierat: eoque omnes, qui supererant, vestigia ducis sequentes, se contulerant. metu deinde, ne dederetur Scipioni, urbe excessit. Mox eodem patentibus portis Romani accepti: nec quicquam hostile, quia voluntate concesserant in ditionem, factum. duæ subinde urbes captæ direptæque. ea præda, & quæ castris incensis ex igne rapta erat, militi concessa est. Syphax octo millium ferme inde spatio loco communito confedit. Asdrubal Carthaginem contendit, ne quid per metum ex recenti clade mollius consuleretur: quò tantus primò terror est allatus, ut, omissa Utica, Carthaginem crederent extemplo Scipionem obsessurum. Senatum itaque Suffetes (quod velut consulare imperium apud eos erat) vocaverunt.

Ibi

Ibi tribus dictis sententiis, una, de pace legatos ad Scipionem decernebat: altera, Annibalem ad tuendam ab exitiabili bello patriam revocabat: tertia, Romanæ in adversis rebus constantiæ erat; reparandum exercitum, Syphacemque orandum, ne bello abfisteret, censebat. Hæc sententia, quia Asdrubal præfens, Barcinæque omnes factionis bellum malebant, vicit. Inde delectus in urbe agrisque haberi coëptus: & ad Syphacem legati missi, summa ope & ipsum reparantem bellum: quum uxor non jam ut ante blanditiis fatis potentibus ad animum amantis, sed precibus & misericordia valuisset; plena lacrimarum obtestans, ne patrem suum patriamque proderet: iisdemque flammis Carthaginem, quibus castra conflagrassent, absumi sineret. Spem quoque opportunè oblatam afferebant legati, quatuor millia Celtiberorum circa urbem nomine Abbam, ab conquistatoribus suis conducta in Hispania, egregiæ juventutis, sibi occurrissæ: & Asdrubalem propediem affore cum manu haudquaquam contemnenda. Igitur non benignè modò legatis respondit, sed ostendit etiam multitudinem Numidarum agrestium, quibus per eosdem dies arma equosque dedisset, & omnem juventutem affirmat exciturum ex regno. Scire incendio, non prælio, cladem acceptam. eum bello inferiorem esse, qui armis vincatur. Hæc legatis responsa. Et post dies paucos rursus Asdrubal & Syphax copias junxerunt. is omnis exercitus fuit triginta ferme millium armatorum.

VIII. Scipionem, velut debellato jam, quod ad Syphacem Carthaginensesque attineret, Uticæ opugnandæ intentum, jamque machinas admoventem muris, avertit fama redintegrati belli. modicisque præfidiis, ad speciem modò obsidionis, terra marique relictis, ipse cum robore exercitus ire ad hostes pergit.

Primo

Primo in tumulo, quatuor ferme millia distante ab castris regiis, consedit: postero die cum equitatu in Magnos (ita vocant) campos, subjectos ei tumulo, degressus, succedendo ad stationes hostium, laceffendoque levibus præliis, diem absumpsit. & per insequens biduum tumultuosis hinc atque illinc excursionibus invicem nihil dictu satis dignum fecerunt. quarto die utrimque in aciem descensum est. Romanus princeps post hastatorum prima signa, in subsidiis triarios constituit: equitatum Italicum ab dextro cornu, ab lævo Numidas Masinissamque opposuit. Syphax Asdrubalque Numidicis adversus Italicum equitatum, Carthaginienfibus contra Masinissam locatis; Celtiberos in mediam aciem in adversa signa legionum accipere. ita instructi concurrunt. Primo impetu simul utraque cornua & Numidæ & Carthaginienfes pulsæ. nam neque Numidæ, maxima pars agrestes, Romanum equitatum, neque Carthaginienfes, & ipse novus miles, Masinissam recenti super cetera victoria terribilem sustinuerunt. Nudata utrimque cornibus Celtiberum acies stabat: quod nec in fuga salus ulla ostendebatur locis ignotis, neque spes veniæ ab Scipione erat; quem, bene meritum de se & gente sua, mercenariis armis in Africam oppugnatum venissent. Igitur circumfusus undique hostibus, alii super alios cadentes obstinati moriebantur. omnibusque in eos versis, aliquantum ad fugam temporis Syphax & Asdrubal præceperunt. Fatigatos cæde diutius, quàm pugna, victores nox oppressit.

IX. Postero die Scipio Lælium Masinissamque, cum omni Romano & Numidico equitatu expeditisque militum, ad persequendos Syphacem atque Asdrubalem mittit. ipse cum robore exercitus urbes circa omnes, quæ Carthaginienfium ditionis erant, partim spe, partim metu, partim vi subegit. Carthagini quidem erat ingens terror: & circumferentem arma Scipionem, omnibus

omnibus finitimis raptim perdomitis, ipsam Carthaginem repente aggressurum credebant. Itaque & muri reficiebantur, propugnaculisque armabantur: & pro se quisque quæ diutinx obsidioni tolerandæ sunt, ex agro convehebat. Rara mentio est pacis, frequentior legatorum ad Annibalem arcessendum mittendorum. pars maxima classem, quæ ad commeatus excipiendos parata erat, mittere jubent ad opprimendam stationem navium ad Uticam incautè agentem: forsitan etiam navalia castra relicta cum levi præsidio oppresuros. In hoc consilium maximè inclinant. legatos tamen ad Annibalem mittendos censent. quippe classi ut felicissimè gerantur res, parte aliqua levare Uticæ obsidionem: Carthaginem ipsam qui tueantur, neque imperatorem alium quàm Annibalem, neque exercitum alium quàm Annibalis superesse. Deductæ ergo postero die naves, simul & legati in Italiam profecti, raptimque omnia stimulante fortuna agebantur: & in quo quisque cessasset, prodi ab se salutem omnium rebatur. Scipio gravem jam spoliis multarum urbium exercitum trahens, captivis aliaque præda in vetera castra ad Uticam missis, jam in Carthaginem intentus, occupat relictum fuga custodem Tuneta. abest ab Carthagine quindecim millia ferme passuum: locus cum operibus, tum suapte natura tutus; & qui & ab Carthagine conspici, & præbere ipse prospectum, cum ad urbem tum ad circumfusum mare urbi, posset.

X. Inde quum maximè vallum Romani jacerent, conspecta classis hostium est, Uticam Carthagine petens. Igitur, omisso opere, pronunciatum iter, signaque raptim ferri sunt cœpta: ne naves in terram & obsidionem versæ, ac minimè navali prælio aptæ opprimerentur. Quî enim restitissent agili & nautico instrumento aptæ & armatæ classi naves tormenta machinasque portantes, & aut in onerariarum usum versæ,

versæ, aut ita pulsæ ad muros, ut pro aggere ac pontibus præbere ascensus possent? Itaque Scipio, contra quàm in navali certamine solet, rostratis, quæ præsidio aliis esse poterant, in postremam aciem receptis prope terram, onerariarum quadruplicem ordinem pro muro adversus hostem opposuit: easque ipsas, ne in tumultu pugnæ turbari ordines possent, malis antennisque de nave in navem trajectis, ac validis funibus velut uno inter se vinculo illigatis comprehendit: tabulasque superinstravit, ut pervius in totum navium ordo esset: & sub ipsis pontibus intervalla fecit, quæ procurrare speculatoriæ naves in hostem, ac tutò recipi possent. His raptim pro tempore instructis, mille ferme delecti propugnatores onerariis imponuntur: telorum maximè missilium, ut quamvis longo certamine sufficerent, vis ingens congeritur. Ita parati atque intenti hostium adventum opperiebantur. Carthaginenses, qui, si maturassent, omnia, permista turba trepidantium, primo impetu oppressissent; perculsi terrestribus cladibus, atque inde ne in mari quidem, ubi ipsi plus poterant, satis fidentes, die segni navigatione absumpto, sub occasum solis in portum (Ruscinona Afri vocant) classe appulere. postero die sub ortum solis instruxere ab alto naves veluti ad justum prælium navale, & tanquam exituris contra Romanis. Quum diu stetissent, postquam nihil moveri ab hostibus viderunt, tum demum onerarias aggrediuntur. Erat res minimè certamini navali similis, proximè speciem muros oppugnantium navium. altitudine aliquantum onerariæ superabant. ex rostratis Pœni vana pleraque (utpote supino jactu) tela in superiorem locum mittebant. gravior ac pondere ipso librior superne ex onerariis ictus erat. Speculatoriæ naves ac levia ipsa navigia, quæ sub constratis pontium per intervalla excurrabant, primò ipso tantum impetu

impetu ac magnitudine rostratarum obruebantur: deinde & propugnatoribus quoque incommodæ erant, quòd permistæ cum hostium navibus inhibere sæpe tela cogeant, metu, ne ambiguo ictu suis inciderent. postremò asseres ferreo unco præfixi (harpagonas vocat miles) ex Punicis navibus injici in Romanas cœpti. Quos quum neque ipsos, neque catenas, quibus suspensi injiciebantur, incidere possent; ut quæque retro inhibita rostrata onerariam hærentem unco traheret, scindi videres vincula, quibus alia aliis innexa erat, feriemque aliam simul plurium navium trahi. Hoc maximè modo lacerati quidem omnes pontes, & vix transiliendi in secundum ordinem navium spatium propugnatoribus datum est. Sex ferme onerariæ puppibus abstractæ Carthaginem sunt. major quàm pro re lætitia, sed eo gratior, quòd inter assiduas clades ac lachrymas unum quantumcumque ex insperato gaudium affulserat; cum eo, ut appareret haud procul exitio fuisse Romanam classem, ni cessatum à præfectis suarum navium foret, & Scipio in tempore subvenisset.

XI. Per eisdem fortè dies quum Lælius & Massinissa quintodecimo ferme die in Numidiam pervenissent, Massylii regnum paternum Masinissæ læti, ut ad regem diu desideratum, concessere. Syphax, pulsus inde præfectis præfidiisque suis, vetere se continebat regno; neutiquam quieturus. Stimulabant ægrum amore uxor socerque: & ita viris equisque abundabat, ut subjectæ oculis regni, per multos florentis annos, vires, etiam minùs barbaro atque impotenti animo spiritus possent facere. Igitur omnibus, qui bello apti erant, in unum coactis, equos, arma, tela dividit: equites in turmas, pedites in cohortes, sicut quondam ab Romanis centurionibus didicerat, distribuit. Exercitu haud minore, quàm quem priùs habuerat, ceterum omni propè novo atque incondito, ire ad hostes pergit.

pergit. Et, castris in propinquo positis, primò pauci equites, ex tuto speculantes, ab stationibus progredi: inde jaculis summoti recurrere ad suos: inde excursiones invicem fieri, & quum pulsos indignatio accenderet, plures subire. quod irritamentum certaminum equestrium est, quum aut vincentibus spes, aut pulsus ira aggregat suos. Ita tum à paucis proelio accenso, omnem utrimque postremò equitatum certaminis studium effudit. ac dum sincerum equestre proelium erat, multitudo Masæylorum, ingentia agmina Syphace emittente, sustineri vix poterat. deinde, ut pedes Romanus repentino per turmas suas viam dantes intercursum stabilem aciem fecit, absterruitque effuse invehentem sese hostem; primo barbari segniùs permittere equos, deinde stare ac propè turbari novo genere pugnae: postremò non pediti solùm cedere, sed ne equitem quidem sustinere peditis præsidio audentem. Jam signa quoque legionum appropinquabant. tum vero Masæyli non modò primum impetum, sed ne conspectum quidem signorum atque armorum tulerunt. tantum seu memoria priorum cladum, seu præsens terror valuit.

XII. Ibi Syphax, dum obequitat hostium turmis; si pudore, si periculo suo fugam sistere posset; equo graviter icto effusus opprimitur capiturque: & vivus (lætum ante omnes Masinissæ præbiturus spectaculum) ad Lælium pertrahitur. Circha caput regni Syphacis erat: eò se ingens hominum contulit vis. Cædes in eo proelio minor quàm victoria fuit, quia equestri tantummodo proelio certatum fuerat. non plus quinque millia occisa, minus dimidium ejus hominum captum est; impetu in castra facto, quò perculsa rege amisso multitudo se contulerat. Masinissa, *sibi quidem, dicere, nihil esse in præsentia pulchrius, quàm victorem, recuperatum tanto post intervallo patrium invisere regnum:*
sed

sed tam secundis, quàm adversis rebus non dari spatium ad cessandum. Si se Lælius cum equitatu vinæque Syphace Cirtham præcedere sinat; trepida omnia metu se oppressurum: Lælium cum peditibus subsequi modicis itineribus posse. Assentiente Lælio prægressus Cirtham, evocari ad colloquium principes Cirthensium jubet. sed apud ignaros regis casus, neque, quæ acta essent, promendo, nec minis, nec suadendo ante valuit, quàm rex vinctus in conspectum datus est. Tum ad spectaculum tam fœdum comploratio orta: & partim pavore mœnia sunt deserta, partim repentino consensu gratiam apud victorem quærentium patefactæ portæ. Et Masinissa, præsidio circa portas opportunaque mœnium dimisso, ne cui fugæ pateret exitus, ad regiam occupandam citato vadit equo. Intranti vestibulum in ipso limine Sophonisba, uxor Syphacis, filia Asdrubalis Pœni occurrit. & quum in medio agmine armatorum Masinissam insignem, cum armis tum cetero habitu, conspexisset; regem esse (id quod erat) rata, genibus advoluta ejus, Omnia quidem, inquit, ut posses in nos, Dii tibi dederunt, virtusque & felicitas tua. Sed si captivæ apud dominum vitæ necisque suæ vocem supplicem mittere licet; si genua, si victricem attingere dextram: precor quæsoque per majestatem regiam, in qua paullo antè nos quoque fuimus; perque gentis Numidarum nomen, quod tibi cum Syphace commune fuit; per hujusce regiæ Deos, qui te melioribus ominibus accipiant, quàm Syphacem hinc miserunt; hanc veniam supplici des, ut ipse, quodcumque fert animus, de captiva statuas, neque me in cujusquam Romani superbum ac crudele arbitrium venire finas. Si nihil aliud quàm Syphacis uxor fuissèm, tamen Numidæ atque in eadem mecum Africa geniti, quàm alienigenæ & externi fidem experiri malletm. Quid Carthaginensi ab Romano, quid filiæ Asdrubalis timendum sit, vides. Si nulla alia re potes, morte me ut vindices

dicis ab Romanorum arbitrio, oro obtestorque. Forma erat insignis, & florentissima ætas. itaque quum modò dextram amplectens, in id, ne cui Romano tradere-tur, fidem exposceret; propiusque blanditias oratio esset, quàm preces: non in misericordiam modò pro-lapsus est animus victoris, sed (ut est genus Numida-rum in Venerem præceps) amore captivæ victor cap-tus, data dextra in id quod petebatur obligandæ fidei, in regiam concedit. Institit deinde reputare secum ipse, quemadmodum promissi fidem præstaret. quod quum expedire non posset, ab amore temerarium at-que impudens mutuatur consilium. Nuptias in eum ipsum diem repente parari jubet, ne quid relinqueret integri aut Lælio, aut ipsi Scipioni consulendi velut in captivam, quæ Masinissæ jam nupta foret. Factis nuptiis supervenit Lælius: & adeo non dissimulavit improbare se factum, ut primò etiam cum Syphace & ceteris captivis detractam eam toro geniali mittere ad Scipionem conatus sit. victus deinde precibus Masinissæ orantis, ut arbitrium, utrius regum duorum fortunæ accessio Sophonisba esset, ad Scipionem rejiceret; misso Syphace & captivis, ceteras urbes Numidiæ, quæ præsidiiis regiis tenebantur, adjuvante Masinissa recepit.

XIII. Syphacem in castra adduci, quum esset nun-ciatum; omnis, velut ad spectaculum triumphi, mul-titudo effusa est. Præcedebat ipse victus, sequeba-tur grex nobilium Numidarum. Tum quantum quis-que plurimum posset, magnitudini Syphacis famæque gentis, victoriam suam augendo, addebat: *illum esse regem, cujus tantum majestati duo potentissimi in terris tribuerint populi, Romanus Carthaginensisque, ut Scipio imperator suus ad amicitiam ejus petendam, relicta pro-vincia Hispania exercituque, duabus quinquaginta milibus in Africam navigaverit: Asdrubal, Pænorum imperator,*

non

non ipse modò ad eum in regnum venerit, sed etiam filiam ei nuptum dederit. Habuisse eum tempore uno in potestate duos imperatores, Pœnum Romanumque. Sicut ab Diis immortalibus pars utraque hostiis mactandis pacem petisset, ita ab eo utrimque pariter amicitiam petitam. Jam tantas habuisse opes, ut Masinissam regno pulsum eò redegerit, ut vita ejus fama mortis & latebris, ferarum modo in silvis rapto viventis, tegeretur. His sermonibus circumstantium celebratus rex in prætorium ad Scipionem est perductus. Movit & Scipionem cum fortuna pristina viri præsentis fortunæ collata: tum recordatio hospitii, dextræque datæ, & fœderis publicè ac privatim juncti. Eadem hæc & Syphaci animum dederunt in alloquendo victore. nam quum Scipio, quid sibi voluisset, quæreret, qui non societatem solùm abnuisset Romanam, sed ultro bellum intulisset; tum ille, peccasse quidem sese, atque insanisse fatebatur; sed non tum demum, quum arma adversus populum Romanum cepisset: exitum sui furoris fuisse, non principium. tunc se insanisse, tum hospitia privata & publica fœdera omnia ex animo ejecisse, quum Carthaginensem matronam domum acceperit. Illis nuptialibus facibus regiam conflasse suam: illam furiam pestemque omnibus delenimentis animum suum avertisse atque alienasse: nec conquiesse, donec ipsa manibus suis nefaria sibi arma adversus hospitem atque amicum induerit. Perdito tamen atque afflicto sibi hoc in miseriis solatii esse, quòd in omnium hominum inimicissimi sibi domum ac penates eandem pestem ac furiam transisse videat. neque prudentiorem, neque constantiorem Masinissam, quàm Syphacem esse, etiam juvenita incautiorem. certè stultius illum atque intemperantiùs eam, quàm se duxisse.

XIV. Hæc non hostili modò odio, sed amoris etiam stimulis, amatam apud æmulum cernens, quum dixisset; non mediocri cura Scipionis animum pepulit.

lit. & fidem criminibus raptæ prope inter arma nuptiæ, neque consulto neque expectato Lælio, faciebant : tamque præceps festinatio, ut quo die captum hostem vidisset, eodem matrimonio junctam acciperet, & ad penates hostis sui nuptiale sacrum conficeret. eo scediora hæc videbantur Scipioni, quod ipsum in Hispania juvenem nullius forma pepulerat captivæ. Hæc secum volutanti Lælius ac Masinissa supervenerunt ; quos quum pariter ambo & benigno vultu excepisset, & egregiis laudibus frequenti prætorio celebrasset ; abductum in secretum Masinissam sic alloquitur : *Aliqua te existimo, Masinissa, intuentem in me bona, & principio in Hispaniam ad jungendam mecum amicitiam venisse, & postea in Africa teipsum, spesque omnes tuas in fidem meam commisisse. Atqui nulla earum virtus est, propter quas appetendus tibi visus sim, qua ego æquè atque temperantia & continentia libidinum gloriatus fuerim. Hanc te quoque ad ceteras tuas eximias virtutes, Masinissa, adjecisse velim. non est, non, (mibi crede) tantum ab hostibus armatis ætati nostræ periculum, quantum ab circumfusus undique voluptatibus. qui eas sua temperantia frenavit ac domuit, næ multo majus decus majoremque victoriam sibi peperit, quàm nos Syphace victo habemus. Quæ me absente strenuè ac fortiter fecisti, libenter & commemoravi, & memini : cetera teipsum reputare tecum, quàm, me dicente, erubescere malo. Syphax populi Romani auspiciis victus captusque est. Itaque ipse, conjunx, regnum, ager, oppida, homines, qui incolunt, quicquid denique Syphacis fuit, præda populi Romani est : & regem, conjugemque ejus, etiamsi non civis Carthaginiensis esset, etiamsi non patrem ejus imperatorem hostium videremus, Romam oporteret mitti : ac senatus populi que Romani de ea judicium atque arbitrium esse, quæ regem nobis socium alienasse, atque in arma egisse præcipitem dicatur. Vince animum. cave deformes multa*
bona

bona uno vitio; & tot meritorum gratiam majore culpa, quàm causa culpæ est, corrumpas.

XV. Masinissæ hæc audienti non rubor solum suffusus, sed lacrimæ etiam obortæ. & quum se quidem in potestate futurum imperatoris dixisset, orassetque eum, ut, quantum res fineret, fidei suæ temere obstrictæ consuleret, (promisisse enim, sese in nullius potestatem eam traditurum) ex prætorio in tabernaculum suum confusus concessit. Ibi arbitris remotis, quum crebro suspirio & gemitu, quod facile ab circumstantibus tabernaculum exaudiri posset, aliquantum temporis consumpsisset; ingenti ad postremum edito gemitu, fidum è servis vocat, sub cujus custodia regio morè ad incerta fortunæ venenum erat, & mistum in poculo ferre ad Sophonisbam jubet, ac simul nunciare: *Masinissam libenter primam ei fidem præstaturum fuisse, quam vir uxori debuerit. quoniam arbitrium ejus, qui possint, adimant, secundam fidem præstare, ne viva in potestatem Romanorum veniat. Memor patris imperatoris, patriæque, & duorum regum, quibus nupta fuisset, sibi ipsa consuleret.* Hunc nuncium ac simul venenum ferens, minister, quum ad Sophonisbam venisset, *Accipio, inquit, nuptiale munus; nec ingratum, si nihil majus vir uxori præstare potuit. Hoc tamen nuncia; melius memoritutum fuisse, si non in funere meo nupsissem.* non locuta est ferociùs, quàm acceptum poculum, nullo trepidationis signo dato, impavidè hausit. Quod ubi nunciatum est Scipioni, ne quid æger animi ferox juvenis graviùs consuleret, accitum eum extemplo nunc solatur; nunc, quòd temeritatem temeritate alia luerit, tristioremq; rem, quàm necesse fuerit, fecerit, leniter castigat. Postero die, ut à præsentimotu averteret animum ejus, in tribunal ascendit: & concionem advocari jussit. Ibi Masinissam pri-

mum

num regem appellatum, eximiisque ornatum laudibus, aurea corona, aurea patera, sella curuli, & scipione eburneo, toga picta, & palmata tunica donat. Addit verbis honorem, *Neque magnificentius quicquam triumpho apud Romanos, neque triumphantibus ampliore eo ornatu esse, quo unum omnium externorum dignum Masinissam populus Romanus ducat.* Lælius deinde & ipsum collaudatum aurea corona donat. & alii militares viri, prout à quoque navata opera erat, donati. His honoribus mollitus regis animus, erectusque in spem propinquam, sublato Syphace, omnis Numidiæ potiundæ.

XVI. Scipio, C. Lælio cum Syphace aliisque captivis Romam missio, cum quibus & Masinissæ legati profecti sunt, ipse ad Tuneta rursum castra refert: &, quæ munimenta inchoaverat, permunit. Carthaginenses non brevi solum, sed propè vano gaudio ab satis prospera in præsens oppugnatione classis perfusi, post famam capti Syphacis, in quo plus propè, quàm in Asdrubale atque exercitu suo, spei reposuerant, perculsi, jam nullo auctore belli ultra audito, oratores ad pacem petendam mittunt triginta seniorum principes. id erat sanctius apud illos consilium, maximaque ad ipsum senatum regendum vis. Qui ubi in castra Romana & prætorium pervenerunt, more adulantium (accepto, credo, ritu ex ea regione, ex qua oriundi erant) procubuerunt. Conveniens oratio tam humili adulationi fuit, non culpam purgantium, sed transferentium initium culpæ in Annibalem, impotentiaque ejus fautores. veniam civitati petebant, civium temeritate bis jam antè everisæ, incolumi futuræ iterum hostium beneficio. *Imperium ex victis hostibus populum Romanum, non perniciem petere. Paratis obedienter servire, quæ vellet, imperaret.* Scipio, & *venisse ea spe in Africam*

cam se ait, & spem suam prospero belli eventu auxam, victoriam se non pacem domum reportaturum esse: tamen, quum victoriam prope in manibus habeat, pacem non abnuere; ut omnes gentes sciant, populum Romanum & suscipere justè bella, & finire. Leges pacis se has dicere. Captivos & perfugas & fugitivos restituant: exercitus ex Italia & Gallia deducant: Hispania abstineant: insulis omnibus, quæ inter Italiam & Africam sunt, decedant: naves longas, præter viginti, omnes tradant: tritici quingenta, bordei trecenta millia modium. Pecuniæ summam quantam imperaverit, parum convenit. alibi quinque millia talentum, alibi quinque millia pondo argenti, alibi duplex stipendium militibus imperatum invenio. His conditionibus, inquit, placeatne pax, triduum ad consultandum dabitur. Si placuerit, mecum inducias facite, Romam ad senatum mittite legatos. Ita dimissi Carthaginienſes, nullas recusandas condiciones pacis quum censuissent, (quippe qui moram temporis quærerent, dum Annibal in Africam trajiceret) legatos alios ad Scipionem, ut inducias facerent; alios Romam ad pacem petendam mittunt, ducentes paucos in speciem captivos, perfugasque & fugitivos, quo impetrabilior pax esset.

XVII. Multis ante diebus Lælius cum Syphace primoribusque Numidarum captivis Romam venit, quæque in Africa gesta essent, omnia exposuit ordine Patribus; ingenti omnium & in præsens lætitia, & in futurum spe. Consulti inde Patres Regem in custodiam Albam mittendum censuerunt: Lælium retinendum, donec legati Carthaginienſes venirent. Supplicatio in quatrimum decreta est. P. Ælius prætor senatu misso, & concione inde advocata, cum C. Lælio in Rostra ascendit. Ibi verò audientes, fusos Carthaginienſium exercitus, devictum & captum ingentis nominis regem, Numidiam omnem egregia victoria

victoria peragratam ; tacitum continere gaudium non poterant, quin clamoribus, quibusque aliis multitudo solet, lætitiā immodicā significarent. Itaque prætor extemplo edixit, *Uti æditui ædes sacras omnes tota urbe aperirent, circumcundi, salutandique Deos, agendique grates per totum diem populo potestas fieret.* Postero die legatos Masinissæ in senatum introduxit. *Gratulati primū senatui sunt, quod P. Scipio prospere res in Africa gessisset. deinde gratias egerunt, quod Masinissam non appellasset modo regem, sed fecisset, restituendo in paternum regnum ; in quo post Syphacem sublatum, si ita Patribus visum esset, sine metu & certamine esset regnaturus : deinde, quod collaudatum pro concione amplissimis decorasset donis ; quibus ne indignus esset, & dedisse operam Masinissam, & porro daturum esse. Petere, ut regium nomen, ceteraque Scipionis beneficia, & munera senatus decreto confirmaret : & , nisi molestum esset, illud quoque petere Masinissam, ut Numidas captivos, qui Romæ in custodia essent, remitterent. Id sibi amplum apud populares futurum esse. Ad ea responsum legatis : Rerum gestarum in Africa prospere communem sibi cum rege gratulationem esse. Scipionem rectè atque ordine videri fecisse, quod eum regem appellaverit : & quicquid aliud fecerit, quod cordi foret Masinissæ, ea Patres comprobare atque laudare. Munera, quæ legati ferrent regi, decreverunt : sagula purpurea duo cum fibulis aureis singulis, & lato clavo tunicis ; & equos duos phalaratos ; bina equestria arma cum lorice ; & tabernacula, militaremque supellectilem, qualem præberi consuli mos esset. Hæc regi prætor mittere iussus. legatis in singulos dona ne min⁹ quinque millium, comitibus eorum millium æris ; & vestimenta bina legatis, singula comitibus, Numidisque, qui ex custodia emissi redderentur regi. ad hoc ædes, libera loca, lautia legatis decreta.*

XVIII. Eadem ætate, qua hæc decreta Romæ, & in Africa gesta sunt, P. Quintilius Varus prætor, & M. Cornelius proconsul in agro Insubrium Gallorum cum Magone Pœno signis collatis pugnârunt. Prætoris legiones in prima acie fuerunt: Cornelius suas in subsidiis tenuit, ipse ad prima signa equo ad-
 vectus. proque duobus cornibus prætor ac proconsul milites ad inferenda in hostes signa summa vi hortabantur. Posteaquam nihil commovebant, tum Cornelio Quintilius, *Lentior, ut vides, sit pugna, inquit: Et induratus præter spem resistendo hostium timor: ac, ne vertat in audaciam, periculum est. Equestrem procellam excitemus oportet, si turbare ac statu movere volumus. Itaque vel tu ad prima signa prælium sustine, ego inducam in pugnam equites: vel ego hic in prima acie rem geram, tu quatuor legionum equites in hostem mitte.* Utram vellet prætor muneris partem proconsule accipiente, Quintilius prætor cum filio, cui Marco prænomen erat, impigro juvene, ad equites pergit, iussosque ascendere in equos repente in hostem emit-
 tit. Tumultum equestrem auxit clamor ab legionibus additus: nec stetit hostium acies, ni Mago ad primum equitum motum paratos elephantos extemplo in prælium induxisset. Ad quorum stridorem odoremque & adspectum territi equi, vanum equestre auxilium fecerunt. & ut permixtus, ubi cuspide uti & cominus gladio posset, roboris majoris Romanus eques erat; ita in ablatum paventibus procul equis melius ex intervallo Numidæ jaculabantur. Simul & ped-
 tum legio duodecima, magna ex parte cæsa, pudore magis quàm viribus tenebat locum: nec diutius tenuisset, ni ex subsidiis tertiadecima legio, in primam aciem inducta, prælium dubium expetisset, Magoque ex subsidiis Gallos integræ legioni opposuisset. Quibus haud magno certamine fufis, hastati legionis unde-

cimæ conglobant sese; atque elephantos, jam etiam peditum aciem turbantes, invadunt, in quos quum pila confertos conjecissent, nullo ferme frustra emissio, omnes retro in aciem suorum averterunt. quatuor gravati vulneribus corruerunt. Tum prima commota hostium acies; simul omnibus peditibus, ut averfos videre elephantos, ad augendum pavorem ac tumultum effusis. sed donec stetit ante signa Mago, gradum sensim referentes ordines tenorem pugnae servabant. posteaquam femine transfixo cadentem, auferrique ex proelio propè exsanguem videre, extemplo in fugam omnes versi. ad quinque millia hostium eo die cæsa, & signa militaria duo & viginti capta. Nec Romanis incruenta victoria fuit. duo millia & trecenti de exercitu prætoris, pars multo maxima ex legione duodecima amissi. inde & tribuni militum duo, M. Cosconius & M. Mænius. tertiæ-decimæ quoque legionis, quæ postremo proelio affuerat, Cn. Helvius, tribunus militum, in restituenda pugna cecidit; & duo & viginti ferme equites illustres, obtriti ab elephantis, cum centurionibus aliquot perierunt. & longius certamen fuisset, ni vulnere ducis concessa victoria esset.

XIX. Mago proximæ noctis silentio profectus, quantum pati viæ per vulnus poterat, itineribus extentis, ad mare in Ligures Ingaunos pervenit. ibi eum legati ab Carthagine paucis antè diebus in sinum Gallicum appulsis navibus adierunt, jubentes, primo quoque tempore in Africam trajicere. idem & fratrem ejus Annibalem (nam ad eum quoque isie legatos eadem jubentes) facturum. Non in eo esse Carthaginienfium res, ut Galliam atque Italiam armis obtineant. Mago non imperio modò senatus, periculoque patriæ motus, sed metuens etiam, ne victor hostis moranti instaret; Liguresque ipsi, relinqui

linqui Italiam à Pœnis cernentes, ad eos, quorum mox in potestate futuri essent, deficerent: simul sperans leniorem in navigatione, quàm in via iactationem vulneris fore, & curationi omnia commodiora, impositis copiis in naves profectus, vixdum superata Sardinia, ex vulnere moritur. naves quoque aliquot Pœnorum, disiectæ in alto, à classe Romana, quæ circa Sardiniam erat, capiuntur. Hæc terra marique in parte Italiæ, quæ jacet ad Alpes, gesta. Consul C. Servilius, nulla memorabili re in provincia Etruria & Gallia (quoniam eò quoque processerat) gesta, patre C. Servilio & C. Lutatio patruo ex servitute post sextumdecimum annum receptis, qui ad vicum Tanetum à Boiis capti fuerant; hinc patre, hinc Catulo lateri circumdati, privato magis quàm publico decore insignis Romam rediit. Latum ad populum est, *ne C. Servilio fraudi esset, quòd patre, qui sella curuli sedisset, vivo, quum id ignoraret, tribunus plebis atque ædilis plebis fuisset, contra quàm sanctum legibus erat.* Hac rogatione perlata, in provinciam rediit. Ad C. Servilium consulem, qui in Bruttis erat, Consentia, Uffugum, Vergæ, Befidiæ, Hetriculum, Sypheum, Argentanum, Clamptia, multique alii ignobiles populi, senescere Punicum bellum cernentes, defecere. Idem consul cum Annibale in agro Crotoniensi acie confligit. Obscura ejus pugnæ fama est. Valerius Antias quinque millia hostium cæsa ait. quæ tanta res est, ut aut impudenter ficta sit, aut negligenter prætermissa. Nihil certè ultra rei in Italia ab Annibale gestum. nam ad eum quoque legati ab Carthagine, vocantes in Africam, iis fortè diebus, quibus ad Magonem, venerunt.

XX. Frendens gemenisque, ac vix lacrimis temperans, dicitur legatorum verba audisse. posteaquam

edita sunt mandata, *Jam non perplexè, inquit, sed palam revocant, qui, vetando supplementum & pecuniam mitti, jampridem retrahabant. Vicit ergo Annibalem non populus Romanus toties cæsus fugatusque, sed senatus Carthaginienſis obtrectatione atque invidia. neque hac deformitate reditus mei tam P. Scipio exsultabit atque effe-
ret ſeſe, quàm Hanno, qui domum noſtram, quando alia re non potuit, ruina Carthaginis oppreſſit.* Jam hoc ipſum præſagiens animo, præparaverat antè naves. itaque inutili militum turba præſidii ſpecie in oppida Bruttii agri, quæ pauca magis metu quàm fide continebantur, dimiſſa, quod roboris in exercitu erat in Africam tranſvexit: multis Italici generis (quia in Africam ſecuturos abnuentes conceſſerant i. i. Junonis Lacinia delubrum, inviolatum ad eam diem) in templo ipſo ſœdè interfectis. Rarò quemquam alium, patriam exilii cauſſa relinquentem, magis mœſtum abiſſe ferunt, quàm Annibalem hoſtium terra excedentem. Reſpexiſſe ſæpe Italiae lit-
tora, & Deos homineſque accuſantem, in ſe quoque ac ſuum ipſius caput exſecratum, quòd non cruentum ab Cannenſi victoria militem Romam duxiſſet. Scipio-
nem ire ad Carthaginem auſum, qui conſul hoſtem in Italia Pænum non vidiſſet. ſe centum millibus armato-
rum ad Traſimenum & Cannas cæſis, circa Caſilinum, Cumasque & Nolam conſenuiſſe. Hæc accuſans querens-
que, ex diutina poſſeſſione Italiae eſt detractus.

XXI. Romam per eoſdem dies, & Magonem & Annibalem proſectos, allatum eſt. cujus duplicis gra-
tulationis minuit lætitiā, & quòd parum duces in retinendis iis (quum id mandatum ab ſenatu eſſet) aut animi aut virium habuiſſe videbantur: & quòd ſolliciti erant, omni belli mole in unum ducem exer-
cituſque inclinata, quo evaſura eſſet res. Per eoſdem dies legati Saguntini venerunt, comprehenſos
cum

cum pecunia adducentes Carthaginienses, qui ad conducenda auxilia in Hispaniam trajecissent. ducentum & quinquaginta auri, octingenta pondo argenti in vestibulo curiæ posuerunt. Hominibus acceptis & in carcerem conditis, auro argentoque reddito, gratiæ legatis actæ: atque insuper munera data, ac naves, quibus in Hispaniam reverterentur. Mentio deinde ab senioribus facta est, *segniùs homines bona, quàm mala, sentire. Transitu in Italiam Annibalis, quantum terroris pavorisque, sese meminisse; quas deinde clades, quos luctus incidisse? Visa castra hostium è muris urbis: quæ vota singulorum, universorumque fuisse? quoties in conciliis voces, manus ad cælum porrigentium, auditas? en unquam ille dies futurus esset, quo vacuam hostibus Italiam bona pace florentem visuri essent? Dedissee tandem id Deos sextodecimo demum anno: nec esse, qui Diis grates agendas censeant. Adeo ne advenientem quidem gratiam homines benignè accipere, nedum ut præteritæ satis memores sint.* Conclamatum deinde ex omni parte curiæ est, uti referret P. Ælius prætor: decretumque, ut quinque dies circa omnia pulvinaria supplicaretur, victimæque majores immolarentur centum viginti. Jam dimisso Lælio, legatisque Masinissæ, quum, Carthaginiensium legatos de pace ad senatum venientes Puteolis visos, inde terra venturos, allatum esset; revocari C. Lælium placuit, ut coram eo de pace ageretur. Q. Fulvius Gillo, legatus Scipionis, Carthaginienses Romam adduxit: quibus vetitis ingredi urbem, hospitium in villa publica, senatus ad ædem Bellonæ datus est.

XXII. Orationem eandem ferme, quam apud Scipionem, habuerunt; culpam omnem belli à publico consilio in Annibalem vertentes. *Eum injussu senatus non Alpes modò, sed Iberum quoque transgressum: nec Romanis solum, sed ante etiam Saguntinis, privato*

consilio bellum intulisse. Senatui ac populo Carthaginensi, si quis verè æstimet, fœdus ad eum diem inviolatum esse cum Romanis. Itaque nihil aliud sibi mandatum esse uti peterent, quàm ut in ea pace, quæ postremò cum consule Lutatius facta esset, manere liceret. Quum, more tradito, Patribus potestatem interrogandi, si quis quid vellet, legatos prætor fecisset; senioresque, qui fœderibus interfuerant, alia alii interrogarent; nec meminisse per ætatem (etenim omnes ferme juvenes erant) dicerent legati: conclamatum ex omni parte curiæ est, Punica fraude electos, qui veterem pacem repeterent, cujus ipsi non meminissent.

XXIII. Emotis deinde curia legatis, sententiæ interrogari cœptæ. M. Livius C. Servilium consulem, qui propior esset, arcessendum, ut coram eo de pace ageretur, censebat. quum de re majore quàm quanta ea esset, consultatio incidere non posset; non videri sibi, absente consulum altero ambobusve eam rem agi, satis ex dignitate populi Romani esse. Q. Metellus, qui triennio antè consul dictatorque fuerat, quum P. Scipio cædendo exercitus, agros populando, in eam necessitatem compulisset hostes, ut supplices pacem peterent; & nemo omnium veriùs existimare posset, quamente ea pax peteretur, quàm is, qui ante portas Carthaginis bellum gereret: nullius alterius consilio, quàm Scipionis, accipiendam abnuendamve pacem esse. M. Valerius Lævinus, qui bis consul fuerat, speculatores, non legatos, venisse arguebat: jubendosque eos Italia excedere, & custodes cum iis usque ad narves mittendos: Scipionique scribendum, ne bellum remitteret. Lælius Fulviusque adjecerunt, & Scipionem in eo positam habuisse spem pacis, si Annibal & Mago Italia non revocarentur. Omnia simulaturos Carthaginienses, duces eos exercitusque exposcentes: deinde, quamvis recentium fœderum & Decorum omnium oblitos, bellum gesturos. Eo magis

magis in Lævini sententiam discessum. Legati pace infecta, ac propè sine responso, dimissi.

XXIV. Per eos dies C. Servilius consul, haud dubius quin pacatæ Italiæ penes se gloria esset, velut pulsum ab se Annibalem persequens, in Siciliam, inde in Africam transiturus, trajecit. Quod ubi Romæ vulgatum est, primò censuerunt Patres, ut prætor scriberet consuli, senatum æquum censere in Italiam reverti eum: deinde, quum prætor specturum eum literas suas diceret, dictator ad idipsum creatus P. Sulpicius, pro jure majoris imperii consulem in Italiam revocavit. reliquum anni cum M. Servilio, magistro equitum, circumeundis Italiæ urbibus, quæ bello alienatæ fuerant, noscendisque singularum causis consumpsit. Per induciarum tempus, & ex Sardinia ab Lentulo prætore centum onerariæ naves, cum commeatu & viginti rostratarum præsidio, & ab hoste & ab tempestatibus mari tuto, in Africam transmiserunt. Cn. Octavio, ducentis onerariis, triginta longis navibus ex Sicilia trajicienti, non eadem fortuna fuit. In conspectum ferme Africæ prospero cursu vectum primò destituit ventus, deinde versus in Africum turbavit, ac passim naves disjecit. ipse cum rostratis, per adversos fluctus ingenti remigum labore enixus, Apollinis promontorium tenuit. onerariæ pars maxima ad Ægimurum, (insula ea sinum ab alto claudit, in quo sita Carthago est, triginta ferme millia ab urbe) aliæ adversus urbem ipsam ad Calidas Aquas delatæ sunt. Omnia in conspectu Carthaginis erant. itaque ex tota urbe in forum concursus est. Magistratus senatum vocare, populus in curiæ vestibulo fremere, ne tanta ex oculis manibusque amitteretur præda. Quum quidam pacis petiæ, alii induciarum (necdum enim dies exierat) fidem opponerent; permixto pene se-

natus populique concilio, consensum est, ut classe quinquaginta navium Asdrubal Ægimurum trajiceret, inde per littora portusque dispersas Romanas naves colligeret. Desertæ fuga nautarum primùm ab Ægimuro, dein ab Aquis onerariæ Carthaginem puppibus tractæ sunt.

XXV. Nondum reverterant ab Roma legati, neque sciebatur, quæ senatus Romani de bello aut pace sententia esset: necdum induciarum dies exierat. eo indigniorem injuriam ratus Scipio, ab iis qui petissent pacem & inducias, & spem pacis & fidem induciarum violatam esse; legatos Carthaginem M. Bæbium, L. Sergium, L. Fabium extemplo misit. qui quum multitudinis concursu propè violati essent, nec reditum tutiorem futurum cernerent; petierunt à magistratibus, quorum auxilio vis prohibita erat, ut naves mitterent quæ se prosequerentur. Datæ triremes duæ quum ad Bagradam flumen pervenissent, unde castra Romana conspiciebantur, Carthaginem rediere. Classis Punica ad Uticam stationem habebat: ex ea tres quadriremes, seu clam misso à Carthagine nuncio uti fieret, seu Asdrubale qui classi præerat sine publica fraude auso facinus, quinqueremem Romanam superantem promontorium ex alto repente aggressæ sunt. sed neque rostro ferire celeritate subterlabentem poterant, neque transilire armati ex humilioribus in altiore navem. & defendebatur egregiè, quoad tela suppeditârunt. quîs deficientibus, quum jam nulla alia res eam, quàm propinquitas terræ, multitudoque à castris in littus effusa, tueri potuisset; concitatam remis, quanto maximo impetu poterant, in terram quum immisissent, navis tantùm jactura facta, incolumes ipsi evaserunt. Ita alio super aliud scelere quum haud dubiè induciæ ruptæ essent, Lælius Fulviusque ab Roma
cum

cum legatis Carthaginiensibus supervenerunt. quibus Scipio, *etsi non induciarum modo fides à Carthaginiensibus, sed etiam jus gentium in legatis violatum esset; tamen se nihil nec institutis populi Romani, nec suis moribus indignum in iis facturum esse*, quum dixisset; legatis dimissis, bellum parabat. Annibali jam terræ appropinquanti, jussus è nauticis ascendere in malum, ut specularetur quam tenerent regionem, quum dixisset, sepulchrum dirutum proram spectare, abominatus, prætervehi jussu gubernatore, ad Lep-
tim appulit classem, atque ibi copias exposuit.

XXVI. Hæc eo anno in Africa gesta.

Insequentia excedunt in eum annum, quo *Ante Chr.*
202.
U.C. 550.
M. Servilius Geminus, qui tum magister equitum erat, & Tib. Claudius Nero consules facti sunt. Ceterum exitu superioris anni quum legati sociarum urbium ex Græcia questi essent, vastatos agros ab regiis præfidiis, profectosque in Macedoniam legatos ad res repetendas non admissos ad Philippum regem; simul nunciassent, quatuor millia militum cum Sopatro duce trajecta in Africam duci, ut essent Carthaginiensibus præsidio, & pecuniæ aliquantum unà missum: legatos ad regem, qui hæc adversus foedus facta videri Patribus nunciarent, mittendos censuit senatus. Missi C. Terentius Varro, C. Mamilius, M. Aurelius. iis tres quinqueremes datæ. Annus insignis incendio ingenti, quo clivus Publicius ad solum exustus est, & aquarum magnitudine: sed annonæ vilitas fuit; præterquam quòd pace omnis Italia erat aperta, etiam quod magnam vim frumenti ex Hispania missam M. Valerius Falto & M. Fabius Buteo ædiles curules quaternis æris vicatim populo descripserunt. Eodem anno Q. Fabius Maximus moritur, exactæ ætatis, si quidem verum est, augurem duos & sexaginta annos
B 5 fuisse,

fuisse, quod quidam auctores sunt. Vir certè fuit dignus tanto cognomine, vel si novum ab eo inciperet. Superavit paternos honores, avitos æquavit. Pluribus victoriis, & majoribus præliis avus insignis Rullus; sed omnia æquare unus hostis Annibal potest. Cautior tamen quàm promptior hic habitus fuit. & sicut dubites, utrùm ingenio cunctator fuerit, an quia ita bello propriè, quod tum gerebatur, aptum erat; sic nihil certius est, quàm *unum hominem nobis cunctando rem restituisse*, sicut Ennius ait. Augur in locum ejus inauguratus Q. Fabius Maximus, filius; in ejusdem locum pontifex (nam duo sacerdotia habuit) Ser. Sulpicius Galba. Ludi Romani diem unum, plebei ter toti instaurati ab ædilibus, M. Sextio Sabino & C. Tremellio Flacco. ii ambo prætores facti, & cum iis C. Livius Salinator & C. Aurelius Cotta. Comititia ejus anni utrùm C. Servilius consul habuerit, an (quia eum res in Etruria tenuerint, quæstiones ex senatusconsulto de conjurationibus principum habentem) dictator ab eo dictus P. Sulpicius, incertum ut sit, diversi auctores faciunt.

XXVII. Principio insequentis anni, M. Servilius, Tib. Claudius, senatu in Capitolium vocato, de provinciis retulerunt. Italiam atque Africam in sortem conjici, Africam ambo cupientes, volebant. ceterùm Q. Metello maximè annitente, neque data, neque negata est Africa. Consules jussi cum tribunis plebis agere, ut, si iis videretur, populum rogarent, quem vellet in Africa bellum gerere. Omnes tribus P. Scipionem jusserunt. nihilominus consules provinciam Africam (ita enim senatus decreverat) in sortem conjecerunt. Ti. Claudio Africa evenit, ut quinquaginta navium classem, omnes quinqueremes, in Africam trajiceret, parique imperio cum Scipione imperator esset. M. Servilius Etruriam sortitus. in eadem provincia

vincia & C. Servilio prorogatum imperium, si consulem manere ad urbem senatui placuisset. Prætores, M. Sextius Galliam est fortitus, ut duas legiones provinciamque traderet ei P. Quintilius Varus: C. Livius Bruttios cum duabus legionibus, quibus P. Sempronius proconsul priore anno præfuerat: Cn. Tremellius Siciliam, ut ab P. Villio Tappulo prætore prioris anni provinciam & duas legiones acciperet; Villius proprætor viginti navibus longis, militibus mille oram Siciliae tutaretur; inde M. Pomponius viginti navibus reliquis mille & quingentos milites Romam deportaret. C. Aurelio Cottæ urbana evenit. ceteris ita, uti quisque obtinebant provincias exercitusque, prorogata imperia. Sexdecim non amplius eo anno legionibus defensum imperium est. Et ut placatis Diis omnia inciperent agerentque, ludos quos M. Claudio Marcello, T. Quintio consulibus, T. Manlius dictator, quasque hostias majores voverat, si per quinquennium illud respublica eodem statu fuisset, ut eos ludos consules, priusquam ad bellum proficiscerentur, facerent. Ludi in circo per quadriduum facti: hostiæque, quibus votæ erant Diis, cæfæ.

XXVIII. Inter hæc simul spes, simul cura indies crescebat: nec satis certum constare apud animum poterat, utrum gaudio dignum esset, Annibalem, post sextum decimum annum, ex Italia discedentem, vacuum possessionem ejus reliquisse populo Romano; an magis metuendum, quod incolumi exercitu in Africam transisset. *Locum nimirum, non periculum, mutatum: cujus tantæ dimicationis vatem, qui nuper decessisset, Q. Fabium haud frustra canere solitum; graviores in sua terra futurum hostem Annibalem quam in aliena fuisset. nec Scipioni aut cum Syphace, inconditæ barbariæ rege, cui Statorius semilixæ ducere exercitus solitus*

solitus sit, aut cum socero ejus Asdrubale, fugacissimo duce, rem futuram, aut tumultuariis exercitibus, ex agrestium semiermi turba subito collectis: sed cum Annibale, prope nato in prætorio patris, fortissimi ducis, alito atque educato inter arma; puero quondam milite, vixdum juvene imperatore: qui senex vincendo factus, Hispanias, Gallias, Italiam ab Alpibus ad fretum monumentis ingentium rerum complèssset, ducere exercitum æqualem stipendiis suis; duratum omnium rerum patientia, quas vix fides fiat homines passos; perfusum millies cruore Romano; exuvias non militum tantum, sed etiam imperatorum portantem. Multos occursuros Scipioni in acie, qui prætores, qui imperatores, qui consules Romanos sua manu occidissent, muralibus vallaribusque insignes coronis, pervagatos capta castra, captas urbes Romanas. Non esse hodie tot fasces magistratibus populi Romani, quot captos ex cæde imperatorum præferre posset Annibal. Has formidines agitando animis, ipsi curas & metus augebant etiam, quòd quum assuèssent per aliquos annos bellum ante oculos, aliis atque aliis in Italiæ partibus, lenta spe, in nullum propinquum debellandi finem gerere, erexerant omnium animos Scipio & Annibal, velut ad supremum certamen comparati duces. Ii quoque, quibus ingens erat in Scipione fiducia, & victoriæ spes, quo magis in propinquam eam imminebant animis, eo curæ intentionis erant. Haud dispar habitus animorum Carthaginienfibus erat: quos modò petisse pacem, intuentes Annibalem ac rerum gestarum ejus magnitudinem, pœnitebat: modò, quum respicerent, bis sese acie victos, Syphacem captum, pulsos se Hispania, pulsos Italia, atque ea omnia unius virtute & consilio Scipionis facta, velut fatalem eum ducem in exitium suum natum horrebant.

XXIX. Jam Adrumetum venerat Annibal. unde ad reficiendum ex jactatione maritima militem paucis diebus sumptis, excitus pavidis nunciis omnia circa Carthaginem obtineri armis afferentium, magnis itineribus Zamam contendit. Zama quinque dierum iter ab Carthagine abest. inde præmissi speculatores, quum excepti à custodibus Romanis deducti ad Scipionem essent; traditos eos tribunis militum, jussosque omisso metu visere omnia, per castra, quà velent, circumduci jussit: percunctatusque, satin' per commodum omnia explorassent, datis qui prosequerentur, retro ad Annibalem dimisit. Annibal nihil quidem eorum, quæ nunciabantur, (nam & Masinissam cum sex millibus peditum, quatuor equitum venisse eo ipso fortè die, afferebant) læto animo audivit; maximè hostis fiducia, quæ non de nihilo profectò concepta est, percussus. Itaque quanquam & ipse causa belli ejus erat, & adventu suo turbaverat & pactas inducias & spem fœderum; tamen, si integer, quàm si victus, peteret pacem, æquiora impetrari posse ratus, nuncium ad Scipionem misit, ut colloquendi secum potestatem faceret. Id utrùm sua sponte fecerit, an publico consilio, neutrum cur affirmem habeo. Valerius Antias primo prælio victum eum à Scipione, quo duodecim millia armatorum in acie sunt cæsa, mille & septingenti capti, legatum cum aliis decem legatis tradit in castra ad Scipionem venisse. Ceterùm Scipio quum colloquium haud abnuisset, ambo ex composito duces castra protulerunt, ut coire ex propinquo possent. Scipio haud procul Nedagara urbe, tum ad cetera loco opportuno, tum quòd aquatio intra teli conjectum erat, confedit. Annibal tumulum à quatuor millibus inde, tutum commodumque alioqui, nisi quòd longinquæ aquationis erat, cepit. ibi in medio locus conspectus undique, ne quid insidiarum esset, delectus.

XXX. Summotis pari spatio armatis, cum singulis interpretibus congressi sunt non suæ modò ætatis maximi duces. sed omnis ante se memoriæ, omnium gentium cuilibet regum imperatorumve pares. Paulisper alter alterius conspectu, admiratione mutua prope attoniti, conticuere. Tum Annibal prior : *Si hoc ita fato datum erat, ut qui primus bellum intuli populo Romano, quique toties propè in manibus victoriam habui, is ultro ad pacem petendam venirem; lator, te mihi sorte potissimum datum, à quo peterem. Tibi quoque inter multa egregia non in ultimis laudum hoc fuerit, Annibalem, cui tot de Romanis ducibus victoriam Dii dedissent, tibi cessione: teque huic bello, vestris prius, quàm nostris, cladibus insigni, finem imposuisse. Hoc quoque ludibrium casus ediderit fortuna, ut cum patre tuo consule ceperim arma, cum eodem primum Romano imperatore signa contulerim, ad filium ejus inermis ad pacem petendam veniam. Optimum quidem fuerat, eam patribus nostris mentem datam ab Diis esse, ut & vos Italiæ, & nos Africæ imperio contenti essemus. neque enim ne vobis quidem Sicilia atque Sardinia satis digna pretia sunt pro tot classibus, tot exercitibus, tot tam egregiis amissis ducibus. Sed præterita magis reprehendi possunt, quàm corrigi. Ita aliena appetivimus, ut de nostris dimicaremus, nec in Italia solum vobis bellum, nobis in Africa esset: sed & vos in pertis vestris propè ac mœnibus signa armaque hostium vidistis; & nos ab Carthagine fremitum castrorum Romanorum exaudivimus. Quod igitur nos maximè abominaremur, vos ante omnia optaretis; in meliore vestra fortuna de pace agitur. agimus ii, quorum & maximè interest pacem esse; & qui quodcumque egerimus, ratum civitates nostræ habituræ sint. animo tantum nobis opus est non abhorrente à quietis consiliis. Quod ad me attinet, jam ætas senem in patriam revertentem, unde puer profectus sum, jam*
secundæ,

secundæ, jam adversæ res ita erudierunt, ut rationem sequi quàm fortunam malim. Tuam & adolescentiam, & perpetuam felicitatem, ferociora utraque, quàm quictis opus est consiliis, metuo. Non temere incerta casuum reputat, quem fortuna nunquam decepit. Quod ego fui ad Trasimenum, ad Cannas, id tu hodie es. Vixdum militari ætate imperio accepto, omnia audacissimè incipientem nusquam fefellit fortuna. Patris & patruī persecutus mortem, ab calamitate vestræ domus decus insigne virtutis pietatisque eximiæ cepisti; amissas Hispanias recuperasti, quatuor inde Punicis exercitibus pulsus; consul creatus, quum ceteris ad tutandam Italiam parum animi esset, transgressus in Africam, duobus hic exercitibus cæsis, binis eadem hora captis simul incensisque castris, Syphace potentissimo rege capto, tot urbibus regni ejus, tot nostri imperii ereptis, me sextumdecimum jam annum hærentem in possessione Italiæ detraxisti. Potest victoriam malle, quàm pacem, animus. Novi vobis spiritus magnos magis quàm utiles, mihi talis aliquando fortuna affulsit. Quod si in secundis rebus bonam quoque mentem darent Dii; non ea solum quæ evenissent, sed etiam ea quæ evenire possent, reputaremus. Ut omnium obliviscaris aliorum, satis ego documenti in omnes casus sum. Quem modò castris inter Anicnem atque urbem vestram positus, ac jam propè scandentem mœnia Romæ videras; hic cernis, duobus fortissimis viris fratribus clarissimis imperatoribus orbatum, ante mœnia propè obsessæ patriæ, quibus terrui vestram urbem, ea pro mea deprecantem. Maximæ cuique fortunæ minimè credendum est. In bonis tuis rebus, nostris dubiis, tibi ampla ac speciosa danti est pax: nobis petentibus magis necessaria, quàm honesta. Melior tutiorque est certa pax, quàm sperata victoria. hæc in tua, illa in Deorum manu est. Ne tot annorum felicitatem in unius horæ dederis discrimen. Cum tuas vires, tum vim fortunæ, Martemque belli communem propone animo.

animo. Utrunque ferrum, corpora humana erunt. nusquam minus, quam in bello, eventus respondent. Non tantum ad id, quod data pace jam habere potes, si prælio vincas, gloriæ adjeceris; quantum ademeris, si quid adversi eveniat. Simul parva ac sperata decora unius horæ fortuna evertere potest. Omnia in pace jungenda tuæ potestatis sunt, P. Corneli: tunc ea habenda fortuna erit, quam Dii dederint. Inter pauca felicitatis virtutisque exempla M. Atilius quondam in hac eadem terra fuisset, si victor pacem petentibus dedisset patribus nostris: sed non statuendo tandem felicitati modum, nec cobibendo efferentem se fortunam, quanto altius elatus erat, eo scædius corruit. Est quidem ejus qui dat, non qui petit, conditiones dicere pacis. sed forsitan non indigni simus, qui nobismetipsis multam irrogemus. Non recusamus, quin omnia, propter quæ bellum initum est, vestra sint, Sicilia, Sardinia, Hispania, quicquid insularum toto inter Africam Italiamque continetur mari: Carthaginienses, inclusi Africæ littoribus, vos (quando ita Diis placuit) externa etiam terra marique videamus regentes imperia. Haud negaverim, propter non nimis sincerè petitam aut expectatam nuper pacem, suspectam esse vobis Punicam fidem. multum, per quos petita sit, ad fidem tuendæ pacis pertinet, Scipio. Vestri quoque (ut audio) patres nonnihil etiam ob hoc, quia parum dignitatis in legatione erat, negaverunt pacem. Annibal peto pacem: qui neque peterem, nisi utilem crederem: & propter eandem utilitatem tuebor eam, propter quam petii. & quemadmodum, quia à me bellum cæptum est, ne quem ejus pœniteret, quoad ipsi invidere Dei, præstiti: ita annitar, ne quem pacis per me partæ pœniteat.

XXXI. Adversus hæc imperator Romanus in hanc fere sententiam respondit. Non me fallebat, Annibal, adventus tui spe Carthaginienses & præsentem induciarum fidem & spem pacis turbasse: neque tu id sanè dissimulas,

mulas, qui de conditionibus superioribus pacis omnia subtrahas, præter ea, quæ jampridem in nostra potestate sunt. Ceterum sicut tibi curæ est, sentire cives tuos, quanto per te onere leventur: sic mihi laborandum est, ne, quæ tunc pepigerunt, hodie subtrahæ ex conditionibus pacis, præmia perfidiæ habeant. Indigni, quibus eadem pateat conditio, ut etiam prosit vobis fraus, petitis. Neque patres nostri priores de Sicilia, neque nos de Hispania fecimus bellum. Et tunc Mamertinorum sociorum periculum, Et nunc Sagunti excidium nobis pia ac iusta induerunt arma. Vos laceffisse, Et tu ipse fateris, Et Dii testes sunt: qui Et illius belli exitum secundum jus fasque dederunt; Et hujus dant, Et dabunt. Quod ad me attinet, Et humanæ infirmitatis memini, Et vim fortunæ reputo, Et omnia, quæcumque agimus, subiecta esse mille casibus scio. Ceterum quemadmodum superbe Et violenter me faterer facere, si, priusquam in Africam trajecissem, te tua voluntate cedentem Italia, Et imposito in naves exercitu ipsum venientem ad pacem petendam aspernarer: sic nunc, quum propè manu conferta resistentem ac tergi-versantem in Africam attraxerim, nulla sum tibi verecundia obstrictus. Proinde si quid ad ea, in quæ tum pax conventura videbatur, (quæ sint, nōsti:) mulæ navium cum commeatu per inducias expugnatarum, legatorumque violatorum adjicitur; est quod referam ad consilium. Sin illa quoque gravia videntur, bellum parate, quoniam pacem pati non potuisti. Ita infecta pace, ex colloquio ad suos quum se recepissent; frustra verba jactata renunciant. armis decernendum esse, habendamque eam fortunam, quam Dii dedissent.

XXXII. In castra ut est ventum, pronunciant ambo, *Arma expedirent milites, animosque ad supremum certamen, non in unum diem, sed in perpetuum, si felicitas adesset, victores. Roma an Carthago jura gentibus darent,*

rent, ante crastinam noctem scituros. neque enim Africam, aut Italiam, sed orbem terrarum victoriæ præmium fore; par periculum præmio, quibus adversæ pugnae fortuna fuisset. nam neque Romanis effugium ullum patebat in aliena ignotaque terra; & Carthagini, supremo auxilio effuso, adesse videbatur præsens excidium. Ad hoc discrimen procedunt postero die duorum opulentissimorum populorum duo longè clarissimi duces, duo fortissimi exercitus, multa ante parta decora aut cummulaturi eo die, aut everfuri. Anceps igitur spes & metus miscebant animos: contemplantibusque modò suam, modò hostium aciem, quum oculis magis quàm ratione pensarent vires, simul læta, simul tristitia observabantur. quæ ipsis sua sponte non succurrebant, ea duces admonendo atque hortando subjiciunt. Pœnus sedecim annorum in terra Italia res gestas, tot duces Romanos, tot exercitus occidione occisos; & sua cuique decora, ubi ad insignem alicujus pugnae memoria militem venerat, referebat. Scipio Hispanias, & recentia in Africa prælia, & confessionem hostium, quòd neque non petere pacem propter metum, neque manere in ea præ insita animis perfidia potuissent. ad hoc, colloquium Annibalis in secreto habitum, ac liberum fingenti, quàm velit flecti. Ominatur, quibus quondam auspiciis patres eorum pugnaverint ad Ægateis insulas; ea illis exeuntibus in aciem portendisse Deos. adesse finem belli, ac laboris. In manibus esse prædam Carthaginis, reditum domum in patriam, ad parentes, liberos, conjuges, penatesque Deos. celsus hæc corpore, vultuque ita læto, ut vicisse jam crederes, dicebat. Instruit deinde primos hastatos; post eos principes: triarii postremam aciem clausit.

XXXIII. Non confertas autem cohortes ante sua quamque signa instruebat; sed manipulos aliquantum inter se distantes, ut esset spatium, quo elephantium

tium accepti nihil ordines turbarent. Lælium (cujus antè legati, eo anno quæstoris extra sortem ex senatusconsulto opera utebatur) cum Italico equitatu ab sinistro cornu, Masinissam Numidasque ab dextro opposuit. vias patentes inter manipulos antesignanorum velitibus (ea tunc levis armatura erat) complevit: dato præcepto, ut, ad impetum elephantorum, aut post rectos refugerent ordines, aut in dextram lævamque discursu applicantes se antesignanis, viam, qua irruerent in ancipitia tela, belluis darent. Annibal ad terrorem primùm elephantos (octoginta autem erant, quot nulla unquam in acie antè habuerat) instruxit; deinde auxilia Ligurum Gallorumque, Balearibus Maurisque admixtis: in secunda acie Carthaginieneses Afrosque, & Macedonum legionem: modico inde intervallo relicto, subsidiariam aciem Italicorum militum (Bruttii plerique erant, vi ac necessitate plures quàm sua voluntate discedentem ex Italia secuti) instruxit. Equitatum etiam ipsum circumdedit cornibus. dextrum Carthaginieneses, sinistrum Numidæ tenuerunt. Varia adhortatio erat in exercitu inter tot homines, quibus non lingua, non mores, non lex, non arma, non vestitus habitusque, non caussa militandi eadem esset. Auxiliariis, & præsens, & multiplicata merces ex præda ostentatur. Galli proprio atque infuso in Romanos odio accendantur. Liguribus campi uberes Italiæ, deductis ex asperrimis montibus, in spem victoriæ ostentantur. Mauros Numidasque impotenti Masinissæ futuro dominatu terret. Aliis aliæ spes ac metus jactantur. Carthaginienensibus mœnia patriæ, Dii penates, sepulchra majorum, liberi cum parentibus conjugesque pavidæ, aut excidium servitiumque, aut imperium orbis terrarum; nihil aut in metum, aut in spem medium ostentatur. Quum maximè hæc imperator apud Carthaginieneses, duces suarum gentium inter populares, plerique per
inter-

interpretes inter immixtos alienigenis agerent, tubæ cornuaque ab Romanis cecinerunt: tantusque clamor ortus, ut elephanti in suos, sinistro maximè cornu, verterentur, Mauros ac Numidas. Addidit facilè Masinissa percussis terrorem: nudavitque ab ea parte aciem equestri auxilio. Paucae tamen bestiarum intrepidæ in hostem actæ, inter velitum ordines cum multis suis vulneribus ingentem stragem edebant. resiliētes enim ad manipulos velites, quum viam elephantis, ne obtererentur, fecissent, in eos ancipites ad ictum utrimque conjiciebant hastas: nec pila ab antesignanis cessabant, donec undique incidentibus telis exacti ex Romana acie, hi quoque in suo dextro cornu ipsos Carthaginiensium equites in fugam verterunt. Lælius, ut turbatos vidit hostes, addit percussis terrorem.

XXXIV. Utrimque equite nudata erat Punica acies, quum pedes concurrat, nec spe, nec viribus jam par. ad hoc, dictu parva, sed magni eadem in re gerenda momenti res; congruens clamor à Romanis, eoque major & terribilior, dissonæ illis, ut gentium multarum discrepantibus linguis, voces. pugna Romana stabilis & suo & armorum pondere incumbētiū in hostem: concursatio & velocitas illinc major, quàm vis. Igitur primo impetu extemplo movere loco hostium aciem Romani: ala deinde & umbonibus pulsantes, in summos gradu illato, aliquantum spatii, velut nullo resistente, incessere: urgentibus & novissimis primos, ut semel motam aciem sensere, quod ipsum vim magnam ad pellendum hostem addebat. Apud hostes, auxiliares cedentes secunda acies Afri & Carthaginienses adeo non sustinebant, ut contra etiam, ne resistentes pertinaciter primos cædendo ad se perveniret hostis, pedem referrent. Igitur auxiliares terga dant repente: & in suos versi, partim refu-
gere

gere in secundam aciem, partim non recipientes cedere; uti paullo ante non adjuti, & tunc exclusi. Et prope duo jam permixta prœlia erant, quum Carthaginienses simul cum hostibus, simul cum suis cogerentur conferere manus. non tamen ita perculsos iratosque in aciem accepere: sed densatis ordinibus, in cornua, vacuumque circa campum extra prœlium ejece-
re; ne pavidos fuga, vulneribusque milites, in certam & integram aciem miscerent. Ceterum tanta strages hominum armorumque locum, in quo steterant paullo ante auxiliares, compleverat; ut propè difficilior transitus esset, quàm per confertos hostes fuerat: itaque qui primi erant hastati, per cumulos corporum armorumque, & tabem sanguinis, qua quisque poterat, sequentes hostem, & signa & ordines confuderunt. principum quoque signa fluctuari cœperant, vagam ante se cernendo aciem. Quod Scipio ubi vidit, receptui propere canere hastatis iussit: & faucis in postremum aciem subductis, principes triariosque in cornua inducit; quo tutior firmiorque media hastatorum acies esset. Ita novum de integro prœlium ortum est: quippe ad veros hostes perventum erat, & armorum genere, & usu militiæ, & fama rerum gestarum, & magnitudine vel spei vel periculi pares. Sed & numero Romanus superior erat, & animo: quòd jam equites, jam elephantos fuderat: jam prima acie pulsa, in secundam pugnabat.

XXXV. In tempore Lælius ac Masinissa pulsos per aliquantum spatii secuti equites, revertentes in aversam hostium aciem incurrere. Is demum equitum impetus fudit hostem. multi circumventi in acie cæsi: multi per patentem circa campum fuga sparfi, tenente omnia equitatu, passim interierunt. Carthaginiensium sociorumque cæsa eo die supra millia viginti. par ferme numerus captus est, cum signis militaribus centum tri-

triginta tribus, elephantis undecim. Victores ad duo millia cecidere. Annibal, cum paucis equitibus inter tumultum elapsus, Adrumetum perfugit; omnia & in prælio & ante aciem, priusquam excederet pugna, expertus. & confessione etiam Scipionis, omniumque peritorum militiæ, illam laudem adeptus, singulari arte aciem eo die instruxisse. *Elephantos in prima fronte: quorum fortuitus impetus atque intolerabilis vis, signa sequi, & servare ordines (in quo plurimum spei ponerent) Romanos prohiberet.* Deinde auxiliares ante Carthaginensium aciem, ne homines misti colluvione omnium gentium, quos non fides teneret sed merces, liberum receptum fugæ haberent: simul primum ardorem atque impetum hostium excipientes fatigarent; ac, si nihil aliud, vulneribus suis ferrum hostile hebetarent: tum, ubi omnis spes esset, milites Carthaginenses. *Afrosque, ut omnibus rebus aliis pares, eo quod integri cum fessis ac sauciis pugnarent, superiores essent.* Italicos intervallo quoque diremptos, incertos socii an hostes essent, in postremam aciem summos. Hoc edito velut ultimo virtutis opere, Annibal quum Adrumetum refugisset, accitusque inde Carthaginem sexto ac trigesimo post anno, quàm puer inde profectus erat, redisset; fassus in curia est, non prælio modò se, sed bello victum: nec spem salutis alibi quàm in pace impetranda esse.

XXXVI. Scipio confestim à prælio, expugnatis hostium castris direptisque, cum ingenti præda ad mare ac naves rediit; nuncio allato, P. Lentulum cum quinquaginta rostratis, centum onerariis, omni genere commeatus, ad Uticam accessisse. Admovendum igitur undique terrorem percussæ Carthagini ratus, misso Lælio Romam cum victoriæ nuncio, Cn. Octavium terrestri itinere ducere legiones Carthaginem jubet. ipse, ad suam veterem nova Lentuli classe adjuncta, profectus ab Utica, portum Carthaginis petit. Haud
procul

procul aberat, quum velata infulis ramisque oleæ Carthaginienfium occurrit navis. Decem legati erant principes civitatis, auctore Annibale missi ad petendam pacem. qui quum ad puppim prætoris navis accessissent, velamenta supplicum porrigentes, orantes, implorantesque fidem & misericordiam Scipionis; nullum iis aliud responsum datum, quàm ut Tunetem venirent: eò se moturum castra. ipse ab contemplato situ Carthagini, non tam noscendi in præsentia, quàm deprimendi hostis causa, Uticam, eòdem & Octavio revocato, rediit. Inde procedentibus ad Tunetem nuncius allatus, Verminam, Syphacis filium, cum equitibus pluribus, quàm peditibus, venire Carthaginensibus auxilio. pars exercitus cum omni equitatu, Saturnalibus primis agmen aggressa, Numidas levi certamine fudit. exitu quoque fugæ intercluso, à parte omni circumdatis equitibus, quindecim millia hominum cæsa, mille & ducenti vivi capti sunt, & equi Numidici mille & quingenti: signa militaria septuaginta duo. Regulus ipse inter tumultum cum paucis effugit. Tum ad Tunetem eodem, quo antea, loco castra posita; legatique triginta Carthagine ad Scipionem venerunt. & illi quidem multo miserabilius quàm antè (quo magis cogebat fortuna) egerunt: sed aliquanto minore cum misericordia, ab recenti memoria perfidiæ, auditi sunt. In concilio, quanquam justa ira omneis ad delendam stimulabat Carthaginem; tamen quum & quanta res esset, & quàm longi temporis obsidio tam munitæ & validæ urbis, reputarent, & ipsum Scipionem expectatio successoris, venturi ad paratam alterius labore ac periculo finiti belli famam, sollicitaret; ad pacem omnium animi versi sunt.

XXXVII. Postèro die revocatis legatis, & cum multa castigatione perfidiæ monitis, ut, tot cladibus edocti, tandem Deos & iusjurandum esse crederent;

con-

conditiones pacis dictæ: *Ut liberi legibus suis viverent. quas urbes, quosque agros, quibusque finibus ante bellum tenuissent, tenerent, populandique finem eo die Romanus faceret. Perfugas, fugitivosque, & captivos omnes redderent Romanis, & naves rostratas, præter decem triremes, traderent, elephantosque, quos haberent domitos; neque domarent alios. Bellum neve in Africa, neve extra Africam, injussu populi Romani gererent. Masinissæ res redderent, sædusque cum eo facerent. Frumentum, stipendiumque auxiliis, donec ab Roma legati rediissent, præstarent. Decem millia talentum argenti descripta, pensionibus æquis, in annos quinquaginta solverent. Obsides centum arbitratu Scipionis darent, ne minores quatuordecim annis, neu triginta majores. Inducias ita se daturum, si per priores inducias naves onerariæ captæ, quæque fuissent in navibus, restituerentur. Aliter nec inducias, nec spem pacis ullam esse. Has conditiones legati quum domum ferre jussi in concione ederent, & Gisgo ad dissuadendam pacem processisset, audireturque à multitudine, inquieta eadem & imbelli; indignatus Annibal, dici ea in tali tempore audiri, arreptum Gisgonem manu sua ex superiore loco detraxit. Quæ insueta liberæ civitati species quum fremitum populi movisset, perturbatus militaris vir urbana libertate, Novem, inquit, annorum à vobis profectus, post trigesimum sextum annum redii. Militares artes (quas me à puero fortuna nunc privata nunc publica docuit) probe videor scire. Urbis ac fori jura, leges, mores, vos me oportet doceatis. Excusata imprudentia, de pace multis verbis differuit, quàm nec iniqua, & necessaria esset. Id omnium maximè difficile erat, quòd ex navibus per inducias captis nihil præter ipsas comparebat naves: neque inquisitio erat facilis, adversantibus paci, qui arguerentur. Placuit naves reddi, & homines utique inquiri. Cetera, quæ abessent,*

essent, æstimanda Scipioni permitti: atque ita pecunia luere Carthaginienses. Sunt qui Annibalem ex acie ad mare pervenisse, inde præparata nave ad regem Antiochum extemplo profectum tradant: postulantique ante omnia Scipioni, ut Annibal sibi traderetur, responsum esse, Annibalem in Africa non esse.

XXXVIII. Posteaquam redierunt ad Scipionem legati; quæ publica in navibus fuerant, ex publicis descripta rationibus quæstores, quæ privata profiteri domini iussi; pro ea summa pecuniæ viginti quinque millia pondo argenti præsentia exacta: induciæque Carthaginiensibus datæ in tres menses. Additum, ne per induciarum tempus alio usquam quàm Romam mitterent legatos: & quicumque legati Carthaginem venissent, ne ante dimitterent eos, quàm Romanum imperatorem, qui, & quæ petentes venissent, certiorum facerent. Cum legatis Carthaginiensibus Romam missi L. Veturius Philo, & M. Marcius Ralla, & L. Scipio imperatoris frater. Post eos dies comiteus ex Sicilia Sardiniaque tantam vilitatem annonæ effecerunt, ut pro vectura frumentum mercator nautis relinqueret. Romæ ad nuncium primum rebellionis Carthaginiensium trepidatum fuerat; iussusque erat Tib. Claudius maturè in Siciliam classem ducere, atque inde in Africam trajicere: & alter consul M. Servilius ad urbem morari, donec, quo statu res in Africa essent, sciretur. Segniter omnia in comparanda deducendaque classè ab Tib. Claudio consule facta erant; quòd Patres de pace Scipionis potius arbitrium esse, quibus legibus daretur, quàm consulis, censuerant. Prodigia quoque nunciata sub ipsam famam rebellionis terrorem attulerant. Cumis solis orbis minui visus, & pluit lapideo imbri: & in Veliterno agro terra ingentibus cavernis confedit, arboresque in profundum haustæ. Ariciæ forum, & circa tabernæ,

Frusinone murus aliquot locis, & porta de cœlo tacta: & in palatio lapidibus pluit. Id prodigium more patrio novendiali sacro, cetera hostiis majoribus expiata. inter quæ etiam aquarum insolita magnitudo in religionem versa. nam ita abundavit Tiberis, ut ludi Apollinares, circo inundato, extra portam Collinam ad ædem Erycinæ Veneris parati sint. Ceterùm ludorum ipso die, serenitate subita orta, pompa duci cœpta ad portam Collinam, revocata deductaque in circum est; quum, discessisse inde aquam, nunciatum esset: lætitiæque populo & ludis celebritatem addidit sedes sua solenni spectaculo reddita.

XXXIX. Claudium consulem, profectum tandem ab urbe, inter portus Cofanum Lauretanumque atrox vis tempestatibus adorta in metum ingentem adduxit. Populonium inde quum pervenisset, stetitque ibi dum reliquum tempestatibus exsæviret, Ilvam insulam, & ab Ilva Corsicam, à Corsica in Sardiniam trajecit. ibi superantem Infanos montes multo & sævior & infestioribus locis tempestas adorta disjecit classem. Multæ quassatæ, armamentisque spoliatæ naves: quædam fractæ. Ita vexata ac lacerata classis Carales tenuit. ubi dum subductæ reficiuntur naves, hyems oppressit: circumactumque anni tempus; & nullo prorogante imperium, privatus Tib. Claudius classem Romam reduxit. M. Servilius, ne comitiorum causâ ad urbem revocaretur, dictatore dicto C. Servilio Gemino, in provinciam est profectus. Dictator magistrum equitum P. Ælium Pætum dixit. Sæpe comitia indicta perfici tempestates prohibuerunt. itaque quum pridie Idus Martias veteres magistratus abissent, novi suffecti non essent; respublica sine curulibus magistratibus erat. L. Manlius Torquatus pontifex eo anno mortuus. in locum ejus suffectus C. Sulpicius Galba. Ab L. Licinio Lucullo & Q. Fulvio, ædilibus curulibus,

bus, ludi Romani ter toti instaurati. Pecuniam ex ærario scribæ viatoresque ædilitii clam egressisse per indicem comperti, damnati sunt; non sine infamia Luculli ædilis. P. Ælius Tubero & L. Lætorius, ædiles plebis vitio creati, magistratu se abdicârunt; quum ludos ludorumque caussa epulum Jovi fecissent, & signa tria ex mulctaticio argento facta in Capitolio posuissent. Cerealia ludos dictator & magister equitum ex senatusconsulto fecerunt.

XL. Legati ex Africa Romani simul Carthaginensesque quum venissent Romam, senatus ad ædem Bellonæ habitus est. ubi quum L. Veturius Philo, pugnatum cum Annibale esse suprema Carthaginensibus pugna, finemque tandem lugubri bello imposuitum, ingenti lætitia Patrum exposuisset; adjecit, Verminam etiam Syphacis filium, quæ parva bene gestæ rei accessio erat, devictum. in concionem inde prodire jussus, gaudiumque id populo impertire. Tum patere facta gratulatione omnia in urbe templa, supplicationesque in triduum decretæ. Legatis Carthaginensium & Philippi regis (nam ii quoque venerant) petentibus, ut senatus sibi daretur, responsum jussu Patrum ab dictatore est, consules novos eis senatum datuos esse. Comitia inde habita: creati consules Cn. Cornelius Lentulus, P. Ælius Pætus.

Prætores M. Junius Pennus, cui fors urbana evenit. M. Valerius Falto Bruttios, M. Fabius Buteo Sardiniam, P. Ælius Tubero Siciliam est sortitus. De provinciis consulum nihil ante placebat agi, quàm legati Philippi regis & Carthaginensium auditi essent. belli finem alterius, principium alterius prospiciebant animis. Cn. Lentulus consul cupiditate flagrabat provinciæ Africæ; seu bellum foret, facilem victoriam, seu jam finiretur, finiti tanti belli se consule gloriam petens. Negare

Ante Chr.

201.

U.C. 551.

itaque priùs quicquam agi passiurum, quàm sibi Africa decreta esset; concedente collega, moderato viro & prudenti: qui gloriæ ejus certamen cum Scipione, præterquam quòd iniquum esset, etiam impar futurum cernebat. Q. Minucius Thermus & Manius Acilius Glabrio, tribuni plebis, rem, priore anno nequicquam tentatam ab Ti. Claudio consule, Cn. Cornelium tentare aiebant. Ex auctoritate Patrum latum ad populum esse, ejus vellent imperium in Africa esse. Omnes quinque & triginta tribus P. Scipioni id imperium decressè. Multis contentionibus & in senatu & ad populum acta res, postremò eò deducta est, ut senatui permitterent. Patres igitur jurati (ita convenerat) censuerunt, uti consules provincias inter se compararent, fortirenturve, uter Italiam, uter classem navium quinquaginta haberet. Cui classis obvenisset, in Siciliam navigaret. si pax cum Carthaginiensibus componi nequisset, in Africam trajiceret: consul mari, Scipio eodem, quo adhuc, jure imperii terra rem gereret. Si condiciones convenirent pacis, tribuni plebis populum rogarent, utrùm consulem, an P. Scipionem, juberent pacem dare: & quem, si deportandus exercitus victor ex Africa esset, deportare. Si pacem per P. Scipionem dari, atque ab eodem exercitum deportari jussissent, ne consul ex Sicilia in Africam trajiceret. Alter consul, cui Italia evenisset, duas legiones à M. Sextio prætore acciperet.

XLI. P. Scipioni cum exercitibus, quos haberet, in provincia Africa prorogatum imperium. Prætori M. Valerio Faltoni duæ legiones in Bruttiiis, quibus C. Livius priore anno præfuerat, decreta. P. Ælius prætor duas legiones in Sicilia ab Cn. Tremellio acciperet. Legio una M. Fabio in Sardiniam, quam P. Lentulus proprætor habuisset, decernitur. M. Servilio prioris anni consuli cum suis duabus item legionibus

nibus in Etruria prorogatum imperium est. Quod ad Hispanias attineret, aliquot jam annos ibi L. Cornelium Lentulum & L. Manlium Acidinum esse. uti consules cum tribunis agerent, si eis videretur, ut plebem rogarent, cui juberent in Hispania imperium esse. is ex duobus exercitibus in unam legionem conscriberet Romanos milites, & in quindecim cohortes socios Latini nominis, quibus provinciam obtineret: veteres milites L. Cornelius & L. Manlius in Italiam deportarent. Cornelio consuli quinquaginta navium classis ex duabus classibus, Cn. Octavii, quæ in Africa esset, P. Villii, quæ Siciliæ oram tuebatur, decreta: ut quas naves vellet, deligeret. P. Scipio quinquaginta longas naves haberet, quas habuisset. quibus si Cn. Octavium, sicut præfuisset, præesse vellet, Octavio proprætore in eum annum imperium esset. si Lælium præficeret, Octavius Romam decederet: reduceretque naves, quibus proconsuli usus non esset. Et M. Fabio in Sardiniam decem longæ naves decreta. Et consules duas legiones urbanas scribere jussi: ut quatuordecim legionibus eo anno, centum navibus longis republ. administraretur.

XLII. Tum de legatis Philippi & Carthaginensium actum. Priores Macedonas introduci placuit, quorum varia oratio fuit: partim purgantium quæ questi erant missi ad regem à Roma legati de populatione sociorum: partim ultro accusantium quidem & socios populi Romani, sed multo infestius M. Aurelium; quem ex tribus ad se missis legatis delectu habito substituisse, & se bello laceffisse contra fœdus, & sæpe cum præfectis suis signis collatis pugnasse: partim postulantium, ut Macedones, duxque eorum Sopater, qui apud Annibalem mercede militassent, captique in vinculis essent, sibi restituerentur. Adversus ea M. Furius, missus ad idipsum ab Aurelio ex

Macedonia, differuit: *Aurelium relictum, ne socii populi Romani fessi populationibus atque injuria ad regem deficerent, finibus sociorum non excessisse: dedisse operam, ne impune in agros eorum transcenderent populatores. Sopatrum ex purpuratis & propinquis regis esse. cum cum quatuor millibus Macedonum & pecunia missum nuper in Africam esse Annibali Carthaginensibusque auxilio. De his rebus interrogati Macedones quum perplexè responderent, ipsi antè responsum tulerunt: Bellum quærere regem, &, si pergat, propediem inventurum. Duplíciter ab eo fœdus violatum: & quòd sociis populi Romani injurias fecerit, bello armisque lacefferit: & quòd hostes auxiliis & pecunia juverit. Et P. Scipionem reſtè atque ordine videri fecisse & facere, quòd eos, qui arma contra populum Romanum ferentes capti sunt, hostium numero in vinculis habeat: & M. Aurelium è republica facere, gratumque id senatui esse, quòd socios populi Romani, quando jure fœderis non posset, armis tueatur. Cum hoc tam tristi responso dimissis Macedonibus, legati Carthaginenses vocati. quorum ætatibus dignitatibusque conspectis, (nam longè primi civitatis erant) tum pro se quisque dicere, verè de pace agi. Insignis tamen inter ceteros Asdrubal erat, (Hædum populares cognomine appellabant) pacis semper auctor, adversusque factioni Barcinæ. Eo tum plus illi auctoritatis fuit, belli culpam in paucorum cupiditatem à republica transferenti. qui quum varia oratione usus esset, nunc purgando crimina; nunc quædam fatendo, ne impudenter certa negantibus difficilior venia esset; nunc monendo etiam Patres conscriptos, ut rebus secundis modestè ac moderatè uterentur: Si se atque Hannonem audissent Carthaginenses, & tempore uti voluissent, daturus fuisse pacis conditiones, quas tunc peterent. Rarò finul hominibus bonam fortunam bonamque mentem dari. Populum Romanum eo invictum esse, quòd in secundis rebus*

bus sapere & consulere meminerit. & Hercule, mirandum fuisse, si aliter facerent. Ex insolentia, quibus nova bona fortuna sit, impotentes lætitiæ insanire: populo Romano usitata ac propè jam obsoleta ex victoria gaudia esse, ac plus pene parcendo victis, quàm vincendo, imperium auxisse. Ceterorum miserabilior oratio fuit, commemorantium, Ex quantis opibus quò recidissent Carthaginensium res. nihil eis, qui modò orbem prope terrarum obtinuisent armis, superesse, præter Carthaginis mœnia. Iis inclusos, non terra, non mari quicquam sui juris cernere. Urbem quoque ipsam, ac penates ita habituros, si non in ea quoque, quo nihil ulterius sit, sævire populus Romanus velit. Quum flecti misericordia Patres appareret, senatorum unum, infestum perfidiæ Carthaginensium, succlamâsse ferunt, Per quos Deos fœdus icturi essent, quum eos, per quos ante iktum esset, fefellissent? Per eosdem, inquit Asdrubal, qui tam infesti sunt fœdera violentibus.

XLIII. Inclinatorum omnium ad pacem animis, Cn. Lentulus consul, cui classis provincia erat, senatusconsulto intercessit. Tum Manius Acilius & Q. Minucius tribuni plebis ad populum tulerunt, Vellent juberentne senatum decernere, ut cum Carthaginensibus pax fieret? & quem eam pacem dare, quemque ex Africa exercitus deportare juberent? De pace, uti rogassent, omnes tribus jusserunt: pacem dare P. Scipionem, eundem exercitus deportare. Ex hac rogatione senatus decrevit, ut P. Scipio ex decem legatorum sententia pacem cum populo Carthaginensi, quibus legibus ei videretur, faceret. Gratias deinde Patribus egere Carthaginenses: petieruntque, ut sibi in urbem introire, & colloqui cum civibus suis liceret, qui capti in publica custodia essent. esse in iis partim propinquos, amicosque suos, nobiles homines; partim ad quos mandata à propinquis haberent. Quibus con-

ventis, quum rursus peterent, ut sibi quos vellent ex iis redimendi potestas fieret, iussi nomina edere. & quum ducentos ferme ederent, senatusconsultum factum est, *Ut legati Romani ducentos ex captivis, quos Carthaginenses vellent, ad P. Cornelium Scipionem in Africam deportarent: nunciarentque ei, ut, si pax convenisset, sine pretio eos Carthaginensibus redderet.* Feciales quum in Africam ad fœdus ferendum ire juberentur, ipsis postulantibus, senatusconsultum in hæc verba factum est: *Ut privos lapides silices, privasque verbenas secum ferrent: uti prætor Romanus his imperaret, ut fœdus ferirent, illi prætorem sagmina poscerent.* Herbæ id genus ex arce sumptum dari fecialibus solet. Ita dimissi ab Roma Carthaginenses, quum in Africam venissent ad Scipionem, quibus antè dictum est legibus, pacem fecerunt, Naves longas, elephantos, perfugas, fugitivos, captivorum quatuor millia tradiderunt, inter quos Q. Terentius Culleo senator fuit. Naves provectas in altum incendi iussit. quingentas fuisse omnis generis, quæ remis agerentur, quidam tradunt. quarum conspectum repente incendium tam lugubre fuisse Pœnis, quàm si ipsa Carthago arderet. De perfugis gravius, quàm de fugitivis, consultum. nominis Latini qui erant, securi percussi: Romani in crucem sublati.

XLIV. Annis antè quadraginta pax cum Carthaginensibus postremò facta erat, Q. Lutatio, A. Manlio consulibus. bellum initum annis pòst tribus & viginti, P. Cornelio, Ti. Sempronio consulibus. Finitum est septimodecimo anno, Cn. Cornelio, P. Ælio Pæto consulibus. Sæpe postea ferunt Scipionem dixisse: Ti. Claudii primùm cupiditatem, deinde Cn. Corneli, fuisse in mora, quo minùs id bellum exitio Carthaginis finiret. Carthaginensibus quum prima
collatio

collatio pecuniæ diutino bello exhaustis difficilis videretur, mœstitiaque & fletus in curia esset, ridentem Annibalem ferunt conspectum. cujus quum Asdrubal Hædus risum increparet in publico fletu, quum ipse lacrimarum causâ esset; *Si quemadmodum oris habitus cernitur oculis, inquit, sic & animus intus cerni posset, facile vobis appareret, non læti, sed prope amentis malis cordis hunc, quem increpatis, risum esse, qui tamen nequaquam adeo est intempestivus, quàm vestræ istæ absurdæ atque abhorrentes lacrimæ sunt. Tunc flêsse decuit, quum adempta nobis arma, incensæ naves, interdictum externis bellis. illo enim vulnere concidimus. Nec esse in vos odio vestro consultum ab Romanis credatis. Nulla magna civitas diu quiescere potest. si foris hostem non habet, domi invenit: ut prævalida corpora ab externis causis tuta videntur, sed suis ipsa viribus onerantur. Tantum nimirum ex publicis malis sentimus, quantum ad privatas res pertinet: nec in eis quicquam acrius, quàm pecuniæ damnum, stimulat. Itaque quum spolia victæ Carthagini detrabebantur, quum inermem jam ac nudam destitui inter tot armatas gentes Africæ cerneretis, nemo ingemuit. nunc, quia tributum ex privato conferendum est, tanquam in publico funere comploratis. Quàm vereor, ne propediem sentiat levissimum in malo vos hodie lacrimâsse.* Hæc Annibal apud Carthaginieneses. Scipio, concione advocata, Masinissam ad regnum paternum Cirtha oppido, & ceteris urbibus agrisque, quæ ex regno Syphacis in populi Romani potestatem venissent, adjectis donavit. Cn. Octavium classem in Siciliam ductam Cn. Cornelio consuli tradere jussit. legatos Carthaginensium Romam proficisci, ut, quæ ab se ex decem legatorum sententia pacta essent, ea Patrum auctoritate populi-que jussu confirmarentur.

XLV. Pace terra marique parta, exercitu in naves imposito, in Siciliam Lilybœum trajecit. inde magna parte militum in navibus missa, ipse per lætam pace non minùs quàm victoria Italiam, effusis non urbibus modò ad habendos honores, sed agrestium etiam turba obsidente vias, Romam pervenit, triumphoque omnium clarissimo urbem est inuestus. Argenti tulit in ærarium pondo centum millia viginti tria. militibus ex præda quadragenos æris divisit. Morte substractus spectaculo magis hominum, quàm triumphantis gloriæ, Syphax est; Tibure haud ita multo antè mortuus, quò ab Alba traductus fuerat. conspecta mors tamen ejus fuit, quia publico funere est elatus. Hunc regem in triumpho ductum Polybius, haudquam spernendus auctor, tradit. Secutus Scipionem triumphantem est, pileo capiti imposito, Q. Terentius Culleo, omnique deinde vita, ut dignum erat, libertatis auctorem coluit. Africanum cognomen militaris priùs favor, an popularis aura celebraverit; an, sicuti Felicis Sullæ, Magnique Pompeii, patrum memoria, cœptum ab assentatione familiari sit, parum compertum habeo. Primus certè hic imperator nomine victæ ab se gentis est nobilitatus: exemplo deindè hujus, nequaquam victoria pares, insignes imaginum titulos, claraque cognomina familiæ fecere.





LIBER XXXI.

E P I T O M E.

XIV. ELLI adversus Philippum Macedoniarum regem, quod intermissum erat, repetiti causae feruntur hae. Tempore Initiorum duo juvenes Acarnanes, qui non initiati erant, Athenas venerunt, & in sacrarium Cereris cum aliis popularibus suis intraverunt. ob hoc, tanquam nefas summum commisissent, ab Atheniensibus caesi sunt. Acarnanes, mortibus suorum commoti, ad vindicandos illos auxilium à Philippo petierunt. V. Paucis mensibus post pacem Carthaginensibus datam, quum Atheniensium, qui oblidebantur à Philippo, legati auxilium à senatu petissent, & senatus id censuisset ferendum, plebe, quod tot bel-
 lorum continuus labor gravis erat, dissentiente, tenuit auctoritas Patrum, ut sociarum civitati ferri opem populus juberet. VI. Bellum id P. Sulpicio consuli mandatum est: XXXV, &c. qui, exercitu ad Macedoniam ducto, equestribus proeliis cum Philippo prospere pugnavit. XVI, &c. Abydeni à Philippo obsessi, ad exemplum Saguntinorum, suos seque occiderunt. XXI. L. Furius praetor Gallos Insubres rebellantes, & Amilcarem Poenum, bellum in ea parte molientem, acie vicit. Amilcar eo bello occisus est, & millia hominum triginta quinque. XV, &c. Praeterea expeditiones Philippi regis, & Sulpicii consulis, expugnationesque urbium ab utroque factas continet. XLVI. Sulpicius consul, adjuvantibus rege Attalo & Rhodiis, bellum gerebat. XLIX. Triumphavit de Gallis L. Furius praetor.

I.  E quoque juvat, velut ipse in parte laboris periculi fuerim, ad finem belli Punici pervenisse. nam etsi profiteri ausum, perscripturum res omneis Romanas, in partibus singulis tanti operis fatigari minimè convenit; tamen quum in mentem venit, tres & sexaginta annos (tot enim sunt à primo Punico ad secundum bellum finitum) æquè multa volumina occupâsse mihi, quàm occupârint quadringenti octoginta octo anni à condita urbe ad Appium Claudium consulem, qui primus bellum Carthaginiensibus intulit; jam provideo animo, velut qui proximis littori vadis inducti mare pedibus ingrediuntur, quicquid progredior, in vastiorem me altitudinem, ac velut profundum invehî, & crescere pene opus, quòd prima quæque perficiendo minui videbatur. Pacem Punicam bellum Macedonicum excepit; periculo haudquaquam comparandum, aut virtute ducis, aut militum robore: claritate regum antiquorum, vetustæque fama gentis, & magnitudine imperii, quo multam quondam Europæ, majorem partem Asiæ obtinuerant armis, propè nobilius. Ceterum cœptum bellum adversus Philippum decem ferme antè annis, triennio priùs depositum erat: quum Ætoli & belli & pacis fuissent causa. vacuos deinde pace Punica jam Romanos, & insensos Philippo, cum ob infidam adversus Ætolos aliosque regionis ejusdem socios pacem, tum ob auxilia cum pecunia nuper in Africam missa Annibali Pœnisque, preces Atheniensium, quos agro pervastato in urbem compulerat, excitaverunt ad renovandum bellum.

II. Sub idem fere tempus & ab Attalo rege & Rhodiis legati venerunt, nunciantes Asiæ quoque civitates sollicitari. His legationibus responsum est,

curæ

curæ Afianam rem senatui fore. Consultatio de Macedonico bello integra ad consules, qui tunc in prælio cum Boiis erant, rejecta est. Interim ad Ptolemæum Ægypti regem legati tres missi, C. Claudius Nero, M. Æmilius Lepidus, P. Sempronius Tuditanus: ut & annuntiarent victum Annibalem, Pœnosque; & gratias agerent regi, quòd in rebus dubiis, quum finitimi etiam socii Romanos defererent, in fide mansisset; & peterent, ut, si coacti injuriis bellum adversus Philippum suscepissent, pristinum animum erga populum Romanum conservaret. Eodem fere tempore P. Ælius consul in Gallia, quum audisset à Boiis ante suum adventum incursiones in agros sociorum factas, duabus legionibus subitariis tumultus ejus causa scriptis, additusque ad eas quatuor cohortibus de exercitu suo, C. Oppium præfectum socium hac tumultuaria manu per Umbriam (quam tribum Sappiniam vocant) agrum Boiorum invadere jussit. ipse eodem aperto itinere per medios montes duxit. Oppius ingressus hostium fines, primò populationes satis prosperè ac tutò fecit: delecto deinde ad castrum Mutilum satis idoneo loco ad demetenda frumenta (jam enim maturæ erant segetes) profectus, neque explorato circa, nec stationibus satis firmis, quæ armatæ inermes atque operi intentos tutarentur, positis, improvise impetu Gallorum cum frumentatoribus est circumventus. Inde pavor fugæ etiam armatos cepit. Ad septem millia hominum palata per segetes sunt cæsa: inter quos ipse C. Oppius præfectus. ceteri in castra metu compulsi, inde sine certo duce consensu militari proxima nocte, relicta magna parte rerum suarum, ad consulem per saltus propè invios pervenere: qui, nisi quòd populatus est Boiorum fines, & cum Ingaunis Liguribus fœdus icit, nihil, quod esset memorabile, aliud in provincia quum gessisset, Romam rediit.

III. Quum primùm senatum habuit, universis postulantis, ne quam priùs rem quàm de Philippo sociorumque querelis ageret; relatum extemplo est: decrevitque frequens senatus, ut P. Ælius consul, quem videretur ei, cum imperio mitteret, qui, classe accepta, quam ex Sicilia Cn. Octavius reduceret, in Macedoniam trajiceret. M. Valerius Lævinus prætor missus, circa Vibonem duodequadraginta navibus ab Cn. Octavio acceptis in Macedoniam transfudit. ad quem quum M. Aurelius legatus venisset, edocuisseque eum quantos exercitus, quantum navium numerum comparasset rex, & quemadmodum circa omnes non continentis modò urbes, sed etiam insulas, partim ipse adeundo, partim per legatos, conciret homines ad arma: majore conatu Romanis id capeffendum bellum esse, ne cunctantibus iis auderet Philippus, quod Pyrrhus priùs ausus ex aliquanto minore regno esset; hæc eadem scribere Aurelium consulibus & senatui placuit.

IV. Exitu hujus anni, quum de agris veterum militum relatum esset, qui ductu atque auspicio P. Scipionis in Africa bellum perfecissent; decreverunt Patres, ut M. Junius, prætor urbis, si ei videretur, decemviros agro Samniti Appuloque, quod ejus publicum populi Romani esset, metiendo dividendoque crearet. Creati P. Servilius, Q. Cæcilius Metellus, C. & M. Servilii (Geminis ambobus cognomen erat) L. & A. Hostilii Catones, P. Villius Tappulus, M. Fulvius Flaccus, P. Ælius Pætus, Q. Flaminius. Per eos dies P. Ælio consulum comitia habente, creati consules P. Sulpicius Galba, C. Aurelius Cotta. Prætores exinde facti Q. Minucius Rufus, L. Furius Purpureo, Q. Fulvius Gillo, Cn. Sergius Plancus. Ludi Romani scenici eo anno magnificè apparatusque facti

ab

Ante Chr.
200.

U.C. 552.

ab ædilibus curulibus L. Valerio Flacco & L. Quintio Flaminio. biduum instauratum est: frumenti-que vim ingentem, quod ex Africa P. Scipio miserat, quaternis æris populo cum summa fide & gratia dividerunt. Et plebei ludi ter toti instaurati ab ædilibus plebis, L. Apustio Fullone, & Q. Minucio Rufo, qui ex ædilitate prætor creatus erat. & Jovis epulum fuit ludorum causa.

V. Anno quingentesimo * quinquagesimo ab urbe condita, P. Sulpicio Galba, C. Aurelio consulibus, bellum cum rege Philippo initum est; paucis mensibus post pacem Carthaginensibus datam. Omnium primum eam rem Idibus Martiis, quo die tum consulatus inibat, P. Sulpicius consul retulit: senatusque decrevit, uti consules majoribus hostiis rem divinam facerent, quibus Diis ipsis videretur, cum precatione ea, *Quam rem senatus populusque Romanus de republica, deque inundo novo bello in animo haberet, ea res uti populo Romano, sociisque, ac nomini Latino bene ac feliciter eveniret*; secundum rem divinam, precationemque, ut de republica, deque provinciis senatum consulerent. Per eos dies, opportunè irritandis ad bellum animis, & literæ à M. Aurelio legato & M. Valerio Lævino proprætore allatæ: & Atheniensium nova legatio venit, quæ regem appropinquare finibus suis nuntiaret; brevique non agros modò, sed urbem etiam in ditione ejus futuram, nisi quid in Romanis auxilii foret. Quam pronuntiassent consules, rem divinam rite perfectam esse, & precationem admisisse Deos; aruspices respondere, lætaque exta fuisse, & prolationem finium, victoriamque, & triumphum portendit: tum literæ Valerii Aureliique lætæ, & legati Atheniensium auditi. Senatus inde consultum factum est,

* Quinquagesimo secundo. potius pro ratione Catonianâ. Vide clar. Dodwelli Tabb. ad Dionys. Halicarn.

ut sociis gratiæ agerentur, quòd, diu sollicitati, ne obsidionis quidem metu fide decessissent. de auxilio mittendo tum respondere placere, quum consules provincias fortiti essent; atque is consul, cui Macedonia provincia evenisset, ad populum tulisset, ut Philippo, regi Macedonum, indiceretur bellum.

VI. P. Sulpicio provincia Macedonia forte evenit. isque rogationem promulgavit; *Vellent, juberent Philippo regi Macedonibusque, qui sub regno ejus essent, ob injurias armaque illata sociis populi Romani, bellum indici.* alteri consuli Aurelio Italia provincia obtigit. Prætores exinde fortiti sunt, Cn. Sergius Plancus urbanam: Q. Fulvius Gillo Siciliam: Q. Minucius Rufus Bruttios: L. Furius Purpureo Galliam. Rogatio de bello Macedonico primis comitiis ab omnibus ferme centuriis antiquata est. id quum fessi diuturnitate & gravitate belli sua sponte homines tædio laborum periculorumque fecerant, tum Q. Bæbius, tribunus plebis, viam antiquam criminandi Patres ingressus, incusaverat bella ex bellis feri, ne pace unquam frui plebs posset. *Ægre eam rem passi Patres, laceratusque probris in senatu tribunus plebis: & consulem pro se quisque hortari, ut de integro comitia rogationi ferendæ ediceret, castigaretque segnitiam populi; atque doceret, quanto damno de decorique dilatio ea belli futura esset.*

VII. Consul, in campo Martio comitiis habitis, priusquam centurias in suffragium mitteret, concione advocata, *Ignorare, inquit, videmini mihi, Quirites, non, utrum bellum an pacem habeatis, vos consuli: (neque enim liberum id vobis permittet Philippus, qui terra marique ingens bellum molitur) sed utrum in Macedoniam legiones transportetis, an hostem in Italiam accipiat. Hoc quantum intersit, si unquam antè aliàs, Punico certè proximo bello experti estis. Quis enim dubitat,*
quin,

quin, si Saguntinis obsessis fidemque nostram implorantibus impigre tulissemus opem, sicut patres nostri Mamertinis tulerant, totum in Hispaniam aversuri bellum fuerimus, quod cunctando cum summa clade nostra in Italiam accepimus? Ne illud quidem dubium est, quin hunc ipsum Philippum, pactum jam per legatos literasque cum Annibale in Italiam trajicere, misso cum classe Lævino, qui ultro ei bellum inferret, in Macedonia continuerimus. Et, quod tunc fecimus, quum hostem Annibalem in Italia haberemus, id nunc, pulso Italia Annibale, devictis Carthaginienfibus, cunctamur facere? Patiamur expugnandis Athenis, sicut Sagunto expugnando Annibalem passus sumus, segnitiam nostram experiri regem. Non quinto inde mense, quemadmodum ab Sagunto Annibal, sed quinto inde die, quàm ab Corintho solverit naves, in Italiam perveniet. Ne æquaveritis Annibali Philippum, ne Carthaginienfibus Macedonas; Pyrrho certè æquabitis. dico, quantum vel vir viro, vel gens genti præstat. Minima accessio semper Epirus regno Macedoniae fuit, Et hodie est. Peloponnesum totam in ditione Philippus habet, Argosque ipsos; non vetere fama magis, quàm morte Pyrrhi nobilitatos. Nostra nunc compara. quanto magis florentem Italiam, quanto magis integras res, salvos ducibus, salvos tot exercitibus, quos Punicum postea bellum absumpsit, aggressus Pyrrhus tamen concussit, Et victor prope ad ipsam urbem Romam venit! Nec Tarentini modò, oraque illa Italiae, quam majorem Græciam vocant, ut linguam, ut nomen secutos crederes, sed Lucanus, Et Bruttius, Et Samnis à nobis defecerunt. Hæc vos, si Philippus in Italiam transmiserit, quietura aut mansura in fide creditis? Manserunt enim Punico postea bello. nunquam isti populi, nisi quum deerit ad quem desciscant, à nobis non deficient. Si piguisset vos in Africam trajicere, hodie in Italia Annibalem Et Carthaginienfes hostes haberetis. Macedonia potiùs, quàm Italia, bellum habeat. hostium urbes agri-
que

que ferro atque igni vastentur. Experti jam sumus, foris nobis, quàm domi, feliciora potentioraque arma esse. Ite in suffragium bene iuvantibus Diis: & quæ Patres censuerunt, vos jubete. Hujus vobis sententiæ non consul modò auctor est, sed etiam Dii immortales, qui mihi sacrificanti, præcantique, ut hoc bellum mihi, senatui, vobisque & sociis ac nomini Latino, classibus exercitibusque nostris bene ac feliciter eveniret, læta omnia prosperaque portendere.

VIII. Ab hac oratione in suffragium missi, uti rogârat, bellum jusserunt. Supplicatio inde à consulibus in triduum ex senatusconsulto indicta est; obsecratique circa omnia pulvinaria Dii, quod bellum cum Philippo populus jussisset, id bene ac feliciter eveniret. consultique feciales ab consule Sulpicio, bellum quod indiceretur regi Philippo, utrùm ipsi utique nunciari juberent; an satis esset, in finibus regni quod proximum præsidium esset, eò nunciari: feciales decreverunt, utrum eorum fecisset, rectè facturum. Consuli à Patribus permissum, ut, quem videretur ex iis, qui extra senatum essent, legatum mitteret ad bellum regi indicendum. Tum de exercitibus consulum prætorumque actum. consules binas legiones scribere jussi, veteres dimittere exercitus. Sulpicio, cui novum ac magni nominis bellum decretum erat, permissum, ut de exercitu, quem P. Scipio ex Africa deportâisset, voluntarios, quos posset, duceret: invitum ne quem militem veterem ducendi jus esset. Prætoribus, L. Furio Purpureoni & Q. Minucio Rufo, quina millia sociùm Latini nominis consul daret: quibus præfidiis alter Galliam, alter Bruttios provinciam obtineret. Q. Fulvius Gillo & ipse jussus ex eo exercitu, quem P. Ælius consul habuisset, ut quisque minimè multa stipendia haberet, legere, donec & ipse quinque millia sociùm

socium ac nominis Latini effecisset : id præsidio Siciliae provinciae esset. M. Valerio Faltoni, qui prætor priori anno Campaniam provinciam habuerat, prorogatum in annum imperium est, uti prætor in Sardiniam trajiceret : atque de exercitu, qui ibi esset, quinque millia socium nominis Latini, qui eorum minimè multa stipendia haberet, legeret. Et consules duas urbanas legiones scribere jussi : quæ, si quo res posceret, multis in Italia contactis gentibus Punici belli societate, iraque inde tumentibus, mitterentur. Sex legionibus Romanis eo anno usura respublica erat.

IX. In ipso apparatu belli legati ab rege Ptolemæo venerunt, qui nunciârunt ; *Athenienses adversus Philippum petisse ab rege auxilium. ceterum etsi communes socii sint, tamen, nisi ex auctoritate populi Romani, neque classem, neque exercitum defendendi aut oppugnandi cujusquam causa regem in Græciam missurum esse. Vel quieturum eum in regno, si populo Romano socios defendere liceat ; vel Romanos quiescere, si malint, passurum : atque ipsum auxilia, quæ facile adversus Philippum tueri Athenas possent, missurum. Gratia regi ab senatu actæ, responsumque ; Tutari socios populo Romano in animo esse. si qua re ad id bellum opus sit, indicaturos regi. regnique ejus opes scire subsidia firma ac fidelia suæ reipublicæ esse.* Munera deinde legatis in singulos quinum millium æris ex senatusconsulto missa. Quum delectum consules haberent, pararentque quæ ad bellum opus essent ; civitas religiosa, in principiis maximè novorum bellorum, supplicationibus habitis jam, & obsecratione circa omnia pulvinaria facta, ne quid prætermitteretur, quod aliquando factum esset ; ludos Jovi, donumque vovere consulem, cui provincia Macedonia evenisset, jussit. Moram voto publico Licinius pontifex maximus attulit,

tulit, qui negavit ex incerta pecunia vovere debere. *Si ea pecunia non posset in bellum usui esse; reponi statim debere, nec cum alia pecunia misceri. quod nisi factum esset, votum rite solvi non posse.* Quanquam & res, & auctor movebat; tamen ad collegium pontificum referre consul jussus, si posset rectè votum incertæ pecuniæ suscipi. posse, rectiusque etiam esse, pontifices decreverunt. Vovit in eadem verba consul, præeunte maximo pontifice, quibus antea quinquennalia vota suscipi solita erant: præterquam quòd tanta pecunia, quantam tum, quum solveretur, senatus censuisset, ludos, donaque facturum vovit. Toties antè ludi magni de certa pecunia voti erant: ii primi de incerta.

X. Omnium animis in bellum Macedonicum versis, repente nihil minus eo tempore timentibus Gallici tumultus fama exorta est. Insubres, Cœnomanique, & Boii, excitis Salyis, Ilvatibusque, & ceteris Ligustinis populis, Amilcare Pœno duce, qui in iis locis de Asdrubalis exercitu substiterat, Placentiam invaserant: & direpta urbe, ac per iram magna ex parte incensa, vix duobus millibus hominum inter incendia ruinasque relictis, trajecto Pado ad Cremonam diripiendam pergunt. Vicinæ urbis audita clades spatium colonis dedit ad claudendas portas, præsidiaque per muros disponenda: ut obsiderentur tamen prius quàm expugnarentur; nunciosque mitterent ad prætorem Romanum. L. Furius Purpureo, qui tum provinciæ præerat, cetero ex senatusconsulto exercitu dimisso, præter quinque millia sociùm ac Latini nominis, cùm iis copiis in proxima regione provinciæ circa Ariminum substiterat. is tum senatui scripsit; quo in tumultu provincia esset. *Duarum coloniarum, quæ ingentem illam tempestatem Punici belli subterfugissent, alteram captam ac direptam ab hostibus, alteram*

alteram oppugnari. Nec in exercitu suo satis præsidii colonis laborantibus fore, nisi quinque millia socium quadraginta millibus hostium (tot enim in armis esse) trucidanda objicere velit, & tanta sua clade jam inflatos excidio coloniae Romanae augere hostium animos.

XI. His literis recitatis decreverunt, ut C. Aurelius consul exercitum, cui in Etruriam ad conveniendum diem edixerat, Arimini eadem die adesse juberet: & aut ipse, si per commodum reipublicae posset, ad opprimendum Gallicum tumultum proficisceretur; aut L. Furio prætori scriberet, ut, quum ad eum legiones ex Etruria venissent, missis in vicem earum quinque millibus sociorum, qui interim Etruriæ præsidio essent, proficisceretur ipse ad coloniam liberandam obsidione. Legatos item mittendos in Africam censuerunt, eosdem Carthaginem, eosdem in Numidiam ad Masinissam. Carthaginem, ut nunciarent, civem eorum Amilcarem relictum in Gallia, baud satis scire ex Asdrubalis prius, an ex Magonis postea exercitu, bellum contra fœdus facere. exercitus Gallorum Ligurumque excivisse ad arma contra populum Romanum. eum, si pax placeret, revocandum illis, & dedendum populo Romano esse. simul nunciare jussi, perfugas sibi non omnes redditos esse. magnam partem eorum palam Carthagini observari dici: quos comprehendi conquirique debere, ut sibi ex fœdere restituantur. Hæc ad Carthaginenses mandata. Masinissæ gratulari jussi, quod non patrium modo recuperasset regnum. sed parte florentissima Syphacis finium adjecta etiam auxisset. Nunciare præterea jussi, bellum cum rege Philippo susceptum, quod Carthaginenses auxiliis juvisset, injuriasque inferendo sociis populi Romani, flagrante bello Italiae, coëgisset classes exercitusque in Græciam mitti; & dissinendo copias, caussa inprimis fuisset serius in Africam trajiciendi. Petere, ut ad id bellum mitteret auxilia Numidarum equitum. Dona
ampla

ampla data, quæ ferrent regi, vasa aurea argenteaque, toga purpurea, & palmata tunica: cum eburneo scipione, & toga prætexta cum curuli sella. jusque polliceri, si quid ei ad firmandum augendumque regnum opus esse judicasset, enixè id populum Romanum merito ejus præstaturum. Verminæ quoque, Syphacis filii, legati per eos dies senatum adierunt; excusantes errorem adolescentiamque, & culpam omnem in fraudem Carthaginensium avertentes. Et Masinissam Romanis ex hoste amicum factum: Verminam quoque annexurum, ne officiis in populum Romanum aut à Masinissa, aut ab ullo alio vincatur. Petere, ut rex, sociusque, & amicus ab senatu appellaretur. Responsum legatis est: & patrem ejus Syphacem sine causa ex socio & amico hostem repente populi Romani factum: & cum ipsum rudimentum adolescentiæ, bello laceffentem Romanos, posuisse. Itaque pacem illi prius petendam à populo Romano esse, quàm ut rex, sociusque, & amicus appelletur. Nominis ejus honorem pro magnis erga se regum meritis dare populum Romanum consueſſe. legatos Romanos in Africa fore: quibus mandaturum sexatum, ut Verminæ pacis dent leges: liberum arbitrium eis populo Romano permittente. Si quid ad eas addi, demi, mutarive vellet, rursus ab senatu ei postulandum fore. Legati cum iis mandatis in Africam missi, C. Terentius Varro, P. Lucretius, Cn. Octavius. quinqueremes singulis datæ.

XII. Literæ deinde in senatu recitatæ sunt Q. Minucii prætoris, cui Bruttii provincia erat, pecuniam Locris ex Proserpinæ thesauris nocte clam sublatam: nec, ad quos pertineat facinus, vestigia ulla exstare. Indignè passus senatus non cessari ab sacrilegiis: & ne Pleminius quidem, tam clarum recensque noxæ simul ac pœnæ exemplum, homines deterere. Cn. Aurelio consuli negotium datum, ut ad præ-

prætozem in Bruttios scriberet: senatui placere, quæstionem de expilatis thesauris eodem exemplo haberi, quo M. Pomponius prætor triennio ante habuisset. quæ inventa pecunia esset, reponi. si quo minus inventum foret, expleri: ac piacularia, si videretur, sicut antè pontifices censuissent, fieri causa expiandæ violationis ejus templi. Prodigia etiam sub idem tempus pluribus locis nunciata acciderunt. In Lucanis cælum arsisse afferebant: Priverni sereno per diem totum rubrum solem fuisse: Lanuvii templo Sospitæ Junonis nocte strepitum ingentem exortum. Jam animalium obscœni fœtus pluribus locis nunciabantur. in Sabinis incertus infans natus, masculus an fœmina esset: alter sexdecim jam annorum item ambiguo sexu inventus. Frusinone agnus cum fuillo capite: Sinuessæ porcus cum capite humano natus. in Lucanis in agro publico equuleus cum quinque pedibus. Fœda omnia & deformia, errantisque in alienos fœtus naturæ visa. Ante omnia abominati semimares, jussique in mare extemplo deportari: sicut proxime C. Claudio, M. Livio consulibus deportatus similis prodigii fœtus erat. Nihilo minus decemviros adire libros de portento eo jusserunt. Decemviri ex libris res divinas easdem, quæ proximè secundùm id prodigium factæ essent, imperârunt. carmen præterea ab ter novenis virginibus cani per urbem jusserunt, donumque Junoni reginæ ferri. Ea uti fierent, C. Aurelius consul ex decemvirorum responso curavit. Carmen sicut patrum memoria Livius, ita tum condidit P. Licinius Tegula.

XIII. Expiatis omnibus religionibus, (nam etiam Locris sacrilegium pervestigatum à Q. Minucio erat, pecuniaque ex bonis noxiorum in thesauros reposita) quum consules in provincias proficisci vellent; privati frequentes, quibus ex pecunia, quam M. Valerio & M.

M. Claudio consulibus mutuam dederant, tertia pensio debebatur eo anno, adierunt senatum: quia consules, quum ad novum bellum, quod magna classe magnisque exercitibus gerendum esset, vix ærarium sufficeret, negaverant esse, unde iis in præsentia solveretur. Senatus querentes eos non sustinuit, *Si in Punicum bellum pecunia data, in Macedonicum quoque bellum uti respublica vellet; aliis ex aliis orientibus bellis, quid aliud quàm publicatam pro beneficio tanquam ob noxam suam pecuniam fore?* Quum & privati æquum postularent, nec tamen solvendo ære alieno respublica esset, quod medium inter æquum & utile erat decreverunt, *Ut, quoniam magna pars eorum agros vulgò venales esse diceret, & sibi met emptis opus esse, agri publici, qui intra quinquagesimum lapidem esset, copia iis fieret. Consules agrum æstimaturos, & in jugera asses vectigales, testandi causa publicum agrum esse, imposituros: ut si quis, quum solvere posset populus, pecuniam habere, quàm agrum, mallet, restitueret agrum populo.* Læti eam conditionem privati acceperunt. Trientius, Tabuliusque is ager, quia pro tertia parte pecuniæ datus erat, appellatus.

XIV. Tum P. Sulpicius, secundum vota in Capitolio nuncupata, paludatus cum lictoribus profectus ab urbe, Brundisium venit: &, veteribus militibus voluntariis ex Africano exercitu in legiones descriptis, navibusque ex classe consulis Cornelii lectis, altera die, quàm à Brundisio solvit, in Macedoniam trajecit. Ibi ei præsto fuere Atheniensium legati, orantes, ut se obsidione eximeret. Missus extemplo Athenas est C. Claudius Cento cum viginti longis navibus, & militum copiis. neque enim ipse rex Athenas obsidebat. eo maximè tempore Abydum oppugnabat; jam cum Rhodiis & Attalo navalibus certaminibus, neutro feliciter prælio, vires expertus. Sed animos ei facie-

bet

bat, præter ferociam insitam, fœdus ictum cum Antiocho Syriæ rege: divisæque jam cum eo Ægypti opes; cui, morte audita Ptolemæi regis, ambo imminabant. Contraxerant autem sibi cum Philippo bellum Athenienses haudquaquam digna causa: dum ex vetere fortuna nihil præter animos servant. Acarnanes duo juvenes, per Initiorum dies non initiati, templum Cereris, imprudentes religionis, cum cetera turba ingressi sunt. Facile eos sermo prodidit, absurdè quædam percunctantes. deductique ad antistites templi, quum palam esset per errorem ingressos, tanquam ob infandum scelus interfecti sunt. Id tam fœde atque hostiliter factum gens Acarnanum ad Philippum detulit: impetravitque ab eo, ut, datis Macedonum auxiliis, bellum se inferre Atheniensibus pateretur. Hic exercitus, primò terram Atticam ferro ignique depopulatus, cum omnis generis præda in Acarnaniam rediit. & irritatio animorum ea prima fuit. postea justum bellum decretis civitatis ultro indicendo factum. Attalus enim rex Rhodique, secuti cedentem in Macedoniam Philippum, quum Æginam venissent; rex Piræum, renovandæ firmandæque cum Atheniensibus societatis causa, trajecit. Civitas omnis obviam effusa cum conjugibus ac liberis, sacerdotes cum insignibus suis intrantem urbem, ac Dii propè ipsi exciti sedibus suis exceperunt.

XV. In concionem extemplo populus vocatus, ut rex, quæ vellet, coram ageret. deinde ex dignitate magis visum, scribere eum, de quibus videretur, quàm præsentem aut referendis suis in civitatem beneficiis erubescere, aut significationibus acclamationibusque multitudinis, assentatione immodica pudorem onerantis. In literis autem, quæ missæ in concionem recitatæ sunt, commemoratio erat beneficiorum primùm in civitatem sociam: deinde rerum, quas adversus

Philippum gefisset: ad postremum adhortatio, capef-
 sendum bellum, dum se, dum Rhodios, tum quidem
 dum etiam Romanos haberent. nequicquam postea,
 si tum cessassent, prætermiffam occasionem quæfituros.
 Rhodii deinde legati auditi sunt, quorum recens erat
 beneficium, quòd naves longas quatuor Athenienfium
 captas nuper à Macedonibus, recuperatasque remife-
 rant. Itaque ingenti consensu bellum adverfus Phi-
 lippum decretum. Honores regi primùm Attalo im-
 modici, deinde & Rhodiis habiti. tum primùm mentio
 illata de tribu, quam Attalida appellarent, ad decem
 veteres tribus addenda. & Rhodiorum populus corona
 aurea virtutis gratia donatus, civitasque Rhodiis data,
 quemadmodum Rhodii priùs Athenienfibus dederant.
 Secundùm hæc rex Attalus Æginam ad classem se
 recepit. Rhodii Ciam ab Ægina, inde per infulas
 Rhodum navigârunt: omnibus, præter Andrum, Pa-
 rumque, & Cythnum, quæ præfidiis Macedonum te-
 nebantur, in societatem acceptis. Attalum Æginæ
 missi in Ætoliâ nuncii, exspectatique inde legati
 aliquamdiu nihil agentem tenere. & neque illos ex-
 cire ad arma potuit, gaudentes utcumque composita
 cum Philippo pace: & ipse, Rhodiique, si institissent
 tunc Philippo, egregium liberatæ per se Græciæ titu-
 lum habere potuissent; patiando rursus eum in Helle-
 spontum trajicere, occupantemque Græciæ opportuna
 loca vires colligere, bellum aluere; gloriamque ejus
 gesti perfectique Romanis concesserunt.

XVI. Philippus magis regio animo est usus: qui
 quum Attalum Rhodiosque hostes non sustinisset, ne
 Romano quidem, quod imminabat, bello territus,
 Philocle quodam ex præfectis suis, cum duobus milli-
 bus peditum, equitibus ducentis, ad populandos Athe-
 nienfium agros misso, classe tradita Heraclidi, ut Ma-
 roneam peteret, ipse terra eodem, cum expeditis duo-
 bus

bus millibus peditum, equitibus ducentis, pergit. & Maroneam quidem primo impetu expugnavit: Ænum inde cum magno labore, postremò proditione Gany-medis præfecti Ptolemæi cepit. deinceps alia castella, Cypsela, & Doriscon, & Serrheum, occupat. inde progressus ad Chersonesum, Elæunta & Alopeconnesum, tradentibus ipsis, recipit. Callipolis quoque & Madytos dedita, & castella quædam ignobilia. Abydeni, ne legatis quidem admissis, regi portas clausurunt. ea oppugnatio diu Philippum tenuit. eripique ex obsidione, ni cessatum ab Attalo & Rhodiis foret, potuerunt. Attalus trecentos tantum milites in præsidium, Rhodii quadriremem unam ex classe, quum ad Tenedum staret, miserunt. eodem postea, quum jam vix sustinerent obsidionem, & ipse Attalus quum trajecisset, spem tantum auxilii ex propinquo ostendit; neque terra neque mari adjutis fociis.

XVII. Abydeni primò tormentis per muros dispositis non terra modò adeuntes aditu arcebant; sed navium quoque stationem infestam hosti faciebant. postea quum & muri pars strata ruinis, & ad interiore rem raptim oppositum murum cuniculis jam perventum esset; legatos ad regem de conditionibus tradendæ urbis miserunt. Paciscebantur autem, ut Rhodiam quadriremem cum fociis navalibus, Attalique præsidium emitti liceret; atque ipsis urbe excedere cum singulis vestimentis. Quibus quum Philippus nihil pacati, nisi omnia permittentibus, respondisset: adeo renunciata hæc legatio ab indignatione simul ac desperatione iram accendit, ut, ad Saguntinam rabiem versi, matronas omnes in templo Dianæ, pueros ingenuos virginesque, infantes etiam cum suis nutritibus in gymnasium includi juberent: aurum & argentum in forum deferri: vestem pretiosam in naves Rhodiam Cyzicenamque, quæ in portu erant, conjici:

sacerdotes victimasque adduci, & altaria in medio poni. ibi delecti primùm, qui, ubi caesam aciem suorum pro diruto muro pugnantem vidissent, extemplo conjuges liberosque interficerent: aurum, argentum, vestemque, quæ in navibus esset, in mare dejicerent: testis publicis privatisque, quamplurimis locis possent, ignes subjicerent: & se facinus perpetraturos, præeuntibus execrabile carmen sacerdotibus, jurejurando adaacti: tum militaris ætas jurare, neminem vivum, nisi victorem, acie excessurum. Hi memores Deorum adeo pertinaciter pugnaverunt, ut, quum nox prælium diremptura esset, rex prior, territus rabie eorum, pugna abstiterit. Principes, quibus atrocior pars facinoris delegata erat, quum paucos, & confectos vulneribus ac lassitudine, superesse prælio cernerent; luce prima sacerdotes cum infulis ad urbem dedendam Philippo mittunt.

XVIII. Ante deditionem, ex iis legatis Romanis, qui Alexandriam missi erant, M. Æmilius trium consensu, minimus natus, audita obsidione Abydenorum, ad Philippum venit. qui questus Attalo Rhodiisque arma illata, & quòd tum maximè Abydum oppugnet, quum rex ab Attalo & Rhodiis ultro se bello laceratum diceret, *Num Abydeni quoque, inquit, ultro tibi intulerunt arma?* Insueto vera audire, ferocior oratio visa est, quàm quæ habenda apud regem esset. *Ætas, inquit, & forma, & super omnia Romanum nomen te ferociorem facit. Ego autem primùm velim vos fœderum memores servare mecum pacem. Si bello laceraveritis, mihi quoque in animo est facere, ut regnum Macedonum nomenque, haud minùs quàm Romanum, nobile bello sentiat. Ita dimisso legato, Philippus, auro argentoque, quæ coacervata erant, accepto, hominum prædam omnem amisit. tanta enim rabies multitudinem invasit, ut, repente proditos rati, qui pugnantes mortem occubu-*
issent,

issent, perjuriūque aliis alii exprobrantes, & sacerdotibus maximè, qui, quos ad mortem devovissent, eorum deditionem vivorum hosti fecissent, repente omnes ad eādem conjugum liberorumque discurrent, seque ipsi per omnes vias lethi interficerent. Obstupefactus eo furore rex suppressit impetum militum: &, *triduum se ad moriendum Abydenis dare*, dixit. Quo spatio plura facinora in se victi ediderunt, quàm infesti edidissent victores. nec, nisi quem vincula, aut alia necessitas mori prohibuit, quisquam vivus in potestatem venit. Philippus, imposito Abydi præsidio, in regnum rediit. Quum velut Sagunti excidium Annibali, sic Philippo Abydenorum clades ad Romanum bellum animos fecisset; nuncii occurrerunt, consulem jam in Epiro esse, & Apolloniam terrestres copias, navales Corcyram in hiberna deduxisse.

XIX. Inter hæc legatis, qui in Africam missi erant de Amilcare Gallici exercitus duce, responsum à Carthaginensibus est; nihil ultra se facere posse, quàm ut exilio eum mulcarent, bonaque ejus publicarent. Perfugas & fugitivos, quos inquirendo vestigare potuerint, reddidisse. & de ea re missuros legatos Romam, qui senatui satisfacerent. Ducenta millia modiū tritici Romam, ducenta ad exercitum in Macedoniam miserunt. Inde in Numidiam ad reges profecti legati. dona data Masinissæ, mandataque edita. Equites mille Numidæ (quum duo millia daret) accepti. ipse in naves imponendos curavit: & cum ducentis millibus modiū tritici, ducentis hordei, in Macedoniam misit. Tertia legatio ad Verminam erat. Is ad primos fines regni obviam progressus, ut scriberent ipsi quas vellent pacis conditiones, permisit. omnem pacem bonam justamque fore sibi cum populo Romano. Datæ leges pacis, jussusque ad eam confirmandam mittere legatos Romam.

XX. Per idem tempus L. Cornelius Lentulus proconsul ex Hispania rediit. qui quum in senatu res ab se per multos annos fortiter feliciterque gestas exposuisset, postulassetque ut triumphanti sibi invehi liceret in urbem; res triumpho dignas esse censebat senatus; sed exemplum à majoribus non accepisse, ut qui neque dictator, neque consul, neque prætor res gessisset, triumpharet. Proconsulem illum Hispaniam provinciam, non consulem, aut prætorem, obtinuisse. Decurrebatur tamen eò, ut ovans urbem iniret; intercedente Ti. Sempronio Longo tribuno plebis, qui nihil magis id more majorum, aut ullo exemplo, futurum diceret. postremò victus consensu Patrum tribunus cessit: & ex senatusconsulto L. Lentulus ovans urbem eît ingressus. Argenti tulit ex præda quadraginta quatuor millia pondo: auri duo millia quadringenta L. militibus ex præda centum viginti asses divisit.

XXI. Jam exercitus consularis ab Arretio Ariminum traductus erat, & quinque millia sociùm Latini nominis ex Gallia in Etruriam transierant. itaque L. Furius magnis itineribus ab Arimino adversus Gallos, Cremonam tum obsidentes, profectus, castra mille quingentorum passuum intervallo ab hoste posuit. Occasio egregiè rei gerendæ fuit, si protinus de via ad castra oppugnanda duxisset. palati passim vagabantur per agros, nullo satis firmo relicto præsidio. lassitudini militum timuit, quòd raptim ductum agmen erat. Galli clamore suorum ex agris revocati, omissa præda quæ in manibus erat, castra repetivere; & postero die in aciem progressi. nec Romanus moram pugnandi fecit. sed vix spatium instruendi fuit: eo cursu hostes in proelium venerunt. Dextra ala (in alas divisum socialem exercitum habebat) in prima acie locata est: in subsidiis duæ Romanæ legiones. M. Furius dextræ alæ, legionibus M. Cæcilius, equitibus

tibus L. Valerius Flaccus (legati omnes erant) præpositi. Prætor secum duos legatos, Cn. Lætorium & P. Titinnium, habebat; cum quibus circumspicere, & obire ad omnes hostium subitos conatus posset. Primò Galli, omni multitudine in unum locum adnixa, obruere atque obterere sese dextram alam, quæ prima erat, sperârunt posse. ubi id parum procedebat, circumvenire à cornibus, & amplecti hostium aciem (quod in multitudine adversus paucos facile videbatur) conati sunt. Id ubi vidit prætor, ut & ipse dilataret aciem, duas legiones ex subsidiis dextra lævaque alæ, quæ in prima acie pugnabat, circumdat; ædemque Deo Jovi vovit, si eo die hostes fudisset. L. Valerio imperat, ut parte duarum legionum equites, altera sociorum equitatum in cornua hostium emittat, nec circumvenire eos aciem patiatur. simul & ipse, ut extenuatam mediam diductis cornibus aciem Gallorum vidit, signa inferre confertos milites, & perumpere ordines jubet. Et cornua ab equitibus, & medii à pedite pulsi. ac repente, quum omni parte cæde ingenti sternerentur, Galli terga vertunt, fugaque effusa repetunt castra. fugientes persecutus eques: mox & legiones insecutæ in castra impetum fecerunt. Minus sex millia hominum inde effugerunt. caesa & capta supra quinque & triginta millia cum signis militaribus octoginta, carpentis Gallicis, multa præda oneratis, plus ducentis. Amilcar dux Pœnus eo prælio cecidit, & tres imperatores nobiles Gallorum. Placentini captivi ad duo millia liberorum capitem redditi colonis.

XXII. Magna victoria lætaque Romæ fuit. literis allatis, supplicatio in triduum decreta est. Romanorum sociorumque ad duo millia eo prælio ceciderunt: plurimi dextræ alæ, in quam primo impetu vis ingens hostium illata est. Quanquam per prætorem prope

debellatum erat, consul quoque C. Aurelius, perfectis quæ Romæ agenda fuerant, profectus in Galliam, victorem exercitum à prætore accepit. Consul alter, quum autumno ferme exacto in provinciam venisset, circa Apolloniam hibernabat. ab classe, quæ Corcyræ subducta erat, C. Claudius, triremesque Romanæ (sicut antè dictum est) Athenas missæ quum Piræeum pervenissent, despondentibus jam animos fociis spem ingentem attulerant. nam & terrestres ab Corintho, quæ per Megaram incurfiones in agros fieri solitæ erant, non fiebant: & prædonum à Chalcide naves, quæ non mare solùm infestum, sed etiam omnes maritimos agros Atheniensibus fecerant, non modò Sunium superare, sed nec extra fretum Euripi committere aperto mari se audebant. Supervenerunt his tres Rhodiæ quadriremes: & erant Atticæ tres apertæ naves ad tuendos maritimos agros comparatæ. Hac classe si urbs agrique Atheniensium defenderentur, fatis in præsentia existimanti Claudio esse, majoris etiam rei fortuna oblata est.

XXIII. Exsules ab Chalcide regionum injuriis pulsi attulerunt, occupari Chalcidem sine certamine ullo posse. nam & Macedonas, quia nullus in propinquo sit hostium metus, vagari passim: & oppidanos, præsidio Macedonum fretos, custodiam urbis negligere. His auctoribus profectus, quanquam Sunium ita maturè pervenerat, ut inde provehi ad primas angustias Eubœæ posset, ne superato promontorio conspiceretur, classem in statione usque ad noctem tenuit. Primis tenebris movit: & tranquillo pervectus Chalcidem, paullo ante lucem, quæ infrequentissima urbis sunt, paucis militibus turrim proximam, murumque circa scalis cepit: alibi sopitis custodibus, alibi nullo custodiente, progressi inde ad frequentia ædificiis loca, custodibus interfectis, refractaque porta, ceteram multitudi-

multitudinem armatorum acceperunt. Inde in totam urbem discursum est; aucto etiam tumultu, quò circa forum ignis testis injectus erat. Conflagrârunt & horrea regia, & armamentarium cum ingenti apparatu machinarum tormentorumque. cædes inde passim fugientium pariter ac repugnantium fieri ccepta est. nec ullo jam, qui militaris ætatis esset, non aut cæso, aut fugato; Sopatro etiam Acarnane, præfecto præsidii, interfecto, præda omnis primò in forum collata, deinde in naves imposita. carcer etiam ab Rhodiis refractus: emissique captivi, quos Philippus tanquam in tutissimam custodiam condiderat. Statuis inde regis dejectis truncatisque, signo receptui dato conscenderunt naves; & Piræum, unde profecti erant, redierunt. Quòd si tantum militum Romanorum fuisset, ut & Chalcis teneri, & non deferi præsidium Athenarum potuisset; magna res principio statim belli, Chalcis & Euripus adempta regi forent. nam ut terra Thermopylarum angustia Græciam, ita mari fretum Euripi claudit.

XXIV. Demetriade tum Philippus erat. quò quum esset nunciata clades sociæ urbis, quanquam serum auxilium peditis erat, tamen, quæ proxima auxilio est, ultionem petens, cum expeditis quinque millibus peditum & trecentis equitibus extemplo profectus, cursu prope Chalcidem contendit; haudquaquam dubius opprimi Romanos posse. à qua destitutus spe, nec quicquam aliud, quàm ad deforme spectaculum semirutæ ac fumantis sociæ urbis, quum venisset, paucis vix, qui sepelirent bello absumptos, relictis, æquè raptim ac venerat, transgressus ponte Euripum, per Bœotiam Athenas ducit; pari incepto haud disparem eventum ratus responsurum. & respondisset, nì speculator (hemerodromos vocant Græci, ingens die uno cursu emetientes spatium)

contemplatus regium agmen è specula quadam, prægressus nocte media Athenas pervenisset. Idem ibi somnus eademque negligentia erat, quæ Chalcidem dies antè paucos prodiderat. Excitati nuncio trepido & prætor Athenensium, & Dioxippus præfectus cohortis mercede militantium auxiliorum, convocatis in forum militibus, tuba signum ex arce dari jubent, ut hostes adesse omnes scirent. ita undique ad portas, post ad muros discurrunt. Paucas post horas Philippus, aliquanto tamen ante lucem appropinquans urbi, conspectis luminibus crebris, & fremitu hominum trepidantium (ut in tali tumultu) exaudito, sustinuit signa: & confidere ac conquiescere agmen iussit; vi aperta propalam usus, quando parum dolus profuerat. Ab Dipylo accessit. porta ea, velut in ore urbis posita, major aliquanto patientiorque, quàm ceteræ, est: & intra eam extraque latæ sunt viæ, ut & oppidani dirigere aciem à foro ad portam possent; & extra limes mille ferme passus in Academix gymnasium ferens, pediti equitque hostium liberum spatium præberet. Eo limite Athenienses cum Attali præsidio & cohorte Dioxippi, acie intra portam instructa, signa extulerunt. Quod ubi Philippus vidit, habere se hostes in potestate ratus, & diu optata cæde (neque enim ulli Græcarum civitatum infestior erat) expleturum, cohortatus milites, *ut se intuentes pugnarent, scirentque ibi signa, ibi aciem esse debere, ubi rex esset*; concitat in hostes equum, non ira tantum, sed etiam gloria elatus, quod, ingenti turba completis etiam ad spectaculum muris, conspici se pignantem, egregium ducebat. Aliquantum ante aciem cum equitibus paucis evehens in medios hostes, ingentem cum suis ardorem, tum pavorem hostibus iniecit. plurimos manu sua cominus eminusque vulneratos, compulsosque in portam consecutus

secutus & ipse; quum majorem in angustiis trepidantium edidisset cædem, in temerario incepto tutum tamen receptum habuit. quia qui in turribus portæ erant, sustinebant tela, ne in permistos hostibus suos conjicerent. Intra muros deinde tenentibus milites Atheniensibus, Philippus, signo receptui dato, castra ad Cynosarges (templum Herculis, gymnasiumque, & lucus erat circumjectus) posuit. sed Cynosarges, & Lyceum, & quicquid sancti amœnive circa urbem erat, incensum est: dirutaque non tecta solum, sed etiam sepulchra: nec divini humanive juris quicquam præ impotenti ira est servatum.

XXV. Postero die quum primò clausæ fuissent portæ, deinde subitò apertæ, quia præsidium Attali ab Ægina, Romanique ab Piræeo intraverant urbem, castra ab urbe retulit rex tria ferme millia passuum. inde Eleusinem profectus, spe improvisò templi castelliue, quod & imminet & circumdatum est templo, capiendi: quum haudquaquam neglectas custodias animadvertisset, & classem à Piræeo subsidio venire; omisso incepto, Megaram, ac protinus Corinthum ducit. & quum Argis Achæorum concilium esse audisset, inopinantibus Achæis, concioni ipsi supervenit. Consultabant de bello adversus Nabin, tyrannum Lacedæmoniorum: qui, translato imperio à Philopœmene ad Cycliadem, nequaquam parem illi ducem, dilapsa cernens Achæorum auxilia, redintegraverat bellum; agrosque finitimorum vastabat; & jam urbibus quoque erat terribilis. Adversus hunc hostem quum, quantum ex quaque civitatum militum conscriberetur, consultarent; Philippus dempturum se eis curam, quod ad Nabin & Lacedæmonios attineret, pollicitus: nec tantum agros sociorum populationibus prohibitorum, sed terrorem omnem.

omnem belli in ipsam Laconiam, ducto eò exemplo exercitu, translaturum. Hæc oratio quum ingenti hominum assensu acciperetur: *Ita tamen æquum est, inquit, me vestra meis armis tutari, ne mea interim nudentur præfidiis. Itaque, si vobis videtur, tantum parate militum, quantum ad Orcum, & Chalcidem, & Corinthum tuenda satis sint: ut, meis ab tergo tutis, securus bellum Nabidi inferam & Lacedæmoniis.* Non fefellit Achæos, quò spectâisset tam benigna pollicitatio, auxiliumque oblatum adversus Lacedæmonios: id quæri, ut obsidem Achæorum juventutem educeret ex Peloponneſo, ad illigandam Romano bello gentem. & id quidem coarguere Cycliades, prætor Achæorum, nihil attinere ratus, id modò quum dixisset, non licere legibus Achæorum de aliis rebus referre, quàm propter quas convocati essent, decreto de exercitu parando adversus Nabin factò, concilium fortiter ac libere habitum dimisit; inter assentatores regio ante eam diem habitus. Philippus magna spe depulsus, voluntariis paucis militibus conscriptis, Corinthum, atque in Atticam terram rediit.

XXVI. Per eos ipsos dies, quibus Philippus in Achaia fuit, Philocles, præfectus regius, ex Eubœa profectus cum duobus millibus Thracum Macedonumque ad depopulandos Atheniensium fines, è regione Eleusinis saltum Citheronis transcendit. inde dimidia parte militum ad prædandum passim per agros dimissa, cum parte ipse occultus loco ad infidias opportuno consedit; ut, si ex castello ab Eleusine in prædantes suos impetus fieret, repente hostes effusos ex improvviso adoriretur. Non fefellere infidiae. itaque revocatis, qui discurrerant ad prædandum, militibus, instructisque, ad oppugnandum castellum Eleusinem profectus, cum multis inde vulneribus

neribus recessit, Philippoque se venienti ex Achaia conjunxit. Tentata & ab ipso rege oppugnatio ejus castelli est. sed naves Romanæ, Piræeo venientes, intromissumque præsidium abistere incepto cogerunt. Diviso deinde exercitu rex cum parte Philoclem Athenas mittit, cum parte ipse Piræeum pergit: ut, dum Philocles subeundo muros, & comminanda oppugnatione contineret urbe Athenienses, ipsi Piræeum levi cum præsidio relictum expugnandi facultas esset. Ceterum nihilo ei Piræei, quàm Eleufinis, facilior, iisdem fere defendentibus, oppugnatio fuit. A Piræeo Athenas repente duxit. inde eruptione subita peditum equitumque inter angustias semiruturi muri, qui brachiis duobus Piræeum Athenis jungit, repulsus; omissa oppugnatione urbis, diviso cum Philocle rursus exercitu, ad vastandos agros profectus; quum priorem populationem sepulchris circa urbem diruendis exercuisset, ne quid inviolatum relinqueret, templa Deum, quæ pagatim sacrata habebant, dirui atque incendi jussit. Exornata eo genere operum eximie terra Attica, & copia domestici marmoris, & ingeniis artificum, præbuit huic furori materiam. neque enim diruere modò ipsa templa, ac simulacra evertere satis habuit: sed lapides quoque, ne integri cumularent ruinas, frangi jussit. & posteaquam non tam irafacta, quàm iræ exercendæ materia hæc deerat; agro hostium in Bœotiam excessit, nec aliud quicquam dignum memoria in Græcia egit.

XXVII. Consul Sulpicius eo tempore inter Apolloniam ac Dyrrhachium ad Apsum flumen habebat castra: quò arcessitum L. Apustium legatum cum parte copiarum ad depopulandos hostium fines mittit. Apustius extrema Macedoniæ populatus, Corrago, & Gerrunio, & Orgesso castellis primo impetu captis,

captis, ad Antipatriam, in faucibus angustis sitam urbem, venit. ac primò evocatos principes ad colloquium, ut fidei Romanorum se committerent, perlicere est conatus: deinde ubi, magnitudine ac mœnibus situque urbis freti, dicta aspernabantur, vi atque armis adortus, expugnavit: puberibusque interfectis, præda omni militibus concessa, diruit muros atque urbem incendit. Hic metus Codrionem, satis validum & munitum oppidum, sine certamine ut dederetur Romanis, effecit. Præsidio ibi relicto, Ilion (nomen propter alteram in Asia urbem, quàm oppidum, notius) vi capitur. Revertentem legatum ad consulem cum satis magna præda, Athenagoras quidam regius præfectus, in transitu fluminis à novissimo agmine adortus, postremos turbavit. ad quorum clamorem & trepidationem quum revectus equo propere legatus signa convertisset, coniectis in medium sarcinis aciem direxisset, non tulere impetum Romanorum militum regii. multi ex iis occisi: plures capti. Legatus, incolumi exercitu reducto ad consulem, remittitur inde extemplo ad classem.

XXVIII. Hac satis felici expeditione bello commisso, reguli ac principes accolæ Macedonum in castra Romana veniunt; Pleuratus Scerdilædi filius, & Amynder Athamanum rex, & ex Dardanis Bato, Longari filius. Bellum suo nomine Longarus cum Demetrio Philippi patre gesserat. Pollicentibus auxilia respondit consul, Dardanorum & Pleurati opera, quum exercitum in Macedoniam induceret, se usurum. Amynandro Ætolos concitandos ad bellum attribuit. Attali legatis (nam ii quoque per id tempus venerant) mandat, ut Æginæ rex, ubi hibernabat, classem Romanam opperiretur. qua adjuncta, bello maritimo, sicut antè, Philippum urgeret.

ret. Ad Rhodios quoque missi legati, ut capefferent partem belli. Nec Philippus segniùs (jam enim in Macedoniam pervenerat) apparabat bellum. Filium Persea, puerum admodum, datis ex amicorum numero qui ætatem ejus regerent, cum parte copiarum ad obsidendas angustias quæ ad Pelagoniam sunt, mittit. Sciathum & Peparethum, haud ignobiles urbes, ne classi hostium prædæ ac præmio essent, diruit. Ad Ætolos mittit legatos, ne gens inquieta adventu Romanorum fidem mutaret.

XXIX. Concilium Ætolorum statuta die, quod Panætolum vocant, futurum erat. Huic ut occurrerent, & legati regis iter accelerârunt, & ab consule missus L. Furius Purpureo legatus venit. Atheniensium quoque legati ad id concilium occurrerunt. Primò Macedones, cum quibus recentissimum fœdus erat, auditi sunt. qui, *nulla nova re, nihil se novi habere, quod afferrent, dixerunt. quibus enim de causis, experta inutili societate Romana, pacem cum Philippo fecissent, compositam semel servare eos debere. An imitari, inquit unus ex legatis, Romanorum licentiam, an levitatem dicam, mavultis?* qui quum legatis vestris Romæ responderi ita jussissent, *Quid ad nos venitis Ætoli, sine quorum auctoritate pacem cum Philippo fecistis? Idem nunc, ut bellum secum adversus Philippum geratis, postulant. Et antea propter vos, Et pro vobis arma sumpta adversus eum simulabant: nunc vos in pace esse cum Philippo prohibent, Messanæ ut auxilio essent: primò in Siciliam conscenderunt; iterum, ut Syracusas oppressas ab Carthaginensibus in libertatem eximerent. Et Messanam Et Syracusas, Et totam Siciliam ipsi habent: vectigalemque provinciam securibus Et fascibus subjecerunt. Scilicet, sicut vos Naupacti legibus vestris per magistratus à vobis creatos concilium habetis, socium hostemque libere, quem*
velitis,

velitis, lecturi, pacem ac bellum arbitrio habituri ~~estis~~ ^{estis} ; sic Siculorum civitatibus Syracusas, aut Messanam, aut Lilybæum indicitur concilium. Prætor Romanus conventus agit. eo imperio evocati conveniunt. excelsi in suggestu superba jura reddentem, stipatum liæoribus vident : virgæ tergo, secures cervicibus immincent : & quotannis alium atque alium dominum fortiuntur. Nec id mirari debent, aut possunt ; quum Italiæ urbes, Rhegium, Tarentum, Capuam, ne finitimas nominem, quarum ruinis crevit urbs Romana, ejusdem subiectas videant imperio. Capua quidem, sepulchrum ac monumentum Campani populi, elato & extorri ejecto ipso populo, superest ; urbs trunca, sine senatu, sine plebe, sine magistratibus, prodigium ; relicta crudeliùs habitanda, quàm si deleta foret. Furor est, si alienigenæ homines, plus lingua & moribus & legibus quàm maris terrarumque spatio discreti, hæc tenuerint, sperare quicquam eodem statu mansurum. Philippi regnum officere aliquid videtur libertati vestræ : qui, quum merito vestro vobis infestus esset, & nihil à vobis ultra quàm pacem petiit, fidemque hodie pacis pactæ desiderat ? Assuefacite his terris legiones externas, & jugum accipite : serò ac nequicquam, quum dominum Romanum habebitis, socium Philippum quæretis. Ætolos, Acarnanas, Macedonas, ejusdem linguæ homines, leves ad tempus ortæ causæ disjungunt conjunguntque : cum alienigenis, cum barbaris æternum omnibus Græcis bellum est, eritque. natura enim, quæ perpetua est, non mutabilibus in diem causis, hostes sunt. Sed unde cæpit oratio mea, ibi desinet. Hoc eodem loco iidem homines de ejusdem Philippi pace triennio antè decrevistis, iisdem improbantibus eam pacem Romanis, qui nunc pactam & compositam turbare volunt. & in qua consultatione nihil fortuna mutavit : cur vos mutetis, non video.

XXX. Secundum Macedonas, ipsis Romanis ita concedentibus jubentibusque, Athenienses, qui, fœda passi, iustius in crudelitatem sævitiamque regis in-vehi poterant, introducti sunt. Deploraverunt vastationem populationemque miserabilem agrorum. Neque id se queri, quod hostilia ab hoste passi forent, (esse enim quædam belli jura; quæ ut facere, ita pati sit fas.) sata exuri, dirui testæ, prædas hominum pecorumque agi; misera magis, quam indigna patienti esse. Verum enimvero id se queri, quod is, qui Romanos alienigenas & barbaros vocet, adeo omnia simul divina humanaque jura polluerit, ut priore populatione cum inferis Diis, secunda cum superis bellum nefarium gesserit: omnia sepulchra monumentaque diruta esse in finibus suis, omnium nudatos manes, nullius ossa terra tegi: delubra sibi fuisse, quæ quondam pagatim habitantes in parvis illis castellis vicisque consecrata, ne in unam urbem quidem contributi majores sui deserta reliquerint. circa ea omnia templa Philippum infestos circumtulisse ignes: semivsta & truncata simulacra Deum inter prostratos jacere postes templorum. Qualem terram Atticam fecerit, exornatam quondam, opulentamque; talem eum, si liceat, Ætoliam Græciamque omnem facturum. Urbis quoque suæ similem deformitatem futuram fuisse, nisi Romani subvenissent. eodem enim scelere urbem colenteis Deos, præsidemque arcis Minervam petitam; eodem Eleusine Cere-
ris templum, eodem Piræei Jovem Minervamque: sed ab eorum non templis modo, sed etiam mœnibus vi atque armis repulsum, in ea delubra, quæ sola religione tuta fuerint, sævisse. Itaque se orare atque obsecrare, Ætolos, ut miserti Atheniensem, ducibus Diis immortalibus, deinde Romanis, qui secundum Deos plurimum possint, bellum susciperent.

XXXI. Tum Romanus legatus: *Totam orationis meae formam Macedones primum, deinde Athenienses mutarunt. Nam & Macedones, quum, ad conquerendas Philippi injurias in tot socias nobis urbes, venissem, ultro accusando Romanos, defensionem ut accusatione potiore haberem, effecerunt: & Athenienses, in Deos superos inferosque nefanda atque inhumana scelera ejus referendo, quid mihi aut cuiquam reliquerunt, quod objicere ultra possim? Eadem Cianos, Abydenos, Aeneos, Maronitas, Thasios, Parios, Samios, Larissenses, Messenios, hinc ex Achaia existimate queri: graviora etiam acerbioraque eos, quibus nocendi majorem facultatem habuit. Nam quod ad ea attinet, quae nobis objecit; nisi gloria digna sunt, fateor ea defendi non posse. Rhegium, & Capuam, & Syracusas nobis objecit. Rhegium, Pyrrhi bello, legio à nobis, Rheginis ipsis ut mitteremus orantibus, in praesidium missa, urbem, ad quam defendendam missa erat, per scelus possedit. Comprobavimus ergo id facinus, an bello persecuti sceleratam legionem, in potestatem nostram redactam, tergo & cervicibus poenas fociis pendere quum coegissemus, urbem, agros, suaeque omnia cum libertate legibusque Rheginis reddidimus? Syracusanis oppressis ab externis tyrannis, quo indignius esset, quum tulissemus opem, & fatigati propè per triennium terra marique urbe munitissima oppugnanda essemus, quum jam ipsi Syracusani servire tyrannis, quam capi à nobis mallent; captam iisdem armis, & liberatam urbem reddidimus. Neque inficias imus, Siciliam provinciam nostram esse, & civitates, quae in parte Carthaginensium fuerunt, & uno animo cum illis adversus nos bellum gesserunt, stipendiarias nobis ac vectigales esse. quin contra, hoc & vos & omnes gentes scire volumus, pro merito cuique erga nos fortunam esse. An Campanorum poenae, de qua neque ipsi quidem queri possunt, nos poeniteat? Hi homines, quum*

quum pro iis bellum adversus Samnites per annos propè septuaginta cum magnis nostris cladibus gessissemus; ipsos fœdere primum, deinde connubio, atque inde cognationibus, postremò civitate nobis conjunxissemus; tempore nostro adverso primi omnium Italiæ populorum, præsidio nostro fœdè interfecto, ad Annibalem defecerunt: deinde indignati se obsideri à nobis, Annibalem ad oppugnandam Romam miserunt. Horum si neque urbs ipsa, neque homo quisquam superesset, quis durius quàm pro merito ipsorum statutum indignari posset? Plures se ibimet ipsi conscientia scelerum mortem consciverunt, quàm à nobis supplicio affecti sunt. Ceteris ita oppidum, ita agros ademimus, ut agrum locumque ad habitandum daremus; urbem innoxiam stare incolumens pateremur, ut qui hodie videat eam, nullum oppugnatae captæve ibi vestigium inveniat. Sed quid ego Capuam dico, quum Carthagini victæ pacem ac libertatem dederimus? Magis illud est periculum, ne nimis facile victis ignoscendo, plures ob id ipsum ad experiendam adversus nos fortunam belli incitemus. Hæc pro nobis dicta sint, hæc adversus Philippum, cujus domestica parricidia,, & cognatorum amicorumque cædes, & libidinem, inhumaniorem prope quàm crudelitatem, vos, quo propiores Macedoniæ estis, meliùs nostis. Quod ad vos attinet Ætoli; nos pro vobis bellum suscepimus, adversus Philippum: vos sine nobis cum eo pacem fecistis. Et forsitan dicatis, bello Punico occupatis nobis, coactos metu vos, leges pacis ab eo, qui tum plus poterat, accepisse: & nos quum alia majora urgerent, depositum à vobis bellum & ipsi omisimus. Nunc & nos, Deum benignitate Punico perfectò bello, totis viribus nostris in Macedoniam incubuimus: & vobis restituendi vos in amicitiam societatemque nostram fortuna oblata est; nisi perire cum Philippo, quàm vincere cum Romanis mavultis.

XXXII. Hæc dicta ab Romano quum essent, inclinatis omnium animis ad Romanos, Damocritus prætor Ætolorum, pecunia, ut fama est, ab rege accepta, nihil aut huic aut illi parti assensus. *Rem magni discriminis consiliis nullam esse tam inimicam, quam celeritatem, dixit. Celerem enim pœnitentiam, sed eandem feram atque inutilem sequi; quum præcipitata raptim consilia neque revocari, neque in integrum restitui possint. Deliberationis autem ejus, cujus ipse maturitatem expectandam putaret, tempus ita jam nunc statui posse. quum legibus cautum esset, ne de pace bello, nisi in Panætologico & Pylaico concilio ageretur, decernerent extemplo, ut prætor sine fraude, quum de bello aut de pace agere velit, advoceet concilium: & quod tum referatur decernaturque, ut perinde jus ratumque sit, ac si in Panætologico aut Pylaico concilio actum esset.* Dimissis ita suspensa re legatis, egregiè consultum genti aiebat. nam utrius partis melior fortuna belli esset, ad ejus societatem inclinatu-
ros. Hæc in concilio Ætolorum acta.

XXXIII. Philippus impigre terra marique parabat bellum. navales copias Demetriadem in Theffalia contrahebat: Attalum, Romanamque classem principio veris ab Ægina ratus moturos, navibus maritimæque oræ præfecit Heraclidem, quem & antè præfecerat. ipse terrestres copias comparabat: magna se duo auxilia detraxisse Romanis credens: ex una parte Ætolos, ex altera Dardanos, faucibus ad Pelagoniam à filio Perseo interclusis. Ab consule non parabatur, sed gerebatur jam bellum. per Dassaretiorum fines exercitum ducebat, frumentum, quod ex hibernis extulerat, integrum vehens; quod in usum militi satis esset, præbentibus agris. Oppida vicique, partim voluntate, partim metu se tradebant. quædam vi expugnata, quædam deserta, in montes pro-

propinquos refugientibus barbaris, inveniebantur. Ad Lycum stativa posuit prope flumen Bevum: inde frumentatum circa horrea Dassaretiorum mittebat. Philippus consternata quidem omnia circa, pavoremque ingentem hominum cernebat; sed parum gnarus quam partem petisset consul, alam equitum ad explorandum, quonam hostes iter intendissent, misit. Idem error apud consulem erat. Movisse ex hibernis regem sciebat; quam regionem petisset ignorans. is quoque speculatum miserat equites. Hæ duæ alæ ex diverso, quum diu incertis itineribus vagatæ per Dassaretios essent, tandem in unum iter convenerunt. Neutros fefellit, ut fremitus procul hominum equorumque exauditus est, hostes appropinquare. Itaque prius quàm in conspectum venirent, equos armaque expedierant. nec mora, ubi primùm hostem videre, concurrendi facta est. Fortè & numero & virtute, utpote lecti utrimque, haud impares, æquis viribus per aliquot horas pugnârunt. Fatigatio ipsorum equorumque incerta victoria dirimit prælium. Macedonum quadraginta equites, Romanorum quinque & triginta ceciderunt. Neque eo magis explorati quicquam, in qua regione castra hostium essent, aut illi ad regem, aut hi ad consulem retulerunt, per transfugas cognitum est: quos levitas ingeniorum ad cognoscendas hostium res in omnibus bellis præbet.

XXXIV. Philippus aliquid & ad caritatem suorum, & ut promptiùs pro eo periculum adirent, ratus profecturum se, si equitum, qui ceciderant in expeditione, sepeliendorum curam habuisset; afferri eos in castra iussit, ut conspiceretur ab omnibus funeris honos. Nihil tam incertum, nec tam inæstimabile est, quàm animi multitudinis. quod promptiores ad subeundam omnem dimicationem videbatur

tur facturum, id metum pigritiamque incussit. nam qui hastis sagittisque, & rara lanceis vulnera facta vidissent, cum Græcis Illyriisque pugnare assueti, posteaquam gladio Hispaniensi detruncata corpora, brachiis abscissis aut tota cervice defecta, divisa à corpore capita, patentiaque viscera, & fœditatem aliam vulnorum viderunt; adversus quæ tela, quosque viros pugnandum esset, pavidi vulgò cernebant. Ipsum quoque regem terror cepit, nondum iusto prælio cum Romanis congressum. itaque revocato filio, præsidioque quod in Pelagoniæ faucibus erat, ut iis copiis suas augeret, Pleurato Dardanisque iter in Macedoniam patefecit. Ipse cum viginti millibus peditum, quatuor equitum, ducibus transfugis ad hostem profectus, paullo plus ducentos passus à castris Romanis tumultum propinquum Athaco fossa ac vallo communivit. ac subiecta cernens Romana castra, admiratus esse dicitur & universam speciem castrorum, & descripta suis quæque partibus, tum tendentium ordine, tum itinerum intervallis: & negasse, barbarorum ea castra ulli videri posse. Biduum consul & rex, alter alterius conatus expectantes, continuere suos intra vallum: tertio die Romanus omnes copias in aciem eduxit.

XXXV. Rex verò, tam celerem aleam universi certaminis timens, quadringentos Tralleis (Illyriorum id, sicut alio diximus loco, est genus) & Cretenses trecentos, addito iis peditibus pari numero equitum, cum duce Athenagora, uno ex purpuratis, ad lacessendos hostium equites misit. Ab Romanis, quum aberat acies eorum paullo plus quingentos passus, velites & equitum duæ ferme alæ emissæ: ut numero quoque eques pedesque hostem æquarent. Credidere regii, genus pugnae, quo assueverant, fore, ut equites invicem insequentes refugientesque nunc telis

telis uterentur, nunc terga darent: Illyriorum velocitas ad excursiones & impetus subitos usui esset: Creteneses in invehentem se effusè hostem sagittas conjicerent. Turbavit hunc ordinem pugnandi non acrior quàm pertinacior impetus Romanorum. nam haud secus, quàm si tota acie dimicarent, & velites emissis hastis cominus gladiis rem gerebant, & equites, ut semel in hostem evecti sunt, stantibus equis, partim ex ipsis equis, partim defilientes immiscentesque se peditibus, pugnabant. ita nec eques regius equiti par erat, insuetus ad stabilem pugnam; nec pedes concursator, & vagus, & propè seminudus genere armorum veliti Romano, parmam gladiumque habenti, pariterque & ad se tuendum & ad hostem petendum armato. Non tulere itaque dimicationem; nec alia re, quàm velocitate, tutantes se in castra refugerunt.

XXXVI. Uno deinde intermisso die, quum omnibus copiis equitum levisque armaturæ pugnaturus rex esset, nocte cetratos, quos peltastas vocant, loco opportuno inter bina castra in insidiis abdidit; præceperatque Athenagoræ & equitibus, ut, si aperto prælio procederet res, uterentur fortuna: si minùs, cedendo sensim, ad insidiarum locum hostem pertraherent. Et equitatus quidem cessit: duces cetratæ cohortis, non satis expectato signo ante tempus excitatis suis, occasionem bene gerendæ rei amisere. Romanus, & aperto prælio victor & tutus à fraude insidiarum, in castra sese recepit. Postero die omnibus copiis consul in aciem descendit, ante prima signa locatis elephantis. quo auxilio tum primùm Romani, quia captos aliquot bello Punico habebant, usi sunt. Ubi latentem intra vallum sensit, exprobrans metum successit. Posteaquam ne tum quidem potestas pugnandi dabatur,

batur, quia ex tam propinquis stativis parum tuta frumentatio erat, dispersos milites per agros equitibus extemplo invasuris; octo ferme inde millium intervallo tutiorem frumentationem habiturus, castra ad Oëtolophum (id est loco nomen) movit. Quum in propinquo agro frumentarentur Romani, primò rex intra vallum suos tenuit, ut cresceret simul & negligentia cum audacia hosti. Ubi effusos vidit, cum omni equitatu & Cretensium auxiliariis, quantum equitum velocissimi pedites cursu æquare poterant, citato profectus agmine, inter castra Romana & frumentatores constituit signa. Inde copiis divisis, partim ad consecrandos vagos frumentatores emisit, dato signo, ne quem vivum relinquerent; cum parte ipse substitit, itineraque, quibus ad castra recursuri videbantur hostes, obsedit. Jam passim cædes ac fuga erat, necdum quisquam in castra Romana nuncius cladis pervenerat: qui refugientes in regiam stationem incidebant; & plures ab obsidentibus vias, quàm ab emissis ad cædem, interficiebantur. tandem inter medias hostium stationes elapsi quidem trepidi tumultum magis quàm certum nuncium intulerunt castris.

XXXVII. Consul, equitibus jussis, quà quisque posset, opem ferre laborantibus, ipse legiones è castris educit, & agmine quadrato ad hostem ducit. Dispersi equites per agros quidem aberrârunt, decepti clamoribus aliis ex alio existentibus loco. Pars obvios habuerunt hostes. pluribus locis simul pugna cœpit. Regia statio atrocissimum prælium edebat. nam & ipsa multitudine equitum peditumque propè justa acies erat: & Romanorum, quia medium obsederat iter, plurimi in eam inferebantur. Eo quoque superiores Macedones erant, quòd & rex ipse hortator aderat, & Cretensium auxiliares multos ex improvise vulne-

vulnerabant, conferti præparatique in disperfos & effusos pugnantes. Quòd si modum in insequendo habuissent, non in præsentis modò certaminis gloriam, sed in summam etiam belli profectum foret. nunc aviditate cædis intemperantiùs insecuti, in prægressas cum tribunis militum cohortes Romana, incidere. & fugiens eques, ut primò signa suorum vidit, convertit in effusum hostem equos: versaque momento temporis fortuna pugnae est, terga dantibus qui modò secuti erant. Multi cominus congressis multi fugientes interfecti. nec ferro tantum perire, sed in paludes quidam coniecti profundo limo cum ipsi equis hausti sunt. Rex quoque in periculo fuit. nam ruente saucio equo præceps ad terram datus, haud multum abfuit quin jaciens opprimeretur. Saluti fuit eques, qui raptim ipse defiluit, pavidumque regem in equum subjecit. Ipse, quum pedes æquare cursu fugientes non posset equites, ab hostibus, ad casum regis concitatis, confossus periit. Rex circumvectus paludes pervias inviasque trepida fuga in castra tandem, jam desperantibus plerisque incolumem evasurum, pervenit. Ducenti Macedonum equites eo proelio perire, centum ferme capti, octoginta admodum ornati equi, spoliis simul armorum relatis, abducti.

XXXVIII. Fuerunt, qui hoc die regem temeritatis, consulem segnitiae accusarent. nam & Philippo quiescendum fuisse, quum paucis diebus hostes, exhausto circa omni agro, ad ultimum inopiae venturos sciret: & consulem, quum equitatum hostium levemque armaturam fudisset, ac propè regem ipsum cepisset, protinus ad castra hostium ducere debuisset. nec enim mansuros ita percussos hostes fuisse; debellarique momento temporis potuisse. Id dictu, quam re, ut pleraque, facilius. nam si omnibus peditum

loque copiis rex congressus fuisset, forsitán inter
 umultum, quum omnes victi metuque perculsi ex
 praelio intra vallum, protinus inde supervadentem
 munimenta victorem hostem fugerent, exui castris po-
 tuerit rex. quum verò integræ copiae peditum in
 castris mansissent, stationes ante portas, præsidiaque
 disposita essent, quid, nisi ut temeritatem regis effusè
 paullo ante secuti perculos equites imitaretur, pro-
 fecisset? neque enim ne regis quidem primum con-
 silium, quo impetum in frumentatores palatos per
 agros fecit, reprehendendum foret, si modum pro-
 speræ pugnae imposuisset. Eò quoque minus est mi-
 rum, tentasse eum fortunam, quod fama erat, Pleu-
 ratum, Dardanosque ingentibus copiis profectos do-
 mo, jam in Macedoniam transcendisse. Quibus si
 undique circumventus copiis foret, sedentem Roma-
 num debellaturum, credi poterat. Itaque secundum
 duas adversas equestres pugnas multo minùs tutam
 moram in iisdem stativis fore Philippus ratus, quum
 abire inde & fallere abiens hostem vellet, caducea-
 tore sub occasum solis ad consulem missò, qui in-
 ducias ad sepeliendos equites peteret; frustratus
 hostem, secunda vigilia, multis ignibus per tota castra
 relictis, silenti agmine abiit.

XXXIX. Corpus jam curabat consul, quum ve-
 nisse caduceatorem, & quid venisset, nunciatum
 est. responso tantum dato, mane postero die fore
 copiam conveniendi, id quod quæsitum erat, nox,
 dieique insequentis pars ad præcipiendum iter Philip-
 po data est. montes, quam viam non ingressurum
 gravi agmine Romanum sciebat, petit. Consul, pri-
 ma luce caduceatore datis induciis dimissò, haud ita
 multo post abisse hostem quum sensisset, ignarus quà
 sequeretur, iisdem stativis frumentando dies aliquot
 consumpsit. Stuberam deinde petit, atque ex Pela-
 gonia

gonia frumentum, quod in agris erat, convexit. inde ad Pellinam est progressus; nondum comperto, quam regionem hostes petissent. Philippus, quum primò ad Bryanium stativa habuisset, profectus inde transversis limitibus, terrorem præbuit subitum hosti. Movere itaque ex Pellina Romani, & ad Osphagum flumen posuerunt castra. Rex haud procul inde & ipse, vallo super ripam amnis ducto (Erigonum incolæ vocant) consedit. inde satis comperto Eordæam petituros Romanos, ad occupandas angustias, ne superare hostes arctis faucibus inclusum aditum possent, præcessit. ibi alia vallo, alia fossa, alia lapidum congerie, ut pro muro essent, alia arboribus objectis, ita ut locus postulabat, aut materia suppeditabat, opere permuniit; atque (ut ipse rebatur) viam suapte natura difficilem, objectis per omnes transitus operibus, inexpugnabilem fecit. Erant pleraque silvestria circa, incommoda phalangi maxime Macedonum: quæ, nisi ubi prælongis hastis velut vallum ante clypeos objecit, (quod ut fiat, libero campo opus est) nullius admodum usus est. Thraces quoque romphææ, ingentis & ipsæ longitudinis, inter objectos undique ramos impediabant. Cretensium una cohors non inutilis erat: sed quæ quoque ipsa ut, si quis impetum faceret, in patentem vulnerequum, equitemque sagittas conjicere poterat; ita adversus scuta Romana nec ad trajiciendum satis magnam vim habebat, nec aperti quicquam erat quod peteret. Itaque id ut vanum teli genus senserunt esse, saxis, passim tota valle jacentibus, incessabant hostem. ea majore cum sonitu, quàm vulnere ullo, pulsatio scutorum parumper succedentes Romanos tenuit. Deinde iis quoque spretis, partim testudine facta per adversos vadunt hostes: partim brevi circuitu quum in jugum collis evasissent,

trepidos ex præfidiis stationibusque Macedonas deturbant; &, ut in locis impeditis difficili fuga, ple-rosque etiam obtruncant.

XL. Ita angustiae minore certamine, quam quod animis proposuerant, superatae: & in Eordæam per-ventum; ubi pervastatis passim agris, in Elimeam se recepit. inde impetum in Orestidem fecit: & op-pidum Celetrum est aggressus, in peninsula situm. Lacus mœnia cingit: angustis faucibus unum ex con-tinenti iter est. Primò situ ipso freti, clausis portis, imperium abnuere: deinde postquam signa ferri, ac testudine succedi ad portam, obsessasque fauces agmi-ne hostium viderunt, priusquam experirentur certa-men, metu in deditionem venerunt. Ab Celetro in Dassaretios processit, urbemque Pelium vi cepit. ser-vitia inde cum cetera præda abduxit, & libera capita sine pretio dimisit, oppidumque iis reddidit, præfi-dio valido imposito. nam & sita opportunè urbs erat ad impetus in Macedoniam faciendos. Ita peragra-tis hostium agris, consul in loca jam pacata ad Apol-loniam, unde orsus bellum erat, copias reduxit. Philippum averterant Ætoli, & Athamanes, & Dar-dani, & tot bella repente alia ex aliis locis exor-ta. Adversus Dardanos, jam recipientes ex Mace-donia sese, Athenagoram cum expeditis peditibus ac majore parte equitatus misit, jussu insistere ab tergo abeuntibus, & carpendo postremum agmen segniores eos ad movendos domo exercitus efficere. Ætolos Damocritus prætor, qui moræ ad decernendum bel-lum ad Naupactum auctor fuerat, idem proximo concilio ad arma conciverat: post famam equestris ad Oëtolophum pugnae, Dardanorumque & Pleurati cum Illyriis transitum in Macedoniam, ad hæc clas-sis Romanæ adventum in Oreum, & super circum-fusas

fufas tot Macedoniae gentes, maritimam quoque instantem obfidionem.

XLI. Hæ cauffæ Damocritum Ætolosque reftituerant Romanis: & Amynandro rege Athamanum adjuncto profecti, Cercinium obfedere. Clauférant portas; incertum vi, an voluntate: quia regium habebant præfidium. Ceterum intra paucos dies captum eft Cercinium, atque incenfum. qui superfuerant è magna clade, liberi feruque inter ceteram prædam abducti. Is timor omnes, qui circumcolunt Bœben paludem, relictis urbibus, montes cœgit petere. Ætoli, inopia prædæ inde averfi, in Perræbiam ire pergunt. Cyretias ibi vi capiunt, fœdeque diripiunt. qui Mallœum incolunt, voluntate in deditionem focietatemque accepti. Ex Perræbiâ Gomphos petendi Amynander auctor erat. & imminet Athamania huic urbi, videbaturque expugnari fine magno certamine poffe. Ætoli campos Theffalix opimos ad prædam petiere: fequente, quamquam non probante, Amynandro, nec effufas populationes Ætolorum, nec castra, quo fors tuliffet loco, fine ullo discrimine ac cura muniendi pofita. itaque ne temeritas eorum, negligentiaque, fibi ac fuis etiam cladis alicujus cauffa effet; quum campeftribus locis fubjicientes eos castra Phecado urbi videret, ipfe paullo plus quingentorum paffuum inde tumulum fuis, quamvis levi munimento tutum, cepit. quum Ætoli, nifi quod populabantur, vix meminiffe viderentur fe in hoftium agro effe, alii palati femiermes vagarentur, alii in castris fine ftationibus per fomnum vinumque dies noctibus æquarent, Philippus inopinantibus advenit. quem quum adeffe refugientes ex agris quidam pavidi nunciâffent, trepidare Damocritus, ceterique duces: & erat fortè meridianum tempus, quo plerique graves

cibo sopiti jacebant. Excitare igitur alii alios, jubere arma capere, alios dimittere ad revocandos qui palati per agros prædabantur. tantaque trepidatio fuit, ut sine gladiis quidam equitum exirent, loricas plerique non induerent. Ita raptim eduçti quum universi sexcentorum ægre simul equites peditesque numerum explerent, incidunt in regium equitatum, numero, animis, armisque præstantem. Itaque primo impetu fusi, vix tentato certamine, turpi fuga repetunt castra. cæsi, captique quidam, quos equites ab agmine fugientium interclusere.

XLII. Philippus, suis jam vallo appropinquantibus, receptui cani jussit. fatigatos enim equos viroscque non tam prælio, quàm itineris simul longitudine, simul præpropere celeritate habebat. Itaque turmatim equites, invicemque manipulos levis armaturæ aquatum ire, & prandere jubet: alios in statione armatos retinet, opperiens agmen peditum tardiùs ductum propter gravitatem armorum. Quod ubi advenit, & ipsis imperatum, ut, statutis signis, armisque ante se positis, raptim cibum caperent, binis ternive summum ex manipulis aquandi causa missis; interim eques cum levi armatura paratus instructusque stetit, si quid hostes moveret. Ætoli (jam enim & quæ per agros multitudo sparsa fuerat, receperat se in castra) ut defensuri munimenta, circa portas vallumque armatos disponunt, dum quietos hostes ipsi feroces ex tuto spectabant. posteaquam mota signa Macedonum sunt, & succedere ad vallum parati atque instructi cœpere, omnes repente, relictis stationibus, per averfam partem castrorum ad tumultum, ad castra Athamanum perfugiunt. multi in hac quoque tam trepida fuga capti cæsiq; sunt Ætolorum. Philippus, si satis diei superesset, non dubius quin Athamanes quoque exui castris potuissent, die per prælium,

prælium, deinde per directionem castrorum absumpto, sub tumulo in proxima planicie consedit; prima luce insequentis diei hostem aggressurus. Sed Ætoli eodem pavore, quo sua castra reliquerant, nocte proxima dispersi fugerunt. Maximè usui fuit Amynander, quo duce Athamanes itinerum periti summis montibus per calles ignotos sequentibus eos hostibus in Ætoliam perduxerunt. non ita multos in dispersa fuga error intulit in Macedonum equites, quos luce prima Philippus, ut desertum tumultum vidit ad carpendum hostium agmen misit.

XLIII. Per eos dies & Athenagoras, regius præfectus, Dardanos recipientes se in fines adeptus, postremum agmen primò turbavit. dein posteaquam Dardani converfis signis direxere aciem, æqua pugna iusto prælio erat. ubi rursus procedere Dardani cœpissent, equite & levi armatura regii, nullum talis auxilii genus habentes Dardanos, oneratos immobilibus armis vexabant. & loca ipsa adjuvabant. Occisi perpauci sunt, plures vulnerati; captus nemo, quia non excedunt temere ordinibus suis, sed confertim & pugnant & cedunt. Ita damna Romano accepta bello, duabus per opportunas expeditiones coercitis gentibus, restituerat Philippus; incepto forti, non prospero solùm eventu. Minuit deinde ei fortè ablata res hostium Ætolorum numerum. Scopas princeps gentis, ab Alexandria magno cum pondere auri ab rege Ptolemæo missus, sex millia peditum & equites mercede conductos Ægyptum avexit. nec ex juventute Ætolorum quemquam reliquisset, ni Damocritus nunc belli quod instaret, nunc futuræ solitudinis admonens, (incertum cura gentis, an ut adversaretur Scopæ, parum donis cultus) partem juniorem castigando domi continuisset. Hæc ea æstate ab Romanis Philippoque gesta erant.

XLIV. Classis, à Corcyra ejusdem principio æstatis cum L. Apustio legato profecta, Malea superata, circa Scyllæum agri Hermionici Attalo regi conjuncta est. Tum verò Atheniensium civitas, cui odia in Philippum per metum jam diu moderata erant, id omne in auxilii præsentis spem effundit. nec unquam ibi desunt linguæ promptæ ad plebem concitandam. quod genus, cum in omnibus liberis civitatibus, tum præcipuè Athenis, ubi oratio plurimum pollet, favore multitudinis alitur. Rogationem extemplo tulerunt, plebesque scivit, *ut Philippi statuæ, imagines omnes, nominaque earum, item majorum ejus virilis ac muliebris sexus omnium tollerentur, delerenturque: dies festi, sacra, sacerdotes, quæ ipsius majorumve ejus honoris causa instituta essent, omnia profanarentur. Loca quoque, in quibus positum aliquid inscriptumve honoris ejus causa fuisset, detestabilia esse; neque in iis quicquam postea poni dedicarique placere eorum, quæ in loco puro poni dedicarique fas esset. Sacerdotes publicos, quotiescumque pro populo Atheniensi, sociisque, & exercitibus, & classibus eorum precarentur, toties detestari atque execrari Philippum, liberos ejus, regnumque, terrestres navalesque copias, Macedonum genus omne, nomenque. additumque decreto, si quis quid postea, quod ad notam ignominiamque Philippi pertineret, ferret, id omne populum Atheniensem jussurum. si quis contra ignominiam, prove honore ejus dixisset fecissetve, qui occidisset eum, jure cæsurum. postremo inclusum, ut omnia quæ adversus Pisistratidas decreta quondam erant, eadem in Philippo servarentur.* Athenienses quidem literis verbisque, quibus solis valent, bellum adversus Philippum gerebant.

XLV. Attalus Romanique, quum Piræeum primò ab Hermione petissent, paucos ibi morati dies, oneratique æquè immodicis ad honores sociorum,

ac quæ in iram adversus hostem fuerant Atheniensium decretis, navigant à Piræeo Andrum. & quum in portu, quem Gaureleon vocant, constitissent, missis qui tentarent oppidanorum animos, si voluntate tradere urbem quàm vim experiri mallent: postquam præsidio regio arcem teneri, nec se potestatis suæ esse respondebant; expositis copiis, omnique apparatu urbium oppugnandarum, diversis partibus rex & legatus Romanus ad urbem subeunt. Plus aliquanto Græcos Romana signa armaque non antè visa, animique militum, tam promptè succedentium muro, terruere. Itaque fuga extemplo in arcem facta est. urbe hostes potiti. & in arce, quum biduum loci se magis quàm armorum fiducia tenuissent; tertio die pacti ipsi præsidiumque, ut cum singulis vestimentis Delium Bœotiæ transveherentur. Ea ab Romanis regi Attalo concessa: prædam ornamentaque urbis ipsi avexerunt. Attalus, ne desertam haberet insulam, & Macedonum fere omnibus, & quibusdam Andriorum, ut manerent, persuasit. postea & ab Delio, qui ex pacto transvesti eò fuerant, promissis regis, quum desiderium quoque patriæ faciliùs ad credendum inclinaret animos, revocati. Ab Andro Cythnum trajecerunt. ibi dies aliquot oppugnanda urbe nequicquam absumpti: &, quia vix operæ pretium erat, abscessere. Ad Prasias (continentis Atticæ is locus est) Issæorum viginti lembi classi Romanorum adjuncti sunt. ii missi ad populandos Carystiorum agros. cetera classis Geræstum, nobilem Eubœæ portum, dum à Carysto Issæi redirent, tenuit. Inde omnes, velis in altum datis, maris medio præter Scyrum insulam Icum pervenere. ibi paucos dies, sævientem Borea, retenti, ubi prima tranquillitas data est, Sciathum trajecere, vastatam urbem, direptamque nuper à Phi-

lippe. Per agros palati milites frumentum, & si qua alia usui esse ad vescendum poterant, ad naves retulere. prædæ nec erat quicquam, nec meruerant Græci cur diriperentur. Inde Cassandream petentes, primò ad Mendin, maritimum civitatis ejus vicin, tendere. inde quum superato promontorio ad ipsa mœnia urbis circumagere classem vellent, sæva coorta tempestate propè obruti fluctibus; dispersi magna ex parte amissis armamentis in terram effugerunt. Omen quoque ea maritima tempestatas ad rem terra gerendam fuit. nam collectis in unum navibus, expositisque copiis aggressi urbem, cum multis vulneribus repulsi, (& erat validum ibi regium præsidium) irritò incepto regressi Canastrum Pallenes trajecere. inde superato Toronæ promontorio, navigantes Acanthum petiere. Ibi primò ager vastatus, deinde ipsa urbs vi capta ac direpta. nec ultra progressi, (jam enim & graves præda naves habebant) retro, unde venerant, Scia-thum, & ab Sciatho Eubœam repetunt.

XLVI. Ibi relicta classe, decem navibus expeditis finem Maliacum intravere, ad colloquendum cum Ætolis de ratione gerendi belli. Sipyrhicas Ætolus princeps legationis ejus fuit, quæ ad communicanda consilia Heracleam cum rege & cum Romano legato venit. Petitum ex fœdere ab Attalo est, ut mille milites præstaret. tantum enim numerum bellum gerentibus adversus Philippum debebat. Id negatum Ætolis: quòd illi quoque gravati priùs essent ad populandam Macedoniam exire, quo tempore, Philippo circa Pergamum urente sacra profanaque, abstrahere eum inde respectu rerum suarum potuissent. Ita Ætoli cum spe magis, Romanis omnia pollicentibus, quàm cum auxilio dimissi. Apustius cum Attalo ad classem rediit. inde consultari

sultari de Oreo oppugnando cœptum. Valida ea civitas & mœnibus, &, quia antè fuerat tentata, firmo erat præsidio. Conjunxerant se iis post expugnationem Andri cum præfecto Agefimbrotō viginti Rhodiæ naves, tectæ omnes. eam classem in stationem ad Zelasium miserunt; (Isthmiæ id super Demetriadem promontorium est peropportunè objectum) ut, si quid inde moverent Macedonum naves, in præsidio essent. Heraclides præfectus regius classem ibi tenebat; magis per occasionem, si quam negligentia hostium dedisset, quàm aperta vi quicquam ausurus. Oreum diversi Romani & rex Attalus oppugnabant: Romani à maritima arce, regii adversus vallem inter duas jacentem arces, qua & muro intersepta urbs est. & ut loca diversa, sic dispari modo etiam oppugnabant: Romani testudinibus & vineis, & ariete admovendo muris: regii ballistis, catapultisque, & alio omni genere tormentorum tela ingerentes. & pondere ingenti saxa jaciebant, & cuniculos, & quicquid aliud priore oppugnatione expertum profuerat. Ceterum non plures tantum Macedones quàm antè tuebantur urbem arcesque, sed etiam præsentioribus animis, & castigationibus regis in admissa culpa, & simul minarum, simul promissionum in futurum memores; ita ut parum in expugnatione celeri spei esset. Interim & aliud agi posse ratus legatus, relictis quot satis videbantur ad opera perficienda militibus, trajicit in proxima continentis: Larissamque (non illam in Thessalia nobilem urbem, sed alteram, quam Cremaستن vocant) subito adventu, præter arcem, cepit. Attalus quoque Ægeleon, nihil minùs quàm tale quicquam in alterius oppugnatione urbis timentibus, oppressit. Et jam cum opera in effectu erant circa Oreum: tum præsidium quod intus erat, labore assiduo,

assiduo, vigiliis diurnis pariter nocturnisque, & vulneribus confectum. Muri quoque pars, ariete incussio subruta, multis jam locis prociderat. perque apertum ruina iter nocte Romani, quodque super portum est, in arcem perruperunt. Attalus luce prima, signo ex arce dato ab Romanis, & ipse urbem invasit, stratis magna ex parte muris: præsidium oppidanique in alteram arcem perfugere. unde biduo post deditio facta. urbs regi, captiva corpora Romanis cessere.

XLVII. Jam autumnale æquinoctium instabat: & est finus Euboicus, quem Cœla vocant, suspectus nautis. itaque, ante hiemales motus evadere inde cupientes, Piræum, unde profecti ad bellum erant, repetunt. Apustius, triginta navibus ibi relictis, super Maleam navigat Corcyram. Regem spatium Initiorum Cereris, ut sacris interesset, tenuit. secundum Initia & ipse in Asiam se recepit, Agefimbrotus & Rhodiis domum remissis. Hæc ea æstate terra marique adversus Philippum sociosque ejus à consule & legato Romanis, adjuvantibus rege Attalo & Rhodiis, gesta. Consul alter C. Aurelius ad confectum bellum quum in provinciam venisset, haud clam tulit iram adversus prætorem, quod absente se rem gessisset. missis igitur eo in Etruriam, ipse in agrum hostium legiones induxit: populandoque cum præda majore, quàm gloria, bellum gessit. L. Furius, simul quod in Etruria nihil erat rei, quod gereret, simul Gallico triumpho imminens, quem absente consule irato atque invidente facilius impetrari posse ratus, Romam inopinatò quum venisset, senatum in æde Bellonæ habuit: expositisque rebus gestis, ut triumphanti sibi in urbem invehì liceret, petit.

XLVIII. Apud magnam partem senatus, & magnitudine rerum gestarum valebat, & gratia. majores
natu

natu negabant triumphum, & quòd alieno exercitu
 rem gessisset, & quòd provinciam reliquisset avidi-
 tate rapiendi occasionem triumphi. id verò eum
 nullo exemplo fecisse. Consulares præcipuè ex-
 spectandum fuisse consulem dicebant. potuisse enim
 castris prope urbem positis, tutanda colonia, ita ut
 acie non decerneret, in adventum ejus rem extra-
 here. & quod prætor non fecisset, senatui faciendum
 esse. Consulem expectarent. ubi coram disceptan-
 tes consulem & prætorem audissent, veriùs de causâ
 existimatuos esse. Magna pars senatus nihil præ-
 ter res gestas, & an in magistratu suisque auspiciis
 gessisset, censabant spectare senatum debere. *Ex*
duabus coloniis, quæ velut claustra ad cohibendos Gal-
licos tumultus oppositæ fuissent, quum una direpta &
incensa esset, trajecturumque id incendium velut ex con-
continentibus tectis in alteram tam propinquam coloniam
esset, quid tandem prætori faciendum fuisse? Nam si
sine consule geri nihil oportuerit, aut senatum peccâsse,
qui exercitum prætori dederit: (potuisse enim, si non
cum prætoris, sed consulis exercitu rem geri voluerit,
ita finire senatusconsultum, ne per prætorem, sed per
consulem geretur) aut consulem, qui non, quum exerci-
tum ex Etruria transire in Galliam jussisset, ipse Ari-
mini occurrerit, ut bello interesset, quod sine eo geri
fas non esset. Non expectare belli tempora moras &
dilationes imperatorum. & pugnandum esse interdum,
non quia velis, sed quia hostis cogat. Pugnam ipsam,
eventumque pugnæ spectari oportere. fusos cæsosque ho-
stis: castra capta ac direpta: coloniam liberatam ob-
sidione: alterius coloniae captivos recuperatos, restitutos-
que suis: debellatum uno prælio esse. Non homines
tantum ea victoria lætatos, sed Diis quoque immortalibus
per triduum supplicationes habitas, quòd bene ac
feliciter, non quòd male ac temere respublica à L. Fu-
rio

rio prætore gesta esset. Data fato etiam quodam Furie genti Gallica bella.


XLIX. Hujus generis orationibus ipsius amicorumque victa est præsentis gratia prætoris, absentis consulis majestas: triumphumque frequentes L. Furio decreverunt. Triumphavit de Gallis in magistratu L. Furius prætor. In ærarium tulit trecenta viginti millia æris, argenti centum septuaginta millia pondo. neque captivi ulli ante currum ducti, neque spolia prælata, neque milites secuti; omnia, præter victoriam, penes consulem esse apparebat. Ludi deinde à P. Cornelio Scipione, quos consul in Africa voverat, magno apparatu facti. Et de agris militum ejus decretum, ut quot quisque eorum annos in Hispania aut in Africa militasset, in singulos annos bina jugera acciperet. eum agrum decemviri assignarent. Triumviri inde creati ad supplendum Venusinis colonorum numerum, quod bello Annibalis attenuatæ vires ejus coloniarum erant, C. Terentius Varro, Titus Quintius Flamininus, P. Cornelius Cn. F. Scipio. hi colonos Venusiam adscripserunt. Eodem anno C. Cornelius Cethegus, qui proconsul Hispaniam obtinebat, magnum hostium exercitum in agro Sedetano fudit. quindecim millia Hispanorum eo prælio dicuntur cæsa, signa militaria capta octo & septuaginta. C. Aurelius consul, quum ex provincia Romam comitiorum causa venisset, non id, quod animis præceperant, questus est, *Non expectatum se ab senatu, neque disceptandi cum prætore consuli potestatem factam: sed ita triumphum decrevisse senatum, ut nullius, nisi ejus, qui triumphaturus esset, haud eorum, qui bello interfuissent, verba audiret. Majores ideo instituisse, ut legati, tribuni militum, centuriones, milites denique triumpho adessent; ut veritas rerum gestarum ejus,*
cui



cui tantus honos haberetur, publicè videretur. E-
quem ex eo exercitu, qui cum Gallis pugnaverit, si
non militem, lixam saltem fuisse, quem percunctari
posset senatus, quid veri prætor vanive referret? Co-
 mitiis deinde diem indixit: quibus creati sunt con-
 sules L. Cornelius Lentulus, P. Villius Tap-
 pulus. Prætores inde facti L. Quintius *Ante Cbr.*
 Flaminius, L. Valerius Flaccus, L. Villius *199.*
 Tappulus, Cn. Bæbius Tamphilus. *U.C. 553.*

L. Annona quoque eo anno pervilis fuit. fru-
 menti vim magnam ex Africa advectam ædiles cu-
 rules, M. Claudius Marcellus & Sex. Ælius Pætus,
 binis æris in modios populo diviserunt: & ludos
 Romanos magno apparatu fecerunt: diem unum
 instaurârunt: signa ænea quinque ex multaticio
 argento in ærario posuerunt. Plebeiï ludi ab ædilibus,
 L. Terentio Massa, & Cn. Bæbio Tamphilo, quem
 prætorem designaverant, ter toti instaurati. Et ludi
 funebres eo anno per quatrduum in foro, mortis
 M. Valerii Lavini causa, à P. & M. filiis ejus facti.
 & munus gladiatorium datum ab iis. paria quin-
 que & viginti pugnarunt. M. Aurelius Cotta, de-
 cemvir sacrorum, mortuus: in ejus locum Manius
 Acilius Glabrio suffectus. Comitiis ædiles curules
 creati sunt fortè ambo, qui statim occipere magi-
 stratum non possent: nam C. Cornelius Cethegus ab-
 sens creatus erat, quum Hispaniam obtineret pro-
 vinciam. C. Valerius Flaccus, quem præsentem
 creârant, quia flamen Dialis erat, jurare in leges
 non poterat: magistratum autem plus quinque dies,
 nisi qui jurâisset in leges, non licebat gerere. Pe-
 tente Flacco, ut legibus solveretur; senatus decre-
 vit, ut, si ædilis qui pro se juraret, arbitrato con-
 sulum daret; consules, si eis videretur, cum tribunis
 plebis agerent, uti ad plebem ferrent. Datus qui
 juraret

juraret pro fratre L. Valerius Flaccus, prætor designatus. tribuni ab plebem tulerunt, plebesque scivit, ut perinde esset, ac si ipse ædilis jurâisset. Et de altero ædile scitum plebis est factum, rogantibus tribunis, quos duos in Hispaniam cum imperio ad exercitus ire juberent, ut C. Cornelius, ædilis curulis, ad magistratum gerendum veniret, & L. Manlius Acidinus decederet de provincia multos post annos. plebes Cn. Cornelio Lentulo & L. Stertinio proconsulibus imperium esse in Hispania jussit.



L I B E R XXXII.

E P I T O M E.

- I.  Omplura prodigia ex diversis regionibus nunciata referuntur: inter quæ, in Macedonia in puppi longæ navis lauream esse natam. XII, XIII. T. Quintius Flamininus consul adversus Philippum feliciter pugnavit in faucibus Epiri, fugatumque coëgit in regnum reverti. XIV, &c. Ipse Thessaliam, quæ est vicina Macedonia, fociis Ætolis & Athamanibus, vexavit. XVI. L. Quintius Flamininus, consulis frater, navali prælio, Attalo rege & Rhodiis adjuvantibus, Eubœam & maritimam oram cepit. XIX, &c. Achæi in amicitiam recepti sunt. XXVI. Conjunctio fervorum, facta de solvendis Carthaginienfibus obsidibus, oppressa est. XXVII. Prætorum numerus ampliatus est, ut seni crearentur. XXX. Cornelius Cethegus consul Gallos Insubres prælio vicit. Cum Lacedæmoniis, & tyranno eorum Nabide

bide amicitia juncta est. Præterea expugnationes urbium in Macedonia referuntur.

I.  Onfules prætoresque, quum Idibus Martiis magistratum inissent, provincias fortiti sunt. L. Cornelio Lentulo Italia, P. Villio Macedonia: prætoribus, L. Quintio urbana, Cn. Bæbio Ariminum, L. Valerio Sicilia, L. Villio Sardinia evenit. Lentulus consul novas legiones scribere jussus: Villius à P. Sulpicio exercitum accipere. in supplementum ejus quantum militum videretur ut scriberet, ipsi permissum. Prætori Bæbio legiones, quas C. Aurelius consul habuisset, ita decretæ, ut retineret eas donec consul novo cum exercitu succederet. in Galliam ubi is venisset, omnes milites exauctorati domum dimitterentur, præter quinque millia socium. his obtineri circa Ariminum provinciam satis esse. Prorogato imperio prætoribus prioris anni: Cn. Sergio, ut militibus, qui in Hispania, Sicilia, Sardinia stipendia per multos annos fecissent, agrum assignandum curaret: Q. Minucio, ut in Bruttis idem de conjurationibus quæstiones, quas prætor cum fide curaue exercuisset, perficeret; & eos, quos sacrilegii compertos in vinculis Romam misisset, Locros mitteret ad supplicium; quæque sublata ex delubro Proserpinæ essent, reponenda cum piaculis curaret. Feriæ Latinæ pontificum decreto instauratæ sunt, quòd legati ab Ardea questi in senatu erant, sibi in monte Albano Latinis carnem, ut assolet, datam non esse. Abs Sueffa nunciatum est, duas portas, quodque inter eas muri erat, de cælo tactum. & Formiani legati ædem Jovis: item Ostienses ædem Jovis: & Veliterni, Apollinis & Sanci ædes: & in Herculis æde capillum

capillum enatum. & ex Bruttiiis ab Q. Minucio pro-
 prætoris scriptum, equuleum cum quinque pedibus,
 pullos gallinaceos tres cum ternis pedibus natos
 esse. Inde à P. Sulpicio proconsule ex Macedonia
 literæ allatæ; in quibus inter cetera scriptum erat,
 lauream in puppi navis longæ enatam. Priorum
 prodigiorum causâ senatus censuerat, ut consules
 majoribus hostiis, quibus Diis videretur, sacrificarent.
 ob hoc unum prodigium aruspices in senatum vo-
 cati, atque ex responso eorum supplicatio populo
 in diem unum edicta, & ad omnia pulvinaria res
 divinæ factæ.

II. Carthaginenses eo anno argentum, in stipen-
 dium impositum, primùm Romam advexerunt. id
 quia probum non esse quæstores renunciaverant,
 experientibusque pars quarta decocta erat, pecunia
 Romæ mutua sumpta, intertrimentum argenti sup-
 plexerunt. Petentibus deinde, ut, si jam videretur
 senatui, obfides sibi redderentur; centum redditii
 obfides. de ceteris, si in fide permanerent, spes
 facta. Petentibus iisdem, qui non reddebantur ob-
 fides, ut ab Norba, ubi parum commodè essent,
 aliò traducerentur; concessum ut Signiam & Feren-
 tinum transirent. Gaditanis item petentibus re-
 missum, ne præfectus Gadeis mitteretur, adversus
 quod iis in fidem populi Romani venientibus cum
 L. Marcio Septimo convenisset. Et Narniensium
 legatis, querentibus ad numerum sibi colonos non
 esse, & immistos quosdam non sui generis pro co-
 lonis se gerere, earum rerum causâ triumviros
 creare L. Cornelius consul iussus. creati Pub. &
 Sex. Ælii (Pætis fuit ambobus cognomen) & C. Cor-
 nelius Lentulus. Quod Narniensibus datum erat,
 ut colonorum numerus cogeretur, id Cossani pe-
 tentes non impetraverunt.

III. Re-

III. Rebus, quæ Romæ agendæ erant, perfectis, consules in provincias profecti. P. Villium, in Macedoniam quum venisset, atrox seditio militum, jam ante irritata, nec satis in principio compressa, excepit. duo millia ea militum fuere, qui ex Africa post devictum Annibalem in Siciliam, inde anno fere post in Macedoniam pro voluntariis transportati erant. id voluntate factum negabant: *ab tribunis recusantes in naves impositos. sed utcumque seu iuncta seu suscepta foret militia, & eam exhaustam, & finem aliquem militandi fieri æquum esse. Multis annis sese Italiam non vidisse. consenuisse sub armis in Sicilia, Africa, Macedonia. Confectos jam se labore & opere, exsangues tot acceptis vulneribus esse. Consul, causam postulandæ missionis probabilem, si modeste peteretur, videri dixit; seditionis nec eam, nec ullam aliam satis justam causam esse. Itaque si manere ad signa, & dicto parere velint, se de missione eorum ad senatum scripturum. Modestia facilius, quàm pertinacia, quod velint impetraturos.*

IV. Thaumacos eo tempore Philippus summa vi oppugnabat aggeribus vineisque: & jam arietem muris admoturus erat. ceterum incepto abstinere eum coëgit subitus Ætolorum adventus, qui, Archidamo duce inter custodias Macedonum mœnia ingressi, nec die nec nocte finem ullum erumpendi, nunc in stationes nunc in opera Macedonum, faciebant. & adjuvabat eos natura ipsa loci. namque Thaumaci, à Pylis sinuque Maliaco per Lami-
am eunti, loco alto siti sunt; ipsis faucibus immi-
nentes, quam Cœlen vocant. Thessaliæque transe-
unti confragosa loca, implicatasque flexibus val-
lium vias, ubi ventum ad hanc urbem est, repente
velut maris vasti, sic immensa panditur planities,
ut subjectos campos terminare oculis haud facile
queas.

queas. Ab eo miraculo Thaumaci appellati. nec altitudine solùm tuta urbs, sed quòd saxo undique abscisso rupibus imposita est. Hæ difficultates, & quòd haud satis dignum tanti laboris periculi-que pretium erat, ut absisteret incepto Philippus, effecerunt. hiems quoque jam instabat, quum inde abcessit, & in Macedoniam in hiberna copias reduxit.

V. Ibi ceteri quidem, data quantacunque quiete temporis, simul animos corporaque remisertant. Philippum, quantum ab assiduus laboribus iterum pugnarumque laxaverat annus, tanto magis intentum in universum eventum belli curæ angunt: non hostes modò timentem, qui terra marique urgebant, sed nunc sociorum, nunc etiam popularium animos, ne & illi ad spem amicitiae Romanorum deficerent, & Macedonas ipsos cupido novandi res caperet: itaque & in Achaiam legatos misit, simul qui iurandum (ita enim pepigerant, quotannis iuratos in verba Philippi) exigent: simul qui redderent Achæis Orchomenon, & Heræam, & Triphyliam: Eleis Alipheram contendentibus, nunquam eam urbem fuisse ex Triphylia, sed sibi debere restitui: quia una esset ex iis, quæ ad condendam Megalopolim ex concilio Arcadum contributæ forent. Et cum Achæis quidem per hæc societatem firmabat. Macedonum animos sibi concilavit cum Heraclide. nam quum eum maximæ invidiæ sibi esse cerneret, multis criminibus oneratum in vincula conjecit, ingenti popularium gaudio. Bellum, si quando unquam antè aliàs, cum magna cura apparavit, exercuitque in armis & Macedonas & mercenarios milites: principioque veris cum Athenegora omnia externa auxilia, quodque levis armaturæ erat, in Chaoniam per Epirum ad occupandas, quæ ad
Anti-

Antigoniam fauces sunt, (Stena vocant Græci) misit. Ipse, post paucis diebus graviore secutus agmine, quum situm omnem regionis adspexisset, maximè idoneum ad muniendum locum credidit, esse, præter amnem Aoum. is inter montes, quorum alterum Æropum, alterum Asnaum incolæ vocant, angusta valle fluit; iter exiguum super ripam præbens. Asnaum Athenagoram cum levi armatura tenere ac communire jubet: ipse in Æropo posuit castra. Quà abscissæ rupes erant, statio paucorum armatorum tenebat; quæ minùs tuta erant, alia fossis, alia vallis, alia turribus muniebat. Magna tormentorum etiam vis (ut missilibus procul arcerent hostem) idoneis locis disposita est. tabernaculum regium pro vallo in conspecto maximè tumulo, ut terrorem hostibus, suisque spem ex fiducia faceret, positum.

VI. Consul per Charopum Epirotem certior factus, quos saltus cum exercitu insedisset rex, & ipse quum Corcyræ hibernâisset, vere primo in continentem trajectus, ad hostem ducere pergit. quinque millia ferme ab regiis castris quum abesset, loco munito relictis legionibus, ipse, cum expeditis progressus ad speculanda loca, postero die concilium habuit, utrùm per inessum ab hoste saltum, quamquam labor ingens, periculumque proponeretur, transitum tentaret: an eodem itinere, quo priore anno Sulpicius Macedoniam intraverat, circumduceret copias. Hoc concilium per multos dies agitantis nuncius venit; T. Quintium consulem factum, sortitumque provinciam Macedoniam, maturato itinere jam Corcyram trajecisse. Valerius Antias intrâsse saltum Villium tradit, &, quia recto itinere nequirit, omnibus à rege inessis, secutum vallem, per quam mediam fertur Aous amnis, ponte raptim
facto

facto in ripam, in qua erant castra regia, transgressum, acie conflixisse: fuscum fugatumque regem, castris exutum: duodecim millia hostium eo proelio caesa: capta duo millia & ducentos, & signa militaria centum triginta & duo, equos ducentos triginta. ædem etiam Jovi in proelio votam, si res prospere gesta esset. Ceteri Græci Latinique auctores, quorum quidem ego legi annales, nihil memorabile à Villio actum, integrumque bellum insequentem consulem T. Quintium accepisse tradunt.

VII. Dum hæc in Macedonia geruntur, consul alter L. Lentulus, qui Romæ substiterat, comitia censoribus creandis habuit. Multis claris petentibus viris creati censores P. Cornelius Scipio Africanus & P. Ælius Pætus. hi magna inter se concordia & senatum sine ullius nota legerunt: & portoria venalium Capuæ, Puteolisque item castrorum portorium, quo in loco nunc oppidum est, fruendum locarunt: colonosque eò trecentos (is enim numerus finitus ab senatu erat) adscripserunt, & sub Tifatis Capuæ agrum vendiderunt. Sub idem tempus L. Manlius Acidinus ex Hispania decedens, prohibitus à M. Portio Læca tribuno plebis, ne ovans rediret, quum ab senatu impetrasset, privatus urbem ingrediens mille ducenta pondo argenti, triginta pondo ferme auri in ærarium tulit. Eodem anno Cn. Bæbius Tamphilus, qui ab C. Aurelio consule anni prioris provinciam Galliam acceperat, temere ingressus Gallorum Insubrium fines, propè cum toto exercitu est circumventus. supra sex millia & sexcentos milites amisit. tanta ex eo bello, quod jam timeri desierat, clades accepta est. Ea res L. Lentulum consulem ab urbe excivit. qui ut in provinciam venit plenam tumultus, trepido exercitu accepto, prætorem, multis probis increpitum,

pitum, provincia decedere, atque abire Romam iussit. Neque ipse consul memorabile quicquam gessit, comitiorum causa Romam revocatus, quæ ipsa per M. Fulvium & Manium Curium tribunos plebis impediabantur: quòd T. Quintium Flamininum consulatum ex quaestura petere non patiebantur. *Jam ædilitatem præturamque fastidiri: nec per honorum gradus documentum sui dantes nobiles homines tendere ad consulatum; sed, transcendendo media, summa imis continuare.* Res ex campestri certamine in senatum venit. Patres censuerunt, *Qui honorem, quem sibi capere per leges liceret, peteret, in eo populo creandi quem velit potestate fieri æquum esse.* In auctoritate Patrum fuere tribuni. Creati consules Sex. Ælius Pætus & T. Quintius Flamininus. Inde prætorum comitia habita. creati L. Cornelius Merula, M. Claudius Marcellus, M. Portius Cato, C.

*Ante Chr.
198.
U.C. 554.*

Helvius, qui ædiles plebis fuerant. ab iis ludi plebei instaurati. & epulum Jovis fuit ludorum causa. Et ab ædilibus curulibus, C. Valerio Flacco flamine Diali & C. Cornelio Cethego, ludi Romani magno apparatu facti. Ser. & C. Sulpicii Galbæ pontifices eo anno mortui sunt. in eorum locum M. Æmilius Lepidus & Cn. Cornelius Scipio pontifices suffecti sunt.

VIII. Sex. Ælius Pætus, T. Quintius Flamininus consules magistratu inito senatum in Capitolio quum habuissent, decreverunt Patres, *ut provincias Macedoniam atque Italiam consules compararent inter se, sortirenturve. utri eorum Macedonia evenisset, in supplementum legionum tria millia militum Romanorum scriberet, & trecentos equites: item sociorum Latini nominis quinque millia peditum, quingentos equites.* Alteri consuli novus omnis exercitus decretus. L. Lentulo, prioris anni consuli, prorogatum imperium est: vetitusque

vetitusque aut ipse provincia decedere prius, aut veterem exercitum deducere, quàm cum legionibus novis consul venisset. Sortiti consules provincias. *Ælio* Italia, *Quintio* Macedonia evenit. Prætores, *L. Cornelius Merula* urbanam, *M. Claudius Siciliam*, *M. Porcius Sardiniam*, *C. Helvius Galliam* est fortitus. Delectus inde haberi est cœptus. nam, præter consulares exercitus, prætores quoque jussi scribere milites erant. *Marcello* in Siciliam quatuor millia peditum socium Latini nominis, & trecentos equites; *Catoni* in Sardiniam ex eodem genere militum tria millia peditum, ducentos equites: ita ut hi prætores ambo, quum in provincias venissent, veteres dimitterent pedites equitesque. *Attali* deinde regis legatos in senatum consules introduxerunt. Hi regem classe sua copiisque omnibus terrarumque Romanam rem juvare, quæque imperarent Romani consules impigre atque obedienter ad eam diem fecisse, quum exposuissent, *Vereri* dixerunt, ne id præstare ei per *Antiochum* regem ultra non liceret. vacuum namque præsidii navalibus terrestribusque regnum *Attali* *Antiochum* invasisse. Itaque *Attalum* orare Patres conscriptos, si sua classe, suaque opera uti ad Macedonicum bellum vellent, mitterent ipsi præsidium ad regnum ejus tutandum: si id nollent, ipsum ad sua defendenda cum classe ac reliquis copiis redire paterentur. Senatus legatis ita responderi jussit, Quod rex *Attalus* classe copiisque aliis duces Romanos juvisset, id gratum senatui fore: auxilia nec ipsos missuros *Attalo* adversus *Antiochum*, socium & amicum populi Romani; nec *Attali* auxilia retenturos ultra quàm regi commodum esset. Semper populum Romanum alienis rebus arbitrio alieno usum. & principum & finem in potestate ipsorum, qui ope sua velint adjutos Romanos, esse. Legatos ad *Antiochum* missuros, qui nunc-

cient,

cient, Attali naviumque ejus & militum opera adversus Philippum, communem hostem, uti populum Romanum. Gratum eum facturum & senatui, si regno abstineat, belloque abstinet. Æquum esse, socios & amicos populi Romani reges inter se quoque ipsos pacem servare.

IX. Consulem T. Quintium, ita habito delectus, ut eos fere legeret qui in Hispania aut Africa meruissent, spectatæ virtutis milites, properantem in provinciam prodigia nunciata atque eorum procuratio Romæ tenuerunt. De cælo tacta erant, via publica Veiis, forum & ædes Jovis Lanuvii, Herculis ædes Ardeæ, Capuæ murus & turres & ædes quæ Alba dicitur. cælum ardere visum erat Arretii. terra Velitris trium jugerum spatio caverna ingenti defederat. Sueffæ Auruncæ nunciabant agnum cum duobus capitibus natum, & Sinuessæ porcum humano capite. Eorum prodigiorum causa supplicatio unum diem habita. & consules rebus divinis operam dederunt; placatisque Diis profecti in provincias sunt. Ælius cum C. Helvetio præ-tore in Galliam, exercitumque ab L. Lentulo acceptum, quem dimittere debebat, prætori tradidit, ipse novis legionibus, quas secum adduxerat. bellum gesturus: neque memorabilis rei quicquam gessit. Et T. Quintius alter consul maturius, quàm priores soliti erant consules, à Brundisio quum transivisset, Corcyram tenuit cum octo millibus peditum, equitibus octingentis. A Corcyra in proxima Epiri quinquere mi trajecit, & in castra Romana magnis itineribus contendit. inde Villio dimisso paucos moratus dies, dum se copiæ à Corcyra assequerentur, concilium habuit, utrùm recto itinere per castra hostium viam facere conaretur: an, ne tentata quidem re tanti labôris ac periculi, per Daliaretios potiùs

Lycumque tuto circuitu Macedoniam intraret. Vicissetque ea sententia, ni timuisset, ne, quum à mari longius recessisset, misso è manibus hoste, si (quod antea fecerat) solitudinibus silvisque se tutari rex voluisset, sine ullo effectu æstas extraheretur. Ut cumque esset igitur, illo ipso tam iniquo loco aggredi hostem placuit. sed magis fieri id placebat, quàm quo modo fieret, satis expediebat. Dies quadraginta sine ullo conatu sedentes in conspectu hostium absumpserant.

X. Inde spes data Philippo est per Epirotarum gentem tentandæ pacis. habitoque concilio delecti ad eam rem agendam, Pausanias prætor & Alexander magister equitum, consulem & regem, ubi in arctissimas ripas Aous cogitur amnis, in colloquium adduxerunt. Summa postulorum consulis erat, præsidia ex civitatibus rex deduceret: iis, quorum agros urbesque populatus esset, redderet res quæ compararent. ceterorum æquo arbitrio æstimatio fieret. Philippus *alias aliarum civitatum conditionem esse* respondit. *quas ipse cepisset, eas liberaturum. quæ sibi traditæ à majoribus essent, earum hereditaria ac iusta possessione non excessurum. si quas quererentur belli clades eæ civitates, cum quibus bellatum foret; arbitrio quo vellent populorum, cum quibus pax utrisque fuisset, se usurum.* Consul, *Nihil ad id quidem arbitrio aut iudice opus esse, dicere. Cui enim non apparere, ab eo, qui prior arma intulisset, injuriam ortam? nec Philippum ab ullis bello laceffitum, ipsum priorem vim omnibus fecisse.* Inde quum ageretur, quæ civitates liberandæ essent, Thessalos primos omnium nominavit consul. ad id verò adeò accensus indignatione est rex, ut exclamaret, *quid victo gravius imperares T. Quinti?* atque ita se ex colloquio proripuit. & temperatum ægre est, quin
missili-

missilibus, quia dirempti medio amne fuerant, pugnam inter se confererent. Postero die per excursions ab stationibus primò in planitie satis ad id patenti multa levia commissa proelia sunt: deinde recipientibus se regiis in arcta & confragosa loca, aviditate accensi certaminis, eò quoque Romani penetravere. Pro his ordo, & militaris disciplina, & genus armorum erat aptum urgendis regiis: pro hoste loca, & catapultæ ballistæque, in omnibus propè rupibus, quasi in muris, dispositæ. Multis hinc atque illinc vulneribus acceptis, quum etiam, ut in prælio iusto, aliquot cecidissent, nox pugnae finem fecit.

XI. Quum in hoc statu res esset, pastor quidam à Charopo principe Epirotarum missus deducitur ad consulem. Is se in eo saltu, qui regiis tunc oneratus castris erat, armentum pascere ait: omnes montium eorum anfractus callesque nôsse. Si secum aliquos mittere velit, non iniquo nec perdifficili aditu supra caput hostium deducturum. Hæc, Charopus renunciari jubet, ita crederet, ut suæ potiùs omnia, quàm illius potestatis essent. Quum magis vellet credere quàm auderet consul, mistumque gaudio ac metu animum gereret, auctoritate motus Charopi, experiri spem oblatam statuit. &, ut averteret rem à suspicione, biduo insequenti laceßere hostem, dispositis ab omni parte copiis, succedentibusque integris in locum defessorum, non destitit. Quatuor millia inde lecta peditum & trecentos equites tribuno militum tradit. equites, quoad loca patiantur, ducere jubet: ubi ad invia equitum ventum sit, in planitie aliqua locari equitatum; pedites, quâ dux monstraret viam, ire: ubi, ut polliceatur, super caput hostium perventum sit, fumo dare signum: nec antè clamorem tollere, quàm, ab

se signo accepto, pugnam cœptam arbitrari posset. Nocte itinera fieri jubet, (& pernox fortè luna erat) interdiu cibi quietisque sumeret tempus. ducem promissis ingentibus oneratum, si fides exstet, vinctum tamen tribuno tradidit. His copiis ita dimissis, eo intentiùs Romanus undique instat capi stationes.

XII. Interim die tertio quum verticem, quem petierant, Romani cepisse ac tenere se fumo significarent; tum verò, trifariam divisis copiis, consul valle media cum militum robore succedit: cornua dextra lævaque admovet castris. nec segniùs hostes obviam eunt. & dum aviditate certaminis provecti extra munitiones pugnant, haud paullo superior est Romanus miles & virtute, & scientia, & armorum genere. Posteaquam multis vulneratis interfectisque recepere se regii in loca aut munito aut natura tuta, verterat periculum in Romanos; temere in loca iniqua, nec faciles ad receptum angustias progressos. neque impunita temeritate inde recepissent sese, ni clamor primùm ab tergo auditus, dein pugna etiam cœpta amentes repentino terrore regios fecisset. Pars in fugam effusi sunt: pars, quia magis locus fugæ deerat, quàm quòd animi satis esset ad pugnam, quum substitissent, ab hoste, & à fronte & à tergo urgente, circumventi sunt. Deleri totus exercitus potuit, si fugientes persecuti victores essent: sed equitem angustiae locorumque asperitas, peditum armorum gravitas impediit. Rex primò effusè ac sine respectu fugit: dein quinque millium spatium progressus, quum ex iniquitate locorum, id quod erat, suspicatus esset, sequi non posse hostem, substitit in tumulto quodam; dimisitque suos per omnia juga vallesque, qui palatos in unum colligerent. Non plus duobus millibus hominum amissis, cetera
omnis

omnis multitudo, velut signum aliquod secuta, in unum quum convenisset, frequenti agmine petunt Thessaliam. Romani, quoad tutum fuit insecuti, cædentes spoliantesque cæsos, castra regia, etiam sine defensoribus, difficili aditu, diripiunt: atque ea nocte in suis castris manserunt.

XIII. Postero die consul per ipsas angustias, quæ se inter valles flumen insinuat, hostem sequitur. Rex primo die ad castra Pyrrhi pervenit. locus quem ita vocant, est in Triphylia terra Melotidis. inde postero die ingenti itinere agminis (& metus urgebat) in montem Lingon perrexit. Ipsi montes Epiri sunt, interjecti Macedoniae Thessaliæque: latus, quod vergit in Thessaliam, oriens spectat; septentrio à Macedonia objicitur. Vestiti frequentibus silvis sunt; juga summa campos patentes, aquasque perennes habent. Ibi stativis rex per aliquot dies habitis, fluctuatus animo est, utrùm protinus in regnum se reciperet, an reverti in Thessaliam posset. Inclinauit sententia, suum in Thessaliam agmen dimitteret; Triccamque proximis limitibus petit: inde obvias urbes raptim peragravit. Homines, qui sequi possent, sedibus excibat, oppida incendebat, rerum suarum, quas possent, ferendarum secum dominis jus fiebat, cetera, militis præda erat. nec quod ab hoste crudelius pati possent, reliqui quicquam fuit, quàm quæ ab sociis patiebantur. Hæc etiam facienti Philippo acerba erant, sed è terra mox futura hostium, corpora saltem eripere sociorum volebat. ita evastata sunt oppida, Phacium, Iresia, Euhydrium, Eretria, Palæphatus. Pheras quum peteret, exclusus, quia res egebat mora, si expugnare vellet, nec tempus erat; omisso incepto, in Macedoniam transcendit. Nam etiam Ætolos appropinquare fama erat. qui audito prælio, quod

circa annum Aoum factum erat, proximis prius evastatis circa Sperchias & Macran (quam vocant) Comen, transgressi inde in Theſſaliam Cymines & Angeas primo impetu potiti sunt. à Metropoli dum vastant agros, concursu oppidanorum ad tuenda mœnia facto, repulsi sunt. Callithera inde aggressi, similem impetum oppidanorum pertinacius sustinuerunt: compulsisque intra mœnia qui eruperant, contenti ea victoria, quia spes nulla admodum expugnandi erat, abceſſerunt. Theuma inde & Calathana vicos expugnant, diripiuntque. Achorras per deditionem receperunt. Xyniæ simili metu à cultoribus desertæ sunt. Hoc sedibus suis extorregmen in præsidium incidit, quod Athamanum, quo tutior frumentatio esset, ducebatur. incondita inermisque multitudo, mista imbelli turba, ab armatis cæsa est. Xyniæ desertæ diripiuntur. Cyphara inde Ætoli capiunt, opportunè Dolopiæ imminens castellum. Hæc raptim intra paucos dies ab Ætolis gesta. Nec Amynder atque Athamanes post famam prosperæ pugnæ Romanorum quieverunt.

XIV. Ceterum Amynder, quia suo militi parum fidebat, petito ab consule modico præsidio, quum Gomphos peteret, oppidum protinus nomine Phecæ, situm inter Gomphos faucesque angustas, quæ ab Athamania Theſſaliam dirimunt, vi cepit. inde Gomphos adortus, & per aliquot dies summa vi urbem tuentes, quum scalas ad mœnia erexisset, eodem metu perpulit ad deditionem. Hæc traditio Gomphorum ingentem terrorem Theſſalis intulit. dedidere deinceps sese, qui Argenta, quique Pherinum, & Thimarum, & Lifinas, & Stimonem, & Lampsum habent, aliaque castella juxta ignobilia. Dum Athamanes Ætolique, summoto Macedonum metu,

metu, in aliena victoria suam prædam faciunt, Thessaliaque à tribus simul exercitibus, incerta quem hostem quemve socium crederet, vastatur; consul faucibus, quas fuga hostium aperuerat, in regionem Epiri transgressus, etsi probè scit cui parti, Charopo principe excepto, Epirotæ favissent; tamen, quia ab satisfaciendi quoque cura imperata enixè facere videt, ex præsentī eos potius quàm ex præterito æstimat habitu, & ipsa facilitate veniæ animos eorum in posterum conciliat. Missis deinde nunciis Corcyram, ut onerariæ naves in sinum venirent Ambracium; ipse progressus modicis itineribus, quarto die in monte Cercetio posuit castra: eodem Amyntandro cum suis auxiliis accito; non tam virium ejus egens, quàm ut duces in Thessaliā haberet. ab eodem consilio & plerique Epirotarum voluntarii inter auxilia accepti.

XV. Primam urbium Thessaliæ Phaleriam est aggressus. duo millia Macedonum in præsidio habebat, qui primò summa vi restiterunt, quantum arma, quantum mœnia tueri poterant. sed oppugnatione continua, non die non nocte remissa, quum consul in eo verti crederet ceterorum Thessalorum animos, si primi vim Romanam non sustinuisent, vicit pertinaciam Macedonum. Capta Phaleria, legati à Metropoli & à Piera dedentes urbes venerunt. venia eisdem petentibus datur. Phaleria incensa ac direpta est. Inde Æginium petit. quem locum quum vel modico præsidio tutum ac propè inexpugnabilem vidisset, paucis in stationem proximam telis coniectis, ad Gomphorum regionem agmen vertit. digressusque in campos Thessaliæ, quum jam omnia exercitui deessent, quia Epirotarum pepercerat agris; explorato antè, utrùm Leucadem ac sinum Ambracium onerariæ tenuissent; frumentatum

Ambraciam invicem cohortes misit. & est iter à Gomphis Ambraciam sicut impeditum ac difficile, ita spatio perbrevis. Intra paucos itaque dies, transvectis à mari commeatibus, repleta omni rerum copia sunt castra. Inde Atracem est profectus. decem ferme millia à Larissa abest. ex Perræbia oriundi sunt. sita est urbs super Peneum amnem. Nihil trepidavere Theffali ad primum adventum Romanorum. Et Philippus sicut in Theffaliam ipse progredi non audebat, ita intra Tempe stativis positus, ut quisque locus ab hoste tentabatur, præsidia per occasiones submittebat.

XVI. Sub idem fere tempus, quo consul adversus Philippum primum in Epiri faucibus castra posuit, & L. Quintius, frater consulis, cui classis cura maritimæque oræ imperium mandatum ab senatu erat, cum duabus quinquereimibus Corcyram transvectus, postquam profectam inde classem audivit, nihil morandum ratus, quum ad Zamam insulam assecutus esset, dimisso L. Apustio, cui successerat; tardè inde ad Maleam, trahendis plerumque remulco navibus, quæ cum commeatu sequebantur, pervenit. A Malea, jussis ceteris, quantum maxime possent, maturatè sequi, ipse tribus quinquereimibus expeditis Piræeum præcepit, accepitque naves ibi relictas ab L. Apustio legato ad præsidium Athenarum. Eodem tempore duæ ex Asia classes profectæ una cum Attalo rege: (eæ quatuor & viginti quinquereimes erant) Rhodia altera viginti navium tectarum. Agesimbrotus præerat. hæ circa Andrum insulam classes conjunctæ, Eubœam inde exiguo distantem freto trajecerunt. Carystiorum primum agros vastârunt: deinde, ubi Carystus præsidio à Chalcide raptim misso firma visa est, ad Eretriam accesserunt. Eodem & L. Quintius cum

iis navibus, quæ Piræei fuerant, Attali regis adventu audito venit, jussitque, ut quæ ex sua classe venissent naves, Eubœam peterent. Eretria summa vi oppugnabatur: nam & trium junctarum classium naves omnis generis tormenta machinasque ad urbium excidia secum portabant: & agri affatim materiæ præbebant ad nova molienda opera. Oppidani primò haud impigre tuebantur mœnia: deinde fessi vulneratique aliquot, quum & muri partem everfam operibus hostium cernerent, ad deditionem inclinârunt. sed præsidium erat Macedonum; quos non minùs quàm Romanos metuebant: & Philocles, regius præfectus, à Chalcide nuncios mittebat, se in tempore affuturum, si sustinerent obfisionem. Hæc mista metu spes, ultra quàm velent aut quàm possent, trahere eos tempus cogebat. deinde posteaquam Philoclem repulsum, trepidantemque refugisse Chalcidem acceperunt, oratores extemplo ad Attalum veniam fidemque ejus petentes miserunt. Dum, in spem pacis intenti, segniùs munera belli obeunt, & ea modò parte, qua murus dirutus erat, ceteris neglectis, stationes armatas opponunt; Quintius noctu ab ea parte, quæ minime suspecta erat, impetu facto, scalis urbem cepit. Oppidanorum omnis multitudo cum conjugibus ac liberis in arcem confugit: deinde in deditionem venit. Pecuniæ aurique & argenti haud sanè multum fuit: signa, tabulæ priscæ artis, ornamentaque ejus generis plura, quàm pro urbis magnitudine aut opibus ceteris, inventa.

XVII. Carystus inde repetita, unde, priusquam è navibus copiæ exponerentur, omnis multitudo, urbe deserta, in arcem confugit. Inde ad fidem ab Romano petendam oratores mittunt. oppidanis extemplo vita ac libertas concessa est: Macedoni-

bus trecenti nummi in capita statutum est pretium, & ut armis traditis abirent. Hac summa redempti in Bœotiam inermes trajecti. Navales copiar, duabus claris urbibus Eubœæ intra dies paucos captis, circumvectæ Sunium, Atticæ terræ promontorium, Cenchreas, Corinthiorum emporium, petierunt. Consul interim omnium spe longiorem atrocioremque oppugnationem habuit: & eâ, quâ minimûm credidisset, resistebant hostes. nam omnem laborem in muro diruendo crediderat fore: si aditum armatis in urbem patefecisset, fugam inde cædemque hostium fore, qualis captis urbibus fieri solet. ceterûm posteaquam, parte muri arietibus decussa, per ipsas ruinas transcenderunt in urbem armati: illud principium velut novi, atque integri laboris fuit. nam Macedones, qui in præsidio erant & multi & delecti, gloriam etiâ egregiam rati, si armis potius & virtute, quâm mœnibus urbem tuerentur, conferti, pluribus introrsus ordinibus acie firmata, quum transcendere ruinas sensissent Romanos, per impeditum ac difficilem ad receptum locum expulerunt. Id consul ægre passus, nec eam ignominiam ad unius modo expugnandæ moram urbis, sed ad summam universi belli pertinere ratus, quod ex momentis parvarum plerumque rerum penderet, purgato loco, qui strage semirutum, muri cumulus erat, turrim ingentis altitudinis, magnam vim armatorum multiplici tabulatoq portantem, promovit: & cohortes invicem sub signis, quæ curneum Macedonum, (phalangem ipsi vocant) si possent, vi perumperent, emittebat. Sed ad loca angusta, haud latè patente intervallo diruti muri, genus armorum pugnaeque hosti aptius erat. ubi conferti hastas ingentis longitudinis præ se Macedones objecissent, velut in constructam densitate clypeorum

elypeorum testudinem, Romani pilis nequicquam emissis quum strinxissent gladios: neque congregi propius, neque præcidere hastas poterant: & si quam incidissent aut præfregissent, hastile fragmento ipso acuto inter spicula integrarum hastarum velut vallum explebat. Ad hoc & muri pars adhuc integra utraque tuta præstabat latera: nec ex longo spatio aut cedendum, aut impetus faciendus erat. quæ res turbare ordines solet. Accessit etiam fortuita res ad animos eorum firmandos. nam quum turris per aggerem parum densati soli ageretur, rota una, in altiore orbitam depressa, ita turrim inclinavit, ut speciem ruentis hostibus, trepidationemque insanam superstantibus armatis præbuerit.

XVIII. Quum parum quicquam succederet, consul minimè æquo animo comparisonem militum generis armorumque fieri patiebatur: simul nec maturam expugnandi spem, nec rationem procul à mari, & in evastatis belli cladibus locis, hibernandi ullam cernebat. itaque relicta obsidione, quia nullus in tota Acarnaniæ atque Ætoliz ora portus erat, qui simul & omnes onerarias, quæ commeatum exercitui portabant, caperet, & testa ad hibernandum legionibus præberet; Anticyra in Phocide, in Corinthium versa sinum, ad id opportunissimè sita visa: quia nec procul Thessalia, hostiumque locis abibant; & ex adverso Peloponnesum exiguo maris spatio divisam, ab tergo Ætoliam Acarnaniamque, ab lateribus Locridem & Boeotiam habebant. Phocidis primo impetu Phanoteam sine certamine cepit. Anticyra haud multum in expugnando præbuit moræ. Ambrysus inde Hyampolisque receptæ. Daulis, quia in tumulo excelso sita est, nec scalis nec operibus capi poterat. lacescendo missilibus eos, qui in præsidio erant, quum ad excursions eliciuissent, refugiendo invicem insequendoque,

&

& levibus sine effectu certaminibus, eo negligentiae & contemptus addaxerunt, ut cum refugientibus in portam permitti impetum Romani facerent. Sex alia ignobilia castella Phocidis, terrore magis quàm armis, in potestatem venerunt. Elatia clausit portas: nec, nisi vi cogerentur, recepturi mœnibus videbantur aut ducem aut exercitum Romanum.

XIX. Elatiam obsidenti consuli rei majoris spes affulsit, Achæorum gentem ab societate regia ad Romanam amicitiam avertendi. Cycliadem, principem factionis ad Philippum trahentium res, expulerant. Aristænus, qui Romanis gentem jungi volebat, prætor erat. Classis Romana cum Attalo & Rhodiis Cenchreis stabat, parabantque communi omnes consilio Corinthum oppugnare. Optimum igitur ratus est, priusquam eam rem aggrederentur, legatos ad gentem Achæorum mitti; pollicentes, si ab rege ad Romanos defecissent, Corinthum iis contributuros in antiquum gentis concilium. Auctore consule legati à fratre ejus L. Quintio, & Attalo, & Rhodiis, & Atheniensibus ad Achæos missi. Sicyone datum iis est concilium. Erat autem non admodum simplex habitus animorum inter Achæos. terrebat eos Lacedæmœnius, gravis & assiduus hostis: horrebant Romana arma: Macedonum beneficiis & veteribus & recentibus obligati erant: regem ipsum suspectum habebant pro ejus crudelitate perfidiaque: neque ex iis, quæ tum ad tempus faceret, æstimantes, graviolem post bellum dominum futurum cernebant. neque solum quid in senatu quisque civitatis suæ, aut in communibus conciliis gentis pro sententia dicerent, ignorabant: sed ne ipsis quidem secum cogitantibus, quid vellent, aut quid optarent, satis constabat. Ad homines ita incertos introductis legatis potestas dicendi facta est. Romanus primùm legatus L. Calpurnius, deinde Attali

tali regis legati, post eos Rhodii differuerunt. Philippi deinde legatis dicendi potestas facta est. postremi Athenienses, ut refellerent Macedonum dicta, auditi sunt. Ii fere atrocissimè in regem, quia nulli nec plura, nec tam acerba passi erant, inuesti sunt. Et illa quidem concio sub occasum solis, tot legatorum perpetuis orationibus die absumpto, dimissa est.

XX. Postero die advocatur concilium, ubi quum per præconem, sicut Græcis mos est, suadendi, si quis vellet, potestas à magistratibus facta esset, nec quisquam prodiret; diu silentium aliorum alios intuentium fuit. neque mirum, si quibus sua sponte volutantibus res inter se pugnantes obtorpuerant quodammodo animi, eos orationes quoque insuper turbaverant, utrimque quæ difficilia essent promendo, admonendoque, per totum diem habitæ. Tandem Aristæus prætor Achæorum, ne tacitum concilium dimitteret, *Ubi, inquit, illa certamina animorum, Achæi, sunt, quibus in conviviiis & circulis, quum de Philippo & Romanis mentio incidit, vix manibus temperabatis? Nunc in concilio, ad eam rem unam indicto, quum legatorum utrimque verba audieritis, quum referant magistratus, quum præco ad suadendum vocet, obmutuistis. Si non cura communis salutis, ne studia quidem, quæ in hanc aut illam partem animos vestros inclinârunt, vocem cuiquam possunt exprimere? quum præsertim nemo tam hebes sit, qui ignorare possit, dicendi ac suadendi, quod quisque aut velit, aut optimum putet, nunc occasionem esse priusquam quicquam decernamus. Ubi semel decretum erit, omnibus id, etiam quibus antè displicuerit, pro bono atque utili scdere defendendum.* Hæc adhortatio prætoris non modò quemquam unum elicuit ad suadendum; sed ne fremitum quidem aut murmur concionis tantæ, ex tot populis congregatæ, movit.

XXI. Tum Aristænus prætor rursus: *Non magis consilium vobis, principes Achæorum, deest, quàm lingua: sed suo quisque periculo in commune consultum non vult. forsitan ego quoque tacerem, si privatus essem. nunc prætor video, aut non dandum concilium legatis fuisse, aut inde sine responso eos dimittendos non esse. Respondere autem nisi ex vestro decreto què possum? Et quando nemo vestrum, qui in hoc concilium advocati esis, pro sententia quicquam dicere vult, aut audet; orationes legatorum hesterno die dictas pro sententiis percenseamus: perinde ac si non postulaverint quæ è re sua essent, sed suaserint quæ nobis censerent utilia esse. Romani Rhodique & Attalus societatem amicitiamque nostram petunt: & in bello, quod adversus Philippum gerunt, se à nobis adjuvari æquum censent. Philippus societatis secum admonet & iurijurandi: modo postulat, ut secum stemus; modo, ne interfimus armis, contentum ait se esse. Nulline venit in mentem, cur, qui nondum socii sunt, plus petant, quàm socius? Non sit hoc neque modestia Philippi, neque impudentia Romanorum. Athæi portus & dant fiduciam postulantibus, & demunt. Philippi præter legatum videmus nihil. Romana classis ad Cenchreas stat, urbium Eubææ spolia præ se ferens: consulem, legionesque ejus, exiguo maris spatio disjunctas, Phocidem ac Locridem pervagantes videmus. Miramini, cur diffidenter Cleomedon legatus Philippi, ut pro rege arma caperemus adversus Romanos, modo egerit. qui si ex eodem fœdere ac iurejurando, cujus nobis religionem injiciebat, rogemus eum, ut nos Philippus & ab Nabide ac Lacedæmoniis & ab Romanis descendat; non modo præsidium, quo nos tueatur, sed ne quid respondeat quidem nobis, sit inventurus: non Hercle magis, quàm ipse Philippus priore anno, qui, pollicendo se adversus Nabidem bellum gesturum, quum tentasset nostram juventutem hinc in Eubæam extrahere, posseaquam nos neque decernere id sibi*

sibi præsidium, neque velle illigari Romano bello vidit, oblitus societatis ejus, quam nunc jactat, vastandos depopulandosque Nabidi ac Lacedæmoniis reliquit. Ac mihi quidem minimè conveniens inter se oratio Cleomedontis visa est. Elevabat Romanum bellum, eventumque ejus eundem fore, qui prioris belli, quod cum Philippo gesserint, dicebat. Cur igitur nostrum ille auxilium absens petit potius, quàm præsens nos veteres socios simul ab Nabide ac Romanis tueatur? Nos dico? Quid ita passus est Eretriam Carystumque capi? quid ita tot Thessaliæ urbes? quid ita Locridem, Phocidemque? quid ita nunc Elatiam oppugnari patitur? cur excessit faucibus Epiri, claustrisque illis inexpugnabilibus super Aoum amnem, aut vi, aut metu, aut voluntate, relictoque, quem insidebat, saltu, penitus in regnum abiit? Si sua voluntate tot socios reliquit hostibus diripiendos, quid recusare potest, quin & socii sibi consulant? si metu, nobis quoque ignoscat timentibus. Si victus armis cessit, Achæi arma Romana sustinebimus, Cleomedon, quæ vos Macedones non sustinuisistis? An tibi potius credamus, Romanos non majoribus copiis, nec viribus, nunc bellum gerere, quàm antea gesserint, potius quàm res ipsas intueamur? Ætolos tum classe adjuverunt: nec duce consulari, nec exercitu bellum gesserunt. Sociorum Philippi maritimæ urbes in terrore ac tumultu erant. mediterranea adeo tuta ab Romanis armis fuerunt, ut Philippus Ætolos, nequicquam opem Romanorum implorantes, depopularetur. nunc autem defuncti bello Punico Romani, quod per sexdecim annos velut intra viscera Italiæ toleraverunt, non præsidium Ætolis bellantibus miserunt, sed ipsi duces belli arma terra marique simul Macedoniæ intulerunt. Tertius jam consul summa vi gerit bellum. Sulpicius, in ipsa Macedonia. congressus, fudit fugavitque regem; partem opulentissimam regni ejus depopulatus. nunc Quintius tenentem claustra Epiri, natura loci, munimentis, exercituque fretum, castris exiit: fugientem

fugientem in Theſſaliam perſecutus, præſidia regia, ſociasque ejus urbes prope in conſpectu regis ipſius expugnavit. Ne ſint vera, quæ Athenienſes modo legati de crudelitate, avaritia, & libidine regis dixerunt: nihil ad nos pertineant, quæ in terra Attica ſcelera in ſuperos inferosque Deos ſint admiſſa; multo minus, quàm quæ Ciani, Abydenique, qui procul à nobis abſunt, paſſi ſunt: noſtrorum ipſi vulnerum, ſi vultis, obliviſcamur: cædes direptionesque bonorum Meſſenæ in media Peloponneſo factas, & hoſpitum Cypariſſiæ Garitenem, contra jus omne ac fas inter epulas prope ipſas occiſum, & Aratum patrem filiumque Sicyonios, quum ſenem infelicem parentem etiam appellare ſolitus eſſet, interſectos: filii etiam uxorem libidinis cauſſa in Macedoniam aſportatam: cetera ſupra virginum matronarumque oblivioni dentur. Ne ſint cum Philippo res, cujus crudelitatis metu obmutuiſſis omnes: nam quæ alia tacendi advocatis in concilium cauſſa eſt? Cum Antigono mitiſſimo ac juſtiſſimo rege, & de nobis omnibus optime merito exiſtimemus diſceptationem eſſe: num id poſtularet ſacere nos, quod tum fieri non poſſet? Peninſula eſt Peloponneſus, anguſtis Iſthmi faucibus continenti adhærens, nulli apertior atque opportunior, quàm navali bello. ſi centum teſtæ nares, & quinquaginta leviores apertæ, & triginta Iſſaici lembi maritimam oram vaſtare, & expoſitas prope in ipſis littoribus urbes cæperint oppugnare, in mediterraneas ſcilicet nos urbes recipiemus? tanquam non inteſtino, & hærente in ipſis viſceribus uramur bello? Quum terra Nabis & Lacedæmonii, mari Romana claſſis urgebunt; unde regiam ſocietatem, & præſidia Macedonum implorem? an ipſi noſtris armis ab hoſte Romano tutabimur urbes, quæ oppugnabuntur? egregiè enim Dymas priore bello ſumus tutati. Satis exemplorum nobis alienæ clades præbent: ne quæramus quemadmodum ceteris exemplo ſimus. Nolite, quia ultro Romani petunt amicitiam, id quod optandum vobis ac ſumma ope petendum erat, ſeſſidire.

fastidire. metu enim videlicet compulsi in aliena terra, quia sub umbra auxilii vestri latere volunt, in societatem vestram confugiunt, ut portubus vestris recipiantur, et comœdibus utantur. Mare in potestate habent; terras quascumque adeunt, extemplo ditionis suæ faciunt. quid rogant, cogere possunt: quia pepercisse volunt, committere vos, cur pereatis, non patiuntur. Nam quod Cleomedon modo, tanquam mediam & tutissimam vobis viam consilii, ut quiesceretis, abstineretisque armis, ostendebat; ea non media, sed nulla via est. Etenim præterquam quod aut accipienda, aut aspernenda vobis Romana societas est; quid aliud quàm nusquam gratia stabili, velut qui eventum expectaverimus, ut fortunæ applicaremus nostra consilia, præda victoris erimus? Nolite, si, quod omnibus votis petendum erat, ultro offertur, fastidire. Non quemadmodum hodie utrumque vobis licet, sic semper licitum est. nec sæpe, nec diu eadem occasio erit. Liberare vos à Philippo jamdiu magis vultis, quàm audetis. Sine vestro labore & periculo, qui vos in libertatem vindicarent, cum magnis classibus exercitibusque mare trajecerunt. Hos si socios aspernamini, vix sanæ mentis estis. sed aut socios, aut hostes habeatis, oportet.

XXII. Secundum orationem prætoris murmur ortum aliorum cum assensu, aliorum inclementer assentientes increpantium: & jam non singuli tantum, sed populi universi inter se altercabantur: tum inter magistratus gentis (Demiurgos vocant: decem numero creantur) certamen nihilo segnus, quàm inter multitudinem, esse. quinque relatores se de societate Romana aiebant, suffragiumque daturos. quinque lege cautum testabantur, ne quid, quod adversus Philippi societatem esset, aut referre magistratibus, aut decernere concilio jus esset. Hic quoque dies jurgiis est consumptus. Supererat unus justii concilii dies: (tertio enim lex jubebat decretum fieri) in quem adeo

exarsere

exarsere studia, ut vix parentes ab liberis temperarent. Rhisiasus Pellenensis erat, filium Demiurgum nomine Memnonem habebat; partis ejus, quæ decretum recitari, perrogarique sententias prohibebat. Is diu obtestatus filium, ut consulere Achæos communi saluti pateretur, neu pertinacia sua gentem universam perditum iret; posteaquam parum proficiebant preces, juratus se eum sua manu interempturum, nec pro filio, sed pro hoste habiturum; minis pervicit, ut postero die conjungeret iis se, qui referebant. qui quum plures facti referrent, omnibus fere populis haud dubiè approbantibus relationem, ac præ se ferentibus quid decreturi essent; Dymæi, ac Megalopolitani, & quidam Argivorum, priusquam decretum fieret, consurrexerunt, ac reliquerunt concilium: neque mirante ullo, neque improbante. Nam Megalopolitanos avorum memoria pulsos ab Lacedæmoniis restituerat in patriam Antigonus: & Dymæis captis nuper direptisque ab exercitu Romano, quum redimi eos, ubicumque servirent, Philippus jussisset, non libertatem modo, sed etiam patriam reddiderat. Jam Argivi, præterquam quòd Macedonum reges ab se oriundos credunt, privatis etiam hospitibus, familiarique amicitia plerique illigati Philippo erant. ob hæc concilio, quod inclinaverat ad Romanam societatem jubendam, excesserunt. veniaque iis hujus secessionis fuit, & magnis & recentibus obligatis beneficiis.

XXIII. Ceteri populi Achæorum, quum sententiæ perrogarentur, societatem cum Attalo ac Rhodiis præsentis decreto confirmârunt. cum Romanis, quia injussu populi non poterat rata esse, in id tempus, quo Romam mitti legati possent, dilata est. in præsentia tres legatos ad L. Quintium mitti placuit, & exercitum omnem Achæorum ad Corinthum ad moveri, captis Cenchreis, jam urbem ipsam Quintio oppug-

oppugnante. Et ii quidem è regione portæ, quæ fert Sicyonem, posuerunt castra. Romani ad Cenchreas versam partem urbis, Attalus traducto per Isthmum exercitu, ab Lechæo, alterius maris portu, oppugnabant primò segniùs, sperantes seditionem intus fore inter oppidanos ac regium præsidium. posteaquam uno animo omnes, & Macedones tanquam communem patriam tuebantur, & Corinthii ducem præsidii Androsthene haud secus quàm civem & suffragio creatum suo imperio justo patiebantur, omnis inde spes pugnantibus in vi, & armis, & operibus erat: undique aggeres haud facili aditu ad mœnia admovebantur. Aries ex ea parte, quam Romani oppugnabant, aliquantum muri diruerat. in quem locum, quia nudatus munimento erat, protegendum armis quum Macedones concurrissent, atrox prælium inter eos ac Romanos ortum est. Ac primò multitudine facilè expellebantur Romani: assumptis deinde Achæorum Attalique auxiliis, æquabant certamen: nec dubium erat, quin Macedonas Græcosque facilè loco pulsuri fuerint. Transfugarum Italicorum magna multitudo erat: pars ex Annibalis exercitu metu pœnæ à Romanis Philippum secuti; pars navales focii, relictis nuper classibus, ad spem honoratioris militiæ transgressi. hos desperata salus, si Romani vicissent, ad rabiem, magis quàm audaciam, accendebat. Promontorium est adversus Sicyonem Junonis, quam vocant Acræam, in altum excurrent: trajectus inde Corinthum, septem millia ferme passuum. eò Philocles, regius & ipse præfectus, mille & quingentos milites per Bœotiam duxit. præstò fuere à Corintho lembi, qui præsidium id acceptum Lechæum trajicerent. Auctor erat Attalus incensis operibus omittendæ exemplo oppugnationis. Pertinaciùs Quintius in incepto
per-

perstabat. is quoque, ut pro omnibus portis disposita vidit præsidia regis, nec facile erumpentium impetus sustineri posse, in Attali sententiam concessit. ita irritò incepto, dimissis Achæis, reditum ad naves est. Attalus Piræum, Romani Corcyram petierunt.

XXIV. Dum hæc à navali exercitu geruntur, consul, in Phocide ad Elatiam castris positus, primò colloquiis rem per principes Elatiensium tentavit: posteaquam nihil esse in manu sua, & plures validioresque esse regios, quàm oppidanos, respondebatur, tum simul ab omni parte operibus armisque urbem est aggressus. Ariete admoto, quantum inter turres muri erat prorutum, quum ingenti fragore ac strepitu nudasset urbem, simul & cohors Romana per apertum recenti strage iter invasit: & ex omnibus oppidi partibus, relictis suis quisque stationibus, in eum, qui premebatur impetu hostium, locum concurrerunt. Eodem tempore Romani & ruinas muri supervadebant, & scalas ad stantia mœnia inferebant. &, dum in unam partem oculos animosque hostium certamen averterat, pluribus locis scalis capitur murus, armatique in urbem transcenderunt. quo tumultu audito territi hostes, relicto, quem conferti tuebantur, loco, in arcem omnes metu, inermi quoque insequente turba, confugerunt. Ita urbe potitur consul. qua direpta, missis in arcem, qui vitam regiis, si abire vellent inermes, libertatem Elatiensibus pollicerentur, fideque in hæc data, post paucos dies arcem recepit.

XXV. Ceterum adventu in Achaiam Philoclis regii præfecti, non Corinthus tantum liberata obfidiōe, sed Argivorum quoque civitas per quosdam principes Philocli prodita est; tentatis prius animis plebis. Mos erat, comitiorum die primo, velut
omnino

ominis causa, prætores pronunciare Jovem, Apollinemque, & Herculem. additum legi erat, ut iis Philippus rex adjiceretur. cujus nomen post pactam cum Romanis societatem quia præco non adjecit, fremitus primò multitudinis ortus, deinde clamor subjicientium Philippi nomen, jubentiumque legitimum honorem usurpare: donec cum ingenti assensu nomen recitatum est. Hujus fiducia favoris Philocles arcessitus, nocte occupat collem imminentem urbi: (Larissam eam arcem vocant) positoque ibi præsidio, quum, lucis principio, signis infestis ad subjectum arci forum vaderet, instructa acies ex adverso occurrit. Præsidium erat Achæorum nuper impositum; quingenti fere juvenes delecti omnium civitatum. Ænesidemus Dymæus præerat. Adhortator à præfecto regio missus, qui excedere urbe juberet (neque enim pares eos oppidanis solis, qui idem quod Macedones sentirent, nedum adjunctis Macedonibus esse, quos ne Romani quidem ad Corinthum sustinuisent) primò nihil nec ducem nec ipsos movit: post paullo, ut Argivos quoque armatos ex parte altera venientes magno agmine viderunt, certam perniciem cernentes, omnem tamen casum, si pertinacior dux fuisset, videbantur subituri. Ænesidemus, ne flos Achæorum juventutis simul cum urbe ammitteretur, pactus cum Philocle, ut abire illis liceret, ipse, quo loco steterat, armatus cum paucis clientibus non excessit. Missus à Philocle qui quæreretur, quid sibi vellet, nihil fatus, tantummodo quum projecto præ se clypeo staret, in præsidio creditæ urbis moriturum se armatum respondit. tum jussu præfecti à Thracibus coniecta tela, interfectique omnes. Et post pactam inter Achæos & Romanos societatem, duæ nobilissimæ

bilissimæ civitates, Argi & Corinthus, in potestate regis erant.

XXVI. Hæc ab Romanis ea æstate in Græcia terra marique gesta. In Gallia nihil sanè memorabile ab Sex. Ælio consule gestum. quum duos exercitus in provincia habuisset, unum retentum, quem dimitti oportebat, cui L. Cornelius proconsul præfuerat, (ipse ei C. Helvium prætorem præfecit) alterum, quem in provinciam adduxit: totum prope annum Cremonensibus Placentinisque cogendis redire in colonias, unde belli casibus dissipati erant, consumpsit. Quemadmodum Gallia præter spem quieta eo anno fuit, ita circa urbem servilis propè tumultus excitatus est. Obsides Carthaginiensium Setiæ custodiebantur: cum iis, ut principum liberis, magna vis fervorum erat. augebant eorum numerum, ut ab recenti Africo bello, & ab ipsis Setinis captiva aliquot nationis ejus ex præda emptæ mancipia. Quum conjurationem fecissent, missis ex eo numero qui in Setino agro, deinde circa Norbam & Circeios servitia sollicitarent: satis jam omnibus præparatis, ludis, qui Setiæ propediem futuri erant, spectaculo intentum populum aggredi statuerant; Setia per eadem & repentinum tumultum capta, Norbam & Circeios occupare. Hujus rei tam fœdæ indicium Romam ad L. Cornelium Merulam prætorem urbis delatum est. Servi duo ante lucem ad eum venerunt, atque ordine omnia, quæ acta futuraque erant, exposuerunt. quibus domi custodiri jussis, prætor, senatu vocato, edoctoque quæ indices afferrent, proficisci ad eam conjurationem quærendam atque opprimendam jussus. cum quinque legatis profectus, obvies in agris sacramento rogatos arma capere & sequi

sequi cogebat. Hoc tumultuario delectu duobus millibus ferme hominum armatis, Setiam, omnibus quò pergeret ignaris, venit. ibi raptim principibus conjurationis comprehensis, fuga servorum ex oppido facta est. dimissi deinde per agros qui vestigarent. Egregia duorum opera servorum indicum, & unius liberi fuit. Ei centum millia gravis æris dari Patres jusserunt: servis vicena quina millia æris, & libertatem. pretium eorum ex ærario solutum est dominis. Haud ita multo post, ex ejusdem conjurationis reliquiis, nunciatum est, servitia Præneste occupatura. Eò L. Cornelius prætor profectus. de quingentis fere hominibus. qui in ea noxa erant, supplicium sumpsit. In timore civitas fuit, obsides captivosque Pœnorum ea moliri. Itaque & Romæ vigiliæ per vicos servatæ: jussique circumire eas minores magistratus: & triumviri carceris lautumiarum intentiorem custodiam habere jussi. & circa nomen Latinum à prætore literæ missæ, ut & obsides in privato servarentur, neque in publicum prodeundi facultas daretur; & captivi ne minus decem pondo compedibus vincti in nulla alia quàm in carceris publici custodia essent.

XXVII. Eodem anno legati ab rege Attalo coronam auream CCXLVI. pondo in Capitolio posuerunt: gratiasque senatui egerunt, quòd Antiochus, legatorum Romanorum auctoritate motus, finibus Attali exercitum deduxisset. Eadem æstate equites ducenti, & elephanti decem, & tritici modium ducenta millia, ab rege Masinissa ad exercitum, qui in Græcia erat, pervenerunt. Item ex Sicilia Sardiniaque magni commeatus, & vestimenta exercitui missa. Siciliam M. Marcellus, Sardiniam M. Porcius Cato obtinebat; sanctus & innocens, asperior tamen in fœnore coercendo habitus. Fugatique
ex

ex insula sceneratores, & sumptus, quos in cultum prætorum focii facere soliti erant, circumcisi, aut sublati. Sex. Ælius consul, ex Gallia comitiorum causa Romam quum redisset, ^{Ante Cbr. 197.} creavit consules C. Cornelium Cethegum & Q. Minucium Rufum. Biduo post, prætorum comitia habita. Sex prætores illo anno primum creati, crescentibus jam provinciis, & latius patefcente imperio. creati autem hi, L. Manlius Vulso, C. Sempronius Tuditanus, M. Sergius Silus, M. Helvius, M. Minucius Rufus, L. Atilius. Sempronius & Helvius ex iis ædiles plebis erant. ædiles curules Q. Minucius Thermus & Ti. Sempronius Longus. Ludi Romani eo anno quater instaurati.

XXVIII. C. Cornelio & Q. Minucio consulibus omnium primum de provinciis consulum prætorumque actum. Prius de prætoribus transacta res, quæ transigi sorte poterat. urbana Sergio, peregrina jurisdictio Minucio obtigit. Sardiniam Atilius, Siciliam Manlius, Hispaniam Sempronius citeriorem, Helvius ulteriorem est sortitus. Consulibus, Italiam Macedoniamque sortiri parantibus, L. Oppius & Q. Fulvius tribuni plebis impedimento erant, quod *longinqua provincia Macedonia esset: neque ulla alia res majus bello impedimentum ad eam diem fuisset, quam quod vixdum inchoatis rebus in ipso conatu gerendi belli prior consul revocaretur. Quartum jam annum esse ab decreto Macedonico bello. quærendo regem & exercitum ejus, Sulpicium majorem partem anni absumpfisse. Villium congregientem cum hoste re infecta revocatum. Quintium rebus divinis Romæ majorem partem anni retentum: ita gessisse tamen res, ut, si aut maturius in provinciam venisset, aut hiems magis sera fuisset, potuerit debellare. Nunc prope in hiberna*

hiberna profectum, ita comparare dici bellum, ut, nisi successor impediatur, profecturus æstate proxima videatur. His orationibus pervicerunt, ut consules in senatus auctoritate fore dicerent se, si idem tribuni facerent. Permittentibus utrisque liberam consulationem, Patres consulibus ambobus Italiam provinciam decreverunt. T. Quintio prorogârunt imperium, donec successor ei venisset. Consulibus binæ legiones decretæ, & ut bellum cum Gallis Cisalpinis, qui defecissent à populo Romano, gererent. Quintio in Macedoniam supplementum decretum peditum quinque millia, & trecenti equites, & sociorum navalium tria millia. Præesse idem, qui præerat, classi L. Quintius Flamininus jussus. Prætoribus in Hispanias octona millia peditum & socium ac Latini nominis data: & quadringenti equites, ut dimitterent veterem ex Hispaniis militem. & terminare jussi, qua ulterior citeriorve provincia servaretur. Macedoniæ legatos P. Sulpicium & P. Villium, qui consules in ea provincia fuerant, adjecerunt.

XXIX. Priusquam consules prætoresque in provincias proficiscerentur, prodigia procurari placuit: quòd ædes Vulcani Summanique Romæ, quòd & Fregellis murus & porta de cælo tacta erant: & Frusinone inter noctem lux orta: & Asculo agnus biceps cum quinque pedibus natus: & Formiis duo lupi oppidum ingressi obvios aliquot laniaverant: Romæ non in urbem solùm, sed in Capitolium penetraverat lupus. C. Acilius tribunus plebis tulit, ut quinque coloniae in oram maritimam deducerentur: duæ ad ostia fluminis Volturni Liternique: una Puteolos: una ad castrum Salerni. His Buxentum adjectum. tricenarum familiarum in singulas colonias jubebantur mitti. triumviri deducendis iis, qui per triennium magistratum

tum haberent, creati, M. Servilius Geminus, Q. Minucius Thermus, T. Sempronius Longus. Delectu rebusque aliis divinis humanisque, quæ per ipsos agenda erant, perfectis, consules ambo in Galliam profecti. Cornelius recta ad Insubres via, qui tum in armis erant, Cænomanis assumptis; Q. Minucius in læva Italiæ ad inferum mare flexit iter: Genuamque exercitu abducto, ab Liguribus orsus est bellum. Oppida Clastidium & Litubium, utraque Ligurum, & duæ gentis ejusdem civitates, Ceclates Cerdiciatesque, sese dediderunt. Et jam omnia cis Padum, præter Gallorum Boios, Ilvates Ligurum, sub ditione erant. quindecim oppida, hominum viginti millia esse dicebantur, quæ se dediderant. Inde in agrum Boiorum legiones duxit.

XXX. Boiorum exercitus haud ita multo antè trajecerat Padum, junxeratque se Insubribus & Cænomanis: quod ita acceperant, conjunctis legionibus consules rem gesturos, ut & ipsi collatas in unum vires firmarent. Posteaquam fama accidit, alterum consulem Boiorum urere agros; seditio extemplo orta est. Postulare Boii, ut laborantibus opem universi ferrent. Insubres negare se sua deserturos. Ita divisæ copiæ: Boiisque in agrum suum tutandum profectis, Insubres cum Cænomanis super amnis Mincii ripas confederunt. Infra eum locum quinque millia passuum & consul Cornelius eidem flumini castra applicuit. inde mittendo in vicus Cænomanorum, Belsiamque, quod caput gentis erat; ut satis comperit, non ex auctoritate seniorum juventutem in armis esse, nec publico consilio Insubrium defectioni Cænomanos se adjunxisse: excitis ad se principibus, id agere ac moliri cepit, ut desciscerent ab Insubribus Cænomani; & signis sublati aut domos redirent, aut ad Romanos tran-

transirent. Et id quidem impetrari nequii. in id data fides consuli est, ut in acie aut quiescerent, aut, si qua etiam occasio fuisset, adjuvarent Romanos. Hæc ita convenisse Insubres ignorabant: suberat tamen quædam suspicio animis, labare fidem sociorum. Itaque quum in aciem eduxissent, neutrum iis cornu committere ausi, ne, si dolo cessissent, rem totam inclinarent, post signa in subsidii eos locaverunt. Consul principio pugnae vovit ædem Sospitæ Junoni, si eo die hostes fusi fugatique essent. A militibus clamor sublatus, compotem voti consulem se facturos, & impetus in hostes est factus. Non tulerunt Insubres primum concursum. quidam, & à Cænomanis, terga repente in ipso certamine aggressis, tumultum ancipitem injectum, auctores sunt: cæsaque in medio quinque & triginta millia hostium, quinque millia & septingentos vivos captos; in iis Amilcarem Pœnorum imperatorem, qui belli causa fuisset: signa militaria centum triginta, & carpenta supra ducenta. Oppida, quæ defectionem secuta erant, dediderunt se Romanis.

XXXI. Minucius consul primò effusis populationibus peragraverat fines Boiorum: deinde, ut relictis Insubribus ad sua tuenda receperant sese, castris se tenuit, acie dimicandum cum hoste ratus. Nec Boii detrectassent pugnam, nisi fama victos Insubres allata animos fregisset. Itaque, relicto duce castrisque, dissipati per vicos, sua ut quisque defenderent, rationem gerendi belli hosti mutârunt. omissa enim spe per unam dimicationem rei decernendæ, rursus populari agros, & urere testâ, vicosque expugnare cœpit. Per eosdem dies Clastidium incensum. inde in Ligustinos Ilvates, qui soli non parebant, legiones ductæ. Ea quoque gens, ut Insubres acie victos, Boios, ita ut tentare spem certaminis

metuerent, territos audivit, in ditionem venit. Literæ consulum è Gallia de gestis prospere sub idem tempus Romam allatæ. M. Sergius prætor urbanus in senatu eas, deinde ex auctoritate Patrum ad populum recitavit. supplicatio in quatrimum decreta.

XXXII. Hiems jam eo tempore erat, quum T. Quintius, capta Elatia, in Phocide ac Locride hiberna disposita haberet. Opunte seditio orta est. Factio una Ætolos, qui propiores erant; altera Romanos arcessebat. Ætoli priores venerunt. sed opulentior factio, exclusis Ætolis, missoque ad imperatorem Romanum nuncio, usque ad adventum ejus tenuit urbem. Arcem regium tenebat præsidium: neque ut discederent inde, aut Opuntiorum minis, aut auctoritate imperantis consulis Romani percelli potuerunt. Mora cur non extemplo oppugnantentur, ea fuit: quòd caduceator ab rege venerat, locum ac tempus petens colloquio. Id gravatè concessum regi est: non quin cuperet Quintius per se partim armis partim conditionibus confectum videre bellum (necdum enim sciebat utrùm successor sibi alter ex novis consulibus mitteretur, an, quod summa vi ut tenderent, amicis & propinquis mandaverat, imperium prorogaretur) aptum autem fore colloquium credebat, ut sibi liberum esset, vel ad bellum manenti, vel ad pacem decedenti rem inclinare. In sinu Maliaco prope Nicæum littus elegere. eò rex ab Demetriade cum quinque lembis & una nave rostrata venit. Erant cum eo principes Macedonum & Achæorum exsul vir insignis Cycliadas. Cum imperatore Romano rex Amynder erat, & Dionysodorus Attali legatus, & Agesimbrotus præfectus Rhodiæ classis, & Phæneas princeps Ætolorum, & Achæi duo, Aristæus & Xenophon. Inter hos Romanus ad extremum
littus

littus progressus, quum rex in proram navis in anchoris stantis processisset; Commodius, inquit, si in terram egrediaris, & ex propinquo dicamus invicem, audiamusque. Quum rex facturum se id negaret; Quem tandem, inquit Quintius, times? Ad hoc ille superbo & regio animo: Neminem equidem timeo, præter Deos immortales: non omnium autem credo fidei, quos circa te video, atque omnium minimè Ætolis. Istud quidem, ait Romanus, par omnibus periculum est, qui cum hoste ad colloquium congregiuntur, ut nulla fides sit. Non tamen, inquit rex, T. Quinti, par perfidiæ præmium est, si fraude agatur, Philippus & Phœneas. neque enim æque difficulter Ætoli prætorem alium, ac Macedones regem in meum locum substituant.

XXXIII. Secundum hæc silentium fuit. Quum Romanus eum æquum censeret priorem dicere, qui petisset colloquium; rex, ejus esse priorem orationem, qui daret pacis leges, non qui acciperet: tum Romanus, Simplicem suam orationem esse. ea enim se dicturum, quæ ni fiant, nulla sit pacis conditio. Deducenda ex omnibus Græciæ civitatibus regi præsidia esse. captivos & transfugas sociis populi Romani reddendos. restituenda Romanis ea Illyrici loca, quæ post pacem in Epiro factam occupasset. Ptolemæo regi Ægypti reddendas urbes, quas post Philopatoris Ptolemæi mortem occupasset. Suas populi que Romani condiciones has esse: ceterum & sociorum audiri postulata verum esse. Attali regis legatus, Naves captivosque, quæ ad Cium navali prælio capta essent, & Nicephorium, Venerisque templum, quæ spoliasset evastassetque, pro incorruptis restitui. Rhodii Peræam (regio est continentis adversus insulam, vetustæ eorum ditionis) repetebant; postulabantque, præsidia deduci ab Iasso, & Bargyliis, & Euromensium urbe, & in Hellesponto Sesto atque Abydo, & Ponopolim Byzantiis in antiqui formulam juris re-

fitui, & liberari omnia Asiæ emporia portusque. Achæi Corinthum & Argos repetebant. Prætor Ætolorum Phæneas quum eadem fere quæ Romani, ut Græcia decederetur, postulasset, redderenturque Ætolis urbes, quæ quondam juris aut ditionis eorum fuissent; excepit orationem ejus princeps Ætolorum Alexander, vir (ut inter Ætolos) facundus. Jamdudum se reticere, ait, non quo quicquam agi putet eo colloquio, sed ne quem sociorum dicentem interpellat. Neque de pace cum fide Philippum agere, neque bella vera virtute unquam gessisse. In colloquiis insidiari & captare: in bello non congredi æquo campo, neque collatis signis dimicare, sed refugientem incendere ac diripere urbes, & vincentium præmia victum corrumpere. At non sic antiquos Macedonum reges, sed acie bellare solitos urbibus parcere, quantum possent, quo opulentiùs imperium haberent. Nam de quorum possessione dimicetur tollentem, nihil sibi præter bellum relinquere, quod consilium esse? Plures priore anno sociorum urbes in Thessalia evastasse Philippum, quàm omnes qui unquam hostes Thessaliæ fuerint. ipsis quoque Ætolis eum plura socium quam hostem ademisse. Lysimachiam, pulso prætore & præsidio Ætolorum, occupasse eum. Cium item, suæ ditionis urbem, funditus evertisse ac delisse. Eadem fraude habere eum Thebas Phthias, Echinum, Larissam & Pharsalum.

XXXIV. Motus oratione Alexandri Philippus navem, ut exaudiretur, propius terram applicuit. Orsum eum dicere in Ætolos maximè violenter Phæneas interfatus, *Non in verbis rem verti, ait: aut bello vincendum, aut melioribus parendum esse. Apparet id quidem, inquit Philippus, etiam cæco; jocatus in valetudinem oculorum Phæneæ. & erat diacior natura, quàm regem decet, & ne inter seria quidem risu satis temperans. Indignari inde cœpit,*
Ætolos,

Ætolos, tanquam Romanos, decedi Græcia jubere: qui, quibus finibus Græcia sit, dicere non possint. Ipsius enim Ætolicæ, Agræos Apodatasque, & Amphilochos, quæ permagna eorum pars sit, Græciam non esse. An, quod à sociis eorum non abstinuerim, justam querelam habent, quum ipsi pro lege hunc morem antiquitus servant, ut adversus socios ipsi suos, publica tantum auctoritate dempta, juventutem suam militare sinant, & contrariæ persæpe acies in utraque parte Ætolica auxilia habeant? Neque ego Cium expugnavi, sed Prusiam socium & amicum oppugnantem adjuxi: & Iysimachiam ab Thracibus vindicavi. sed quia me necessitas ad hoc bellum à custodia ejus avertit, Thracæ habent. Et Ætolis hæc. Attalo autem Rhodiisque nihil jure debes. non enim à me, sed ab illis principium belli ortum est. Romanorum autem honoris causa Peræam Rhodiis, & naves Attalo cum captivis, qui comparebunt, restituiam. Nam quod ad Nicephorium Venerisque templi restitutionem attinet: quid ea restitui posulantibus respondeam, nisi quo uno modo luci sitæque casæ restitui possunt, curam impensamque sationis me præstaturum: quoniam hæc inter se reges postulare & respondere placet. Extrema ejus oratio adversus Achæos fuit: in qua orsus ab Antigoni primum, suis deinde erga eam gentem meritis, recitari decreta eorum jussit, omnes divinos humanosque honores complexa. atque ad ea adjecit recens de exercitu, quo ab se descivissent. invehensque graviter in perfidiam eorum; Argos tamen se redditurum eis dixit. De Corintho cum imperatore Romano deliberaturum esse, quæsiturumque simul ab eo, utrum iisne urbibus decedere se æquum censeat, quas à seipso captas jure belli habeat, an iis etiam, quas à majoribus suis accepisset.

XXXV. Parantibus Achæis Ætolisque ad ea respondere, quum prope occasum sol esset, dilato in

posteriorum diem colloquio, Philippus in stationem, ex qua profectus erat, Romani socique in castra redierunt. Quintius postero die ad Nicæam (is enim locus placuerat) ad constitutum tempus venit. Philippi nullus usquam nec nuncius ab eo per aliquot horas veniebat: & jam desperantibus venturum, repente apparuerunt naves. Atque ipse quidem, *quum tam gravia & indigna imperarentur, inopem consilii diem se consumpsisse deliberando*, aiebat. Vulgò credebatur de industria rem in serum tractam, ne tempus dari posset Achæis Ætolisque ad respondendum. & eam opinionem ipse affirmavit, petendo, ut summotis aliis, ne tempus altercando tereretur, & aliquis finis rei imponi posset, cum imperatore Romano liceret sibi colloqui. Id primò non acceptum, ne excludi colloquio viderentur socii. deinde, quum haud absisteret petere, ex omnium consilio Romanus imperator cum Appio Claudio tribuno militum, ceteris summotis, ad extremum littus processit. Rex cum duobus, quos pridie adhibuerat, in terram est egressus. Ibi quum aliquamdiu secretò locuti essent, quæ acta ad suos Philippus retulerit, mindus compertum est. Quintius hæc retulit ad socios. *Romanis cum cedere tota Illyrici ora, persugas remittere, ac si qui essent captivi. Attalo naves, & cum iis captos navales socios: Rhodiis regionem, quam Peræam vocant, reddere. Iasso & Bargyliis non cessurum. Ætolis Pharsalum Larissamque reddere. Thebas non reddere. Achæis non Argis modo sed etiam Corinto cessurum. Nulli omnium placere partium quibus cessurus aut non cessurus esset, destinatio. plus enim amitti in iis, quàm acquiri: nec unquam, nisi tota deduxisset Græcia præsidia, causas certaminum deponere.*

XXXVI. Quum hæc toto ex concilio certatim omnes vociferarentur, ad Philippum quoque procul stantem vox est perlata. itaque à Quintio petit, ut rem totam in posterum diem differret. profectò aut persuasurum se, aut persuaderi sibi passurum. Littus ad Thronium colloquio destinatur, eò maturè conventum est. Ibi Philippus primò & Quintium, & omnes qui aderant, rogare, ne spem pacis turbare vellent. postremò petere tempus, quo legatus Romam ad senatum mittere posset. *Aut bis conditionibus se pacem impetraturum, aut quascumque senatus dedisset, leges pacis accepturum.* Id ceteris haudquaquam placebat: nec enim aliud quàm moram & dilationem ad colligendas vires quæri. Quintius, *verum id futurum fuisse, dicere: si æstas, & tempus rerum gerendarum esset. nunc hieme instante nihil amitti, dato spatio ad legatos mittendos.* Nam neque sine auctoritate senatus quicquam eorum ratum fore, quæ cum rege ipsi pepigissent: & explorari (dum bello necessariam quietem ipsa hiems daret) senatus auctoritatem posse. In hanc sententiam & ceteri sociorum principes concesserunt: induciisque datis in duos menses, & ipsos mittere singulos legatos ad edocendum senatum, ne fraude regis caperetur, placuit. Ad ditum induciarum pacto, ut regia præsidia Phocide ac Locride extemplo deducerentur. Et ipse Quintius cum sociorum legatis Amynandrum Athamanum regem; utque speciem legationis adjiceret, Q. Fabium (uxoris Quintii sororis filius erat) & Q. Fulvium & Appium Claudium misit.

XXXVII. Ut ventum Romam est, prius sociorum legati, quàm regis, auditi sunt. cetera eorum oratio conviciis regis consumpta est. Moverunt eo maximè senatum, demonstrando maris terrarumque regionis ejus situm: ut omnibus appareret, si Demetriadem

in Theſſalia, Chalcidem in Eubœa, Corinthum in Achaia rex teneret, non poſſe liberam Græciam eſſe: & ipſum Philippum non contumelioſius, quàm veriùs, compedes eas Græciæ appellare. Legati deinde regis intromiſſi. quibus longiorem exorſis orationem, brevis interrogatio, ceſſurusne iis tribus urbibus eſſet, ſermonem incidit. quum mandati ſibi de his nominatim negarent quicquam, ſic infecta pace regii dimiſſi. Quintio liberum arbitrium pacis ac belli permiſſum. Quo ut ſatis apparuit, non tædere belli ſenatum, & ipſe, victoriæ quàm pacis avidior, neque colloquium poſtea Philippo dedit, neque legationem aliam, quàm quæ omni Græcia decedi nunciaret, admiſſurum dixit.

XXXVIII. Philippus quum acie decernendum videret, & undique ad ſe contrahendas vires, maxime de Achaia urbibus, regionis ab ſe diverſæ, & magis tamen de Argis, quàm de Corintho, ſollicitus, optimum ratus Nabidi eam Lacedæmoniorum tyranno velut fiduciariam dare, ut victori ſibi reſtitueret: ſi quid adverſi accidiſſet, ipſe haberet: Philocli, qui Corintho, Argiſque præerat, ſcribit, ut tyrannum ipſe conveniret. Philocles, præterquam quòd jam veniebat cum munere, adjicit ad pignus futuræ regi cum tyranno amicitia, filias ſuas regem Nabidis filiis matrimonio conjungere velle. Tyrannus primò negare, aliter urbem eam ſe accepturum, niſi Argivorum ipſorum decreto arceſſitus ad auxilium urbis eſſet. deinde, ut frequenti concione non aſpernatos modò, ſed abominatos etiam nomen tyranni audivit; cauſſam ſe ſpoliandi eos naſtum ratus, tradere ubi vellet urbem, Philoclem juſſit. Noſte ignaris omnibus acceptus in urbem eſt tyrannus. prima luce occupat ſuperiora omnia loca, portæque clauſæ. Paucis principum tumultum inter

ter primum elapsis, eorum absentium direptæ fortunæ. præsentibus aurum atque argentum ablatum, pecuniæ imperatæ ingentes. qui non cunctanter contulere, sine contumelia & laceratione corporum sunt dimissi. quos occulere aut retrahere aliquid suspicio fuit, in servilem modum lacerati atque extorti. Concione inde advocata, rogationem promulgavit; unam de tabulis novis, alteram de agro viritim dividendo: duas faces novantibus res ad plebem in optimates accendendam.

XXXIX. Posteaquam in potestate Argivorum civitas erat, nihil ejus memor tyrannus, à quo eam civitatem & quam in conditionem accepisset, legatos Elatiam ad Quintium & Attalum Æginæ hibernantem mittit, qui nunciarent, Argos in potestate sua esse. eò si veniret Quintius ad colloquium, non dissidere sibi omnia cum eo conventura. Quintius, ut eo quoque præsidio Philippum nudaret, quum annuisset se venturum, mittit ad Attalum, ut ab Ægina Sicyonem sibi occurreret; ipse ab Anticyra decem quinquereimis, quas iis fortè ipsis diebus L. Quintius frater ejus adduxerat ex hibernis Corcyrae, Sicyonem transmisit. Jam ibi Attalus erat, qui, quum tyranno ad Romanum imperatorem, non Romano ad tyrannum eundem diceret; in sententiam suam Quintium traduxit, ne in urbem ipsam Argos iret. Haud procul urbe Mycenica vocatur. in eo loco ut congredierentur, convenit. Quintius cum fratre & tribunis militum paucis, Attalus cum regio comitatu, Nicostratus Achæorum prætor cum auxiliariis paucis venit. tyrannum ibi cum omnibus copiis opperientem invenerunt. Progreßus armatus cum satellitibus est in medium fere interjacentis campi: inermis Quintius cum fratre & duobus tribunis militum: inermes item regi prætor Achæorum

Achæorum & unus ex purpuratis latus cingebant. Initium sermonis ab excusatione tyranni ortum : *quod armatus ipse armatisque septus, quum inermes Romanum imperatorem regemque cerneret, in colloquium venisset. neque enim se illos timere, sed exsules Argivorum.* Inde ubi de conditionibus amicitiae coeptum agi est, Romanus duas postulare res : unam, ut bellum cum Achæis finiret : alteram, ut adversus Philippum mitteret secum auxilia. Auxilia se misurum dixit. pro pace cum Achæis induciæ impetratæ, donec bellum cum Philippo finiretur.

XL. De Argis quoque disceptatio ab Attalo rege est nata, quum fraude Philoclis proditam urbem vi ab eo teneri argueret : illo, ab ipsis Argivis, ut se defenderet, accitum. Concionem Argivorum rex postulabat, ut id sciri posset. Nec tyrannus abnuere, sed, deductis ex urbe præfidiis, liberam concionem, non immittis Lacedæmoniis, declaraturam quid Argivi vellent, præberi debere dicebat rex. Tyrannus negavit deducturum. Hæc disceptatio sine exitu fuit. de colloquio discessum, sexcentis Cretensisibus ab tyranno datis Romano ; induciisque, inter Nicostratum prætorem Achæorum & Lacedæmoniorum tyrannum, in quatuor menses factis. Inde Quintius Corinthum est profectus, & ad portam cum Cretenesium cohorte accessit, ut Philocli præfecto urbis appareret, tyrannum à Philippo descisse. Philocles & ipse ad imperatorem Romanum in colloquium venit : hortantique, ut extemplo transfiret, urbemque traderet, ita respondit, ut distulisset rem, magis quàm negasse, videretur. A Corintho Quintius Anticyram trajecit : inde fratrem ad tentandam Acarnanum gentem misit. Attalus ab Argis Sicyonem est profectus. Ibi & civitas novis honoribus veteres regis honores dedit : & rex ad id,

id, quòd sacrum Apollinis agrum grandi quondam pecunia redemerat eis, tum quoque, ne sine aliqua munificentia præteriret civitatem sociam atque amicam, decem talenta argenti dono dedit, & decem millia medimnùm frumenti. atque ita Cenchreas ad naves rediit. Et Nabis, firmato præsidio Argis, Lacedæmonem regressus, quum ipse viros spoliasset; ad feminas spoliandas uxorem Argos remisit. Ea, nunc singulas illustres, nunc simul plures genere inter se junctas domum arcessendo, blandiendoque ac minando, non aurum modò iis, sed & postremò vestem quoque, mundumque omnem muliebrem ademit.



L I B E R XXXIII.

E P I T O M E.

VII, &c.  ITUS Quintius Flamininus proconsul cum Philippo ad Cynoscephalas in Theffalia acie victo debellavit. XVII. L. Quintius Flamininus, frater proconsulis, Acarnanes, Leucade urbe, quod caput Acarnanum, expugnata, in dedicationem accepit. XXV. C. Sempronius Tuditanus prætor à Celtiberis cum exercitu cæsus est. XXI. Attalus à Thebis ob subitam valetudinem Pergamum translatus decessit. XXX, &c. Pax petenti Philippo, Græciæ libertas data est. XXXVI, XXXVII. L. Furius Purpureo & Claudius Marcellus consules Boios & Insubres Gallos subegerunt. Marcellus triumphavit. XLV, &c. Annibal frustra in Africa bellum molitus, & ob hoc Romanis per epistolas adversæ factionis

factionis principum delatus, propter metum Romanorum, qui legatos ad Carthaginiensium senatum de eo miserant, profugus ad Antiochum regem Syriæ se contulit, bellum contra Romanos parantem.

I.  ÆC per hiemem gesta. Initio autem veris Quintius, Attalo Elatiam excito, Bœotiorum gentem, incertis ad eam diem animis fluctuantem, ditionis suæ facere cupiens, profectus per Phocidem quinque millia ab Thebis, quod caput est Bœotix, posuit castra. Inde postero die cum unius signi militibus, & Attalo, legationibusque, quæ frequentes undique convenerant, pergit ire ad urbem, iussis legionis hastatis (ea duo millia militum erant) sequi se mille passuum intervallo distantes. Ad medium ferme viæ Bœotiorum prætor Antiphilus obuius fuit: cetera multitudo è muris adventum imperatoris Romani regisque prospiculabatur. rara arma, paucique milites circa eos apparebant: hastatos, sequentes procul, anfractus viarum vallesque interjectæ occultebant. Quum jam appropinquaret urbi, velut obviam egredientem turbam salutaret, tardius incedebat. Causa erat moræ, ut hastati consequerentur. Oppidani, ante lictorem turba acta, insecutum confestim agmen armatarum non ante, quàm ad hospitium imperatoris ventum est, conspexere. Tum, velut prodita dolo Antiphili prætoris urbe captaque, obstupuerunt omnes. Et apparebat nihil liberæ consultationis concilio, quod in diem posterum indictum erat, Bœotis relictam. Texerunt dolorem, quem & nequicquam, & non sine periculo ostendissent. In concilio Attalus primus verba fecit.

II. Orsus à maiorum suorum, suisque, & communibus in omnem Græciam, & propriis in Bœotiorum gentem

gentem meritis; segnior jam & infirmior, quàm ut contentionem dicendi sustineret, obmutuit, & concidit. Et dum regem auferunt perferuntque, parte membro-
rum captum, paullisper concio intermissa est. Aristæus inde, Achæorum, eo cum majori auctoritate auditus, quòd non alia, quàm quæ Achæis suaserat, Bœotis suadebat. Pauca ab ipso Quintio adjecta; fidem magis Romanam, quàm arma aut opes extollente verbis. Rogatio inde, à Platæensi Dicæarcho lata, recitataque de societate cum Romanis jungenda, nullo contra dicere audente, omnium Bœotiæ civitatum suffragiis accipitur jubeturque. Concilio dimisso Quintius tantum Thebis moratus, quantum Attali repens casus coëgit, postquam non vitæ præsens periculum vis morbi attulisse, sed membrorum debilitatem visa est, relicto eo ad curationem necessariam corporis, Elatiam, unde profectus erat, redit: Bœotis quoque, sicut priùs Achæis, ad societatem adscitis; &, quoniam tuta ea pacataque ab tergo relinquebantur, omnibus jam cogitationibus in Philippum, & quod reliquum belli erat, conversis.

III. Philippus quoque primo vere, postquam legati ab Roma nihil pacati retulerant, delectum per omnia oppida regni habere instituit, in magna inopia juniorum: absumpserant enim per multas jam ætates continua bella Macedonas, ipso quoque regnante: & navalibus bellis adversus Rhodios Attalumque, & terrestribus adversus Romanos ceciderat magnus numerus. ita & tinones ab decem & sex annis milites scribebat, & emeritis quidam stipendiis, quibus modò quidquam reliqui roboris erat, ad signa revocabantur. Ita, suppleto exercitu, secundùm vernum æquinoctium omnes copias Diu contraxit; ibique stativis positus, exercendo quotidie milite, hostem opperiebatur. Et Quintius, per eosdem ferme dies ab Elatia profectus,

fectus, præter Thronium & Scarpheam ad Thermopylas pervenit. Ibi concilium Ætolorum, Heracleam indictum, tenuit, consultantium quantis auxiliis Romanum ad bellum sequerentur. Cognitis sociorum decretis, tertio die ab Heraclea Xynias progressus, in confinio Ænianum Theſſalorumque positis castris, Ætolica auxilia opperiebatur. Nihil morati Ætoli sunt. Phænia duce duo millia peditum cum equitibus quadringentis venerunt. Ne dubium esset quid expectâſſet, confestim Quintius movit castra. Transgresso in Phthioticum agrum quingenti Gortynii Cretensium, duce Cydate, & trecenti Apolloniæ haud dispari armatu se conjungere: nec ita multo post Amynder cum Athamanum peditum ducentis & mille. Philippus, cognita profectioe ab Elatia Romanorum, ut cui de summa rerum adesset certamen, adhortandos milites ratus, multa jam sæpe memorata de majorum virtutibus, simul de militari laude Macedonum quum disſervisset, ad ea quæ tum maximè animos terrebant, quibusque erigi ad aliquam spem poterant, venit.

IV. Acceptæ ad Aoum flumen in angustiis cladi, territa Macedonum phalange, ad Atracem vi pulſos Romanos opponebat: & illic tamen ubi infestas fauces Epiri non tenuissent, primam culpam fuisse eorum, qui negligenter custodias servâſſent; secundam, in ipso certamine, levis armaturæ mercenariorumque militum. Macedonum verò phalangem & tunc stetiſſe, & loco æquo justaque pugna semper mansuram invictam. Decem & sex millia militum hæc fuere; robor omne virium, & regni. ad hoc duo millia cetraſtorum, quos peltastas appellant, Thracumque & Illyriorum, (Trallis nomen est genti) par numerus bina millia erant, & miſti ex pluribus gentibus mercede conducti auxiliares mille ferme, & duo millia equitum.

equitum. Cum iis copiis rex hostem opperiebatur. Romanis ferme par numerus erat, equitum copiis tantum, quod Ætoli accefferant, superabant.

V. Quintius ad Thebas Phthioticas castra quum movisset, spem nactus per Timonem principem civitatis prodi urbem, cum paucis equitum levisque armaturæ ad muros successit. Ibi adeo frustrata spes est, ut non certamen modò cum erumpentibus, sed periculum quoque atrox subiret; ni castris exciti repente pedites equitesque in tempore subvenissent. Et postquam nihil conceptæ temere spei succedebat, urbis quidem amplius tentandæ in præsentia conatu abstitit: ceterùm satis gnarus jam in Thessalia regem esse, nondum comperto quam in regionem venisset, milites, per agros dimissos, vallum cedere & parare jubet. Vallo & Macedones & Græci usi sunt; sed usum nec ad commoditatem ferendi, nec ad ipsius munitionis firmamentum aptaverunt. Nam & majores & magis ramosas arbores cædebant, quàm quas ferre cum armis miles posset: & quum castra his ante objectis sepfissent, facilis molitio eorum valli erat. nam & quia rari stipites magnarum arborum eminebant, multique & validi rami præbebant quod rectè manu caperetur, duo aut summum tres juvenes connixi arborem unam evellebant. qua vulsa, portæ instar, extemplo patebat, nec in promptu erat quod obmolirentur. Romanus leves & bifurcos plerosque, & trium, aut cum plurimum quatuor ramorum, vallos cædit, ut & suspensis ab tergo armis ferat plures simul aptè miles: & ita densos offigunt implicantque ramos, ut neque quæ cujusque stipitis palma sit pervideri possit: & adeo acuti, aliusque per alium immissi, radii locum ad inferendam manum non relinquunt, ut neque prehendi, quod trahatur, neque trahi, quum inter se innixi rami vinculum invicem præbeant, possit;

sit; & si evulsus fortè est unus, nec loci multum aperit, & alium reponere perfacile est.

VI. Quintius postero die, vallum secum ferente milite, ut paratus omni loco castris ponendis esset, progressus modicum iter, sex ferme millia à Pheris quum consedisset, speculatum in qua parte Thessaliæ hostis esset, quidve pararet, misit. Circa Larissam erat rex, qui certior jam factus, Romanum ab Thebis Pheras movisse, defungi quamprimum & ipse certamine cupiens, ducere ad hostem pergit, & quatuor millia fere à Pheris posuit castra. Inde postero die quum expediti utrimque ad occupandos super urbem tumulos processissent, pari ferme intervallo ab jugo, quod capiendum erat, quum inter se conspecti essent, constiterunt, nuncios in castra remissos, qui quid sibi, quum præter spem hostis occurrisset, faciendum esset, consulerent, quieti opperientes. Et illo quidem die nullo inito certamine in castra revocati sunt. Postero die circa eosdem tumulos equestre prælium fuit; in quo non minima Ætolorum opera regii fugati, atque in castra compulsi sunt. Magnum utrisque impedimentum ad rem gerendam fuit ager confitus crebris arboribus, hortique, ut in suburbanis locis, & coarctata itinera maceris, & quibusdam locis interclusa. Itaque pariter ducibus consilium fuit excedendi ea regione; &, velut ex prædicto, ambo Scotussam petierunt: Philippus, spe frumentandi inde; Romanus, ut progressus corrumperet hosti frumenta. Per diem totum, quia colles perpetuo jugo intererant, nullo conspecta inter se loco agmina ierant. Romani ad Eretriam Phthiotici agri, Philippus super amnem Onchestum posuit castra. Ne postero quidem die, quum Philippus ad Melambium, quod vocant, Scotussæi agri, Quintius circa Thetidium Pharsaliæ terræ posuisset castra, aut hi, aut illi, ubi hostis esset, fatis compertum

compertum habuerunt. Tertio die primò nimbus effusus, dein caligo noctis simillima Romanos metu insidiarum tenuit.

VII. Philippus maturandi itineris causa, post imbrem nubibus in terram demissis nihil deterritus, signa ferri iussit. sed tam densa caligo obscaverat diem, ut neque signiferi viam, nec signa milites cernerent; agmen ad incertos clamores vagum velut errore nocturno turbaretur. Supergressi tumulos, qui Cynoscephalæ vocantur, relicta ibi statione firma peditum equitumque, posuerunt castra. Romanus eisdem ad Thetidium castris quum se tenuisset, exploratum tamen ubi hostis esset decem turmas equitum & mille pedites misit: monitos, ut ab insidiis, quas dies obscurus apertis quoque locis testurus esset, præcaverent. Ubi ventum ad infessos tumulos est, pavore mutuo injecto velut torpentes quieverunt. dein nunciis retro in castra ad duces missis, ubi primus terror ab nec opinato visu confedit, non diutius certamine abstinere. Principio à paucis procurentibus laceßita pugna est, deinde subsidiis tuentum pulsos aucta: in qua quum haudquaquam pares Romani alios super alios nuncios ad ducem mitterent, premi sese; quingenti equites, & duo millia peditum, maximè Ætolorum, cum duobus tribunis militum propere missa, rem inclinatam restituerunt: versaque fortuna Macedones laborantes opem regis per nuncios implorabant. Sed ut qui nihil minus illo die propter effusam caliginem quam prælium expectasset, magna parte hominum omnis generis pabulatum missa, aliquamdiu inops consilii trepidavit: deinde postquam nuncii instabant, & jam juga montium detexerat nebula, & in conspectu erant Macedones, in tumultum maximè editum inter alios compulsi, loco se magis quàm armis tutantes; committendam rerum summam in discrimen utcumque

cumque ratus, ne partis indefensæ jactura fieret; Athenagoram ducem mercede militantium cum omnibus, præter Thracas, auxiliis, & equitatu Macedonum ac Thessalorum mittit. eorum adventu depulsi ab jugo Romani non antè resisterunt, quàm in planiorem vallem perventum est. Ne effusa detruderentur fuga, plurimum in Ætolis equitibus præsidii fuit. is longè tum optimus eques in Græcia erat: pedites inter finitimos vincebantur.

VIII. Lætior res quàm pro successu pugnæ nunciata, quum alii super alios recurrentes ex prælio clamerent fugere pavidos Romanos, invitum & cunctabundum, & dicentem temere fieri, non locum sibi place-re, non tempus, perpulit, ut educeret omnes copias in aciem. Idem & Romanus, magis necessitate quàm occasione pugnæ inductus, fecit. dextrum cornu, elephantis ante signa instructis, in subsidiis reliquit: lævo cum omni levi armatura in hostem vadit. simul admonens, cum iisdem Macedonibus pugnatos, quos ad Epiri fauces, montibus fluminibusque septos, victa naturali difficultate locorum, expulissent, acieque expugnassent: cum iis quos P. Sulpicii prius ductu obsidentes Eordæe aditum vicissent. Fama stetisse, non viribus, Macedoniae regnum. Eam quoque famam tandem evanuisse. Jam perventum ad suos in ima valle stantes erat, qui adventu exercitus imperatorisque pugnam renovant, impetuque facto rursus avertunt hostem. Philippus cum cetratis, & cornu dextro peditum, robore Macedonici exercitus, quam phalangem vocabant, proprio cursu ad hostem vadit. Nicanori ex purpuratis uni, ut cum reliquis copiis confestim sequatur, imperat. Primò ut in jugum evasit, &, jacentibus ibi paucis armis corporibusque hostium, prælium eo loco fuisse, pulsofque inde Romanos, & pugnari prope castra hostium vidit, ingenti gaudio est elatus: mox refugientibus

entibus suis & terrore verso, paullisper, incertus an in castra reciperet copias, trepidavit: deinde ut adpropinquabat hostis, & præterquam quòd cædebantur averfi, nec nisi defenderentur servari poterant, ac ne ipsi quidem in tuto jam receptus erat; coactus nondum adsecuta parte suorum periculum summæ rerum facere, equites, levemque armaturam, qui in prælio fuerant, dextro in cornu locat. cetratos & Macedonum phalangem, hastis positis, quarum longitudo impedimento erat, gladiis rem gerere jubet. simul, ne facillè perrumperetur acies, dimidium de fronte demptum introrsus porrectis ordinibus duplicat, ut longa, potiùs quàm lata, acies esset. simul & densari ordines iussit, ut vir viro, arma armis jungerentur.

IX. Quintius his, qui in prælio fuerant, inter signa & ordines acceptis, tuba dat signum. Rarò alias tantus clamor dicitur in principio pugnae exortus. nam fortè utraque acies simul conclamavere. nec solum qui pugnabant, sed subsidia etiam, quique tum maximè in proelium veniebant. Dextro cornu rex, loci plurimum auxilio, ex jugis altioribus pugnans, vincebat: sinistro tum cum maximè adpropinquante phalangis parte, quæ novissimi agminis fuerat, sine ullo ordine trepidabatur. Media acies, quæ propior dextrum cornu erat, stabat, spectaculo, velut nihil ad se pertinentis pugnae intenta: phalanx, quæ venerat, agmen magis quàm acies, aptiorque itineri quàm pugnae, vixdum in jugum evaserat. In hos incompositos Quintius, quanquam pedem referentes in dextro cornu suos cernebat, elephantis priùs in hostem actis, impetum facit; ratus partem profligatam cetera tracturam. Non dubia res fuit. extemplo terga vertè Macedones, terrore primo bestiarum averfi. & ceteri quidem hos pulsos sequebantur: unus è tribunis militum extemplo capto consilio cum viginti signorum militibus

militibus relicta ea parte suorum, quæ hæc dubiè vincebat, brevi circuitu dextrum cornu hostium aversum invadit. Nullam aciem ab tergo adortus non turbasset; ceterum ad communem omnium in tali re trepidationem accessit, quòd phalanx Macedonum, gravis atque immobilis, nec circumagere se poterat, nec hoc qui à fronte paullo ante pedem referentes, tunc ultro territis instabant, patiebantur. Ad hoc, loco etiam premebantur, quia jugum ex quo pugnaverant, dum per proclive pulsos insequuntur, traderant hosti ad terga sua circumducto. Paullisper in medio cæsi, deinde omisiss plerique armis capeſſunt fugam.

X. Philippus cum paucis peditum equitumque primò tumulum altiore inter ceteros cepit, ut specularetur, quæ in læva parte suorum fortuna esset: deinde, postquam fugam effusam animadvertit, & omnia circa juga signis atque armis fulgere, tum & ipse acie excessit. Quintius quum cedentibus institisset, repente quia erigentes hastas Macedonas conspexerat, quidnam pararent incertus, paullisper novitate rei constituit signa: deinde, ut accepit hunc morem esse Macedonum tradentium sese, parcere victis in animum habebat. Ceterum ab ignaris militibus, omisſam ab hoste pugnam, & quid imperator vellet, impetus in eos factus, & primis cæsis, ceteri in fugam dissipati sunt. Rex effuso cursu Tempe petit. Ibi ad Gonnos diem unum substitit, ad excipiendos si qui proelio superessent. Romani victores in castra hostium spe prædæ irruunt: verum ea magna jam ex parte direpta ab Ætolis inveniunt. Cæsa eo die octo hostium millia, quinque capta. Ex victoribus septingenti ferme ceciderunt. Si Valerio quis credat, omnium rerum immodicè numerum augenti, quadraginta millia hostium eo die sunt cæsa; capta, ubi modestius mendacium

cium est, quinque millia, septingenti, signa militaria ducenta unum & quadraginta. Claudius quoque duo & triginta millia hostium caesa scribit, capta quatuor millia & trecentos. Nos non minimo potissimum numero credidimus, sed Polybium secuti sumus, non incertum auctorem, cum omnium Romanorum rerum, tum præcipuè in Græcia gestarum.

XI. Philippus, collectis ex fuga qui variis casibus pugnae dissipati vestigia ejus secuti fuerant, missisque Larissam ad commentarios regiones comburendos, ne in hostium venirent potestatem, in Macedoniam cessit. Quintius, captivis prædaque vendundis, partim militi concessis, Larissam est profectus; haudum satis gnarus quam regionem petisset rex, quidve pararet. Caduceator eò regius venit; specie ut induciæ essent, donec tollerentur ad sepulturam, qui in acie cecidissent; re vera ad petendam veniam legatis mittendis. Utrumque ab Romano impetratum. adjecta & illa vox, *bono animo esse regem ut suberet*: quæ maximè Ætolos offendit, tumentes jam querentesque, *mutatum victoriam imperatorem. Ante pugnam omnia magna parvaque communicare cum sociis solitum, nunc omnium expertes consiliorum esse: suo ipsum arbitrio cuncta agere: cum Philippo jam gratiæ privatis locum querere; ut dura atque aspera belli Ætoli exbanstrint, pacis gratiam & fructum Romanus in se vertat.* Ea haud dubiè decesserat iis aliquantum honoris. sed cur negligerentur, ignorabant. Donis regiis imminere credebant invicti ab ea cupiditate animi virum: sed & succensebat non immeritò Ætolis ob insatiabilem aviditatem prædæ, & arrogantiam eorum, victoriæ gloriam in se rapientium, quæ vanitate sua omnium aures offendeat: & Philippo sublato, fractis opibus Mace-

Macedonici regni, Ætolos habendos Græciæ dominos cernebat. Ob eas causas multa sedulo, ut viliores levioresque apud omnes essent & viderentur, faciebat.

XII. Induciæ quindecim dierum datæ hosti erant, & cum ipso rege constitutum colloquium: cujus priusquam tempus veniret, in consilium advocavit socios. Retulit quas leges placeret dici. Amynander Athamanum rex paucis sententiam absolvit; *ita componendam pacem esse, ut Græciæ etiam absentibus Romanis satis potens tuendæ simul pacis libertatisque esset.* Ætolorum asperior oratio fuit, qui pauca præfati, rectè atque ordine imperatorem Romanum facere, quod quos belli socios habuisset, cum iis communicaret pacis consilia. falli autem eum tota re, si aut Romanis pacem, aut Græciæ libertatem satis firmam se credat relicturum, nisi Philippo aut occiso, aut regno pulso: quæ utraque proclivis esse, si fortuna uti vellet. Ad hæc Quintius, negare Ætolos, aut moris Romanorum memores, aut sibi ipsis convenientem sententiam dixisse; & illos prioribus omnibus conciliis colloquiisque, de conditionibus pacis semper, non ut ad internecionem bellaretur, disserruisse, & Romanos, præter vetustissimum morem victis parcendi, præcipuum clementiæ documentum dedisse, pace Annibali & Carthaginensibus data. Omittere se Carthaginenses. Cum Philippo ipso quoties ventum in colloquium, nec unquam ut cederet regno actum esse: an, quia victus prælio foret, inexpiabile bellum factum? Cum armato hoste infestis animis concurrere debere: adversus victos, mitissimum quæque, animum maximum habere. Libertati Græciæ videri graves Macedonum reges. si regnum, gensque tollatur, Thracas, Illyrios, Gallos deinde, gentes feras & indomitas, in Macedoniam se & in Græciam effusuras. Ne proxima quæque amolendo, majoribus

ribus gravioribusque aditum ad se facerent. Interfanti deinde Phæneæ prætori Ætolorum, testificantique, si elapsus eo tempore Philippus foret, mox gravius eum rebellaturum, *Desistite tumultuari*, inquit, *ubi consultandum est. Non iis conditionibus illigabitur pax, ut movere bellum possit.*

XIII. Hoc dimisso concilio, postero die rex ad fauces, quæ ferunt in Tempe (is datus erat locus colloquio) venit: tertio die datur ei Romanorum ac sociorum frequens concilium. Ibi Philippus perquam prudenter iis, sine quibus pax impetrari non poterat, sua potius voluntate omisiss, quàm ut altercando extorquerentur, quæ priore colloquio aut imperata à Romanis, aut postulata ab sociis essent, omnia se concedere, de ceteris senatui permissurum dixit. Quenquam vel inimicissimis omnibus præclusisse vocem videbatur, Phæneas tamen Ætolus, cunctis tacentibus, *Quid nobis*, (inquit) *Philippe, red-disne tandem Pharsalum, & Larissam Cremastem, & Echinum, & Thebas Phthias?* Quum Philippus nihil morari diceret quo minus reciperent; disceptatio inter imperatorem Romanum & Ætolos orta est de Thebis: nam eas populi Romani jure belli factas esse Quintius dicebat, quòd integris rebus, exercitu ab se admoto vocati in amicitiam, quum potestas libera desciscendi ab rege esset, regiam societatem Romanæ præposuissent. Phæneas, & pro societate belli, quæ ante bellum habuissent, restitui Ætolis æquum censebat, & ita in fœdere primo cautum esse, ut belli præda, rerumque, quæ ferri agique possent, Romanos; ager urbesque captæ Ætolos sequerentur. *Vos*, inquit, *ipsi*, Quintius, *societatis istius leges rupistis, quo tempore relictis nobis cum Philippo pacem fecistis: quæ si maneret, captarum tamen urbium illa lex foret. Thessaliæ civitates sua voluntate*

in ditionem nostram venerunt. Hæc, cum omnium fortiorum adsensu dicta, Ætolis non in præsentia modò gravia auditu, sed mox belli etiam causæ, magnarumque ex eo cladium, iis fuerunt. Cum Philippo ita convenit, ut Demetrium filium, & quosdam ex amicorum numero obsides, & ducenta talenta daret: de ceteris Romam mitteret legatos. ad eam rem quatuor mensium induciæ essent. Si pax non impetrata ab senatu foret, obsides pecuniamque reddi Philippo receptum est. Causa Romano imperatori non alia major fuisse dicitur pacis maturandæ, quàm quòd Antiochum bellum transitumque in Europam moliri constabat.

XIV. Eodem tempore, atque, ut quidam tradidere, eodem die ad Corinthum Achæi ducem regium Androstenem iusto prælio fuderunt. Eam urbem pro arce habiturus Philippus adversus Græciæ civitates, & principes inde evocatos per speciem colloquendi, quantum equitum dare Corinthii ad bellum possent, retinuerat pro obsidibus, & præter quingentos Macedonas, mistosque ex omni genere auxiliorum octingentos, quòd jam antè ibi fuerat, mille Macedonum eò miserat, & mille ac ducentos Illyrios, Thracasque, & Cretenses, qui in utraque parte militabant, octingentos. His additi Bœoti, Thessalique, & Acarnanes mille, scutati omnes, & ex ipsorum Corinthiorum juventute, impleta ut essent sex millia armatorum, fiduciam Androstheni fecerunt acie decernendi. Nicostratus, prætor Achæorum, Sicyone erat cum duobus millibus peditum, centum equitibus; sed, impari se & numero & genere militum cernens, mœnibus non excedebat. Regiæ copię peditum equitumque vagæ Pellenensem, & Phliasium, & Cleonæum agrum depopulabantur. Postremò exprobrantes metum hosti, in fines Sicyoniorum transcendebant: navibus

vibus etiam circumvecti omnem oram Achaiae vastabant. Quum id effusius hostes, &, ut sit ab nimia fiducia, negligentius etiam facerent, Nicostratus, spem nactus nec opinantes eos aggrediendi, circa finitimas civitates nuncium occultum mittit, quo die, & quot, ex quaque civitate armati, ad Apelaorum (Stymphaliae terrae is locus est) convenirent. Omnibus ad diem edictam paratis, profectus inde extemplo, per Phliasiorum fines nocte Cleonas, insciis omnibus quid pararet, pervenit. Erant autem cum eo quinque millia peditum, ex quibus armaturae levis, & trecenti equites, cum iis copiis dimissi, qui specularentur, quam in partem hostes effunderent sese, operiebantur.

XV. Androsthenes, omnium ignarus, Corintho profectus, ad Nemeam (amnis est Corinthium & Sicyonium interfluens agrum) castra locat. Ibi parte dimidia exercitus dimissa, dimidiam trifariam divisit, & omnes equites discurrere ad depopulandos simul Pellenensium Sicyoniumque agros, & Phliasium, jubet. Haec tria diversa agmina discessere. quod ubi Cleonas ad Nicostratum perlatum est, extemplo validam mercenariorum manum praemissam ad occupandum saltum, per quem transitus in Corinthium est agrum, ante signa equitibus ut praegrederentur locatis, ipse confestim agmine duplici sequitur. Parte una mercenarii milites ibant cum levi armatura, altera clypeati, dein aliarum gentium exercitus robur erat. Jam haud procul castris aberant pedites equitesque, & Thracum quidam in vagos palatosque per agros hosteis impetum fecerunt, quum repens terror castris infertur. Trepidare dux, ut qui hostes nusquam, nisi raro, in collibus ante Sicyonem, non audentes agmen demittere in campos, vidisset; ad Cleonas quidem accessuros nunquam credidisset. revocari tuba jubet

vagos à castris dilapsos. Ipse, raptim capere arma iussis militibus, infrequenti agmine porta egressus, super flumen instruit aciem. Ceteræ copiæ vix colligi atque instrui quum potuissent, primum hostium impetum non tulerunt. Macedones & maximè omnium frequentes ad signa fuerant, & diu ancipitem victoriæ spem fecerunt: postremò fuga ceterorum nudati, quum duæ jam acies hostium ex diverso, levis armatura ab latere, clypeati cetratique à fronte urgerent, & ipsi re inclinata primò retulere pedem; deinde impulsus terga vertunt, & plerique abjectis armis, nulla spe castrorum tuendorum relicta, Corinthum petierunt. Nicostratus, mercenariis militibus ad hos persequendos, equitibus Thracumque auxiliis in populatorum agri Sicyonii missis, magnam ubique cædem edidit; majorem propè quàm in prælio ipso. Ex iis quoque qui Pellenem Phliuntaque depopulati erant, incompociti partim omniumque ignari, ad castra revertentes, in hostium stationes tanquam in suas illati sunt: partim ex discursu id quod erat suspicati, ita se in fugam passim sparserant, ut ab ipsis agrestibus errantes circumvenirentur. Ceciderunt eo die mille & quingenti, capti trecenti. Achaia omnis magno liberata metu.

XVI. Priusquam dimicaretur ad Cynoscephalas, L. Quintius Corcyram excitis Acarnanum principibus, quæ sola Græciæ gentium in societate Macedonum manserat, initium quoddam ibi motus fecit. Duæ autem maximè causæ eos tenuerant in amicitia regis; una fides infita genti, altera metus odiumque Ætolorum. Concilium Leucadem indictum est. Eò neque cuncti convenere Acarnanum populi, nec ipsis qui convenerant idem placuit. sed & principes & magistratus pervicerunt, ut privatum decretum Romanæ societatis fieret. Id omnes qui abfuerant ægre passi,

&

& in hoc fremitu gentis à Philippo missi duo principes Acarnanum, Androcles & Echedemus, non ad tollendum modò decretum Romanæ societatis valuerunt, sed etiam ut Archelaus & Bianor, principes gentis ambo, quòd auctores ejus sententiæ fuissent, proditionis in concilio damnarentur, & Zeuxidæ prætori, quòd de ea re retulisset, imperium abrogaretur. Rem temerariam, sed eventu prosperam damnati fecerunt. Suadentibus namque amicis, cederent tempori, & Corcyram ad Romanos abirent; statuerunt offerre se multitudini, & aut eo ipso lenire iras, aut pati quod casus tulisset. Quum se frequenti concilio intulissent, primò murmur ac fremitus admirantium, silentium mox à verecundia simul pristinæ dignitatis ac misericordia præsentis fortunæ ortum est. potestate quoque dicendi facta, principio suppliciter, procedente autem oratione, ubi ad crimina diluenda ventum est, cum tanta fiducia, quantam innocentia dabat, disseruerunt: postremò ultro aliquid etiam queri, & castigare iniquitatem simul in se crudelitatemque ausi, ita adfecerunt animos, ut omnia, quæ in eos decreta erant, frequentes tollerent. neque eo minus redeundum in societatem Philippi, abnuendamque Romanorum amicitiam, censerent.

XVII. Leucade hæc sunt decreta: id caput Acarnaniæ erat, eoque in concilium omnes populi conveniebant. Itaque quum hæc repentina mutatio Corcyram ad legatum Flamininum perlata esset, extemplo cum classe profectus Leucadem, ad Heræum quod vocant naves adplicuit. Inde cum omni genere tormentorum machinarumque, quibus expugnantur urbes, ad muros accessit; ad primum terrorem ratus inclinari animos posse. Postquam pacati nihil ostendebatur; tum vineas turreſque erigere, & arietem admoveſe muris cœpit. Acarnania univerſa, inter Æto-

liam atque Epirum posita, solem occidentem & mare Siculum spectat. Leucadia nunc insula, & vadoso freto, quod perfossum manu est, ab Acarnania divisa, tum peninsula erat, occidentis regione arctis faucibus cohærens Acarnaniæ. Quingentos ferme passus longæ fauces erant, latæ haud amplius centum & viginti. in his angustiiis Leucas posita est, colli applicata verso in orientem & Acarnaniam. Ima urbis plana sunt, jacentia ad mare: quo Leucadia ab Acarnania dividitur. Inde terra marique expugnabilis est. nam & vada sunt stagno similia, quàm mari: & campus terrenus omnis, operique facilis. Itaque multis simul locis aut subruti, aut ariete decussi ruebant muri. Sed quàm urbs ipsa opportuna oppugnantibus erat, tam inexpugnabiles hostium animi. die ac nocte intenti reficere quassata muri, obstruere quæ patefacta ruinis erant, prælia impigre inire, & armis magis muros quàm se ipsos mœnibus tutari. diutiusque spe Romanorum obsidionem eam extraxissent, ni exules quidam Italici generis, Leucade habitantes, ab arce milites accepissent. eos tamen, ex superiore loco magno cum tumultu decurrentes, acie in foro instructa, iusto prælio aliquamdiu Leucadii sustinuerunt. Interim & scalis capta multis locis mœnia, & per stragem lapidum ac ruinas transcendunt in urbem. jamque ipse legatus magno agmine circumvenerat pugnantes. pars in medio cæsi, pars armis abjectis dediderunt se victori. Et post dies paucos audito prælio, quod ad Cynoscephalas pugnatum erat, omnes populi Acarnaniæ in deditionem legati venerunt.

XVIII. Iisdem diebus, omnia simul inclinante fortuna, Rhodii quoque ad vindicandam à Philippo continentem regionem, (Peræam vocant) possessam à maioribus suis, Pausistratum prætorem cum octingentis Achæis peditibus, mille & nongentis fere armatis ex
vario

vario genere auxiliorum collectis, miserunt. Galli, & Nisuetæ, & Pisuetæ, Tamiani, & Arei ex Africa, & Laodiceni ex Asia erant. cum his copiis Pausistratus Tendebe in Stratonicensi agro, locum peropportunum, ignaris regiis qui tenuerant, occupavit. In tempore & ad id ipsum excitum auxilium mille Achæi pedites cum centum equitibus supervenerunt. Theoxenus iis præerat. Dinocrates, regius præfectus, recuperandi castelli causa primò castra ad ipsa Tendebe movit, inde ad alterum castellum, item Stratonicensis agri: Astragon vocant. omnibusque ex præfidiis, quæ multifariam disjecta erant, devocatis, & ab ipsa Stratonicea Thessalorum auxiliaribus Alabanda, ubi hostes erant, ducere pergit. Nec Rhodii pugnam detrectaverunt. atque, castris in propinquum collatis, extemplo in aciem descensum est. Dinocrates quingentos Macedonas dextro cornu, lævo Agrianas locat: in medium accipit contractos ex castellorum (Cares maximè erant) præfidiis: equites cornibus circumdat. Cretensium auxiliares Thracumque Rhodia cohors dextro cornu, sinistro mercenarios milites, lectam peditum manum, habuere: medios mixta ex pluribus gentibus auxilia: equites levisque armaturæ quod erat, cornibus circumjectum. Eo die steterunt tantum acies utraque super ripam, qui tenui aqua interfluebat, torrentis: paucisque telis emissis, in castra receperunt sese. Postero die eodem ordine instructi majus aliquanto proelium quam pro numero edidere pugnantium. nec enim plus terna millia peditum fuisse, & centeni ferme equites. ceterum non numero tantum, nec armorum genere, sed animis quoque paribus, & æqua spe pugnauerunt. Achæi primi, torrente superato, in Agrianas impetum fecere; deinde tota propè cursu transgressa amnem acies est. Diu anceps pugna stetit. numero Achæi mille & ipsi

quadringentos loco expulere. Inclinat dein dextrum omne cornu. Macedones, usquedum ordine & velut stipata phalanx consistebat, moveri nequiverunt: postquam lævo latere nudato circumjacere hastas in venientem ex transverso hostem conati sunt, turbati ex templo tumultum primò inter se fecerunt: terga deinde vertunt: postremò abjectis armis, in præcipitem fugam effusi, Bargylas petentes fugerunt. Eòdem & Dynocrates perfigit. Rhodii, quantum diei superfuit, secuti, receperunt sese ad castra. Satis constat, si confestim victores Stratoniceam petissent, recipi eam urbem sine certamine potuisse. Prætermissa ejus rei occasio est, dum in castellis vicisque Perææ recipiendis tempus teritur. Interim animi eorum, qui Stratoniceam præsidio obtinebant, confirmati sunt. mox & Dinocrates cum iis, quæ prælio supererant, copiis intravit muros. Nequicquam inde obsessa oppugnataque urbs est. recipi nisi aliquanto post per Antiochum non potuit. Hæc in Thessalia, hæc in Achaia, hæc in Asia per eosdem dies ferme gesta.

XIX. Philippus quum audisset Dardanos, transgressos fines ab contempu concessi tum regni, superiora Macedoniæ evastare; quamvis toto propè orbe terrarum, undique se suosque profligante fortuna, urgebatur; tamen morte tristius ratus Macedoniæ etiam possessione pelli, delectu raptim per urbes Macedonum habito, cum sex millibus peditum & quingentis equitibus circa Stobos Pæoniæ improvisò hostes oppressit. Magna multitudo hominum in prælio, major prædandi cupidine palata per agros caesa est. quibus fuga expeditior fuit, ne tentato quidem casu pugnæ, in fines suos redierunt. Ea una expeditione non pro reliquo statu fortunæ facta, refectis suorum animis, Thessalonicam sese recepit. Non tam in tempore Punicum bellum terminatum erat, ne simul

& cum Philippo foret bellandum, quàm opportunè, jam Antiocho in Syria moliente bellum, Philippus est superatus. nam præterquam quòd facilius cum singulis, quàm si in unum ambo simul contulissent vires, bellatum est; Hispania quoque sub idem tempus magno tumultu ad bellum consurrexit. Antiochus, quum, priore æstate omnibus, quæ in Cœle Syria sunt, civitatibus Ptolemæi in suam potestatem redactis, in hiberna Antiochiam concessisset, nihilo quietiores postea res habuit. omnibus enim regni viribus connixus, quum ingentes copias terrestres maritimasque comparasset, principio veris præmissis terra cum exercitu filiis duobus Ardue ac Mithridate, jussisque Sardibus se opperiri, ipse cum classe centum tectarum navium, ad hoc levioribus navigiis cercurisque ac lembis ducentis profiscitur: simul per omnem oram Ciliciæque & Cariae tentaturus urbes, quæ in ditione Ptolemæi essent; simul Philippum (necdum enim debellatum erat) exercitu navibusque adjuturus.

XX. Multa egregia Rhodii, pro fide erga populum Romanum, proque universo nomine Græcorum, terra marique ausi sunt: nihil magnificentius, quàm quòd ea tempestate, non territi tanta mole imminentis belli, legatos ad regem miserunt, Nephelida, (promontorium Ciliciæ est, inclytum fœdere antiquo Atheniensium) si eo non contineret copias suas, se obviam ituros; non ab odio ullo, sed ne conjungi cum Philippo paterentur, & impedimento esse Romanis liberantibus Græciam. Coracesium eo tempore Antiochus operibus oppugnabat: Zephyrio, & Solis, & Aphrodisiade, & Coryco, & superato Anemurio, (promontorium id quoque Ciliciæ est) Selinunte recepto, omnibus his aliisque ejus oræ castellis aut metu aut voluntate sine certamine in

deditionem acceptis, Coracesium præter spem clausis portis tenebat cum. Ibi legati Rhodiorum auditi. & quanquam ea legatio erat, quæ accendere regium animum posset, temperavit iræ: &, legatos se Rhodium missurum, respondit; *iisque mandaturum, ut renovarent vetusta jura cum ea civitate, sua majorumque suorum: & vetarent eos adventum pertimescere regis. Nihil his aut sociis eorum noxæ futurum fraudisve. nam Romanorum amicitiam se non violaturum. Argumento & suam recentem ad eos legationem esse, & senatus honorifica in se decreta responsaque.* Tum fortè legati redierunt ab Roma, comiter auditi dimissique, ut tempus postulabat, incerto adhuc adversus Philippum eventu belli. Quum hæc legati regis in concione Rhodiorum agerent, nuncius venit, debellatum ad Cynoscephalas esse. Hoc nuncio accepto, Rhodiis, dempto metu à Philippo omni, erat consilium obviam eundi classe Antiocho. Illam alteram curam non omiserunt tuendæ libertatis civitatum sociarum Ptolemæi, quibus bellum ab Antiocho imminebat. nam alias auxiliis juverunt, alias providendo ac præmonendo conatus hostis: caussaque libertatis fuerunt Cauneis, Mindiis, Halicarnassensibus, Samiisque. Non operæ est persequi, ut quæque acta in his locis sint; quum ad ea, quæ propriè Romani belli sunt, vix sufficiam.

XXI. Eodem tempore & Attalus rex, æger Thebis Pergamum advectus, moritur; altero & septuagesimo anno, quum quatuor & quadraginta annos regnasset. Huic viro, præter divitias, nihil ad spem regni fortuna dederat. his simul prudenter, simul magnifice utendo, effecit, primum ut sibi, deinde ut aliis non indignus videretur regno. Victis deinde proelio uno Gallis, quæ tum gens recenti adventu terribior Asiæ erat, regium adscivit nomen: cujus

cujus magnitudini semper animum æquavit. Summa justitia suos rexit, unicam fidem sociis præstitit, uxorem ac liberos quatuor superstites habuit. mitis ac munificus amicis fuit. regnum adeo stabile ac firmum reliquit, ut ad tertiam stirpem possessio ejus descenderit. Quum is status rerum in Asia Græciaque & Macedonia esset, vixdum terminato cum Philippo bello, pace certè nondum perpetrata, ingens in Hispania ulteriore coortum est bellum. M. Helvius eam provinciam obtinebat. Is literis senatum certiores fecit, *Colcam & Luscinum regulos in armis esse. Cum Colca decem & septem oppida, cum Lusino validas urbes, Cardonem & Bardonem, & maritimam oram omnem, quæ nondum animos nudaverat, ad finitimorum motus consurrecturam.* His literis à M. Sergio prætore, cujus jurisdictio inter cives erat, recitatis, decreverunt Patres; ut, comitiis prætorum perfectis, cui prætori provincia Hispania obvenisset, is primo quoque tempore de bello Hispaniæ ad senatum referret.

XXII. Sub idem tempus consules Romam venerunt, quibus in æde Bellonæ senatum habentibus, postulantibusque triumphum ob res prospere bello gestas, C. Atinius Labeo & C. Urfanius tribuni plebis, ut separatim de triumpho agerent consules, postulârunt. communem se relationem de ea re fieri non passuros, ne par honos in dispari merito esset. Quumque Minucius utrique provinciam Italianam obtigisse diceret, communi animo consilioque se & collegam res gessisse; Cornelius adjiceret, Boios adversus se transgredientes Padum, ut Insubribus Cænomanisque auxilio essent, depopulante vicis eorum atque agros collega, ad sua tuenda averfos esse; tribuni *res tantas bello gessisse Cornelium fateri, ut non magis de triumpho ejus, quàm de honore*

Diis immortalibus habendo dubitari posset. Non tamen nec illum, nec quemquam alium civem tantum gratia atque opibus valuisse, ut, quum sibi met triumphum impetrasset, collegæ eundem honorem impudenter petenti daret. Q. Minucium in Liguribus levia prælia, vix digna dictu fecisse: in Gallia magnum numerum militum amisisse. Nominabant etiam tribunos militum T. Juvencium, & Cn. Labeonem ejus fratrem, qui adversa pugna cum multis aliis viris fortibus civibus ac sociis cecidissent. Oppidorum paucorum vicorum falsas, & in tempus simulatas, sine ullo pignore deditiones factas esse. Hæ inter consules tribunosque altercationes biduum tenuerunt, victique perseverantia tribunorum consules separatim retulerunt.

XXIII. Cn. Cornelio omnium consensu decretus triumphus. & Placentini Cremonensesque addiderunt favorem consuli, gratias agentes, commemorantesque, obsidione se esse ab eo liberatos. plerosque etiam, quum apud hostes essent, servitute exceptos. Q. Minucius, tentata tantum relatione, quum adversum omnem senatum videret, in monte Albano se triumphaturum, & jure imperii consularis & multorum clarorum virorum exemplo, dixit. Cn. Cornelius de Insubribus Cænomanisque in magistratu triumphavit. multa signa militaria tulit, multa Gallica spolia captivis carpentis transvexit. multi nobiles Galli ante currum traducti, inter quos quidam, Amilcarem ducem Pœnorum fuisse, auctores sunt. Ceterum magis in se convertit oculos Cremonensium Placentinorumque colonum turba pileatorum, currum sequentium. Tulit in triumpho ducenta triginta septem millia quingentos æris; argenti bigati septuaginta novem millia. septuagenos æris militibus divisit: duplex equiti, triplex centurioni. Q. Minucius consul de Liguribus Boiisque Gallis
in

in monte Albano triumphavit. is triumphus, ut loco, & fama rerum gestarum, & quod sumptum non erogatum ex ærario omnes sciebant, inhonoratior fuit: ita signis, carpentisque, & spoliis ferme æquabat. Pecuniæ etiam propè par summa fuit: æris translata ducenta & quinquaginta quatuor millia: argenti bigati quinquaginta tria millia, & ducenti. militibus centurionibusque & equitibus item in singulos datum, quod dederat collega.

XXIV. Secundùm triumphum consularia comitia habita. creati consules L. Furius Purpureo & M. Claudius Marcellus. Prætores po-
Ante Cbr.
196.
U.C. 556.
 stero die facti, Q. Fabius Buteo, Ti. Sempronius Longus, Q. Minucius Thermus, Manius Acilius Glabrio, L. Apustius Fullo, C. Lælius. Exitu ejus anni literæ à T. Quintio venerunt, se signis collatis cum rege Philippo in Theffalia pugnâsse, hostium exercitum fustum fugatumque. Hæ literæ priùs in senatu à Sergio prætore, deinde ex auctoritate Patrum in concione sunt recitatæ. Ob res prospere gestas in dies quinque supplicationes decretæ. Brevi pòst legati & à T. Quintio & ab rege venerunt. Macedones deducti extra urbem in villam publicam, ibique iis locus & lautia præbita: & ad ædem Bellonæ senatus est habitus. Haud multa verba facta, quum Macedones, quæcumque senatus censuisset, id regem facturum esse dicerent. Decem legati more majorum, quorum ex consilio T. Quintius imperator leges pacis Philippo daret, decreti: adjectumque, ut in eo numero legatorum P. Sulpicius & P. Villius essent: qui consules provinciam Macedoniam obtinuissent. Cossanis eo die postulantibus ut sibi colonorum numerus augeretur, mille assignari jussit; dum ne quis in
 eorum

eorum numero esset, qui post P. Cornelium & Ti. Sempronium consules hostis fuisset.

XXV. Ludi Romani eo anno in circo scenaque ab ædilibus curulibus, P. Cornelio Scipione & Cn. Manlio Vulsone, & magnificentius quàm aliàs facti, & lætius propter res bello bene gestas spectati: totique ter instaurati, plebei septies instaurati. Acilius Glabrio, C. Lælius eos ludos fecerunt. Ex argento multaticio tria signa ænea Cereri, Liberæque, & Liberæ posuerunt. L. Furius & M. Claudius Marcellus, consulatu inito, quum de provinciis ageretur, & Italiam utrique provinciam senatus decerneret; ut Macedoniam cum Italia fortirentur, petebant. Marcellus provinciæ cupidior, pacem simulatam ac fallacem dicendo, & rebellaturum, si exercitus inde deportatus esset, regem, dubios sententiæ Patres fecerat. Et forsitan obtinuissent consules, ni Q. Marcius Rex & C. Atinius Labæo, tribuni plebis, se intercessuros dixissent: ni prius ipsi ad plebem tulissent, vellent juberentne cum rege Philippo pacem esse. Ea rogatio in Capitolio ad plebem lata est. omnes quinque & triginta tribus, uti rogatæ, jusserunt. Et quo magis pacem ratam esse in Macedonia vulgò lætarentur, tristis ex Hispania nuncius allatus effecit, vulgatæque literæ, *C. Sempronium Tuditanum proconsulem in ceteriore Hispania prælio victum: exercitum ejus fustum fugatumque, & illustres viros in acie cecidisse. Tuditanum, cum gravi vulnere latum ex prælio, haud ita multo post expirasse.* Consulibus ambobus Italia provincia cum his legionibus, quas superiores consules habuissent, decreta, & ut quatuor legiones novas scriberent; duas, quæ, quo senatus censuisset, mitterentur, & T. Quintius Flamininus cum duabus

bus legionibus provinciam eodem exercitu obtinere jussus. imperium ei prorogatum fatis jam antè videri.

XXVI. Prætores deinde provincias sortiti, L. Apulius Fullo urbanam jurisdictionem, Manius Acilius Glabrio inter cives & peregrinos, Q. Fabius Buteo Hispaniam ulteriorem, Q. Minucius Thermus citeriorem, C. Lælius Siciliam, Tib. Sempronius Longus Sardiniam. Q. Fabio Buteoni & Q. Minucio, quibus Hispaniæ provinciæ evenerant, consules legiones singulas, ex quatuor ab se scriptis quas videretur, uti darent, decretum est: socium ac nominis Latini quaterna millia peditum, trecenos equites. hique primo quoque tempore in provincias ire jussi. Bellum in Hispania quinto post anno exortum est, quàm simul cum Punico bello fuerat finitum. Priusquam hi prætores ad bellum propè novum, quia tum primum suo nomine, nullo Punico exercitu aut duce ad arma ierant, proficiscerentur, aut ipsi consules ab urbe moverent; procurare, ut assolet, prodigia, quæ nunciabantur, jussi. L. Julius Sequestris, in Sabinos proficiscens, fulmine ipse equusque exanimati fuerant: ædes Feroniæ in Capenate de cælo tacta erat: ad Monetæ duarum hastarum spicula arserant: lupus Æsquilina porta ingressus, frequentissima parte urbis, quum in forum decurrisset, Tusco vico atque inde Melio per portam Capenam propè intactus evaserat. Hæc prodigia majoribus hostiis sunt procurata.

XXVII. Iisdem diebus Cn. Cornelius Lentulus, qui ante Sempronium Tuditanum citeriorem Hispaniam obtinuerat, quum ex senatusconsulto ovans urbem esset ingressus, tulit præ se auri mille & quingenta quindecim pondo, argenti viginti millia, signati denarium triginta quatuor millia, & quingentos

gentos quinquaginta. L. Stertinius ex ulteriore Hispania, ne tentata quidem triumphi spe, quinquaginta millia pondo argenti in ærarium tulit: & de manubiis duos fornices in foro Boario ante Fortunæ ædem & matris Matutæ, unum in Maximo Circo fecit: & his fornicibus signa aurata imposuit. Hæc per hiemem ferme acta. Hibernabat eo tempore Athenis Quintius. à quo quum multa focii peterent, Bœoti petierunt impetraveruntque, ut hi, qui suæ gentis militassent apud Philippum, sibi restituerentur. id à Quintio facillè impetratum; non quia satis dignos eos credebat, sed quia, Antiocho rege jam suspecto, favor conciliandus nomini Romano apud civitates erat. Restitutis, confestim apparuit, quàm nulla inita apud Bœotos gratia esset. nam & ad Philippum gratias agentes pro redditis hominibus, perinde atque ipsi id à Quintio & Romanis datum esset, miserunt: & comitiis proximis Bœotarchen nullam aliam ob causam Brachyllam quendam, quàm quòd præfectus Bœotorum apud regem militantium fuisset, fecerunt; præteritis Zeuxippo & Pisistrato, aliisque qui Romanæ societatis auctores fuerant. Id ægre & in præsentia hi passi, & in futurum etiam metum ceperunt. quum ad portas propè sedente exercitu Romano ea fierent; quidnam se futurum esset, profectis in Italiam Romanis, Philippo ex propinquo socios adjuvante, & infesto his qui partis adversæ fuissent?

XXVIII, Dum Romana arma propinqua habebant, tollere Brachyllam, principem fautorum regis, statuerunt. & tempore ad eam rem capto, quum in publico epulatus reverteretur domum temulentus, prosequentibus mollibus viris, qui joci causa convivio celebri interfuerant; ab sex armatis, quorum

rum tres Italici, tres Ætoli erant, circumventus occiditur. Fuga comitum, & quiritatio facta, & tumultus tota urbe discurrentium cum luminibus. percussores proxima porta evaserunt. Luce prima concio frequens, velut exstante indicio, ad vocem præconis convocata in theatro erat. Palam ab suo comitatu, & obscœnis illis viris fremebant interfectum: animis autem Zeuxippum auctorem destinabant cædis. In præsentia placuit comprehendi eos, qui simul fuissent, quæstioneinque ex his haberi. qui dum quærantur, Zeuxippus, confimili animo, avertendi ab se criminis causa, in concionem progressus, errare ait homines, qui tam atrocem cædem pertinere ad illos semiviros crederent. multaue in eam partem probabiliter argumentatus: quibus fidem apud quosdam fecit, nunquam, si confcius esset, oblatum se multitudini, mentionemve cædis nullo laceffente facturum fuisse. Alii non dubitare, obviam eundo impudenter, criminis suspicionem averti. Torti post paullo infontes, quum scirent ipsi opinionem omnium, ea pro indicio usi, Zeuxippum & Pisistratum nominaverunt: nullo adjecto, cur scire quicquam viderentur, argumento. Zeuxippus tamen cum Stratonida quodam nocte perfugit Tanagram, suam magis conscientiam, quàm indicium hominum nullius rei consciorum, metuens: Pisistratus, spretis indicibus, Thebis mansit. Servus erat Zeuxippo, totius internuncius & minister rei. quem indicem Pisistratus timens, eo ipso timore ad indicium protraxit. literas ad Zeuxippum mittit, servum confcium tolleret. non tam idoneum ad celandam rem eum videri sibi, quàm ad agendam fuerit. Has qui tulit literas, jussit Zeuxippo dare quamprimum. is, quia non sibi conveniendi ejus copia fuit, ipsi illi servo, quem ex omnibus domino

mino fidissimum credebat, tradidit: & adjecit, à Pisistrato de re magnopere pertinente ad Zeuxippum esse. Conscientia ictus, quum extemplo traditurum eas affirmâisset, aperit. Perlectis literis, pavidus Thebas refugit. & Zeuxippus quidem, fuga servi motus, Athenas, tutiorem exsilio locum ratus, concessit. De Pisistrato aliquo quæstiones tormentis habitæ, & sumptum supplicium est.

XXIX. Efferavit ea cædes Thebanos Bœotosque omnes ad execrabile odium Romanorum; Zeuxippum principem gentis id facinus conscisse. ad rebellandum neque vires, neque ducem habebant. Proximum bello quod erat, in latrocinium versi, alios hospites, alios vagos per hiberna milites, ad varios commeantes usus excipiebant. quidam in ipsis itineribus ad notas latebras insidiantibus, pars in desertâ per fraudem diversoria devecti deductique opprimebantur. postremò non tantùm odio, sed etiam aviditate prædæ ea facinora faciebant: quia negotiandi ferme causa argentum in zonis habentes in commeatibus erant. Quum primò pauci, dein indies plures desiderantur, infamis esse Bœotia omnis cœpit, & timidiùs quàm in hostico egredi castris miles. Tum Quintius legatos ad quærendum de latrociniiis per civitates mittit. Plurimi pedites circa Copaïdem paludem inventi. ibi ex limo eruta extractaque ex stagno cadavera, faxis aut amphoris, ut pondere traherentur in profundum, annexa. multa facinora Acræphiæ & Coronæ facta inveniebantur. Quintius primò noxios tradi sibi iussit. & pro quingentis militibus (tot enim intercepti erant) quingenta talenta Bœotos conferre. Quorum neutrum quum fieret, verbis tantùm civitates excusarent, nihil publico consilio factum esse: missis Athenas & in Achaiam legatis, qui testa-

rentur

rentur fociis, iusto pioque bello se persecuturum Bœotos; & cum parte copiarum P. Claudio Acræphiam ire iussu, cum parte Coroneam circumfedit, evastatis prius agris, quâ ab Elatia duo diversa agmina iere. Hac perculsi clade Bœoti, quum omnia terrore ac fuga complerent, legatos mittunt. qui quum in castra non admitterentur, Achæi Atheniensesque supervenerunt. Plus auctoritatis Achæi habuerunt, deprecantes: ac, ni impetrassent pacem Bœotis, bellum simul gerere decreverunt. Per Achæos Bœotis copia adeundi alloquendique Romanum facta est. iussisque tradere noxios, & multæ nomine triginta talenta conferre, pax data; & ab oppugnatione recessum.

XXX. Post paucos dies decem legati ab Roma venerunt, quorum ex consilio pax data Philippo in has leges est. Omnes Græcorum civitates, quæ in Europa, quæque in Asia essent, libertatem ac suas leges haberent. quæ earum sub ditione Philippi fuissent, præsidia ex his Philippus deduceret: his, quæ in Asia essent, Euromo, Padasisque, & Bargyliis, & Jusso, & Myrina, & Abydo, & Thasso, & Perintha: eas quoque enim placere liberas esse. De Cianorum libertate, Quintius Prusiæ Bithynorum regi scriberet, quid senatui & decem legatis placuisset. Captivos transfugasque reddere Philippum Romanis, & naves omnes tectas tradere; quin & regiam unam inhabilis propè magnitudinis, quam sexdecim versus remorum agebant. Ne plus quintigenti armatorum haberet, neve elephantum ullum. Bellum extra Macedoniæ fines ne injussu senatus gereret. Mille talentum daret populo Romano, dimidium præsens, dimidium pensionibus decem annorum. Valerius Antias, quaternum millium pondo argenti vectigal in decem annos, triginta quaterna millia pondo & ducenta, præsens viginti millia pondo. idem nominatim

minatim adjectum scribit, ne cum Eumene Attali filio (novus is tum rex erat) bellum gereret. In hæc obsides accepti, inter quos Demetrius Philippi filius. Adjicit Valerius Antias, Attalo absenti Ægiram insulam elephantosque dono datos, & Rhodiis Stratoniceam Cariæ, atque alias urbes, quas Philip-
pus tenuisset: Atheniensibus insulas datas, Paron, Imbrum, Delum, Scyrum.

XXXI. Omnibus Græciæ civitatibus hanc pacem approbantibus, soli Ætoli id decretum decem legatorum clam mussantes carpebant. *litteras inanes vana specie libertatis adumbratas esse. Cur enim alias Romanis tradi urbes, nec nominari eas, alias nominari, & sine traditione juberi liberas esse? nisi ut quæ in Asia sint, liberentur, longinquitate ipsa tutiores: quæ in Græcia sint, ne nominatæ intercipientur, Corinthus, & Chalcis, & Oreum, cum Eretria & Demetriade.* Nec tota ex vano criminatio erat. dubitabatur enim de Corintho, & de Chalcide, & Demetriade, quia in senatusconsulto, quo missi decem legati ab urbe erant, ceteræ Græciæ atque Asiæ haud dubiè liberabantur: de his tribus urbibus legati, quòd tempore reipublicæ postulassent, id è republica fideque sua facere statuere jussi erant. Antiochus rex erat, quem transgressurum in Europam, quum primùm ei res suæ placuissent, non dubitabant. ei tam opportunas ad occupandum patere urbes nolebant. Ab Elatia Anticyram cum decem legatis, inde Corinthum trajecit. ibi consilia decem legatorum tractabantur. Identidem Quintius, liberandam omnem Græciam, si Ætolorum linguas retundere, si veram caritatem, majestatem apud omnes nominis Romani vellent esse: si fidem facere, ad liberandam Græciam, non ad transferendum à Philippo ad se imperium, se mare trajecisse. Nihil contra ea de liber-

libertate urbium alii dicebant. ceterum ipsis tutius esse manere paullisper sub tutela praesidii Romani, quam pro Philippo Antiochum dominum accipi. Postremo ita decretum est: *Corinthus redderetur Achaëis, ut in Acrocorintho tamen praesidium esset: Chalcidem ac Demetriadem retineri, donec cura de Antiocho decessisset.*

XXXII. Isthmiorum statum ludicrum aderat, semper quidem & aliàs frequens, cum propter spectaculi studium insitum genti, quo certamina omnis generis artium viriumque ac pernicitatis visuntur; tum quia propter opportunitatem loci per duo diversa maria omnium Græcorum undique conventus erat. Sed expectatione erecti, qui deinde status futurus Græciæ, quæ sua fortuna esset: alii non taciti solum opinabantur, sed sermonibus etiam ferebant. Romani ad spectaculum confederunt, & præco cum tubicine, ut mos est, in mediam arenam, unde solenni carmine ludicrum indici solet, processit: & tuba silentio facto ita pronunciat. SENATUS POPULUSQUE ROMANUS, ET T. QUINTIUS IMPERATOR, PHILIPPO REGE MACEDONIBUSQUE DEVICTIS, LIBEROS, IMMUNES, SUIS LEGIBUS ESSE JUBET CORINTHIOS, PHOCENSES, LOCRENSESQUE OMNES, ET INSULAM EUBOEAM: ET MAGNETAS, THESALOS, PERRAEBOS, ACHÆOS PHTHIOTAS. Percensuerat omnes gentes, quæ sub ditione Philippi regis fuerant. Audita voce præconis, majus gaudium fuit, quam quod universum homines caperent. Vix satis credere se quisque audisse: alii alios intueri mirabundi, velut somnii vanam speciem. quod ad quemque pertineret, suarum aurium fidei minimùm credentes, proximos interrogabant. Revocatus præco, quum unusquisque non audire, fed

sed videre libertatis suæ nuncium averet: iterum pronuntiaret eadem. Tum ab certo jam gaudio tantus cum clamore plausus est ortus, totiesque repetitus, ut facile appareret, nihil omnium bonorum multitudini gratius, quam libertatem esse. Ludicrum deinde ita raptim peractum est, ut nullius nec animi nec oculi spectaculo intenti essent. adeo unum gaudium præoccupaverat omnium aliarum sensum voluptatum.

XXXIII. Ludis verò dimissis, cursu propè omnes tendere ad imperatorem Romanum: ut, ruente turba in unum, adire, contingere dextram cupientium, coronas lemniscosque jacentium, haud procul periculo fuerit. Sed erat trium ferme & triginta annorum, & cum robur juventæ tum gaudium ex tam insigni gloriæ fructu vires suppeditabant. nec præsens omnium modò effusa lætitia est; sed per multos dies gratis & cogitationibus & sermonibus revocata: *Esse aliquam in terris gentem, quæ sua impensa, suo labore ac periculo bella gerat pro libertate aliorum. nec hoc finitimis, aut propinquæ vicinitatis hominibus, aut terris continenti junctis præstet. maria trajiciat, ne quod toto orbe terrarum injustum imperium sit; & ubique jus, fas, lex potentissima sint. Una voce præconis liberatas omnes Græciæ atque Asiæ urbes. hoc spe concipere audacis animi fuisse: ad effectum adducere, virtutis & fortunæ ingentis.*

XXXIV. Secundùm ista jam Quintius & decem legati legationes regum, gentium, civitatumque audire. Primi omnium regis Antiochi vocati legati sunt. his eadem, quæ fere Romæ erant, verba sine fide rerum jactata. Nihil jam perplexè, ut antè, quum dubiæ res incolumi Philippo erant, sed apertè pronunciatum, ut excederet Asiæ urbibus, quæ aut Philippi, aut Ptolemæi regum fuissent. abstineret liberas, omnesque Græcas. Ante omnia denunciatum, ne in Europam aut ipse transiret, aut copias trajiceret.

ret. Dimissis regis legatis, conventus gentium civitatumque est haberi coëptus. eoque maturius peragebatur, quòd decreta decem legatorum civitates nominatim pronunciabant. Orestis (Macedonum ea gens est) quòd primi ab rege defecissent, suæ leges redditæ. Magnetes, & Perræbi, & Dolopes liberi quoque pronunciati. Thessalorum genti, præter libertatem concessam, Achæi Phthiotæ dati, Thebis Phthioticis & Pharsalo excepto. Ætolos, de Pharsalo & Leucade postulantes, ut ex fœdere sibi restituerentur, ad senatum rejecerunt. Phocenses, Locenses, & quæ sicut antè fuerant adjecta, decreti auctoritate, his contulerunt. Corinthus, & Triphylia, & Heræa (Peloponnesi & ipsa urbs est) reddita Achæis. Oreum & Eretriam decem legati Eumeni regi Attali filio dabant. dissentiente Quintio, venit res in arbitrium senatus: senatus libertatem his civitatibus dedit, Carysto adjecto. Pleurato Lycus & Parthini dati: Illyriorum utraque gens sub ditione Philippi fuerat. Amyndrum tenere jusserunt castella, quæ per belli tempus Philippo capta ademisset.

XXXV. Dimisso conventu, decem legati, partiti munia inter se, ad liberandas suæ quisque regionis civitates discesserunt: P. Lentulus Bargylas, L. Stertinus Hephestiam & Thassum & Thraciæ urbes, P. Villius & L. Terentius ad regem Antiochum, Cn. Cornelius ad Philippum. qui de minoribus rebus editis mandatis percunctatus, si consilium non utile solùm sed etiam salutare admittere auribus posset? quum rex, gratias quoque se acturum, diceret, si quid, quod in rem suam esset, expromeret: magnopere ei suavis, quoniam pacem impetrasset, ad societatem amicitiamque petendam mitteret Romam legatos: ne, si quid Antiochus moveret, expectasse, & temporum opportunitates captasse ad bellandum videri posset.

Ad

Ad Tempe Thessalica Philippus est conventus. qui quum se missurum extemplo legatos respondisset; Cornelius Thermopylas, ubi frequens Græciæ statis diebus esse solet conventus, (Pylaïcum appellant) venit. Ætolos præcipuè monuit, ut constanter & fideliter in amicitia populi Romani permanerent. Ætolorum principes alii interquesti sunt, quòd non idem erga suam gentem Romanorum animus esset post victoriam, qui in bello fuisset: alii ferociùs incusarunt, exprobraruntque, non modò vinci sine Ætolis Philippum, sed ne transire quidem in Græciam Romanos potuisse. Adversus ea respondere (ne in altercationem excederet res) quum superfedisset Romanus; omnia eos æqua impetraturos, si Romam misissent, dixit. itaque ex auctoritate ejus decreti legati sunt. Hunc finem bellum cum Philippo habuit.

XXXVI. Quum hæc in Græcia Macedoniaque & Asia gererentur, Etruriam infestam propè conjuratio fervorum fecit. ad quærendam opprimendamque eam Manius Acilius prætor, cui inter cives peregrinosque jurisdictio obtigerat, cum una ex duabus legione urbana missus, alios jam congregatos pugnando vicit. ex his multi occisi, multi capti. alios verberatos crucibus affixit, qui principes conjurationis fuerant. alios dominis restituit. Consules in provincias profecti sunt. Marcellum Boiorum ingressum fines, fatigato per diem totum milite via facienda, castra in tumulo quodam ponentem, Corolamus, regulus Boiorum, cum magna manu adortus, ad tria millia hominum occidit. & illustres viri aliquot in illo tumultuario prælio ceciderunt, inter quos præfecti sociùm Ti. Sempronius Gracchus, M. Junius Silanus: & tribuni militum de legione secunda, A. Ogulnius & P. Claudius. castra tamen ab Romanis impigre permunita retentaque, quum hostes à prospera pugna nequicquam

quam oppugnâssent. Stativis deinde eisdem per dies aliquot sese tenuit, dum & faucios curaret, & à tanto terrore animos militum reficeret. Boii, ut est gens minimè ob moræ tædium patiens, in castella sua vi-
cosque dilapsi sunt. Marcellus, Pado confestim tra-
jecto, in agrum Comensem, ubi Insubres Comensibus ad arma excitis castra habebant, ducit legiones. in ipso itinere prælium committunt: & primò adeo acriter invaserunt, ut antesignanos impulerint. quod ubi animadvertit, veritus ne moti semel pellerentur, co-
hortem Marforum opposuit: & equitum Latinorum omnes turmas in hostem emisit. Quorum quum pri-
mus secundusque impetus retudisset inferentem se fe-
rociter hostem, confirmata & reliqua acies Romana restitit primò, deinde signa acriter intulit. nec ultra sustinuerunt certamen Galli, quin terga verterent, at-
que effusè fugerent. In eo prælio supra quadraginta millia hominum cæsa, Valerius Antias scribit: & quingenta septem signa militaria capta, & carpenta quadringenta triginta duo, & aureos torques multos, ex quibus unum magni ponderis Claudius in Capitolio Jovi donum in æde positum scribit. Castra eo die Gallorum expugnata direptaque. & Comum oppidum intra dies paucos captum. Castella inde duodetriginta ad consulem defecerunt. Id quoque inter scriptores ambigitur, utrum in Boios prius, an Insubres consul exercitum induxerit, adversamque prospera pugna obliteraverit: an victoria ad Comum parta, deformata clade in Boiis accepta sit.

XXXVII. Sub hæc tam varia fortuna gesta, L. Furius Purpureo alter consul per tribum Sappiniam in Boios venit. Jam castro Mutilo appropinquabat, quum veritus, ne intercluderetur simul à Boiis Ligu-
ribusque, eadem via, qua adduxerat, reduxit; & magno circuitu per aperta, eaque tuta loca, ad colle-

gam pervenit. dein junctis exercitibus primum Boiorum agrum usque ad Felsinam oppidum populates peragraverunt. Ea urbs, ceteraque castella, & Boii fere omnes, præter juventutem, quæ prædandi causa in armis erat, (tunc in devias silvas recesserat) in ditionem venerunt. In Ligures deinde traductus exercitus. Boii negligentius coactum agmen Romanorum, quia ipsi procul abesse viderentur, improvisò aggressuros se rati, per occultos saltus secuti sunt. quos non adepti, Pado repente navibus trajecto, Lævos Libuosque quum pervastassent, redeuntes inde Ligurum extremo fine cum agresti præda in agmen incidunt Romanum. Celerius prælium acriusque commissum, quàm si tempore locoque ad certamen destinatis, præparatis animis concurrissent. Ibi quantam vim ad stimulandos animos ira haberet, apparuit. nam ita cædis magis quàm victoriæ avidi pugnârunt Romani, ut vix nuncium cladis hosti relinquerent. Ob eas res gestas, consulum literis Romam allatis, supplicatio in triduum decreta est. Brevi post Marcellus Romam venit, triumphusque ei magno consensu Patrum est decretus. Triumphavit in magistratu de Insubribus Comensibusque. Boiorum triumphi spem collegæ reliquit: quia ipsi propriè adversa pugna in ea gente evenerat, collegæ secunda. Multa spolia hostium captivis carpentis traducta: multa militaria signa lata, æris trecenta viginti millia, argenti bigati ducenta triginta quatuor millia. in pedites singulos dati octingenti æris: triplex equiti, centurionique.

XXXVIII. Eodem anno Antiochus rex, quum hibernasset Ephesi, omnes Asiæ civitates in antiquam imperii formulam redigere est conatus: reliquas quidem, aut quia locis planis positæ erant, aut quia parum mœnibus armisque ac juventuti fidebant, haud difficulter jugum accepturas. Smyrna & Lampascus libertatem

libertatem usurpabant, periculumque erat, ne, si concessum his foret, quos metuebat, Smyrnam in Æolide Ioniaque, Lampfacum in Hellesponto aliæ urbes sequerentur. Igitur & ipse ab Epheso ad Smyrnam obsidendam misit: & quæ Abydi copiarum erant, præsidio tantum modico relicto, duci ad Lampfacum oppugnandum jussit. Nec vi tantum terrebat: sed per legatos leniter alloquendo, castigandoque temeritatem & pertinaciam, spem conabatur facere, brevi quæ peterent habituros. & tum fatis & ipsis & omnibus aliis apparere, ab rege impetratam eos libertatem, non per occasionem raptam, habere. Adversus quæ respondebant, *Nilil neque mirari, neque succensere Antiochum debere, si spem libertatis differri non satis æquo animo paterentur.* Ipse initio veris, navibus ab Epheso profectus, Hellespontum petit: terrestres copias Madytum trajicit, Chersonesi urbem: terrestri navalem exercitum junxit. & quia clausurant portas, circumdedit mœnia armatis; & jam opera admoventi deditio est facta. Idem metus tum incolentes alias Chersonesi urbes in deditionem dedit. Lyfimachiam inde omnibus simul navalibus terrestribusque copiis venit. quam quum desertam ac stratum propè ruinis invenisset, (ceperant autem direptamque incenderant Thraces paucis antè annis) cupido eum restituendi nobilem urbem, & loco sitam opportuno, cepit. Itaque omni cura simul est aggressus & tecta murosque restituere, & partim redimere servientes Lyfimachienfes, partim fuga sparfos per Hellespontum Chersonesumque conquirere contrahereque; partim novos colonos, spe commodorum proposita, adscribere, & omni modo frequentare. simul ut Thracum summo veretur metus, ipse parte dimidia terrestrium copiarum ad depopulandum proxima Thraciæ est profectus: partem, navalesque

valesque socios omnes reliquit in operibus reficiendæ urbis.

XXXIX. Sub hoc tempus & L. Cornelius, missus ab senatu ad dirimenda inter Antiochum Ptolemæum-que reges certamina, Selymbriæ substitit: & decem legatorum P. Lentulus à Bargyliis, P. Villius & L. Terentius à Thasso Lyfimachiam petierunt. eodem & à Selymbria L. Cornelius, & ex Thracia post paucos dies Antiochus convenerunt. Primus congressus cum legatis, & deinceps invitatio benigna & hospitalis fuit. ut de mandatis statuque præsentis Asiæ agi cœptum est, animi exasperati sunt. Romani omnia acta ejus, ex quo tempore è Syria classe solvisset, displicere senatui non dissimulabant: restituique Ptolemæo civitates omnes, quæ ditionis ejus fuissent, æquum censebant. *Nam quod ad eas civitates attineret, quas à Philippo possessas Antiochus per occasionem, averso Philippo in Romanum bellum, intercepisset, id verò ferendum non esse, Romanis per tot annos terra marique tanta pericula ac labores exhausisse, Antiochum belli præmia habere. Sed ut in Asiam adventus ejus dissimulari ab Romanis, tanquam nihil ad eos pertinens, potuerit; quòd jam etiam in Europam omnibus navalibus terrestribusque copiis transferit, quantum à bello aperto Romanis abesse? Illum quidem, etiam si in Italiam trajiciat, negaturum.*

XL. Ad ea rex, Satis jam antè videre se, Romanos inquirere, quid regi Antiocho faciendum: at quousque terra marique progrediendum fuerit ipsis, non cogitare. *Asiam nihil ad populum Romanum pertinere: nec magis illis inquirendum esse, quid Antiochus in Asia, quam Antiocho, quid in Italia populus Romanus faciat. Quod ad Ptolemæum attineat, cui ademptas civitates querantur: sibi cum Ptolemæo & amicitiam esse: & id agere se, ut brevi etiam affinitas jungatur. Nec ex Philippi quidem adversa*

adversa fortuna spolia ulla se petisse: aut adversus Romanos in Europam trajecisse: sed ut Chersonesi urbes, Thraciæque recuperaret. Eorum enim locorum imperium ad se pertinere, quippe quod ab initio Lyfimachi fuerit. quo victo omnia, quæ illius fuissent, jure belli Seleuci facta sint, existimare suæ ditionis esse. Occupatis majoribus suis rerum aliarum alia cura, primò quædam ex his Ptolemæum, deinde & Philippum usurpando aliena possedisse: sicut quædam ex proxima Thracia, quæ indubitè Lyfimachi fuerint. Ad ea facienda in antiquum venisse: & Lyfimachiam, deletam Thracum impetu, de integro condere; ut Seleucus filius eam sedem regni habeat.

XLI. His disceptationibus per dies aliquot habitis, rumor sine ullo satis certo auctore allatus de morte Ptolemæi regis, ut nullus exitus imponeretur sermonibus. nam dissimulabat pars utraque se audisse. & L. Cornelius, cui legatio ad duos reges, Antiochum Ptolemæumque, mandata erat, spatium modici temporis ad conveniendum Ptolemæum petebat; ut, priusquam moveretur aliquid in nova possessione regni, perveniret in Ægyptum. & Antiochus suam fore Ægyptum, si tum occasio esset, censebat. Itaque dimissis Romanis, relictoque Seleuco filio cum terrestribus copiis ad restituendam, ut instituerat, Lyfimachiam; ipse, omni classe navigans Ephesum, legatis ad Quintium missis, qui ad fidem de societate agerent, oram Asiæ legens, pervenit in Lyciam. Patarisque cognito vivere Ptolemæum, navigandi quidem in Ægyptum omissum consilium est. Cyprum nihilo minùs tendens, quum Chelidonium promontorium superâisset, paullisper seditione remigum est retentus in Pamphylia circa Eurymedontem amnem. Inde profectum eum ad capita quæ (vocant) Sari fluminis, fœda tempestas oborta propè cum omni classe demersit. multæ naves ejectæ: multæ ita haustæ mari, ut

nemo in terram enaverit. Magna vis hominum ibi interiiit, non remigum tantum militumque ignotorum, sed etiam insignium amicorum. Collectis reliquiis naufragii, quum res non in eo esset, ut Cyprum tentaret; minus opulento agmine, quam profectus erat, Seleuciam redit. ibi subduci navibus iussis (jam enim hiems instabat) ipse in hiberna Antiochiam processit.

XLII. In hoc statu regum erant res. Romæ eo primum anno triumviri epulones facti, C. Licinius Lucullus, P. Manlius, qui legem de creandis his tulerat, & P. Porcius Læca. his triumviris item, ut pontificibus, lege datum togæ prætextæ habendæ jus. Sed magnum certamen cum omnibus sacerdotibus eo anno fuit quæstoribus urbanis, Q. Fabio Labeoni & L. Aurelio. Pecunia opus erat, quod ultimam pensionem pecuniæ in bellum collatæ persolvere placuerat privatis. Quæstores ab auguribus, pontificibus, quod stipendium per bellum non contulissent, petebant. ab sacerdotibus tribuni nequicquam appellati, omniumque annorum, per quos non dederant, exactum est. Eodem anno duo mortui pontifices, novique in eorum locum suffecti: M. Marcellus consul in locum C. Sempronii Tuditani, qui prætor in Hispania decesserat; & L. Valerius in locum M. Cornelii Cethegi. Et Q. Fabius Maximus augur mortuus est admodum adolescens, priusquam ullum magistratum caperet: nec eo anno augur in ejus locum est suffectus. Comitia inde consularia habita à M. Marcello consule. creati consules L. Valerius Flaccus, M. Porcius Cato. Prætores inde facti C. Fabricius Luscinius, C. Atinius Labeo, Cn. Manlius Vulso, Ap. Claudius Nero, P. Manlius, P. Porcius Læca. Ædiles curules, M. Fulvius Nobilior & C. Flaminius, tritici decies centam millia binis æris populo dividerunt. id C. Flaminiæ honoris causa,

Ante Chr.

195.

U. C. 557.

caussa, ipsius patrisque, advexerant Siculi Romam. Flaminius gratiam ejus communicaverat cum collega. Ludi Romani & apparati magnificè sunt, & ter toti instaurati. *Ædiles plebis*, Cn. Domitius *Ænobarbus* & Cn. Scribonius curio maximus, multos pecuarios ad populi judicium adduxerunt. tres ex his condemnati sunt. ex eorum mulctaticia pecunia ædem in insula Fauni fecerunt. Ludi plebis per biduum instaurati, & epulum fuit ludorum causa.

XLIII. L. Valerius Flaccus & M. Porcius, quo die magistratum inierunt, de provinciis quum ad senatum retulissent, Patres censuerunt, *Quum in Hispania tantum glisceret bellum, ut jam consulari & duce & exercitu opus esset, placere, consules Hispaniam citeriorem & Italiam provincias aut comparare inter se, aut sortiri. Utri Hispania provincia evenisset, eum duas legiones & quinque millia socium Latini nominis & quingentos equites secum portare, & naves longas viginti ducere. Alter consul duas legiones scriberet. His Galliam provinciam obtineri satis esse, fractis proximo anno Insubrium & Boiorum animis.* Cato Hispaniam, Valerius Italiam est sortitus. Prætores deinde provincias sortiti, C. Fabricius Luscinus urbanam, C. Atinius Labeo peregrinam, Cn. Manlius Vulso Siciliam, Ap. Claudius Nero Hispaniam ulteriorem, P. Porcius Læca Pisas, ut ab tergo Liguribus esset, P. Manlius in Hispaniam citeriorem adjutor consuli datur. T. Quintio, suspectis non solum Antiocho & Ætolis, sed etiam Nabide Lacedæmoniorum tyranno, prorogatum in annum imperium est, duas legiones ut haberet. in eas si quid supplementi opus esset, consules scribere & mittere in Macedoniam jussi. Ap. Claudio præter legionem, quam Q. Fabius habuerat, duo millia peditum & ducentos equites novos conscribere permisum. Par numerus peditum equitumque novorum

P. Manlio in citeriorem Hispaniam decretus; & legio eadem quæ fuerat sub Minucio prætoræ data. Et P. Porcio Læcæ ad Etruriam circa Pisas duo millia perditum & quingenti equites ex Gallico exercitu decreti. In Sardinia prorogatum imperium Sempronio Longo.

XLIV. Provinciis ita distributis, consules, priusquam ab urbe proficiscerentur, ver sacrum ex pontificum jussu fecere; quod A. Cornelius Mammula prætor voverat, de senatus sententia, populique jussu, Cn. Servilio, C. Flaminio consulibus. annis post uno ac viginti factum est, quàm votum. Per eosdem dies C. Claudius Ap. F. Pulcher, augur in Q. Fabii Maximi locum, qui priore anno mortuus erat, lectus inauguratusque est. Mirantibus jam vulgo hominibus, quod Hispania movisset bellum negligi, literæ à Q. Minucio allatæ sunt, *Se ad Turbam oppidum cum Budaro & Besafide, imperatoribus Hispanis, signis collatis prospere pugnasse. duodecim millia hostium cæsa. Budarem imperatorem captum, ceteros fusos fugatosque.* His literis lectis minùs terroris ab Hispanis erat, unde ingens bellum expectatum fuerat. Omnes curæ post adventum utique decem legatorum in Antiochum regem conversæ. Hi, expositis priùs quæ cum Philippo acta essent, & quibus legibus data pax, non minorem belli molem restare ab Antiocho docuerunt. *Ingenti classe, egregio terrestri exercitu in Europam cum trajecisse. nisi avertisset vana spes, ex vaniore rumore orta, Ægypti invadendæ, mox bello Græciam arsuram fuisse. neque enim ne Ætolos quidem quieturos, cum ingenio inquietam, tum iratam Romanis gentem. Harere & aliud in visceribus Græciæ ingens malum; Nabin nunc Lacedæmoniorum, mox, si liceat, universæ Græciæ futurum tyrannum, avaritia & crudelitate omneis fama celebratos tyrannos æquantem. Cui si Argos velut arcem Pelopon-*

Peloponneso impositam tenere liceat, deportatis in Italiam Romanis exercitibus, nequicquam liberatam à Philippo Græciam fore. pro rege, si nihil aliud, longinquo vicinum tyrannum dominum habituram.

XLV. Hæc quum jam ab gravibus auctoribus, tum qui omnia per se ipsos explorata referrent, audirent majores; quod ad Antiochum attineret, maturanda his, quum rex quacumque de causâ in Syriam concessisset, de tyranno consultatio visa est. Quum diu disceptatum esset, utrùm jam causæ satis videretur, cur decerneretur, an permitterent T. Quintio, quod ad Nabin Lacedæmonium attineret, faceret quæ è republica censeret esse, permiserunt. eam rem esse rati, quæ maturata dilatave non tam magni momenti ad summam rem populi Romani esset. Magis id animadvertendum esse, quid Annibal & Carthaginenses, si cum Antiocho ortum foret bellum, acturi essent. Adversæ Annibali factionis homines principibus Romanis, amicis quisque suis, identidem scribebant, *Nuncios literasque ab Annibale ad Antiochum missas, & ab rege ad eum clam legatos venisse. Ut feras quasdam nunquam mitescere; sic immitem, implacabilem ejus viri animum esse. marcescere otio situque civitatem queri eum, & inertia operis; nec sine armorum sonitu excitari posse.* Hæc probabilia memoria prioris belli, per unum illum non magis gesti, quàm moti, faciebat. Irritaverat etiam recenti factò multorum potentium animos.

XLVI. Judicium ordo Carthagine ea tempestate dominabatur; eo maximè, quòd iidem perpetui iudices erant. Res, fama, vitæque omnium in illorum potestate erat. qui unum ejus ordinis, idem omnes adversos habebat; nec accusator apud iudices insensos deerat. Horum in tam impotenti regno (neque enim civiliter nimis opibus utebantur) prætor factus Anni-

bal, vocare ad se quæstorem. Idem pro nihilo habuit. nam & adversæ factionis erat: & quia ex quæstura in iudices, potentissimum ordinem, referebantur, jam pro futuris mox opibus animos gerebat. Enimvero indignum id ratus Annibal, viatorem ad præhendendum quæstorem misit: subductumque in concionem, non ipsum magis quàm ordinem iudicum, præ quorum superbia atque opibus nec leges quicquam essent nec magistratus, accusavit. & ut secundis auribus accipi orationem animadvertit, & infimorum quoque libertati gravem esse superbiam eorum; legem extemplo promulgavit, pertulitque, Ut in singulos annos iudices legerentur, ne quis biennium continuum iudex esset. Ceterùm, quantum eo facto ad plebem inierat gratiam, tantum magnæ partis principum offendeat animos. Adjecit aliud, quo, bono publico, sibi proprias similitudines irritavit. Vestigalia publica partim negligentia dilabebantur; partim prædæ ac divisui principum quibusdam & magistratibus erant. quin & pecunia, quæ in stipendium Romanis suo quoque anno penderetur, deerat; tributumque grave privatis imminere videbatur.

XLVII. Annibal postquam vestigalia quanta terrestria maritimaque essent, & in quas res erogarentur, animadvertit, & quid eorum ordinarii reipublicæ usus consumerent, quantum peculatus averteret; omnibus residuis pecuniis exactis tributo privatis remisso, satis locupletem rempubl. fore ad vestigal præstandum Romanis pronunciavit in concione, & præstitit promissum. Tum verò isti, quos paverat per aliquot annos publicus peculatus, velut bonis ereptis, non furto eorum manibus extorto, insensu & irati, Romanos in Annibalem, & ipsos cassam odi querentes, instigabant. Itaque diu repug-


repugnante Scipione Africano, quia parum ex populi Romani dignitate esse ducebat, subscribere odiis accusationibusque Annibalis, & factionibus Carthaginensium inferere publicam auctoritatem; nec satis habere bello vicisse Annibalem, nisi velut accusatores calumniam in eum jurarent, ac nomen deferrent: tandem pervicerunt, ut legati Carthaginem mitterentur, qui apud senatum eorum arguerent, Annibalem cum Antiocho rege consilia belli faciendi inire. Legati tres missi, C. Servilius, M. Claudius Marcellus, Q. Terentius Culleo. qui quum venissent, ex consilio inimicorum Annibalis, quærentibus causam adventus, dici jusserunt, venisse ad controversias, quæ cum Masinissa rege Numidarum Carthaginensibus essent, dirimendas. id creditum vulgò. Annibalem unum se peti ab Romanis non fallebat; & ita pacem Carthaginensibus datam esse, ut inexpiabile bellum adversus se unum maneret. Itaque cedere tempori & fortunæ statuit. & præparatis jam omnibus antè ad fugam, observatus eo die in foro, avertendæ suspicionis causa, primis tenebris vestitu forensi ad portam cum duobus comitibus ignaris consilii est egressus.

XLVIII. Quum equi quo in loco jussi erant præsto fuissent, nocte via cita regionem quandam agri Vocani transgressus, postero die manè inter Achollam & Thapsum ad suam turrim pervenit. ibi eum parata instructaque remigio excepit navis. ita Africa Annibal excessit, sæpius patriæ quàm suorum eventus miseratus. Eo die in Cercinam insulam trajecit. ubi quum in portu naves aliquot onerarias cum mercibus invenisset, & ad egressum eum è nave concursus salutantium esset factus; percunctantibus, legatum se Tyrum dici jussit. veritus tamen, ne qua earum navis, nocte profecta
Thap-

Thapsum aut Achollam, nunciaret, se Cercinæ visum; sacrificio apparari jussu, magistros navium mercatoresque invitari jussit: & vela cum antennis & navibus corrogari, ut umbra (etenim media æstas fortè erat) cœnantibus in littore fieret. Quantum res & tempus patiebatur apparatæ celebratæque ejus diei epulæ sunt: multoque vino in serum noctis convivium productum. Annibal, quum primum fallendi eos, qui in portu erant, tempus habuit, navem solvit. ceteri sopiti quum postero die tandem ex somno pleni crapulæ surrexissent, id quod ferum erat, aliquot horas remis in naves collocandis & aptandis armamentis absumpserunt. Carthaginæ & multitudinis, assuetæ domum Annibalis frequentare, concursus ad vestibulum ædium est factus: & ut non comparere eum vulgatum est, in forum turba convenit, principem civitatis quærentium, & alii fugam conscisse, (id quod erat) alii fraude Romanorum interfectum, idque magis, ferebant: variosque vultus cerneret, ut in civitate aliorum alias partes foventium factionibus. Visum deinde Cercinæ eum, tandem allatum est.

XLIX. Romani legati quum in senatu exposuissent, *Compertum Patribus Romanis esse, & Philip-pum regem, antè ab Annibale maximè accensum, bellum populo Romano fecisse, & nunc literas nunciosque ab eo ad Antiochum regem profectos: baud quieturum antè, quàm bellum toto orbe terrarum conscisset. Ne his debere impune esse, si satisfacere Carthaginenses populo Romano vellent, nihil eorum sua voluntate, nec publico consilio factum esse. Carthaginenses responderunt; quicquid æquum censuissent Romani, facturos esse. Annibal prospero cursu Tyrum pervenit: exceptusque à conditoribus Carthaginis, ut alia pa-*
tria,

tria, vir tam clarus omni genere honorum, paucos moratus dies, Antiochiam navigat. ibi profectum jam regem quum audisset, filium ejus solenne ludorum ad Daphnen celebrantem convenisset: comiter ab eo exceptus, nullam moram navigandi fecit. Ephesi regem est consecutus, fluctuantem adhuc animo, incertumque de Romano bello. sed haud parvum momentum animo ejus ad moliendum adventus Annibalis fecit. Ætolorum quoque eodem tempore alienati ab societate Romana animi sunt: quoniam legatos Pharsalum & Leucadem, & quasdam alias civitates ex primo fœdere petentes, senatus ad Quintium rejecit.



LIBER XXXIV.

E P I T O M E.

I, II, &c.



EX Oppia, quam C. Oppius, tribunus plebis, bello Punico de fingendis cultibus matronarum tulerat, cum maxima contentione abrogata est: quum Porcius Cato auctor fuisset, ne ea lex aboleretur. VIII, IX, &c. Is in Hispaniam profectus bello, quod Emporiis orsus est, citeriorem Hispaniam pacavit. XXII, &c. T. Quintius Flamininus bellum adversus Lacedæmonios & tyrannum eorum Nabidem prospere gestum, data iis pace, qualem ipse voluit, liberatisque Argis, qui sub ditione tyranni erant, finivit. XLIV. Senatus tunc primum secretus à populo ludos spectavit. ut id fieret, Sex. Ælius Pætus & Cornelius Cethegus.

gus censores intervenerunt cum indignatione plebis. XLV. Coloniae pleraque deductae sunt. XLVI. M. Porcius Cato de Hispania triumphavit. XLVI, &c. Res praeterea in Hispania, & adversus Boios & Insubres Gallos, feliciter gestae referuntur. LII. T. Quintius Flamininus, qui Philippum Macedonum regem & Nabidem Lacedaemoniorum tyrannum vicerat, Graeciamque omnem liberaverat, ob hanc rerum gestarum multitudinem triduo triumphavit. LIX. Legati Carthaginensium nunciaverunt, Annibalem, qui ad Antiochum confugerat, bellum cum eo moliri. LX. Tentaverat autem Annibal per Aristonem Tyrium, sine literis Carthaginem missum, ad rebellandum Pœnos concitare.

I.  Nter bellorum magnorum, aut vix-
dum finitorum, aut imminentium,
curas intercessit res parva dictu;
sed quae studiis in magnum certa-
men excesserit. M. Fundanius &
L. Valerius, tribuni plebis, ad plebem tulerunt de
Oppia legē abroganda. Tulerat eam C. Oppius
tribunus plebis, Q. Fabio, Ti. Sempronio consuli-
bus, in medio ardore Punici belli, *Ne qua mulier
plus semuncia auri haberet: neu vestimento versicolori
uteretur: neu juncto vehiculo in urbe oppidove, aut
propius inde mille passus, nisi sacrorum publicorum caussa
veheretur.* M. & P. Junii Bruti tribuni plebis le-
gem Oppiam tuebantur. nec eam se abrogari pas-
suros aiebant. Ad suadendum dissuadendumque multi
nobiles prodibant. Capitolium turba hominum fa-
ventium adversantiumque legi complebatur. Ma-
tronae nulla nec auctoritate, nec verecundia, nec
imperio virorum contineri limine poterant: omnes
vias urbis, aditusque in forum obsidebant, viros
descen-

descendentes ad forum orantes, ut, florente republica, crescente indies privata omnium fortuna, matronis quoque pristinum ornatum reddi paterentur. Augebatur hæc frequentia mulierum indies. nam etiam ex oppidis conciliabulisque convenerant. Jam & consules prætoresque, & alios magistratus adire & rogare audebant. ceterum minimè exorabilem alterum utique consulem M. Porcium Catonem habebant; qui pro lege, quæ abrogabatur, ita differuit.

II. Si in sua quisque nostrum matrefamilie, Quirites, jus & majestatem viri retinere instituisset, minus cum universi feminis negotii haberemus. nunc domi victa libertas nostra impotentia muliebri, hic quoque in foro obteritur & calcatur: & quia singulas sustinere non potuimus, universas horremus. Equidem fabulam & fictam rem ducebam esse, virorum omne genus in aliqua insula conjuratione muliebri ab stirpe sublatum esse. Ab nullo genere non æquè summum periculum est; si cætus, & concilia, & secretas consultationes esse sinas. Atque ego vix statuere apud animum meum possum, utrum pejor ipsa res, an pejore exemplo agatur. Quorum alterum ad nos consules, reliquosque magistratus; alterum ad vos, Quirites, magis pertinet. nam utrum è republica sit, necne, id quod ad vos fertur, vestra existimatio est, qui in suffragium ituri estis. Hæc consternatio muliebris, siue sua sponte, siue auctoribus vobis, M. Fundani & L. Valeri, facta est, haud dubio ad culpam magistratuum pertinens, nescio vobis, tribuni, an consulibus magis sit deformis. vobis, si feminas ad concitandas tribunicias seditiones jam adduxistis: nobis, si ut plebis quondam, sic nunc mulierum secessione leges accipiendæ sunt. Equidem non sine rubore quodam paullo antè per medium agmen mulierum in forum perveni. quòd nisi me verecundia singularum magis majestatis & pudoris, quàm universarum tenuisset,

isset, ne compellatæ à consule viderentur, dixissem: Qui hic mos est in publicum procurrendi & obsidendi vias, & viros alienos appellandi? Istud ipsum suos quæque domi rogare non potuistis? An blandiores in publico quàm in privato, & alienis quàm vestris estis? quanquam ne domi quidem vos, si sui juris finibus matronas contineret pudor, quæ leges hic rogarentur abrogarenturve, curare decuit. Majores nostri, nullam ne privatam quidem rem agere seminas sine auctore voluerunt: in manu esse parentum, fratrum, virorum. nos (si Diis placet) jam etiam rempublicam capeffere eas patimur, & foro quoque, & concionibus, & comitiis immisceri. Quid enim nunc aliud per vias & compita faciunt, quàm quod aliæ rogationes tribunorum plebis suadent, aliæ legem abrogandam censent? Date frenos impotenti naturæ, & indomito animali, & sperate ipsas modum licentiæ facturæ, nisi vos faciatis. Minimum hoc eorum est, quæ iniquo animo feminae sibi aut moribus aut legibus injuncta patiuntur. omnium rerum libertatem, imo licentiam (si vera dicere volumus) desiderant. quid enim, si hoc expugnauerint, non tentabunt?

III. Recensete omnia muliebria jura, quibus licentiam earum alligaverint majores nostri, per quæque subjecerint viris: quibus omnibus constrictas vix tamen continere potestis. Quid si carpere singula & extorquere, & exæquari ad extremum viris patiemi; tolerabiles vobis eas fore creditis? extemplo, simul pares esse cæperint, superiores erunt. At, Hercule, ne quid novum in eas rogetur, recusant. non jus, sed injuriam deprecantur. Imo ut quam accepistis, jussistis suffragiis vestris legem, quam usu tot annorum & experiendo comprobastis, hanc ut abrogetis: id est, ut unam tollendo legem ceteras infirmetis. Nulla lex satis comoda omnibus est: id modò quæritur, si majori parti,

&

Et in summam prodest. si quod cuiquam privatim officiet jus, id destruet ac demolietur; quid attinebit universos rogare leges, quas mox abrogare, in quos latae sunt, possint? Volo tamen audire quid sit, propter quod matronae consternatae procurrant in publicum, ac vix foro se Et concione abstineant. Ut captivi ab Annibale redimantur, parentes, viri, liberi, fratres earum? Procul abest, absitque semper talis fortuna reipublicae. Sed tamen quum fuit, negastis hoc piis precibus earum. At non pietas, nec sollicitudo pro suis, sed religio congregavit eas. Matrem Idæam à Pessinunte ex Phrygia venientem accepturae sunt. Quid honestum dictu saltem seditioni praetenditur muliebri? Ut auro Et purpura fulgeamus, inquit: ut carpentis festis profestisque diebus, velut triumphantes de lege victa Et abrogata, Et captis Et ereptis suffragiis vestris, per urbem vectemur: ne ullus modus sumptibus, nec luxuria sit.

IV. Saepe me querentem de feminarum, saepe de virorum, nec de privatorum modo sed etiam magistratum sumptibus audistis; diversisque duobus vitiis, avaritia Et luxuria, civitatem laborare: quae pestes omnia magna imperia everterunt. Haec ego quo melior laetiorque indies fortuna reipublicae est, imperiumque crescit; Et jam in Graeciam Asiamque transcendimus, omnibus libidinum illecebris repletas, Et regias etiam attractamus gazas: eo plus horreo, ne illae magis res nos ceperint, quam nos illas. Insecta, mihi credite, signa ab Syracusis illata sunt huic urbi. jam nimis multos audio Corinthi Et Athenarum ornamenta laudantes mirantesque, Et antefixa scitilia Deorum Romanorum ridentes. Ego hos malo propitios Deos, Et ita spero futuros, si in suis manere sedibus patiemur. Patrum nostrorum memoria per legatum Cineam Pyrrhus, non virorum modo, sed etiam mulierum animos donis tentavit. nondum lex Oppia ad coercendam luxuriam mulic-

muliebre lata erat: tamen nulla accepit. Quàm causam fuisse censetis? Eadem fuit, quæ majoribus nostris, nihil de hac re lege sancienti. nulla erat luxuria, quæ coerceretur. Sicut antè morbos necesse est cognitos esse, quàm remedia eorum; sic cupiditates prius natæ sunt quàm leges, quæ iis modum facerent. Quid legem Liciniam excitavit de quingentis jugeribus, nisi ingens cupido agros continuandi? Quid legem Cinciam de donis & muneribus, nisi quia vestigalis jam & stipendiaria plebes esse senatui cæperat? Itaque minimè mirum est, nec Oppiam, nec aliam ullam tum legem desideratam esse, quæ modum sumptibus mulierum faceret; quum aurum & purpuram data & oblata ultro non accipiebant. Si nunc cum illis donis Cineas urbem circumiret; stantes in publico invenisset quæ acciperent. Atque ego nonnullarum cupiditatum ne causam quidem aut rationem inire possum. nam ut quod alii liceat, tibi non licere, aliquid fortasse naturalis aut pudoris aut indignationis habeat: sic æquato omnium cultu, quid unaquæque vestrum veretur, ne in se conspiciatur? Pessimus quidem pudor est vel parsimoniam, vel paupertatis: sed utrumque lex vobis demit, quum id quod habere non licet non habetis. Hanc, inquit, ipsam exæquationem non fero, illa locuples. cur non insignis auro & purpura conspicio? cur paupertas aliarum sub hac legis specie latet; ut quod habere non possunt, habituræ, si liceret, fuisse videantur? Vultis hoc certamen uxoribus vestris injicere, Quirites, ut divites id habere velint, quod nulla alia possit; pauperes, ne ob hoc ipsum contemnantur, supra vires se extendant? Næ, simul pudere, quod non oportet, cæperit; quod oportet, non pudebit. quæ de suo poterit, parabit; quæ non poterit, virum rogabit. Miserum illum virum, & qui exoratus & qui non exoratus erit! quum quod ipse non dederit, datum ab alio videbit.

videbit. Nunc vulgò alienos viros rogant, & quod majus est, legem & suffragia rogant; & à quibusdam impetrant, adversus te & rem tuam & liberos tuos inexorabiles. simul lex modum sumptibus uxoris tuæ facere desierit, tu nunquam facies. Nolite eodem loco existimare, Quirites, futuram rem; quo fuit, antequam lex de hoc ferretur. Et hominem improbum non accusari tutius est, quàm absolvi: & luxuria non mota tolerabilior esset, quàm erit nunc; ipsis vinculis, sicut fera bestia, irritata, deinde emissa. Ego nullo modo abrogandam legem Oppiam censeo. vos quod faxitis, Deos omnes fortunare velim.

V. Post hæc tribuni quoque plebei, qui se intercessuros professi erant, quum pauca in eandem sententiam adjecissent; tum L. Valerius pro rogatione ab se promulgata ita disseruit: Si privati tantummodo ad suadendum dissuadendumque id quod à nobis rogatur processissent, ego quoque, quum satis dictum pro utraque parte existimarem, tacitus suffragia vestra expectassem. nunc quum vir gravissimus consul M. Porcius non auctoritate solum, quæ tacita satis momenti habuisset, sed oratione etiam longa & accurata infectatus sit rogationem nostram; necessarium est paucis respondere. qui tamen plura verba in castigandis matronis, quàm in rogatione nostra dissuadenda consumpsit: & quidem ut in dubio poneret, urum id quod reprehenderet, matronæ sua sponte, an nobis auctoribus fecissent. Rem defendam, non nos: in quos jecit magis hæc consul verbo-tenus, quàm ut re insinularet. Cæstum, & seditiones, & interdum secessionem muliebre[m] appellavit, quod matronæ in publico vos rogassent, ut legem in se latam per bellum temporibus duris, in pace & flore ac beata republica abrogaretis. Verba magna, quæ rei augendæ causa conquirantur, & hæc & alia esse scio: & M. Catonem oratorem non solum gravem, sed interdum etiam trucem esse scimus omnes, quum ingenio sit mitis. Nam quid tandem novi matronæ fecerunt,

cerunt, quòd frequentes in causa ad se pertinente in publicum processerunt? Nunquam autè hoc tempus in publico apparuerunt? Tuas adversus te Origines revolvam. Accipe quoties id fecerint, & quidem semper bono publico. Jam à principio, regnante Romulo, quum, Capitolio ab Sabinis capto, medio in foro signis collatis dimicaretur; nonne intercurso matronarum inter acies duas prælium sedatum est? Quid? regibus exactis, quum Coriolano Marcio duce legiones Volscorum castra ad quintum lopedem posuissent; nonne id agmen, quo obruta hæc urbs esset, matronæ averterunt? Jam urbe capta à Gallis, aurum, quo redempta urbs est, nempe matronæ consensu omnium in publicum contulerunt. Proximo bello (ne antiqua repetam) nonne & quum pecunia opus fuit, viduarum pecuniæ adjuverunt ærarium? & quum Dii quoque novi ad opem ferendam dubiis rebus arcescerentur, matronæ universæ ad mare profectæ sunt, ad matrem Idæam accipiendam? Dissimiles, inquit, causæ sunt. nec mihi causas æquare propositum est. nihil novi factum, purgare satis est. Ceterum, quòd in rebus ad omnes pariter viros feminasque pertinentibus fecisse eas nemo miratus est, in causa propriè ad ipsas pertinente miramur fecisse? Quid autem fecerunt? superbas me-Dius-Fidius aures habemus, si quum domini servorum non fastidiant preces, nos rogari ab honestis feminis indignamur.

VI. Venio nunc ad id, de quo agitur: in quo duplex consulis oratio fuit. nam & legem ullam omnino abrogari est indignatus, & eam præcipuè legem, quæ luxuriæ muliebris coercendæ causa lata esset. Et illa communis pro legibus visa consularis oratio est, & hæc adversus luxuriam severissimis moribus conveniebat. Itaque periculum est, nisi, quid in utraque re vani sit, docuerimus, ne quis error vobis offundatur. Ego enim, quemadmodum ex his legibus, quæ non in tempus aliquod, sed perpetuæ utilitatis causa in æternum latæ sunt, nullam
abrogari

abrogari debere fateor, nisi quam aut usus coarguit, aut status aliquis reipublicæ inutilem fecit; sic quas tempora aliqua desiderârunt leges, mortales (ut ita dicam) & temporibus ipsis mutabiles esse video. Quæ in pace latæ sunt, plerumque bellum abrogat: quæ in bello, pax: ut in navis administratione alia in secundam, alia in adversam tempestatem usui sunt. Hæc quum ita natura distincta sint, ex utro tandem genere ea lex esse videtur, quam abrogamus? An vetus regia lex, simul cum ipsa urbe nata? An (quod secundum est) à decemviris ad condenda jura creatis in duodecim tabulis scripta? Sine qua quum majores nostri non existimârint matronale decus servari posse, nobis quoque verendum sit, ne cum ea pudorem sanctitatemque feminarum abrogemus? Quis igitur nescit, novam istam legem esse, Q. Fabio, Ti. Sempronio consulibus viginti annis antè latam? sine qua quum per tot annos matronæ optimis moribus vixerint, quod tandem, ne abrogata ea effundantur ad luxuriam, periculum est? Nam si ista lex ideo lata esset, ut finiret libidinem muliebrem; verendum foret, ne abrogata incitaret. cur sit autem lata, ipsum indicabit tempus. Annibal in Italia erat victor ad Cannas: jam Tarentum, jam Arpos, jam Capuam habebat: ad urbem Romam admoturus exercitum videbatur. defecerant socii. non milites in supplementum, non socios navales ad classem tuendam, non pecuniam in ærario habebamus: servi, quibus arma darentur, ita ut pretium pro iis bello perfecto dominis solveretur, emebantur: in eandem diem pecuniæ, frumentum, & cetera, quæ belli usus postulabant, præbenda publicani se conducturos professi erant: servos ad remum, numero ex censu constituto, cum stipendio nostro dabamus: aurum & argentum omne, à senatoribus ejus rei initio orto, in publicum conferebamus: viduæ & pupilli pecunias suas in ærarium deferebant. cautum erat, quo ne plus auri & argenti facti, quo ne plus signati argenti & æris
domi

domi haberemus. Tali tempore in luxuria & ornatu matronæ occupatæ erant, ut ad eam coercendam lex Oppia desiderata sit: quum, quia Cereris sacrificium lugentibus omnibus matronis intermissum erat, senatus finiri luctum triginta diebus iussit. Cui non apparet, inopiam & miseriam civitatis, quia omnium privatorum pecuniæ in usum publicum vertendæ erant, istam legem scripsisse, tamdiu mansuram, quamdiu causâ scribendæ legis mansisset? Nam si quæ tunc temporis causâ aut decrevit senatus, aut populus iussit, in perpetuum servari oportet, cur pecunias reddimus privatis? cur publica præsentî pecunia locamus? cur servi, qui militent, non emuntur? cur privati non damus remiges, sicut dedimus?

VII. Omnes alii ordines, omnes homines mutationem in meliorem statum reipublicæ sentient: ad conjuges tantum nostras pacis & tranquillitatis publicæ fructus non perveniet? Purpura viri utemur, prætextati in magistratibus, in sacerdotiis; liberi nostri prætextis purpura togis utentur: magistratibus in coloniis municipiisque, hic Romæ infimo generi magistris vicorum togæ prætextæ habendæ jus permittemus; nec id ut vivi solum habeant tantum insigne, sed etiam ut cum eo crementur mortui: feminis duntaxat purpuræ usum interdicemus? & quum tibi viro liceat purpura in veste stragula uti, matremfamilie tuam purpureum amiculum habere non fines? & equus tuus speciosius instratus erit, quàm uxor vestita? Sed in purpura, quæ teritur, absumitur, injustam quidem, sed aliquam tamen causam tenacitatis video: in auro verò, in quo præter manus pretium nihil intertrimenti fit, quæ malignitas est? præsidium potius in eo est & ad publicos & ad privatos usus, sicuti experti esis. Nullam æmulationem inter se singularum, quando nulla haberet, esse aiebat. At, Hercule, universis dolor & indignatio est, quum sociorum Latini nominis uxoribus vident ea concessa ornamenta, quæ sibi adempta sint: quum

quum insignes eas esse auro & purpura, quum illas ve-
bi per urbem, se pedibus sequi; tanquam in illarum civi-
tatibus, non in sua, imperium sit. Virorum hoc ani-
mos vulnerare posset: quid muliercularum censetis, quas
etiam parva movent? Non magistratus, nec sacerdotia,
nec triumphi, nec insignia, nec dona aut spolia bellica
his contingere possunt. Mundiciæ, & ornatus, & cultus,
hæc feminarum insignia sunt: his gaudent & gloriantur,
hunc mundum muliebrem appellârunt majores nostri.
Quid aliud in luctu, quàm purpuram atque aurum, de-
ponunt? quid, quum eluxerunt, sumunt? quid in gra-
tulationibus supplicationibusque, nisi excellentiorem orna-
tum adjiciunt? Scilicet si legem Oppiam abrogaveritis,
non vestri arbitrii erit, si quid ejus vetare volueritis,
quod nunc lex vetat. minus filiæ, uxores, sorores etiam
quibusdam in manu erunt. Nunquam salvis suis ex-
uitur servitus muliebris. & ipsæ libertatem, quam vi-
duitas & orbitas facit, detestantur. In vestro arbi-
trio suum ornatum, quàm in legis, malunt esse. & vos
in manu & tutela, non in servitio, debetis habere eas:
& malle patres vos aut viros, quàm dominos dici. In-
vidiosis nominibus utebatur modo consul, seditionem mu-
liebrem & secessionem appellando. Id enim periculum
est, ne Sacrum montem, sicut quondam irata plebs, aut
Aventinum capiant. Patiendum huic infirmitati est,
quodcumque vos censueritis. quo plus potestis, eo mode-
ratiùs imperio uti debetis.

VIII. Hæc quum contra legem proque lege dicta
essent, aliquanto major frequentia mulierum postero
die sese in publicum effudit, unoque agmine om-
nes tribunorum januas obsederunt, qui collegarum
rogationi intercedebant: nec antè abstiterunt, quàm
remissa intercessio ab tribunis esset. Nulla deinde
dubitatio fuit, quin omnes tribus legem abroga-
rent. anno vigesimo post abrogata est, quàm lata.

M.

M. Porcius consul, posteaquam abrogata est Oppia lex, extemplo viginti quinque navibus longis, quarum quinque sociorum erant, ad Lunæ portum profectus, eodem exercitu convenire jussu, & edicto per oram maritimam misso navibus omnis generis contractis, ab Luna proficiscens edixit, ut ad portum Pyrenæi sequerentur, inde frequenti classe ad hostes iturum. Prætervecti Ligustinos montes, sinumque Gallicum, ad diem quam edixerat, convenerunt. inde Rhodam ventum: & præsidium Hispanorum, quod in castello erat, vi dejectum. Ab Rhoda secundo vento Emporias perventum. ibi copię omnes, præter socios navales, in terram expositę.

IX. Jam tunc Emporię duo oppida erant muro divisa. Unum Gręci habebant, à Phocęa, unde & Massilienses oriundi; alterum Hispani. sed Gręcum oppidum, in mare expositum, totum orbem muri minus quadringentos passus patentem habebat: Hispanis retractior à mari trium millium passuum in circuitu murus erat. Tertium genus Romani coloni ab Divo Cæsare post devictos Pompeii liberos adjecti. nunc in corpus unum confusi omnes; Hispanis prius, postremò & Gręcis in civitatem Romanam adscitis. Miraretur, qui tum cerneret aperto mari ab altera parte, ab altera Hispanis, tam ferę & bellicosę genti, objectos, quę res eos tutaretur. disciplina erat custos infirmitatis, quam inter validiores optimè timor continet. Partem muri versam in agros egregiè munitam habebant, una tantum in eam regionem porta imposita: cujus assiduus custos semper aliquis ex magistratibus erat. nocte pars tertia civium in muris excubabant: neque moris tantum aut legis causa, sed quanta, si hostis ad portas esset, servabant vigilias & circumibant cura. Hispanum neminem in urbem

urbem recipiebant. ne ipsi quidem temere urbe excedebant. ad mare patebat omnibus exitus. porta ad Hispanorum oppidum versa nunquam nisi frequentes, pars tertia fere, cujus proxima nocte vigiliæ in muris fuerant, egrediebantur. Causa exundi hæc erat. commercio eorum Hispani imprudentes maris gaudebant: mercarique & ipsi ea, quæ externa navibus inveherentur, & agrorum exigere fructus, volebant. hujus mutui usus desiderium, ut Hispana urbs Græcis pateret, faciebat. Erant etiam eo tutiores, quòd sub umbra Romanæ amicitiae latebant. quam sicut minoribus viribus, quàm Massilienses, pari colebant fide. tunc quoque consulem exercitumque comiter ac benignè acceperunt. Paucos ibi moratus dies Cato, dum exploraret ubi & quantæ hostium copiae essent; ut ne mora quidem segnis esset, omne id tempus exercendis militibus consumpsit. Id erat fortè tempus anni, ut frumentum in areis haberent. itaque redemptoribus vetitis frumentum parare, ac Romam dimissis, Bellum, inquit, se ipsum alet. Profectus ab Emporiis agros hostium urit vastatque. omnia fuga & terrore complet.

X. Eodem tempore M. Helvio decedenti ex ulteriore Hispania cum præsidio sex millium, dato ab Ap. Claudio prætore, Celtiberi agmine ingenti ad oppidum Illiturgi occurrunt. Viginti millia armatorum fuisse Valerius scribit; duodecim millia ex iis cæsa; oppidum Illiturgi receptum, & puberes omnes interfectos. Inde ad castra Catonis Helvius pervenit. & quia tuta jam ab hostibus regio erat, præsidio in ulteriorem Hispaniam remisso, Romam est profectus: & ob rem feliciter gestam ovans urbem est ingressus. Argenti infecti tulit in ærarium quatuordecim millia pondo septingenta

triginta duo: & signati bigatorum septemdecim millia viginti tria, & Oscensis argenti centum viginti millia quadringenta triginta octo. Causa triumphum negandi senatui fuit, quod alieno auspicio, & in aliena provincia pugnasset. Ceterum biennio post redierat, quum, provincia successori Q. Minucio tradita, annum insequentem retentus ibi longo & gravi morbo fuisset. itaque duobus modò mensibus antè Helvius ovans urbem est ingressus, quàm successor ejus Q. Minucius triumpharet. Hic quoque tulit argenti pondo triginta quatuor millia octingenta: bigatorum septuaginta octo millia, & Oscensis argenti ducenta septuaginta octo millia.

XI. In Hispania interim consul haud procul Emporiis castra habebat. Eò legati tres ab Ilergetum regulo Bilistage, in quibus unus filius erat, venerunt, querentes, castella sua oppugnari; nec spem ullam esse resistendi, nisi praesidium Romani misissent. Quina millia militum satis esse: nec hostes, si tanta manus venisset, mansuros. Ad ea consul, *Moveri quidem vel periculo eorum vel metu dicere. Sed sibi nequaquam tantum copiarum esse, ut, quum magna vis hostium haud procul absit, cum qua mox signis collatis dimicandum sibi indies expectet, dividendo exercitum, minuire tutò vires posset.* Legati ubi hæc audierunt, flentes ad genua consulis provolvuntur. Orant, *Ne se in rebus tam trepidis deferat. Quò enim se, repulsos ab Romanis, ituros? nullos se socios, nihil usquam in terris aliud spei habere. Potuisse se extra id periculum esse, si decedere fide, si conjurare cum ceteris voluissent. nullis minis, nullis terribulis se motos, sperantes satis opis & auxilii sibi in Romanis esse. Id si nullum sit, si sibi à consule negetur, Deos hominesque se testes facere, invitos & coactos se, ne eadem quæ Saguntini passi sunt patiantur, defecturos:*

turos: & cum ceteris potius Hispanis, quàm solos perituros esse.

XII. Et illo quidem die sic sine responso dimissi. Consulem nocte, quæ infecuta est, anceps cura agitare: nolle deserere socios, nolle minuere exercitum; quod aut moram sibi ad dimicandum, aut in dimicando periculum afferre posset. Stat sententia, non minuire copias, ne quid interim hostes inferant ignominia: fociis spem pro re ostentandam censet. Sæpe vana pro veris, maximè in bello valuisse: & credentem se aliquid auxilii habere, perinde atque haberet, ipsa fiducia & sperando atque audendo servatum. Postero die legatis respondit, *Quamquam vereatur ne suas vires, aliis eas commodando, minuat; tamen illorum se temporis ac periculi, magis quàm sui, rationem habere. Denunciari militum parti tertiæ ex omnibus cohortibus jubet, ut cibum, quem in naves imponant, maturè coquant. Navesque in diem tertium expediri jussit. Duos ex legatis Bilistagi atque Ilergetibus nunciare ea jubet; filium reguli comiter habendo & muneribus apud se retinet. Legati non antè profecti, quàm impositos in naves milites viderunt: id pro haud dubio jam nunciantes, non suos modò, sed etiam hostes fama Romani auxilii adventantis impleverunt.*

XIII. Consul, ubi satis quod in speciem fuit ostentatum est, revocari ex navibus milites jubet. ipse, quum jam id tempus anni appeteret quo geri res possent, castra hiberna mille passuum ab Emporiis posuit. inde per occasiones nunc hac parte, nunc illa, modico præsidio castris relicto, prædatum milites in hostium agros educebat. Nocte ferme proficiscebantur, ut & quàm longissimè è castris procederent & inopinantes opprimerent, & exercebat ea res novos milites, & hostium magna vis

excipiebatur: nec jam egredi extra munimenta ca-
 stellorum audebant. Ubi satis admodum & suorum
 & hostium animos est expertus, convocari tribunos
 præfectosque & equites omnes & centuriones jussit.
*Tempus, inquit, quod sæpe optâstis, venit: quo vobis
 potestas fieret virtutem vestram ostendendi. Adbuc præ-
 donum magis quàm bellantium militâstis more: nunc
 iusta pugna hostes cum hostibus conferetis manus. non
 agros inde populari, sed urbium opes haurire licebit.
 Patres nostri, quum Hispania Carthaginensium & im-
 peratores ibi & exercitus essent, ipsi nullum imperato-
 rem, nullos in ea milites haberent; tamen addere hoc
 in fœdere voluerunt, Ut imperiî sui Iberus fluvius esset
 finis. Nunc, quum duo prætores, quum consul, quum
 tres exercitus Romani Hispaniam obtineant, Carthagi-
 nensium jam propè decem annis nemo in his provinciis
 sit; imperium nobis citra Iberum amissum est. Hoc ar-
 mis & virtute recuperetis oportet: & rationem rebel-
 lantem magis temere, quàm constanter bellantem, jugum
 quo se exuit, accipere rursus cogatis. In hunc mo-
 dum maximè adhortatus, pronunciat, se nocte ad
 castra hostium ducturum. ita ad corpora curanda
 dimissi.*

XIV. Media nocte, quum auspicio operam de-
 disset, profectus, ut locum quem vellet, priusquam
 hostes sentirent, caperet; præter castra hostium cir-
 cumducit, & prima luce acie instructa sub ipsum
 vallum tres cohortes mittit. Mirantes barbari à
 tergo apparuisse Romanum, discurrere ipsi ad arma.
 interim consul apud suos, *Nusquam, nisi in virtute
 spes est, milites, inquit, & ego sedulo ne esset, feci.
 inter castra nostra & nos medii hostes. ab tergo ho-
 stium ager est. quod pulcherrimum, idem tutissimum est,
 in virtute spem positam habere.* Sub hæc cohortes
 recipi jubet, ut barbaros simulatione fugæ eliceret.

Id

Id quod crediderat, evenit. pertimuisse & cedere rati Romanos, porta erumpunt: & quantum inter castra sua & hostium aciem relictum erat loci armatis complent. Dum trepidant acie instruenda, consul, jam paratis ordinatisque omnibus, incompósitos aggreditur. equites primos ab utroque cornu in pugnam educit. sed in dextro extemplo pulsī, cedentesque trepidi, etiam pediti terrorem intulere. Quod ubi vidit consul, duas cohortes delectas ab dextro latere hostium circumduci jubet; & ab tergo se ostendere, priusquam concurrerent peditum acies. is terror objectus hosti rem metu Romanorum equitum inclinatam æquavit. tamen adeo turbati erant dextræ alæ equites peditesque, ut quosdam consul manu ipse reprehenderit, & adversos in hostem verterit. ita & quamdiu missilibus pugnatum est, anceps pugna erat: & jam à dextra parte, unde terror & fuga cœperat, ægre Romanus restabat. A sinistro cornu & ab fronte urgebantur barbari: & cohortes ab tergo instantes pavidi respiciebant. Ut emissis soliferreis falaricisque gladios strinxerunt, tum velut redintegrata est pugna. non cæcis ictibus procul ex improvīso vulnerabantur: sed, pede collato, tota in virtute ac viribus spes erat.

XV. Fessos jam suos consul ex secunda acie, subsidiariis cohortibus in pugnam inductis, accendit. nova acies facta. integri, recentibus telis fatigatos adorti hostes, primū acri impetu velut cuneo perculerunt; deinde dissipatos in fugam averterunt: effusoque per agros cursu castra repetebantur. Ubi omnia fuga completa vidit Cato; ipse ad secundam legionem, quæ in subsidio posita erat, equo revehitur: & signa præ se ferri, plenoque gradu ad castra hostium oppugnanda succedere jubet. si quis extra ordinem avidiūs procurrit, &

ipse interequitans sparo percutit, & tribunos centurionesque castigare jubet. Jam castra hostium oppugnabantur: saxisque & sudibus & omni genere telorum summovebantur à vallo Romani. ubi recens admota legio est; tum & oppugnantibus animus crevit, & infensius hostes pro vallo pugnabant. Consul omnia oculis perlustrat, ut, qua minima vi resistitur, ea parte irrumpat. ad sinistram portam infrequentes videt: eò secundæ legionis principes hastatosque inducit. Non sustinuit impetum eorum statio, quæ portæ opposita erat. & ceteri, posteaquam intra vallum hostes vident, ipsis castris exuti, signa armaque abjiciunt. cæduntur in portis suomet ipsi agmine in arcto hærentes: secundani terga hostium cædunt, ceteri castra diripiunt. Valerius Antias supra quadraginta millia hostium cæsa eo die scribit. Cato ipse, haud sanè detrectator laudum suarum, multos cæsos ait; numerum non adscribit.

XVI. Tria eo die laudabilia fecisse putatur. unum, quò circumducto exercitu, procul navibus suis castrisque, ubi spem nisi in virtute haberent, inter medios hosteis prælium commisit: alterum, quò cohortes ab tergo hostibus objecit: tertium, quò secundam legionem, ceteris omnibus effusis ad sequendos hosteis, pleno gradu sub signis compositam instructamque subire ad portam castrorum jussit. Nihil deinde à victoria cessatum: quum, receptui signo dato, suos spoliis onustos in castra reduxisset, paucis horis noctis ad quietem datis, ad prædandum in agros duxit. Effusius, ut sparsis hostibus fuga, prædati sunt. quæ res non minùs, quàm pugna pridie adversa, Emporitanos Hispanos accolæque eorum in deditionem compulit. multi & aliarum civitatum, qui Emporias perfugerant, dederunt se.

quos

quos omnes, appellatos benignè, vinoque & cibo curatos, domos dimisit. Confestim inde castra movit. & quacumque incedebat agmen, legati deditum civitates suas occurrebant. & quum Tarracōnem venit, jam omnis cis Iberum Hispania perdomita erat, captivique & Romani & sociū ac Latini nominis, variis casibus in Hispania oppressi, donum consuli à barbaris reducebantur. Fama deinde vulgatur, consulem in Turdetaniam exercitum ducturum. & ad devios montanos profecturum etiam falsò perlatum est. Ad hunc vanum & sine auctore ullo rumorem Bergistanorum civitatis septem castella defecerunt. eos deducto exercitu consul sine memorando proelio in potestatem redegit. Haud ita multo post iidem, regresso Tarracōnem consule, priusquam inde quoquam procederet, defecerunt. Iterum subacti: sed non eadem venia victis fuit. sub corona venire omnes, ne sæpius pacem sollicitarent.

XVII. Interim P. Manlius prætor, exercitu veterè à Q. Minucio, cui successerat, accepto, adjuncto & Ap. Claudii Neronis ex ulteriore Hispania veterè item exercitu, in Turdetaniam proficiscitur. Omnium Hispanorum maximè imbelles habentur Turdetani. freti tamen multitudine sua obviam ierunt agmini Romano. Eques immissus turbavit exemplo aciem eorum. pedestre proelium nullius ferme certaminis fuit. milites veteres, periti hostium bellicque, haud dubiam pugnam fecerunt. Nec tamen ea pugna debellatum est. decem millia Celtiberū mercede Turduli conducunt, alienisque armis parabant bellum. Consul interim rebellionē Bergistanorum ictus, ceteras quoque civitates ratus per occasionem idem facturās, arma omnibus cis Iberum Hispanis ademit. quam rem adeo ægre passi,

ut multi mortem sibi met ipsis consciscerent: ferox genus nullam vitam rati sine armis esse. Quod ubi consuli renunciatum est, senatores omnium civitatum ad se vocari iussit, atque iis, *Non nostra, inquit, magis, quàm vestra refert, vos non rebellare. siquidem id majore Hispanorum malo, quàm exercitus Romani labore, semper adhuc factum est. Id ut ne fiat, uno modo arbitror caveri posse, si effectum erit, ne possitis rebellare. Volo id quàm molliissima via consequi. vos quoque in ea re consilio me adjuvate. nulum libentiùs sequar, quàm quod vosmet ipsi attuleritis.* Tacentibus, spatium se ad deliberandum dierum paucorum dare dixit. quum revocati secundo quoque concilio tacuissent: uno die muris omnium dirutis, ad eos, qui nondum parebant, profectus, ut in quamque regionem venerat, omnes, qui circa incolebant, populos in deditionem accepit. Segesticam tantùm, gravem atque opulentam civitatem, vineis & pluteis cepit.

XVIII. Eo majorem habebat difficultatem in subigendis hostibus, quàm qui primi venerant in Hispaniam; quòd ad illos tædio imperii Carthaginensium Hispani deficiebant; huic ex usurpata libertate in servitutem velut asserendi erant: & ita mota omnia accepit, ut alii in armis essent, alii obsidione ad defectionem cogerentur: nec, nisi in tempore subventum foret, ultra sustentaturi fuerint. Sed in consule ea vis animi atque ingenii fuit, ut omnia maxima minimaque per se adiret atque ageret: nec cogitaret modò imperaretque quæ in rem essent, sed pleraque ipse per se transigeret; nec in quemquam omnium gravius severiusque, quàm in semet ipsum imperium exerceret; parsimonia & vigiliis & labore cum ultimis militum certaret; nec quicquam in exercitu suo præcipui, præter honorem atque imperium, haberet.

XIX. Difficilius bellum in Turdetania prætori P. Manlio Celtiberi, mercede exciti ab hostibus, sicut antè dictum est, faciebant. itaque eò consul, arcessitus litteris prætoris, legiones duxit. Ubi eò venit, (castra separatim Celtiberi, & Turdetani habebant) cum Turdetanis extemplo levia prælia, incursantes in stationes eorum, Romani facere: semperque victores ex quamvis temere cæpto certamine abire. Ad Celtiberos in colloquium tribunos militum ire consul, atque iis trium conditionum electionem ferre jubet. primam, si transire ad Romanos velint, & duplex stipendium accipere, quàm quantum à Turdetanis pepigissent: alteram, si domos abire, publica fide accepta, nihil eam rem noxæ futuram, quòd hostibus se Romanorum junxissent: tertiam, si utique bellum placeat, diem locumque constituent, ubi secum armis decernant. A Celtiberis dies ad consultandum petita. concilium immixtis Turdetanis habitum magno cum tumultu: eo minùs decerni quicquam potuit. Quum incertum bellum an pax cum Celtiberis esset; comatus tamen, haud secus quàm in pace, ex agris castellisque hostium Romani portabant: dein sæpe munimenta eorum, velut communi pacto commercio, privatis induciis ingredientibus. Consul ubi hostes ad pugnam elicere nequit, primùm prædatum sub signis aliquot expeditas cohortes in agrum integræ regionis ducit: deinde audito, Seguntia Celtiberum omnes sarcinas impedimentaue relicta, eò pergit ducere ad oppugnandum. Posteaquam nulla moventur re, persoluto stipendio non suis modò, sed etiam prætoris militibus, relictoque omni exercitu in castris prætoris, ipse cum septem cohortibus ad Iberum est regressus.

XX. Ea tam exigua manu oppida aliquot cepit. defecere ad eum Sedetani, Aufetani, Sueffetani. Lacetanos, deviam & silvestrem gentem, cum infita feritas continebat in armis; tum conscientia, dum consul exercitusque Turdulo bello est occupatus, depopulatorum subitis incurfionibus sociorum. Igitur ad oppidum eorum oppugnandum consul ducit non Romanas modò cohortes, sed juventutem etiam meritò infensorum iis sociorum. Oppidum longum in latitudinem haudquaquam tantundem patens habebant. quadringentos inde ferme passus constituit signa. ibi delectarum cohortium stationem relinquens, præcepit eis, ne se ex loco antè moverent, quàm ipse ad eos venisset. ceteras copias ad ulteriorem partem urbis circumducit. Maximum ex omnibus auxiliis numerum Sueffetanæ juventutis habebat. eos ad murum oppugnandum subire jubet. Quorum ubi arma signaque Lacetani cognovere; memores, quàm sæpe in agro eorum impune perfulsissent, quoties ipsos signis collatis fudissent fugassentque: patefacta repente porta, universi in eos erumpunt. Vix clamorem eorum, nedum impetum Sueffetani tulere. quod posteaquam, sicut futurum ratus erat, consul fieri etiam vidit; equo citato subter murum hostium ad cohortes advehitur: atque eas arreptas, effusis omnibus ad sequendos Sueffetanos, quàm silentium ac solitudo erat, in urbem inducit: priusque omnia cepit quàm se reciperent Lacetani. mox ipsos, nihil præter arma habentes, in deditionem accepit.

XXI. Confestim inde victor ad Vergium castrum ducit. receptaculum id maximè prædonum erat: & inde incurfiones in agros pacatos provinciæ ejus fiebant. Transfugit inde ad consulem princeps Vergestanus: & purgare se ac populares cœpit. Non
esse

esse in manu ipsis rempublicam. prædones receptos totum suæ potestatis id castrum fecisse. Consul eum domum redire, conficta aliqua probabili cur abfuisset causa, iussit. Quum se muros subisse cerneret, intentosque prædones ad tuenda mœnia esse; tum uti cum suæ factionis hominibus meminisset arcem occupare. Id, uti præceperat, factum. Repente anceps terror, hinc muros ascendentibus Romanis, illinc arce capta, barbaros circumvasit. Hujus potitus loci consul, eos qui arcem tenuerant, liberos esse cum cognatis, suaque habere iussit: Vergestanos ceteros quæstori ut venderet, imperavit: de prædonibus supplicium sumpsit. Pacata provincia, vectigalia magna instituit ex ferrariis argentariisque, quibus tum institutis locupletior indies provincia fuit. Ob has res gestas in Hispania, supplicationem in triduum Patres decreverunt.

XXII. Eadem æstate alter consul L. Valerius Flaccus in Gallia cum Boiorum manu propter Litaniam silvam signis collatis secundo prælio conflixit. Octo millia Gallorum cæsa traduntur: ceteri omisso bello in vicos suos atque agros dilapsi. Consul reliquum æstatis circa Padum Placentiæ & Cremonæ exercitum habuit, restituitque quæ in iis oppidis bello diruta fuerant. Quum hic status rerum in Italia Hispaniaque esset, T. Quintio in Græcia ita hibernis actis, ut, exceptis Ætolis, quibus nec pro spe victoriæ præmia contigerant, nec diu quies placere poterat, universa Græcia, simul pacis libertatisque perfruens bonis, egregiè statu suo gauderet; nec magis in bello virtutem Romani ducis, quàm in victoria temperantiam iustitiamque & moderationem miraretur: senatusconsultum, quo bellum adversus Nabin Lacedæmonium decretum erat, affertur. Quo lecto Quintius, conventu Corinthum
omnium

omnium sociarum civitatum legationibus in diem certam edicto, ubi frequentes undique principes convenerunt, ita ut ne Ætoli quidem abessent, tali oratione est usus: *Bellum adversus Philippum non magis communi animo consilioque Romani & Græci gesserunt, quàm utrique suas causas belli habuerunt. Nam & Romanorum amicitiam, nunc Carthaginenses hostes eorum juvando, nunc hic sociis nostris oppugnandis violaverat: & in vos talis fuit, ut nobis, etiamsi nostrarum oblivisceremur injuriarum, vestræ injuriæ satis digna causa belli fuerint. Hodierna consultatio tota ex vobis pendet. Refero enim ad vos, utrum Argos, sicut scitis ipsi, ab Nabide occupatos, pati velitis sub ditione ejus esse: an æquum censeatis nobilissimam vetustissimamque civitatem, in media Græcia sitam, repeti in libertatem, & eodem statu, quo ceteras urbes Peloponnesi & Græciæ, esse. Hæc consultatio, ut videtis, tota de re pertinente ad vos est: Romanos nihil contingit, nisi quatenus liberatæ Græciæ unius civitatis servitus non plenam nec integram gloriam esse finit. Ceterum si vos nec cura ejus civitatis, nec exemplum, nec periculum movet, ne serpat latius contagio ejus mali; nos æqui bonique facimus. De hac re vos consulo, staturus eo, quod plures censueritis.*

XXIII. Post orationem Romani imperatoris percenseri aliorum sententiæ coeptæ sunt. Quum legatus Atheniensium, quantum poterat, gratiis agendis Romanorum in Græciam merita extulisset, imploratos auxilium adversus Philippum tulisse opem, non rogatos ultro adversus tyrannum Nabin offerre auxilium, indignatusque esset, hæc tanta merita sermonibus tamen aliquorum carpi, futura calumniantium, quum fateri potius præteritorum gratiam deberent; apparebat inaccessi Ætolos. Igitur Alexander, princeps gentis, invehens primùm in Athenienses, qui, libertatis quondam duces & auctores, assentationis propriæ gratia

tia communem causam proderent: questus deinde, Achæos, Philippi quondam milites, postremum ab inclinata ejus fortuna transfugas, & Corinthum recepisse, & id agere, ut Argos habeant; Ætolos, primos hostes Philippi, semper socios Romanorum, pactos in fœdere suas urbes agrosque fore devicto Philippo, fraudari Echino & Pharsalo: infimulavit fraudis Romanos, Quod, vano titulo libertatis ostentato, Chalcidem & Demetriadem præsidii tenerent: qui Philippo, cunctanti deducere inde præsidia, objicere semper soliti sunt; nunquam, donec Demetrias Chalcisque & Corinthus tenerentur, liberam Græciam fore. Postremò, qui remanendi in Græcia retinendique exercitus Argos & Nabin causam facerent, deportarent legiones in Italiam. Ætolos polliceri, aut conditionibus & voluntate sua Nabin præsidium Argis deducturum, aut vi atque armis coacturos in potestate consentientis Græciæ esse.

XXIV. Hæc vaniloquentia primùm Aristænum prætorem Achæorum excitavit. Ne istuc, inquit, Jupiter Optimus Maximus sinit, Junoque regina, cujus in tutela Argi sunt, ut illa civitas inter tyrannum Lacedæmonium & latrones Ætolos præmium sit posita in eo discrimine, ut miserius à nobis recipiatur, quàm ab illo capta est. Mare interjectum ab istis prædonibus non tuetur nos, T. Quinti. Quid, si in media Peloponneso arcem sibi fecerint, futurum nobis est? Linguam tantum Græcorum habent, sicut speciem hominum. Moribus ritibusque effratorioribus, quàm ulli barbari, immanes belluæ vivunt. Itaque vos rogamus, Romani, ut & ab Nabide Argos recuperetis; & ita res Græciæ constituatis, ut ab latrocinio quoque Ætolorum satis pacata hæc relinquatis. Romanus, cunctis undique increpantibus Ætolos, responsurum se fuisse iis dixit, nisi ita insensos omneis in eos videret, ut sedandi potius quàm irritandi essent. Contentum itaque opinione ea, quæ de Romanis Ætolisque esset,

esset, referre se dixit, quid de Nabidis bello placeret, nisi redderet Achæis Argos. Quum omnes bellum decrēssent; auxilia ut pro viribus suis quæque civitates mitterent, est hortatus. Ad Ætolos legatum etiam misit: magis ut nudaret animos, id quod evenit, quàm spe impetrari posse.

XXV. Tribunis militum, ut exercitum ab Elatia arcefferent, imperavit. Per eosdem dies & Antiochi legatis de societate agentibus respondit, *nihil se absentibus decem legatis sententiæ habere. Romam eundem ad senatum iis esse.* Ipse copias eductas ab Elatia ducere Argos pergit. atque ei circa Cleonas Aristæus prætor cum decem millibus Achæorum, equitibus mille occurrit. & haud procul inde junctis exercitibus posuerunt castra. Postero die in campum Argivorum descenderunt: & quatuor fere millia ab Argis locum castris capiunt. Præfectus præsidio Laconum erat Pythagoras; gener idem tyranni, & uxoris ejus frater: qui sub adventum Romanorum & utrasque arces (nam duas habent Argi) & loca alia, quæ aut opportuna aut suspecta erant, validis præfidiis firmavit. sed inter agenda hæc pavorem injectum adventu Romanorum dissimulare haudquaquam poterat: & ad externum terrorem intestina etiam seditio accessit. Damocles erat Argivus, adolescens majoris animi quàm consilii: qui primò, jurejurando interposito, de præsidio expellendo cum idoneis collocutus, dum vires adjicere conjurationi studet, incautior fidei æstimator fuit. Colloquentem eum cum suis satelles à præfecto missus quum arcefferet, sensit proditum consilium esse: hortatusque conjuratos qui aderant, ut, potius quàm extorti morerentur, arma secum çaperent: atque ita cum paucis in forum ire pergit, clamitans, ut, qui salvam rempublicam vellent, auctorem & ducem se libertatis sequerentur. Haud sanè movit quemquam,
quia

quia nihil usquam spei propinquæ, nedum satis firmi præsidii cernebant. Hæc vociferantem eum Lacedæmonii circumventum cum suis interfecerunt. comprehensi deinde quidam & alii: ex iis occisi plures, pauci in custodiam coniecti. multi proxima nocte funibus per murum demissi ad Romanos transfugerunt.

XXVI. Quintius, affirmantibus iis, si ad portas Romanus exercitus fuisset, non sine effectu futurum eum motum fuisse, & si propius castra admoventur, non quieturos Argivos, misit expeditos pedites equitesque, qui circa Cylarabin (gymnasium id est minus trecentos passus ab urbe) cum erumpentibus à porta Lacedæmoniis prælium commiserunt, atque eos haud magno certamine compulerunt in urbem. & castra eo ipso loco, ubi pugnatum erat, imperator Romanus posuit. Diem inde unum in speculis fuit, si quid novi motus oriretur. posteaquam oppressam metu civitatem vidit, advocat concilium de oppugnandis Argis. Omnium principum Græciæ, præter Aristænum, eadem sententia erat; quum causa belli non alia esset, inde potissimum ordiendum bellum. Quintio id nequaquam placebat, sed Aristænum contra omnium consensum differentem cum haud dubia approbatione audivit. & ipse adjecit, *quum pro Argivis adversus tyrannum bellum susceptum sit, quid minus conveniens esse, quàm omisso hoste Argos oppugnari? Se verò caput belli Lacedæmonem & tyrannum petiturum.* Et dimisso concilio, frumentatum expeditas cohortes misit. Quod maturi erat circa, demessum & convectum est. viride, ne hostes mox haberent, protritum & corruptum. Castra deinde movit; & Parthenio monte superato, præter Tegeam tertio die ad Caryas posuit castra. ibi, priusquam hostium intraret agrum, sociorum auxilia exspectavit. Venerunt Macedones à Philippo mille quingenti, & Thessalorum equites quadringenti.

ti. nec jam auxilia, quorum affatim erat, sed com-
meatus, finitimis urbibus imperati, morabantur Ro-
manum. Navales quoque magnæ copiæ convenie-
bant. Jam ab Leucade L. Quintius cum quadraginta
navibus venerat: jam Rhodiæ decem & octo testæ
naves: jam Eumenes rex circa Cycladas insulas erat
cum decem testis navibus, triginta lembis, mixtisque
aliis minoris formæ navigiis. ipsorum quoque Lace-
dæmoniorum exsules permulti, tyrannorum injuria
pulsi, spe recuperandæ patriæ in castra Romana con-
venerant. Multi autem erant jam per aliquot ætates,
ex quo tyranni tenebant Lacedæmonem, alii ab aliis
pulsi. Princeps erat exsulum Agefipolis, cujus jure
gentis regnum Lacedæmone erat: pulsus infans ab
Lycurgo tyranno post mortem Cleomenis, qui primus
tyrannus Lacedæmone fuit.

XXVII. Quum terra marique tantum belli circum-
staret tyrannum, & propè nulla spes esset vires suas
hostiumque æstimanti, non tamen omisit bellum: sed
& à Creta mille delectos juventutis eorum excivit,
quum mille jam haberet: & tria millia mercenario-
rum militum, decem millia popularium cum castella-
nis agrestibus in armis habuit: & fossa valloque ur-
bem communivit. &, ne quid intestini motus oriretur,
metu & acerbitate pœnarum tenebat animos. Quo-
niam, ut salvum vellent tyrannum, sperare non po-
terat, quum suspectos quosdam civium haberet; educ-
tis in campum omnibus copiis, (Dromon ipsi vocant)
positis armis ad concionem vocari jussit Lacedæmoni-
os, atque eorum concioni satellites armatos circum-
dedit. & pauca præfatus, *Cur sibi omnia timenti caven-
tique ignoscendum in tali tempore foret: & ipsorum refer-
re, si quos suspectos status præsens rerum faceret, probi-
beri potius, ne quid moliri possint, quàm puniri molientes.*
Itaque quosdam se in custodia habiturum, donec ea quæ
inset

instet tempestas prætereat. Hostibus repulsis (à quibus, si modo proditio intestina satis caveatur, minus periculi esse) extemplo eos emissurum. Sub hæc citari nomina octoginta firme principum juventutis iussit; atque eos, ut quisque ad nomen responderat, in custodiam tradidit: nocte insequenti omnes interfecti. Ilotarum quidam (hi sunt jam inde antiquitus castellani agreste genus) transfugere voluisse infimulati, per omnes vicos sub verberibus acti necantur. hoc terrore obstupuerant multitudinis animi ab omni conatu novorum consiliorum. Intra munitiones copias continebat, nec parem se ratus, si dimicare acie vellet: & urbem relinquere tam suspensis & incertis omnium animis metuens.

XXVIII. Quintius satis jam omnibus paratis, profectus ab stativis, die altero ad Sellasiam super Oneunta fluvium pervenit: quo in loco Antigonus, Macedonum rex, cum Cleomene, Lacedæmoniorum tyranno, signis collatis dimicasse dicebatur. inde, quum audisset ascensum difficilis & arctæ viæ esse, brevi per monteis circuitu, præmissis cui munirent viam, lato satis & patenti limite ad Eurotam amnem, sub ipsis propè fluentem mœnibus, pervenit. ubi castra metantes Romanos, Quintiumque ipsum, cum equitibus atque expeditis prægressum, auxiliares tyranni adorti, in terrorem ac tumultum conjecerunt, nihil tale expectantes; quia nemo his obviis toto itinere fuerat, ac veluti pacato agro transferant. Aliquamdiu pedibus equites, equitibus pedites vocantibus, quum in se cuique minimum fiduciæ esset, trepidatum est. tandem signa legionum supervenerunt: & quum primi agminis cohortes inductæ in prælium essent, qui modò terrori fuerant, trepidantes in urbem compulsi sunt. Romani quum tantum à muro recessissent, ut extra ictum teli essent, acie directâ paullisper steterunt. Posteaquam nemo hostium contra exhibat, redierunt

dierunt in castra. Postero die Quintius prope flumen præter urbem sub ipsas Menelaii montis radices ducere copias instructas pergit. primæ legionariæ cohortes ibant: levis armatura & equites agmen cogeant. Nabis intra murum instructos paratosque sub signis habebat mercenarios milites, in quibus omnis fiducia erat, ut ab tergo hostem aggrediretur. posteaquam extremum agmen præteriiit, tum ab oppido, eodem quo pridie eruperant tumultu, pluribus simul locis erumpunt. Ap. Claudius agmen cogeant: qui ad id quod futurum erat, ne inopinatum accideret, præparatis suorum animis, signa extemplo convertit, totumque in hostem agmen circumegit. itaque, velut rectæ acies concurrissent, iustum aliquamdiu proelium fuit. tandem Nabidis milites in fugam inclinârunt. quæ minus infida ac trepida fuisset, ni Achæi locorum prudentes institissent. hi & cædem ingentem ediderunt, & disperfos passim fuga plerosque armis exuerunt. Quintius prope Amyclas posuit castra. inde, quum perpopulatus omnia circumjecta urbi frequentis & amœni agri loca esset, nullo jam hostium porta excedente, movit castra ad flumen Eurotam. inde vallem Taygeto subiectam, agrosque ad mare pertinentes evastat.

XXIX. Eodem fere tempore L. Quintius maritimæ oræ oppida partim voluntate, partim metu aut vi recepit. certior deinde factus, Gythium oppidum omnium maritimarum rerum Lacedæmoniis receptaculum esse, nec procul à mari castra Romana abesse, omnibus id copiis aggredi constituit. Erat eo tempore valida urbs & multitudine civium incolarumque, & omni bellico apparatu instructa. In tempore Quintio, rem haud facilem aggredienti, rex Eumenes & classis Rhodiorum supervenerunt. ingens multitudo navalium sociorum, è tribus contracta classibus, intra paucos

paucos dies omnia, quæ ad oppugnationem urbis, terra marique munitæ, facienda opera erant, effecit. Jam testudinibus admotis murus subruebatur: jam arietibus quatiebatur. Itaque una crebris ictibus everfa est turris; quodque circa muri erat, casu ejus prostratum. & Romani simul à porta, unde aditus planior erat, ut distenderent ab apertiore loco hostes, simul per patefactum ruina iter irrumpere conabantur. nec multum abfuit, quin, quâ intenderant, penetrarent. sed tardavit impetum eorum spes objecta dedendæ urbis, mox deinde eadem turbata. Dexagoridas & Gorgopas pari imperio præerant urbi. Dexagoridas miserat ad legatum Romanum, traditurus urbem. & quum ad eam rem tempus & ratio convenisset, à Gorgopa proditor interficitur: intentiusque ab uno urbs defendebatur. & difficilior facta oppugnationo erat, ni T. Quintius cum quatuor millibus delectorum militum supervenisset. Is quum supercilio haud procul distantis tumuli ab urbe instructam aciem ostendisset, & ex altera parte L. Quintius ab operibus suis terra marique instaret; tum verò desperatio Gorgopam quoque coëgit id consilii, quod in altero morte vindicaverat, capere. & pactus, ut abducere inde milites, quos præsidii causa habebat, liceret, tradidit Quintio urbem. Priusquam Gythium traderetur, Pythagoras præfectus Argis relictis, tradita custodia urbis Timocrati Pellenensi, cum mille mercenariis militibus & duobus millibus Argivorum Lacedæmonem ad Nabin venit.

XXX. Nabis sicut primo adventu Romanæ classis & traditione oppidorum maritimæ oræ conterritus erat, sic parva spe quum acquievisset, Gythio ab suis retento, posteaquam id quoque traditum Romanis audivit esse, quum ab terra, omnibus circa hostium, nihil spei esset, à mari quoque toto se interclusum, cedendum

cedendum fortunæ ratus, caduceatorem primum in castra misit ad explorandum, si paterentur legatos ad se mitti. qua impetrata re, Pythagoras ad imperatorem venit, nullis cum aliis mandatis, quàm ut tyranno colloqui cum imperatore liceat. Concilio advocato, quum omnes dandum colloquium censuissent; dies locusque constituitur. In mediæ regionis tumulos modicis copiis sequentibus quum venissent, relictis ibi in statione conspecta utrimque cohortibus, Nabis cum delectis custodibus corporis, Quintius cum fratre & Eumene rege, & Sosilao Rhodio, & Aristæno Achæorum prætore, tribunisque militum paucis descendit.

XXXI. Ibi permissio, ut seu dicere prius seu audire mallet, ita cœpit tyrannus. *Si ipse per me, T. Quinti, vosque qui adestis, causam excogitare, cur mihi aut indixissetis bellum, aut inferretis, possem; tacitus eventum fortunæ meæ expectâssem. nunc imperare animo nequivi, quin prius, quàm perirem, cur periturus essem scirem. Et, Hercule, si tales essetis, quales esse Carthaginenses fama est, apud quos nihil societatis fides sancti haberet; in me quoque vobis quid faceretis minus pensi esse, non mirarer. Nunc, quum vos intueor, Romanos esse video, qui rerum divinarum sædera, humanarum fidem socialem sanctissimam habeatis. Quum me ipse respexi, eum esse spero, cui & publicè, sicut ceteris Lacedæmoniis, vobiscum vetustissimum sædus sit: & meo nomine privatim amicitia ac societas nuper Philippi bello renovata. At enim ego eam violavi & everti, quòd Argivorum civitatem teneo. Quo modo hoc tuear? re, an tempore? Res mihi duplicem defensionem præbet. nam & ipsis vocantibus ac tradentibus urbem eam accepi, non occupavi: & accepi, quum Philippi partium, non in vestra societate esset. Tempus autem eo me liberat, quòd quum jam Argos haberem, societas mihi vobiscum convenit: & ut vobis mitterem ad bellum auxilia, non ut Argis præsidium deducerem, pepigistis.*

pepigiſtis. At, Herce, in ea controverſia, quæ de Argis eſt, ſuperior ſum: & æquitate rei, quòd non veſtram urbem, ſed hoſtium; quòd volentem, non vi coactam accēpi: & veſtra confeſſione, quòd in conditionibus ſocietatis mihi Argos reliquiſtis. Ceterum nomen tyranni & facta premunt, quòd ſervos ad libertatem voco, quòd in agros inopem plebem deduco. De nomine hoc reſpondere poſſum: me, qualiſcumque ſum, eundem eſſe, qui fui, quum tu ipſe mecum, T. Quinti, ſocietatem pepigiſti. Tum me regem appellari à vobis memini: nunc tyrannum vocari video. Itaque ſi ego nomen imperii mutàſſem, mihi meæ inconfantia; quum vos mutetis, vobis veſtræ reddenda ratio eſt. Quod ad multitudinem ſervis liberandis auctam, & egentibus diwiſum agrum attinet; poſſum quidem & in hoc me jure temporis tutari. Jam feceram hæc, qualiacumque ſunt, quum ſocietatem mecum pepigiſtis, & auxilia in bello adverſum Philiptum accepiſtis. Sed ſi nunc ea feciſſem, non dico, quid in eo vos læſiſſem, aut veſtram amicitiam violàſſem? ſed illud, me more atque inſtituto majorum feciſſe. Nolite ad veſtras leges atque inſtituta exigere ea, quæ Lacedæmone ſunt. Nihil comparare ſingula neceſſe. vos à cenſu equitem, à cenſu peditem legitis: & paucos excellere opibus, plebem ſubjectam eſſe illis vultis. Noſter legumlator non in paucorum manu rempublicam eſſe voluit, quem vos ſenatum appellatis; nec excellere unum aut alterum ordinem in civitate: ſed per æquationem fortunæ ac dignitatis fore credidit, ut multi eſſent, qui arma pro patria ferrent. Pluribus me peregiſſe, quàm pro patriæ ſermone brevitatſ, fateor. Et breviter peroratum eſſe potuit; Nihil me, poſteaquam vobiſcum amicitiam inſtitui, cur ejus vos pæniteret, commiſiſſe.

XXXII. Ad hæc imperator Romanus: Amicitia & ſocietas nobis nulla tecum, ſed cum Pelope rege Lacedæmoniorum juſto ac legitimo facta eſt. Cujus jus tyranni

ranni quoque, qui postea per vim tenuerunt Lacedæmone imperium, (quia nos bella nunc Punica, nunc Gallica, nunc alia ex aliis occupaverant) usurpârunt; sicut tu quoque hoc Macedonico bello fecisti. Nam quid minus conveniret, quàm nos, qui pro libertate Græciæ adversus Philippum gereremus bellum, cum tyranno instituere amicitiam? Et tyranno quàm, qui unquam, sævissimo Et violentissimo in suos? Nobis verò, etiam si Argos nec cepisses per fraudem nec teneres, liberantibus omnem Græciam, Lacedæmon quoque vindicanda in antiquam libertatem erat, atque in leges suas: quarum modò, tanquam æmulus Lycurgi, mentionem fecisti. An, ut ab Iasso Et Bargiliis præsidia Philippi deducantur, curæ erit nobis: Argos Et Lacedæmonem, duas clarissimas urbes, lumina quondam Græciæ, sub pedibus tuis relinquemus, quæ titulum nobis liberatæ Græciæ servientes deforment? At enim cum Philippo Argivi senserunt. Remittimus hoc tibi, ne nostram vicem irascaris. Satis compertum habemus, duorum, aut summum trium in ea re, non civitatis culpam esse: tam Hercle, quam in te tuoque præsidio arcessendo accipiendoque in arcem, nihil sit publico concilio ædum. Thessalos, Et Phocenses, Et Locrenses consensu omnium scimus partium Philippi fuisse. tamen quum ceteram liberaverimus Græciam, quid tandem censes in Argivis, qui insontes publici consilii sint, facturos? Servorum ad libertatem vocatorum, Et egentibus hominibus agri divisi crimina tibi objici dicebas. non quidem nec ipsa mediocria: sed quid ista sunt præ iis, quæ à te tuisque quotidie alia super alia facinora eduntur? Exhibe liberam concionem vel Argis, vel Lacedæmone, si audire juvat vera dominationis impotentissimæ crimina. Ut omnia alia vetustiora emittam, quam cædem Argis Pythagoras iste gener tuus pene in oculis meis edidit? quam tu ipse, quum jam propè in finibus Lacedæmoniorum essem? Agedum, quos in concione comprehensos, omnibus audientibus

audientibus civibus tuis, in custodia te habiturum esse pronuntiasti; jube victos produci, ut miseri parentes, quos falso lugent, vivere sciant. Enim ut jam ita sint hæc, quid ad vos Romani? Hoc tu dicas liberantibus Græciam? hoc iis, qui, ut liberare possent, mare trajecerunt, terra marique gesserunt bellum? Vos tamen, inquis, vestramque amicitiam ac societatem propriè non violavi. Quoties vis te id arguam fecisse? Sed nolo pluribus: summam rem complectar. Quibus igitur amicitia violatur? Nempe his duabus rebus maximè; si socios meos pro hostibus habeas, si cum hostibus te conjungas. Utrum non à te factum est? nam & Messenen uno atque eodem jure fæderis, quo & Lacedæmonem in amicitiam nostram acceptam, socius ipse sociam nobis urbem vi atque armis cepisti: & cum Philippo hoste nostro non societatem solum, sed, si Diis placet, affinitatem etiam per Philoclem præfectum ejus pepigisti: & bellum adversum nos gerens, mare circa Maleam infestum navibus piraticis fecisti: & plures propè cives Romanos, quàm Philippus, cepisti atque occidisti: tutiorque Macedoniæ ora, quàm promontorium Maleæ, commeatus ad exercitus nostros portantibus navibus fuit. Proinde parcensis fidem ac jura societatis jactare: & omiſſa populari oratione, tanquam tyrannus & hostis loquere.

XXXIII. Sub hæc Aristæus nunc monere Nabin, nunc etiam orare, ut, dum liceret, dum occasio esset, sibi ac fortunis suis consulere. Referre deinde nominatim tyrannos civitatum finitimarum cœpit, qui, deposito imperio, restitutaque libertate suis, non tutam modò, sed etiam honoratam inter cives senectutem egissent. His dictis invicem, auditisque, nox prope diremit colloquium. Postero die Nabis Argis se cedere ac deducere præsidium, quando ita Romanis placeret, & captivos & perfugas redditurum dixit. Aliud si quid postularent,

scriptum

scriptum ut ederent petiit, ut deliberare cum amicis posset. Ita & tyranno ad consultandum tempus datum est: & Quintius, sociorum etiam principibus adhibitis, habuit concilium. Maximæ parti sententia erat, *perseverandum in bello esse, & tollendum tyrannum: nunquam aliter tutam libertatem Græciæ fore. Satius multo fuisse, non moveri bellum adversus eum, quàm omitti motum. & ipsum velut comprobata dominatione firmiorem futurum, auctore injusti imperii assumpto populo Romano, & extemplo multos in aliis civitatibus ad insidiandum libertati civium suorum incitaturum.* Ipsius imperatoris animus ad pacem inclinatioer erat. videbat enim, compulso intra mœnia hoste, nihil præter obsidionem restare; eam autem fore diuturnam. *Non enim Cythium, quod ipsum tamen traditum, non expugnatum esset, sed Lacedæmonem validissimam urbem viris armisque oppugnatueros. Unam spem fuisse, si qua admoventibus exercitum dissensio inter ipsos ac seditio excitari posset. quum signa portis propè inferri cernerent, neminem se movisse. Adjiciebat & cum Antiocho insidam pacem Villium legatum inde redeuntem nunciare. multo majoribus quàm ante terrestribus navalibusque copiis in Europam eum transfisse. Si occupasset obsidio Lacedæmonis exercitum, quibus aliis copiis adversus regem tam validum ac potentem bellum gesturos? Hæc propalam dicebat. illa tacita suberat cura, ne novus consul Græciam provinciam fortiretur, & inchoati belli victoria successor tradenda esset.*

XXXIV. Quum adversus tendendo nihil moveret socios; simulando se transire in eorum sententiam, omnes in assensum consilii sui traduxit. *Bene vertat!* inquit, *obsideamus Lacedæmonem, quando ita placet. Ceterum quum res tam lenta, quàm ipsi scitis oppugnatio urbium sit, & obsidentibus prius sæpe quàm obsessis*

obsessis tædium afferat; jam nunc hoc ita proponere vos animis oportet, hibernandum circa Lacedæmonis mœnia esse. Quæ mora si laborem tantum ac periculum haberet, ut & animis & corporibus ad sustinenda ea parati essetis, hortarer vos. Nunc impensa quoque magna eget in opera, in machinationes & tormenta, quibus tanta urbs oppugnanda est; in commeatus nobis vobisque in hiemem expediendos. Itaque ne aut repente trepidetis, aut rem inchoatam turpiter desituatis, scribendum antè vestris civitatibus censeo, explorandumque, quid quæque animi, quid virium habeat. Auxiliorum satis superque habeo: sed quo plures sumus, pluribus rebus egebimus. Nihil jam præter nudum solum ager hostium habet. Ad hoc hiems accedit, ad comportandum ex longinquo difficilis. Hæc oratio primùm animos omnium ad respicienda cuique domestica mala convertit: segnitiam, invidiam, & obtrectationem domi manentium adversus militantes, libertatem difficilem ad consensum, inopiam publicam, malignitatem conferendi ex privato. Versis itaque subito voluntatibus, facere, quod è republica populi Romani sociorumque esse crederet, imperatori permiserunt.

XXXV. Inde Quintius, adhibitis legatis tantum tribunisque militum, condiciones, in quas cum tyranno pax fieret, has conscripsit. Sex mensum induciæ ut essent Nabidi, Romanisque, & Eumeni regi, & Rhodiis. Legatos extemplo mitterent Romam T. Quintius & Nabis, ut pax ex auctoritate senatus confirmaretur. Ex qua die scriptæ condiciones pacis editæ Nabidi forent, ea dies ut induciarum principium esset: & ut ex ea die intra decimum diem ab Argis ceterisque oppidis, quæ in Argivorum agris essent, præsidia omnia deducerentur: vacuæque & libera traderentur Romanis. ne quod inde mancipium regium publicumve aut privatum educeretur; & si qua antè educa forent, dominis

rectè restituerentur. Naves, quas civitatibus maritimis admisset, redderet: neve ipse novam ullam, præter duos lembos, qui non plus quàm sexdecim remis agerentur, haberet. Perfugas, captivos, omnibus sociis populi Romani civitatibus redderet, & Messeniis omnia quæ comparerent, quæque domini cognoscerent. Exsulibus quoque Lacedæmoniis liberos & conjuges restitueret, quæ earum viros sequi voluissent. invita ne qua exsulis comes esset. Mercenariorum militum Nabidis, qui aut in civitates suas, aut ad Romanos transfuissent, iis res suæ omnes rectè redderentur. In Creta insula ne quam urbem haberet: quas habuisset, redderet Romanis. Ne quam societatem cum ulla Cretensium, aut quoquam alio institueret, neu bellum gereret. Civitatibus omnibus quas ipse restituisset, quæque se suaque in fidem ac ditionem populi Romani tradidissent, omnia præsidia deduceret, seque ipse suosque ab his abstineret. Ne quod oppidum, ne quod castellum in suo alienove agro conderet. Obsides, ea ita futura, daret quinque, quos imperatori Romano placuisset; filium in his suum: & talenta centum argenti in præsentis, & quinquaginta talenta in singulos annos per annos octo.

XXXVI. Hæc conscripta, castris propius urbem motis, Lacedæmonem mittuntur. nec sanè quicquam eorum fatis placebat tyranno, nisi quòd præter spem reducendorum exsulum mentio nulla facta erat. maxime autem omnium ea res offendeat, quòd & naves & maritimæ civitates ademptæ erant. Fuerat autem ei magno fructui mare, omnem oram à Malea prædatoriis navibus infestam habenti. juventutem præterea civitatum earum ad supplementum longè optimi generis militum habebat. Has conditiones, quanquam ipse in secreto volutaverat cum amicis, vulgò tamen omnes fama ferebant; vanis ut ad ceteram fidem, sic ad secreta tegenda satellitum regio-

regionum ingeniis. Non tam omnia universi, quàm ea quæ ad quemque pertinerent, singuli carpebant. qui exfulum conjuges in matrimonio habebant, aut ex bonis eorum aliquid possederant; tanquam amis. furi, non reddituri, indignabantur. servis liberatis à tyranno non irrita modò futura libertas, sed multo fœdior, quàm fuisset antè, servitus, redeuntibus in iratorum dominorum potestatem, ante oculos observabatur. mercenarii milites & pretia militiæ ca-sura in pace ægre ferebant, & reditum sibi nullum esse in civitates videbant, insensas non tyrannis magis, quàm satellitibus eorum.

XXXVII. Hæc inter se primò in circulis ferentes fremere; deinde ad arma subito discurrerunt. Quo tumultu quum per se satis irritatam multitudinem cerneret tyrannus, concionem advocari jussit. ibi quum ea, quæ imperarentur ab Romanis, exposuisset; & graviora atque indigniora quædam falsò affinxisset; & ad singula nunc ab universis, nunc à partibus concionis acclamaretur: interrogavit, *Quid se respondere ad ea, aut quid facere vellent?* Propè una voces omnes, *Nibil respondere, bellum geri* jusserunt. & pro se quisque, qualia multitudo solet, bonum animum habere, & bene sperare jubentes, fortes fortunam adjuvare aiebant. His vocibus incitatus tyrannus, & Antiochum Ætolosque adjutores pronunciat, & sibi ad obsidionem sustinendam copiarum affatim esse. Exciderat pacis mentio ex omnium animis, & in stationes non ultra quieturi discurrent. Paucorum laceffentium excursio, & emissia jacula extemplo Romanis dubitationem, quin bel-landum esset, exemerunt. Levia inde prælia per quatrimum primum sine ullo satis certo eventu commissa. quinto die prope justa pugna adeo paventes in oppidum Lacedæmonii compulsi sunt, ut

quidam milites Romani, terga fugientium cædentes, per intermissa, ut tunc erant, mœnia urbem intrârint.

XXXVIII. Et tunc quidem Quintius, fatis eo terrore coercitis excursionibus hostium, nihil præter ipsius oppugnationem urbis superesse ratus, missis qui omnes navales socios à Gythio arcesserent, ipse interim cum tribunis militum ad visendum urbis situm mœnia circumvehitur. Fuerat quondam sine muro Sparta. tyranni nuper locis patentibus planisque objecerant murum: altiora loca, & difficiliora aditu, stationibus armatorum pro munimento objectis tutabantur. Ubi fatis omnia inspexit; corona oppugnandam ratus, omnibus copiis (erant autem Romanorum sociorumque, simul peditum equitumque, simul terrestriumque ac navalium copiarum ad quinquaginta millia hominum) urbem cinxit. Alii scalas, alii ignem, alii alia, quibus non oppugnarent modò, sed etiam terrerent, portabant. jussi clamore sublato subire undique omnes, ut, quâ primùm occurrerent, quave opem ferrent, ad omnia simul paventes Lacedæmonii ignorarent. Quod roboris in exercitu erat, trifariam divisum. parte una à Phœbeo, altera à Dictynneo, tertia ab eo loco quem Heptagonias appellant (omnia autem hæc aperta sine muro loca sunt) aggredi jubet. Quum tantus undique terror circumvasisset; primò tyrannus, & ad clamores repentinos & ad nuncios trepidos motus, ut quisque maximè laboraret locus, aut ipse occurrebat, aut aliquos mittebat. deinde circumfuso undique pavore ita obtorpuit, ut nec dicere quod in rem issset, nec audire posset: nec inops modò consilii, sed vix mentis compos esset.

XXXIX. Romanos primò sustinebant in angustiis Lacedæmonii: ternæque acies tempore uno locis
diversis

diversis pugnabant. deinde crescente certamine nequaquam erat praelium par. missilibus enim Lacedæmonii pugnabant, à quibus se & magnitudine scuti perfacilè Romanus tuebatur miles, & quòd alii vani, alii leves admodum ictus erant. nam propter angustias loci, confertamque turbam non modò ad emittenda cum procursu, quo plurimùm concitantur tela, spatium habebant; sed ne ut de gradu quidem libero ac stabili conarentur. Itaque ex adverso missa tela nulla in corporibus, rara in scutis hærebant. à circumstantibus ex superioribus locis quidam vulnerati sunt: mox progressos jam etiam ex tectis non tela modò, sed tegulæ quoque inopinantes perculerunt. Sublatis deinde supra capita scutis, continuatissime ita inter se, ut non modò ad cæcos ictus, sed ne ad inferendum quidem ex propinquo telum loci quicquam esset, testudine facta subibant. & primò angustiae paullisper sua hostiumque refertæ turba tenuerunt: posteaquam in patentiorem viam urbis paullatim urgentes hostem processere; non ultra vis eorum atque impetus sustineri poterant. Quum terga vertissent Lacedæmonii, & effusa fuga superiora peterent loca; Nabis quidem, ut capta urbe trepidans, quam ipse evaderet, circumspectabat. Pythagoras cum ad cetera animo officioque ducis fungebatur; tum verò unus, ne caperetur urbs, causa fuit. succendi enim ædificia proxima muro iussit. quæ quum momento temporis arfissent, ut adjuvantibus ignem, qui aliàs ad extinguendum opem ferre solent, ruere in Romanos tectà: nec tegularum modò fragmenta, sed etiam ambusta tigna ad armatos pervenire, & flamma latè fundi, fumus terrorem etiam majorem quàm periculum facere. Itaque & qui extra urbem erant Romanorum, tum maximè impetus facientes recessere

sere à muro : & qui jam intraverant, ne incendio à tergo oriente intercluderentur ab suis, receperunt sese. & Quintius posteaquam quid rei esset, vidit ; receptui canere iussit. ita jam à capta propè urbe revocati, redierunt in castra.

XL. Quintius, plus ex timore hostium quàm ex re ipsa spei nactus, per triduum insequens territavit eos: nunc prœliis laceffendo, nunc operibus intersepiendo quædam, ne exitus ad fugam esset. His comminationibus compulsus tyrannus, Pythagoram rursus oratorem misit. quem Quintius primò aspernatus excedere castris iussit : deinde suppliciter orantem, advolutumque genibus tandem audivit. Prima oratio fuit omnia permittentis arbitrio Romanorum. deinde, quum ea velut vana & sine effectu nihil proficerent, eò deducta res est, ut his conditionibus, quæ ex scripto paucis antè diebus editæ erant, induciæ fierent. pecuniaque & obsides accepti. Dum oppugnatur tyrannus, Argivi, nunciis aliis propè super alios afferentibus, tantùm non jam captam Lacedæmonem esse ; erecti & ipsi, simul eo quòd Pythagoras cum parte validissima præsidii excesserat, contempta paucitate eorum qui in arce erant, duce Archippo quodam præsidium expulerunt. Timocratem Pellenensem, quia clementer præfuerat, vivum fide data emiserunt. Huic lætitiæ Quintius supervenit, pace data tyranno, dimissisque ab Lacedæmone Eumene & Rhodiis & L. Quintio fratre ad classem.

XLI. Læta civitas celeberrimum festorum dierum ac nobile ludicrum Nemeorum, die stata propter belli mala prætermissum, in adventum Romani exercitus ducisque indixerunt, præfeceruntque ludis ipsum imperatorem. Multa erant quæ gaudium cumlarent. reducti cives ab Lacedæmone erant, quos

quos nuper Pythagoras, quosque antè Nabis abduxerant. redierant, qui post compertam à Pythagora conjurationem, & cæde jam cæpto effugerant. libertatem ex longo intervallo, libertatisque auctores Romanos, quibus caussa bellandi cum tyranno ipsi fuissent, cernebant. testata quoque ipso Nemeorum die voce præconis libertas est Argivorum. Achæis quantum restituti Argi in commune Achaïæ concilium lætitiæ afferebant; tantum serva Lacedæmon relicta, & lateri adhærens tyrannus, non sincerum gaudium præbebant. Ætoli verò eam rem omnibus conciliis lacerare. *Cum Philippo non antè defitum bellari, quàm omnibus excederet Græciæ urbibus. Tyranno relictam Lacedæmonem: regem autem legitimum, qui in Romanis fuerat castris, ceterosque nobilissimos cives in exilio victuros. Nabidis dominantis satellitem factum populum Romanum.* Quintius ab Argis Elatium, unde ad bellum Spartanum profectus erat, copias reduxit. Sunt qui non ex oppido proficiscentem bellum gessisse tyrannum tradant, sed castris adversus Romana castra positis: diuque cunctatum, quum Ætolorum auxilia expectasset, coactum ad extremum acie configere, impetu in pabulatores suos ab Romanis facto. eo proelio victum, castrisque exutum pacem petisse: quum cecidissent quindecim millia militum, capta plus quatuor millia essent.

XLII. Eodem fere tempore & à T. Quintio de rebus ad Lacedæmonem gestis, & ab M. Porcio consule ex Hispania literæ allatæ. utriusque nomine ternos in dies supplicatio à senatu decreta est. L. Valerius consul, quum post fusos circa Litanam filvam Boios quietam provinciam habuisset, comitorum caussa Romam rediit: & creavit consules P. Cornelium Scipionem Africanum

Ante Clr. iterum & Ti. Sempronium Longum. Ho-
^{194.}
U.C. 558. rum patres primo anno secundi Punici
belli consules fuerant. Prætoria inde co-
mitia habita. creati P. Cornelius Scipio, & duo
Cn. Corneli, Merenda & Blasio, & Cn. Domitius
Ænobarbus, & Sex Digitius, & T. Juvencius Thalna.
Comitiis perfectis consul in provinciam rediit. No-
vum jus eo anno à Ferentinatibus tentatum; ut
Latini, qui in coloniam Romanam nomina dedis-
sent, cives Romani essent. Puteolos Salernumque
& Buxentum adscripti coloni qui nomina dederant,
quam ob id se pro civibus Romanis ferrent, sena-
tus judicavit, non esse eos cives Romanos.

XLIII. Principio anni, quo P. Scipio Africanus
iterum & Ti. Sempronius Longus consules fuerunt,
legati Nabidis tyranni Romam venerunt duo. His
extra urbem in æde Apollinis senatus datus est.
pax, quæ cum T. Quintio convenisset, ut rata esset
petierunt, impetraveruntque. De provinciis quum
relatum esset, senatus frequens in eam sententiam
ibat: ut, quoniam in Hispania & Macedonia debel-
latum foret, consulibus ambobus Italia provincia
esset. Scipio satis esse Italiæ unum consulem cen-
sebat, alteri decernendam Macedoniam esse. *Bellum
grave ab Antiocho imminere. jam ipsum sua sponte in
Europam transgressum. Quid deinde facturum censerent,
quum hinc Ætoli haud dubiè hostes vocarent ad bel-
lum, illinc Annibal Romanis cladibus insignis imperator
stimularet?* Dum de provinciis consulum discepta-
tur, prætores sortiti sunt. Cn. Domitio urbana
jurisdictio, T. Juvencio peregrina evenit: P. Cor-
nelio Hispania ulterior, Sex. Digitio citerior: duo-
bus Cn. Corneli, Blasio Sicilia, Merendæ Sar-
dinia. In Macedoniam novum exercitum trans-
portari non placuit: eum qui esset ibi, reduci in
Ita-

Italiam à Quintio, ac dimitti. item eum exercitum dimitti, qui cum M. Porcio Catone in Hispania esset. Consulibus ambobus Italiam provinciam esse, & duas urbanas eò legiones scribere, ut, dimissis quos senatus censuisset exercitibus, octo omnino Romanæ legiones essent.

XLIV. Ver sacrum factum erat priore anno, M. Porcio & L. Valerio consulibus. id quum P. Licinius pontifex, non esse rectè factum, collegio primum, deinde ex auctoritate collegii Patribus renunciasset, de integro faciendum arbitrata pontificum censuerunt; ludosque magnos, qui unà voti essent, tanta pecunia, quanta affoleret, faciendos. Ver sacrum videri pecus, quod natum esset inter Kal. Martias & pridie Kalendas Maias, P. Cornelio Scipione & Ti. Sempronio Longo consulibus. Censorum inde comitia habita sunt. creati censores Sex. Ælius Pætus & C. Cornelius Cethegus, principem senatus P. Scipionem consulem, quem & priores censores legerant, legerunt. treis omnino senatores, neminem curuli honore usum, præterierunt. Gratiam quoque ingentem apud eum ordinem pepererunt, quòd ludis Romanis, adilibus curulibus imperârunt, ut loca senatoria secernerent à populo. nam antea in promiscuo spectabant. Equitibus quoque perpaucis adempti equi, nec in ullum ordinem sævitum. Atrium Libertatis & Villa publica ab eisdem resecta amplificataque. Ver sacrum, ludique votivi, quos voverat Ser. Sulpicius Galba consul, facti. Quum spectaculo eorum occupati animi omnium essent, Q. Pleminius, qui propter multa in Deos hominesque scelera Locris admissa in carcerem conjectus fuerat, comparaverat homines, qui pluribus simul locis urbis nocte incendia facerent; ut in consternata nocturno tu-

multu civitate refringi carcer posset. ea res indicio consciorum palam facta delataque ad senatum est. Pleminius in inferiorem demissus carcerem est, necatusque.

XLV. Coloniae civium Romanorum eo anno deductae sunt Puteolos, Vulturum, Liternum, treceni homines in singulas. Item Salernum, Buxentumque coloniae civium Romanorum deductae sunt. deduxere triumviri, Ti. Sempronius Longus, qui tum consul erat, M. Servilius, Q. Minucius Thermus. Ager divisus est, qui Campanorum fuerat. Sipontum item in agrum, qui Arpinorum fuerat, coloniam civium Romanorum alii triumviri, D. Junius Brutus, M. Baebius Tamphilus, M. Helvius deduxerunt. Tempfam item & Crotonem civium Romanorum coloniae deductae. Tempfanus ager de Brutiis captus erat. Bruttii Graecos expulerant. Crotonem Graeci habebant. Triumviri Cn. Octavius, L. Aemilius Paullus, C. Pletorius Crotonem; Tempfam L. Cornelius Merula & C. Salonijs deduxerunt. Prodigia quoque alia visa eo anno Romae sunt, alia nunciata. In foro & comitio & Capitolio sanguinis guttae visae sunt: & terra aliquoties pluit: & caput Vulcani arsit. Nunciatum est, Interamnæ lac fluxisse: pueros ingenuos Arimini sine oculis ac naso; & in Piceno agro non manus, non pedes habentem natum. Ea prodigia ex pontificum decreto procurata, & sacrificium novendiale factum, quod Adriani nunciaverant, in agro suo lapidibus pluiffe.

XLVI. In Gallia L. Valerius Flaccus proconsul circa Mediolanum cum Gallis Insubribus & Boiis, qui Dorulaco duce ad concitandos Insubres Padum transfregi erant, signis collatis depugnavit. decem millia hostium sunt caesa. Per eos dies collega ejus M. Porcius Cato ex Hispania triumphavit. tulit in eo triumpho

pho argenti infecti viginti quinque millia pondo, bigati centum viginti tria millia, Oscensis quingenta quadraginta: auri pondo mille quadringenta. Militibus ex præda divisit in singulos ducenos septuagenos æris, triplex equiti. Ti. Sempronius consul, in provinciam profectus, in Boiorum primùm agrum legiones duxit: Boiorix tum regulus eorum cum duobus fratribus, tota gente concitata ad rebellandum, castra locis idoneis posuit, ut appareret dimicatu-ros, si hostis fines intrâisset. Consul ubi quantæ copiæ, quanta fiducia esset hosti, sensit; nuncium ad collegam mittit, ut, si videretur ei, maturaret venire. se tergiversando in adventum ejus rem extracturum. Quæ causâ consuli cunctandi, eadem Gallis (præterquam quòd cunctatio hostium animos faciebat) rei maturandæ erat, ut, priusquam conjungerentur consulum copiæ, rem transigerent. per biduum tamen nihil aliud, quàm steterunt parati ad pugnandum si quis contra egrederetur: tertio vi subiere ad vallum, castraque ab omni simul parte aggressi sunt. Consul extemplo arma capere milites jussit. armatos inde paullisper continuit, ut & stolidam fiduciam hosti augeret, & disponderet copias, quibus quæque portis erumperent. Duæ legiones duabus principalibus portis signa efferre jussæ. sed in ipso exitu ita conferti obstitere Galli, ut clauderent viam. Diu in angustiis pugnatum est. nec dextris magis gladiisque gerebatur res, quàm scutis corporibusque ipsis obnixa urgebant: Romani, ut signa foras efferrent; Galli, ut aut ipsi in castra penetrarent, aut exire Romanos prohiberent. nec antè in hanc aut illam partem moveri acies potuerunt, quàm Q. Victorius primi pili centurio, & C. Atinius tribunus militum, quartæ hic, ille secundæ legionis, (rem in asperis proeliis sæpe tentatam

tentatam) signa adempta signiferis in hostes jecerunt. dum repetunt enixè signum, priores secundani se porta ejecere.

XLVII. Jam hi extra vallum pugnabant, quarta legione in porta hærente, quum alius tumultus ex averſa parte caſtrorum eſt exortus. in portam quæſtoriam irruperant Galli: reſiſtentesque pertinaciùs occiderant L. Poſtunium quæſtorem, cui Tympano fuit cognomen; & M. Atinium & P. Sempronium præfeſtos ſociùm, & ducentos ferme milites. Capta ab ea parte caſtra erant, donec cohors extraordinaria, miſſa à conſule ad tuendam quæſtoriam portam & eos qui intra vallum erant, partim occidit, partim expulit caſtris, & irrumpentibus obſtitit. Eodem fere tempore & quarta legio cum duabus extraordinariis cohortibus porta erupit. ita ſimul tria prælia circa caſtra locis diſtantibus erant: clamoresque diſſoni ad incertos ſuorum eventus à præſenti certamine animos pugnantium avertabant. Uſque ad meridiem æquis viribus, ac propè pari ſpe pugnatum eſt. labor & æſtus mollia & fluida corpora Gallorum, & minimè patientia ſitis, quum decedere pugna coëgiſſet; in paucos reſtantes impetum Romani fecerunt, fuſosque compulerunt in caſtra. Signum inde receptui à conſule datum eſt. ad quod pars major receperunt ſeſe; pars, certaminis ſtudio & ſpe potiundi caſtris hoſtium, perſiſtit ad vallum. Eorum paucitate contempta, Galli univerſi ex caſtris erumpunt: fuſi inde Romani, quæ imperio conſulis noluerant, ſuo pavore ac terrore caſtra repetunt. ita varia hinc atque illinc nunc victoria, nunc fuga fuit. Gallorum tamen ad undecim millia, Romanorum quinque millia ſunt occiſa.

XLVIII. Galli recepere in intima finium ſeſe. Conſul Placentiam legiones duxit. Scipionem alii,
con-

conjuncto exercitu cum collega, per Boiorum Ligurumque agros populantem isse, quoad progredi silvæ paludesque passæ sint, scribunt: alii, nulla memorabili re gesta, comitiorum causa rediisse Romam. Eodem hoc anno T. Quintius Elatiæ, quò in hiberna reduxerat copias, totum hiemis tempus jure dicundo consumpsit; mutandisque iis, quæ aut ipsius Philippi, aut præfectorum ejus licentia in civitatibus facta erant, quum suæ factionis hominum vires augendo, jus ac libertatem aliorum deprimeret. Veris initio Corinthum, conventu edicto, venit. ibi omnium civitatum legationes, in concionis modum circumfusas, est allocutus; orsus ab inita primum Romanis amicitia cum Græcorum gente, & imperatorum, qui ante se in Macedonia fuissent, suisque rebus gestis. Omnia cum approbatione ingenti sunt audita; præterquam quum ad mentionem Nabidis ventum esset. *Id minimè conveniens liberanti Græciam videbatur, tyrannum reliquisse, non suæ solum patriæ gravem, sed omnibus circa civitatibus metuendum, hærentem visceribus nobilissimæ civitatis.*

XLIX. Nec ignarus hujus habitus animorum Quintius, *Si sine excidio Lacedæmonis fieri potuisset, fatebatur, pacis cum tyranno mentionem admittendam auribus non fuisse: nunc quum aliter quàm ruina gravissima civitatis opprimi non posset, satius visum esse, tyrannum debilitatum, ac totis propè viribus ad nocendum cuiquam ademptis, relinqui, quàm intermori vehementioribus, quàm quæ pati posset, remediis civitatem sinere, in ipsa vindicta libertatis perituram.* Præteritorum commemorationi subjecit, *Proficisci sibi in Italiam, atque omnem exercitum deportare, in animo esse. Demetriadis Chalcidisque præsidia intra decimum diem audituros deducta: Acrocorinthum ipsis extemplo*
viden-

videntibus vacuam Achæis traditurum; ut omnes scirent, utrùm Romanis an Ætolis mentiri mos esset, qui malè commissam libertatem populo Romano sermonibus distulerint, & mutatos pro Macedonibus Romanos dominos. Sed illis nec quid dicerent, nec quid facerent, quicquam unquam pensi fuisse. Reliquas civitates monere, ut ex factis non ex dictis amicos pensent: intelligantque, quibus credendum, & à quibus cavendum sit. Libertate modicè utantur, temperatam eam salubrem & singulis & civitatibus esse: nimiam & aliis gravem, & ipsis qui habeant effrenatam & præcipitem esse. Concordiæ in civitatibus principes & ordines inter se, & in commune omnes civitates consulerent. adversus consentientes nec regem quemquam satis validum, nec tyrannum fore. Discordiam & seditionem omnia opportuna insidiantibus facere: quum pars, quæ domestico certamine inferior sit, externo potius se applicet, quàm civi cedat. Alienis armis partam, externa fide redditam libertatem sua cura custodirent servarentque: ut populus Romanus dignis datam libertatem, ac munus suum bene positum sciret.

L. Has velut parentis voces quum audirent, manare omnibus gaudio lacrimæ, adeo ut ipsum quoque confunderent dicentem. Paullisper fremitus approbantium dicta fuit: monentiumque aliorum alios, ut eas voces velut oraculo missas in pectora animosque dmitterent. Silentio deinde facto petiit ab iis, ut cives Romanos, si qui apud eos in servitute essent, conquisitos intra duos menses mitterent ad se in Thessaliam. *Ne ipsis quidem honestum esse in liberata terra liberatores ejus servire.* Omnes acclamârunt, gratias se inter cetera etiam ob hoc agere, quòd admoniti essent, ut tam pio, tam necessario officio fungerentur. Ingens numerus erat bello Punico captorum, quos Annibal, quum à suis
non

non redimerentur, venundederat. Multitudinis eorum argumentum est, quòd Polybius scribit centum talentis eam rem Achæis stetit: quum quingenos denarios pretium in capita, quod redderetur dominis, statuissent. Mille enim ducentos ea ratione Achaia habuit. Adjice nunc pro portione quot verisimile sit totam Græciam habuisse. Nondum conventus dimissus erat, quum respiciunt præsidium ab Acrocorintho descendens protinus ad portam duci atque abire. Quorum agmen imperator secutus, prosequentibus cunctis, servatorem liberatoremque acclamantibus; salutatis dimissisque eis, eadem qua venerat via Elatiam rediit. inde cum omnibus copiis Ap. Claudium legatum dimittit. per Thessaliam atque Epirum ducere Oricum jubet, atque ibi se opperiri. inde namque in animo esse, exercitum in Italiam trajicere. & L. Quintio fratri legato & præfecto classis scribit, ut onerarias ex omni Græciæ ora eòdem contraheret.

LI. Ipse Chalcidem profectus, deductis non à Chalcide solum, sed etiam ab Oreò atque Eretria præfidiis, conventum ibi Euboicarum civitatum habuit: commonitosque in quo statu rerum accepisset eos, & in quo relinqueret, dimisit. Demetriadem inde proficiscitur: deductoque præsidio, prosequentibus cunctis, sicut Corinthi & Chalcide, pergit ire in Thessaliam: ubi non liberandæ modò civitates erant, sed ex omni colluvione & confusione in aliquam tolerabilem formam redigendæ. Nec enim temporum modò vitiis, ac violentia & licentia regia turbati erant: sed inquieto etiam ingenio gentis; nec comitia, nec conventum, nec concilium ullum, non per seditionem ac tumultum, jam inde à principio ad nostram usque ætatem traducentes. A censu maximè & senatum & iudices legit: potentior-

tentiooremque eam partem civitatum fecit, cui salva tranquillaque omnia magis esse expediebat.

LII. Ita quum percensuisset Thessaliam, per Epirum in Oricum, unde erat trajecturus, venit. Ab Orico copiae omnes Brundisium transportatae. inde per totam Italiam ad urbem prope triumphantes, non minore agmine rerum captarum, quam suo praese se acto venerunt. Posteaquam Romam ventum est, senatus extra urbem Quintio ad res gestas ediferendas datus est: triumphusque meritis ab lubentibus decretus. Triduum triumphavit. Die primo arma, tela, signaque aerea, & marmorea transtulit; plura Philippo adempta, quam quae ex civitatibus ceperat. Secundo die aurum argentumque, factum infectumque & signatum. infecti argenti fuit decem & octo millia pondo, & ducenta septuaginta facti. vasa multa omnis generis, caelata pleraque, quaedam eximiae artis: & ex aere multa fabrefacta. ad hoc clypea argentea decem. signati argenti octoginta quatuor millia fuere Atticorum. tetradrachmum vocant: trium fere denariorum in singulis argenti est pondus. auri pondo fuit tria millia septingenta quatuordecim, & clypeum unum ex auro totum: & Philippei nummi aurei quatuordecim millia, quingenti quatuordecim. Tertio die coronae aureae, dona civitatum, translatae centum quatuordecim. & hostiae ductae: & ante currum multi nobiles captivi, obsidesque, inter quos Demetrius regis Philippi filius fuit, & Armenes Nabidis tyranni filius, Lacedaemonius. Ipse deinde Quintius in urbem est investus. milites secuti currum frequentes; ut omni ex provincia exercitu deportato. His ducenti quinquageni aris in pedites divisi: duplex centurioni, triplex equiti. Praebuerunt speciem triumpho capitibus rasis secuti, qui servitute exempti fuerant.

LIII.

LIII. Exitu hujus anni Q. Ælius Tubero tribunus plebis ex senatusconsulto tulit ad plebem, plebesque scivit, Ut Latinæ duæ coloniæ, una in Bruttios, altera in Thurinum agrum, deducerentur. His deducendis triumviri creati, quibus in triennium imperium esset: in Bruttios Q. Nævius, M. Minucius Rufus, M. Furius Crassipes: in Thurinum agrum Cn. Manlius, Q. Ælius, L. Apustius. ea bina comitia Cn. Domitius prætor urbanus in Capitolio habuit. Ædes eo anno aliquot dedicatæ sunt. Una Junonis Sospitæ in foro olitorio; vota locataque quadriennio ante à C. Cornelio consule Gallico bello. censor idem dedicavit. Altera Fauni. ædiles eam biennio antè ex mulctaticio argento faciendam locarant, C. Scribonius, & Cn. Domitius, qui prætor urbanus eam dedicavit. Et ædem Fortunæ Primigeniæ in colle Quirinali dedicavit Q. Marcius Ralla, duumvir ad id ipsum creatus. voverat eam decem annis antè Punico bello P. Sempronius Sophus: locaverat idem censor. Et in insula Jovis ædem C. Servilius duumvir dedicavit. vota erat sex annis ante Gallico bello ab L. Furio Purpureone prætore; ab eodem postea consule locata.

LIV. Hæc eo anno acta. P. Scipio *Ante Cbr.* ex provincia Gallia ad consules subrogandos rediit. ^{193.} Comitia consulum fuere, quibus creati sunt L. Cornelius Merula & Q. Minucius Thermus. Postero die creati sunt prætores L. Cornelius Scipio, M. Fulvius Nobilior, C. Scribonius, M. Valerius Messala, L. Porcius Licinus, & C. Flaminius. Megalesia, ludos scenicos, C. Attilius Serranus, L. Scribonius Libo ædiles curules primi fecerunt. Horum ædilium ludos Romanos primùm senatus à populo secretus spectavit, præbuitque sermones (sicut omnis novitas solet) aliis *tandem,*

tandem, quod multo antè debuerit, tributum consentibus amplissimo ordini; aliis, demptum ex dignitate populi, quicquid majestati Patrum adjectum esset, interpretantibus: Et omnia discrimina talia, quibus ordines discernentur, Et concordiae Et libertatis aequè minuendae esse. Ad quingentesimum quinquagesimum octavum annum in promiscuo spectatum esse. Quid repente factum, cur immisceri sibi in cavea Patres plebem nollent? cur dives pauperem confessorum fastidiret? novam Et superbam libidinem ab nullius antè gentis senatu neque desideratam neque institutam. Postremò ipsum quoque Africanum, quod consul auctor ejus rei fuisset, poenituisse ferunt. adeo nihil motum ex antiquo probabile est. veteribus, nisi quæ usus evidenter arguit, stari malunt.

LV. Principio anni, quo L. Cornelius, Q. Minucius consules fuerunt, terræmotus ita crebri nunciabantur, ut non rei tantum ipsius, sed feriarum quoque ob id indictarum homines tæderet. nam neque senatus haberi, neque respublica administrari poterat; sacrificando expiandoque occupatis consulibus. Postremò decemviris adire libros jussis, ex responso eorum supplicatio per triduum fuit. coronati ad omnia pulvinaria supplicaverunt. edictumque est, ut omnes qui ex una familia essent pariter supplicarent. item ex auctoritate senatus consules edixerunt, ne quis, quo die terræmotu nunciato feriæ indictæ essent, eo die alium terræmotum nunciaret. Provincias deinde consules prius, tum prætores fortiti. Cornelius Galliam, Minucius Ligures fortiti sunt. C. Scribonius urbanam, M. Valerius peregrinam, L. Cornelius Siciliam, L. Porcius Sardiniam, C. Flaminius Hispaniam citeriorem, M. Fulvius Hispaniam ulteriorem.

LVI. Nihil belli eo anno expectantibus consulibus, literæ M. Cincii (præfectus Pisis erat) allatæ: *Ligurum viginti millia armatorum, conjuratione per omnia concilia-*

*conciliabula universæ gentis facta, Lunensem primum agrum depopulatos, Pisanum deinde finem transgressos, omnem oram maris peragrâsse. Itaque Minucius consul, cui Ligures provincia evenerat, ex auctoritate Patrum in Rostra ascendit: & edixit, ut legiones duæ urbanæ, quæ superiore anno conscriptæ essent, post diem decimum Arretii aessent. in earum locum se duas legiones urbanas scripturum. item sociis & Latini nominis magistratibus, legatisque eorum, qui milites dare debebant, edixit, ut in Capitolio se adirent. Ex iis quindecim millia peditum & quingentos equites pro numero cujusque juniorum descripsit: & inde è Capitolio protinus ire ad portam; & ut maturaretur res, proficisci ad delectum jussit. Fulvio Flaminioque terna millia Romanorum peditum, & centeni equites in supplementum, & quina millia socium Latini nominis, & ducenti equites decreti: mandatumque prætoribus, ut veteres dimitterent milites, quum in provinciam venissent. Quum milites, qui in legionibus urbanis erant, frequentes tribunos plebeios adissent, uti causas cognoscerent eorum, quibus aut emerita stipendia, aut morbus causæ essent, quo minùs militarent; eam rem literæ Ti. Sempronii discusserunt, in quibus scriptum erat, *Ligurum quindecim millia in agrum Placentinum venisse: & cum usque ad ipsa coloniae mœnia & Padi ripas cum cadibus & incendiis perpopulatos esse. Boiorum quoque gentem ad rebellionem spectare.* Ob eas res tumultum esse decrevit senatus, tribunos plebei non placere causas militares cognoscere, quo minùs ad edictum convenirent. Adjecerunt etiam, ut socii nominis Latini, qui in exercitu P. Cornelii, Ti. Sempronii fuissent, & dimissi ab iis consulibus essent; ut ad quam diem L. Cornelius consul edixisset, & in quem locum edixisset Etruriæ, convenirent: & ut L. Cornelius consul, in provinciam proficiscens, in oppidis agrisque, quæ iturus*

rus esset, si quos ei videretur, milites scriberet armaretque, & duceret secum. dimittendique ei, quos eorum, quandoque vellet, jus esset.

LVII. Posteaquam consules delectu habito profecti sunt in provincias, tum T. Quintius postulavit, ut de his, quæ cum decem legatis ipse statuisset, senatus audiret: eaque, si videretur, auctoritate sua confirmaret. Id eos facilius facturos, si legatorum verba, qui ex universa Græcia, & magna parte Asiæ, quique ab regibus venissent, audissent. Hæ legationes à C. Scribonio prætore urbano in senatum introductæ sunt; benignèque omnibus responsum. Cum Antiocho quia longior disceptatio erat, decem legatis, quorum pars in Asia aut Lyfimachiæ apud regem fuerant, delegata est. T. Quintio mandatum, ut, adhibitis iis, legatorum regis verba audiret: responderetque iis, quæ ex dignitate atque utilitate populi Romani responderi possent. Menippus & Hegesianax principes regiæ legationis erant. ex iis Menippus, *Ignorare se, dixit, quidnam perplexi sua legatio haberet, quum simpliciter ad amicitiam petendam jungendamque societatem venissent. Esse autem tria genera fœderum, quibus inter se paciscerentur amicitias civitates regesque. Unum, quum bello victis dicerentur leges. ubi enim omnia ei, qui armis plus posset, dedita essent, quæ ex iis habere victos, quibus mulctari eos velit, ipsius jus atque arbitrium esse. Alterum, quum pares bello æquo fœdere in pacem atque amicitiam venirent. tunc enim repeti reddique per conventionem res: Et si quarum turbata bello possessio sit, eas aut ex formula juris antiqui, aut ex partis utriusque commodo componi. Tertium esse genus, quum, qui hostes nunquam fuerint, ad amicitiam sociali fœdere inter se jungendam cõiant. eos neque dicere, neque accipere leges; id enim victoris Et victi esse. Ex eo genere quum Antiochus esset, mirari se, quòd Romani æquum censeant ei leges dicere;*
quas

quas *Asiæ* urbium liberas & immunes, quas stipendiarias esse velint; quas intrare præsidia regia regemque vetent. cum *Philippo* enim hoste pacem, non cum *Antiocho* amico societatis fœdus ita sancendum esse.

LVIII. Ad ea *Quintius*: Quoniam vobis distinctè agere libet, & genera jungendarum amicitiarum enumerare, ego quoque duas conditiones ponam, extra quas nullam esse regi nuncietis amicitiae cum populo Romano jungendæ. Unam, si nos nihil, quod ad urbes *Asiæ* attinet, curare velit, ut & ipse omni Europa abstineat. Alteram, si se ille *Asiæ* finibus non contineat & in Europam transcendat, ut & Romanis jus sit, *Asiæ* civitatum amicitias & tueri quas habeant, & novas complecti. Enimvero, id auditu etiam dicere indignum esse, *Hegeſianax*, *Thraciæ* & *Cberſoneſi* urbibus arceri *Antiochum*. quæ *Seleucus* proavus ejus, *Lyſimacho* rege bello victo & in acie cæſo, per summum decus parta reliquerit; pari cum laude partim ab *Thracibus* possessa armis receperit *Antiochus*; partim deserta, sicut ipsam *Lyſimachiam*, & revocatis cultoribus frequentaverit; & quæ strata ruinis atque incendiis erant, ingentibus impensis ædificaverit. Quid igitur simile esse, ex ea possessione ita parta, ita recuperata, deduci *Antiochum*, & Romanos abstinere *Asia*, quæ nunquam eorum fuerit? Amicitiam Romanorum expetere *Antiochum*, sed quæ impetrata gloriæ sibi, non pudori sit. Ad hæc *Quintius*: Quandoquidem, inquit, honesta pensamus: sic, ut aut sola aut prima certè pensari decet principi orbis terrarum populo, & tanto regi: utrum tandem videtur honestius, liberas velle omnes quæ ubique sunt *Græciæ* urbes, an servas & vestigales facere? Si sibi *Antiochus* pulchrum esse censet, quas urbes proavus belli jure habuerit, avus paterque nunquam usurpaverint pro suis, eas repetere in servitutem; & populus Romanus susceptum patrociniū libertatis *Græcorum* non deserere, fidei constantiæque suæ ducit esse. Sicut à *Philippo* *Græ-*
ciam

ciam liberavit, ita & ab Antiocho Asiæ urbes, quæ Græci nominis sint, liberare in animo habet. neque enim in Æolidem Ioniæque coloniæ in servitutem regiam missæ sunt: sed stirpis augendæ causâ, gentisque vetustissimæ per orbem terrarum propagandæ.

LIX. Quum hæsitaret Hegesianax, nec inficiari posset, honestiorem causam libertatis quàm servitutis prætexi titulo; *Quin mittimus ambages*, inquit P. Sulpicius, qui maximus natu ex decem legatis erat, *alteram ex duabus conditionibus, quæ modo disertè à Quintio datæ sunt, legite: aut supersedete de amicitia agere. Nos verò*, inquit Menippus, *nec volumus, nec possumus pacisci quicquam, quo regnum Antiochi minuatur.* Postero die Quintius legationes universas Græciæ Asiæque quum in senatum introduxisset, ut scirent quali animo populus Romanus, quali Antiochus erga civitates Græciæ essent; postulata & sua & regis exposuit. *Renunciarent civitatibus suis, populum Romanum, qua virtute quaque fide libertatem eorum à Philippo vindicaverit, eadem ab Antiocho, nisi decedat Europa, vindicaturum.* Tum Menippus deprecari & Quintium & Patres institit, *Ne festinarent decernere, quo decreto turbaturi orbem terrarum essent. Tempus & sibi sumerent, & regi ad cogitandum darent. cogitaturum, quum renunciatæ conditiones essent: & impetraturum aliquid, aut pacis causâ consensurum.* Ita integra dilata res est. legatos mitti ad regem eosdem, qui Lyfimachia apud eum fuerant, placuit, P. Sulpicium, P. Villium, P. Ælium.

LX. Vixdum ii profecti erant, quum à Carthagine legati, bellum haud dubiè parare Antiochum Annibale ministro, attulerunt: injeceruntque curam, ne simul & Punicum bellum excitaretur. Annibal patria profugus pervenerat ad Antiochum, sicut antè dictum est: & erat apud regem in magno honore, nulla alia arte, nisi quòd volutanti diu consilia de Romano bello

nemo

nemo aptior super tali re particeps sermonis esse poterat. Sententia ejus una atque eadem semper erat, ut in Italia bellum gereretur. *Italiam & commeatus & militem præbituram externo hosti. Si nihil ibi moveatur, liceatque populo Romano viribus & copiis Italiæ extra Italiam bellum gerere; neque regem neque gentem ullam parem Romanis esse. Sibi centum tectas naves, decem millia peditum, mille equites deposcebat. Ea se classe primum Africam petiturum. magnopere confidere, & Carthaginenses ad rebellandum ab se compelli posse. Si illi cunctentur, se aliqua parte Italiæ bellum excitaturum Romanis. Regem cum ceteris omnibus transire in Europam debere, & in aliqua parte Græciæ copias continere: neque trajicientem, & (quod in speciem famamque belli satis sit) paratum trajicere.*

LXI. In hanc sententiam quum adduxisset regem, præparandos sibi ad id popularium animos ratus; literas, ne quo casu interceptæ palam facerent conata, scribere non est ausus. Aristonem quendam Tyrium nactus Ephesi, expertusque solertiam levioribus ministeriis; partim donis, partim spe præmiorum oneratum, quibus etiam ipse rex annuerat, Carthaginem cum mandatis mittit. edit nomina eorum, quibus conventis opus esset. instruit etiam secretis notis, per quas haud dubiè agnoscerent sua mandata esse. Hunc Aristonem, Carthagine obversantem, non priùs amici quàm inimici Annibalis, qua de causâ venisset, cognoverunt. Et primò in circulis conviviiisque celebrata sermonibus res est. deinde in senatu quidam, *nihil actum esse, dicere, exsilio Annibalis, si absens quoque novas moliri res, sollicitandoque animos hominum turbare statum civitatis posset. Aristonem quendam Tyrium advenam, instructum mandatis ab Annibale & ab Antiocho rege, venisse: certos homines quotidie cum eo secreta colloquia serere, & in occulto colloqui; quod mox in omnium perniciem*

perniciem erupturum esset. Conclamare omnes, vocari Aristonem debere, & quæri quid venisset: & nisi expromeret, cum legatis Romam mitti. satis pro temeritate unius hominis suppliciorum pensum esse. Privatos suo periculo peccaturos. rempublicam non extra noxam modo, sed etiam extra famam noxæ conservandam esse. Vocatus Aristo purgare sese, & firmissimo propugnaculo uti, quòd nihil literarum ad quemquam attulisset. ceterum nec causam adventus satis expediebat; & in eo maximè hæsitabat, quòd cum Barcinæ solùm factionis hominibus collocutum eum arguebant. Orta deinde altercatio est, aliis pro speculatore comprehendi jam & custodiri jubentibus, aliis negantibus tumultuandi causam esse. mali rem exempli esse, de nihilo hospites corripit. idem Carthaginienfibus & Tyri, & in aliis emporiis, in quæ frequenter commeent, eventurum. Dilata eo die res est. Aristo, Punico ingenio inter Pœnos usus, tabellas conscriptas celeberrimo loco supra sedem quotidianam magistratus prima vespere suspendit. ipse de tertia vigilia navem conscendit & profugit. Postero die, quum Sufetes ad jus dicendum confedisent, conspectæ tabellæ, demptæque & lectæ. Scriptum erat, ARISTONEM PRIVATIM AD NEMINEM, PUBLICÉ AD SENIORES (ita senatum vocabant) MANDATA HABUISSE. Publicato crimine, minus intenta de paucis quæstio erat. mitti tamen legatos Romam, qui rem ad consules & senatum deferrent, placuit: simul qui de injuriis Masinissæ quærentur.

LXII. Masinissa, posteaquam & infames Carthaginenses & inter se ipsos discordes sensit, principes propter colloquia Aristonis senatui, senatum propter indicium ejusdem Aristonis populo suspectum, locum injuriæ esse ratus, agrum maritimum eorum & depulatus est, & quasdam urbes vectigales Carthaginensium

ensium sibi coëgit stipendium pendere. Emporia vocant eam regionem. ora est minoris Syrtis, & agri uberis. Una civitas ejus Leptis: ea singula in dies talenta vectigal Carthaginiensibus dedit. Hanc tum regionem & totam infestam Mafinissa, & ex quadam parte dubiæ possessionis, sui regni an Carthaginiensium esset, effecerat. & quia simul ad purganda crimina, & questum de se Romam eos ituros compërit, qui & illa onerarent suspicionibus, & de jure vectigalium disceptarent, legatos & ipse Romam misit. Auditi de Tyrio advena primùm Carthaginienses curam injecere Patribus, ne cum Antiocho simul & Pœnis bellandum esset. maximè ea suspicio crimen urgebat, quòd quem comprehensum Romam mitti placuisset, nec ipsum nec navem ejus custodissent. De agro deinde cum regis legatis disceptari cœptum. Carthaginienses jure finium causam tutabantur, quòd intra eos terminos esset, quibus P. Scipio victor agrum, qui juris esset Carthaginiensium, sinisset: & confessione regis, qui, quum Aphirem profugum ex regno suo cum parte Numidarum vagantem circa Cyrenas persequeretur, precariò ab se iter per eum ipsum agrum, tanquam haud dabiè Carthaginiensium juris, petisset. Numidæ & de terminatione Scipionis mentiri eos arguebant: & si quis veram originem juris exigere vellet, quem proprium agrum Carthaginiensium in Africa esse? Advenis, quantum secto bovis tergo amplecti loci potuerint, tantum ad urbem commendam precariò datum. quicquid Byrsam sedem suam excesserint, vi atque injuria partum habere. Neque enim de quo agatur, probare eos posse: non modò semper, ex quo cœperint, sed ne diu quidem eos possedisse. Per opportunitates nunc illos nunc reges Numidarum usurpasse jus: semperque penes eum possessionem fuisse, qui plus armis potuisset. Cujus conditionis res fuerit, priusquam hostes Romanis Carthaginienses, socius atque amicus rex Numida-

rum esset, ejus finerent esse: nec se interponerent, quo minus, qui possent, tenerent. Responderi legatis utriusque partis placuit; missuros se in Africam, qui inter populum Carthaginensem & regem in re præsenti disceptarent. Missi P. Scipio Africanus, & C. Cornelius Cethegus, & M. Minucius Rufus; audita inspectaque re, suspensa omnia, neutrò inclinatis sententiis, reliquere. Id utrùm sua sponte fecerint, an quia mandatum ita fuerit, non tam certum est, quàm videtur tempori aptum fuisse, integro certamine eos relinqui. Nam ni ita esset, unus Scipio vel notitia rei vel auctoritate, ita de utrisque meritis, finire nutu disceptationem potuisset.



L I B E R XXXV.

E P I T O M E.

XIV.  UB. Scipio Africanus legatus ad Antiochum Ephesi cum Annibale, qui se Antiocho junxerat, collocutus est: ut, si fieri posset, metum ei, quem ex populo Romano conceperat, eximeret. Inter alia quum quæreret, quem fuisse maximum imperatorem Annibal crederet; respondit: Alexandrum Macedonum regem, quòd parva manu innumera- biles exercitus fudisset; quodque ultimas oras, quas visere supra spem humanam esset, peragrasset. Quæ- renti deinde quem secundum poneret; Pyrrhum, inquit, castra metari primum docuisse. ad hoc ne- minem elegantius loca cèpisse, præsidia disposuisse. Exsequenti, quem tertium diceret, semet ipsum dixit. Ridens Scipio, *Quidnam tu diceres, si me,* inquit, *vi- cisses?*

*eiffes? Tunc verò, inquit, me & ante Alexandrum, & ante Pyrrhum, & ante alios posuiffem. XXI. Inter cetera prodigia, quæ plurima fuiſſe traduntur, bovem, Cn. Domitii conſulis, locutum, Roma cave tibi, refertur. XXIII, XLI. Apparant in Antiochum bellum Romani. XIII, XXV, &c. Nabis Lacedæmoniorum tyrannus incitatus ab Ætolis, qui & Philippum & Antiochum ad inferendum bellum populo Romano ſollicitabant, à populo Romano deſcivit: & bello adverſus Philopœmenem Achæorum prætorem geſto, XXXV. ab Ætolis interfectus eſt. XXXII. Ætoli quoque ab amicitia populi Romani defece-
runt. cum quibus ſocietate junc̃ta, Antiochus Syriæ rex, quum bellum Græciæ intuliſſet, complures urbes occupavit: inter quas Chalcidem & totam Eubœam. XLII, XLIII, &c. Res præterea in Liguribus geſtas, & apparatus belli ab Antiocho continet.*

I.  Rincipio anni, quo hæc geſta ſunt, Sex. Digitius prætor in Hiſpania citeriore cum civitatibus iis, quæ poſt profectionem M. Catonis permultæ rebellaverant, crebra magis quàm digna dictu prælia fecit: & adeò pleraque adverſa, ut vix dimidium militum, quàm quod acceperat, ſucceſſori tradiderit. Nec dubium eſt, quin omnis Hiſpania ſublatura animos fuerit; ni alter prætor P. Cornelius Cn. F. Scipio trans Iberum multa ſecunda prælia feciſſet: quo terrore non minus quinquaginta oppida ad eum defece-
runt. Prætor hæc geſſerat Scipio. Idem proprætor Luſitanos, pervaſtata ulteriori provincia cum ingenti præda domum redeuntes, in ipſo itinere aggreſſus, ab hora tertia diei ad octavam incerto eventu pugnavit,

numero militum impar, superior aliis. nam & acie frequenti armatis adversus longum & impeditum turba pecorum agmen, & recenti milite adversus fessos longo itinere concurrerat. Tertia namque vigilia exierant hostes: huic nocturno itineri tres diurnæ horæ accesserant: nec ulla quiete data, laborem viæ prælium exceperat. itaque principio pugnae vigoris aliquid in corporibus animisque fuit. & turbaverant primò Romanos: deinde æquata paulisper pugna est. in hoc discrimine ludos Jovi, si vi fudisset cecidissetque hostes, prætor vovit. Tandem gradum acrius intulere Romani, cessitque Lusitanus: deinde prorsus terga dedit. quum institissent fugientibus victores, ad duodecim millia hostium sunt cæsa: capti quingenti quadraginta, omnes ferme equites: & signa militaria capta centum triginta quatuor. De exercitu Romano septuaginta & tres emissi. Pugnatum haud procul Ilipa urbe est. Eò victorem opulentum prædæ exercitum P. Cornelius reduxit. ea omnis ante urbem exposita est: potestasque dominis suas res cognoscendi facta. cetera vendenda quæstori data. quod inde resectum est, militi divisum.

II. Nondum ab Roma profectus erat C. Flaminus prætor, quum hæc in Hispania gerebantur. itaque tam adversæ quam secundæ res per ipsum amicosque ejus magnis sermonibus celebrabantur. & tentaverat, quoniam bellum ingens in provincia exarsisset, & exiguas reliquias exercitus ab Sex. Digitio, atque eas ipsas plenas pavoris ac fugæ accepturus esset, ut unam sibi ex urbanis legionibus decernerent: ad quam quum militem ab se ipso scriptum ex senatusconsulto adjecisset, eligeret ex omni numero tria millia & quingentos pedites, & equites trecentos. Ea se legione (nam in Sex. Digitii

Digitii exercitu haud multum spei esse) rem gesturum. Seniores negare, ad rumores à privatis temere in gratiam magistratum confectos, senatusconsulta facienda esse. nisi quod aut prætores ex provinciis scriberent, aut legati renunciarent, nihil ratum haberi debere. Si tumultus in Hispania esset, placere, tumultuarios milites extra Italiam scribi à prætore. Mens ea senatus fuit, ut in Hispania tumultuarii milites legerentur. Valerius Antias & in Siciliam navigasse delectus caussa C. Flaminium scribit: & ex Sicilia Hispaniam petentem, tempestate in Africam delatum, vagos milites de exercitu P. Africani sacramento rogasse: his duarum provinciarum delectibus tertium in Hispania adjecisse.

III. Nec in Italia segnius Ligurum bellum crecebat. Pisas jam quadraginta millibus hominum, affluente quotidie multitudine ad famam belli spemque prædæ, circumsedebant. Minucius consul Arretium die, quem edixerat ad conveniendum militibus, venit. inde quadrato agmine ad Pisas duxit. & quum hostes non plus passuum tribus millibus ab oppido trans fluvium movissent castra, consul urbem, haud dubiè servatam adventu suo, est ingressus. Postero die & ipse trans fluvium ferme mille passus ab hoste posuit castra. inde levibus præliis à populationibus agrum sociorum tutabatur. in aciem exire non audebat; novo milite & ex multis generibus hominum collecto, necdum noto satis inter se, ut fidere alii aliis possent. Ligures multitudine freti & in aciem exhibant, parati de summa rerum decernere: & abundantes militum numero passim multas manus per extrema finium ad prædandum emittebant: & quum coacta vis magna pecorum prædaque esset, paratum erat præfidium, per quod in castella eorum vicosque ageretur.

IV. Quum bellum Ligustinum ad Pisas constitisset, consul alter L. Cornelius Merula per extremos Ligurum fines exercitum in agrum Boiorum induxit: ubi longè alia belli ratio, quàm cum Liguribus erat. Consul in aciem exhibat: hostes pugnam detrectabant: prædatumque, ubi nemo obviam exiret, discurrerant Romani; Boii diripi sua impune, quàm tuendo ea conferere certamen, malebant. Posteaquam omnia ferro ignique satis evastata erant, consul agro hostium excessit, & ad Mutinam agmine incauto, ut inter pacatos, ducebat. Boii, ubi egressum è finibus suis hostem sensere, sequebantur silenti agmine; locum insidiis quærentes. nocte prætergressi castra Romana, saltum, quàm transeundum erat Romanis, infederunt. Id quum parum occultè fecissent, consul, qui multa nocte solitus erat movere castra, ne nox terrorem in tumultuario prælio augeret, lucem expectavit. & quum luce moveret, tamen turmam equitum exploratum misit. Posteaquam relatum est, quantæ copiæ & in quo loco essent, totius agminis sarcinas in medium conjici jussit, & triarios vallum circumjicere: cetero exercitu instructo ad hostem accessit. Idem & Galli fecerunt, posteaquam apertas esse insidias, & recto ac justo prælio, ubi vera virtus vinceret, dimicandum viderunt.

V. Hora secunda ferme concursus est. sinistra sociorum equitum ala, & extraordinarii prima in acie pugnabant. præerant duo consulares legati, M. Marcellus, & Ti. Sempronius prioris anni consul. Novus consul nunc ad prima signa erat; nunc legiones continebat in subsidiis, ne certaminis studio prius concurrerent, quàm datum signum esset. equites earum extra aciem in locum patentem Q. & P. Minucios tribunos militum educere jussit. inde, quum

quum signum dedisset, impetum ex aperto facerent. Hæc agenti nuncius venit à Ti. Sempronio Longo, non sustinere extraordinarios impetum Gallorum, & cæsos permultos esse: *Et qui supersint, partim labore, partim metu remisisse ardorem pugnae. legionem alteram ex duabus, si videretur, summitteret, priusquam ignominia acciperetur.* Secunda legio missa est, & extraordinarii recepti. Tum redintegrata est pugna; quum & recens miles & frequens ordinibus legio successit. sinistra ala ex prælio subducta est: dextra in primam aciem subiit. Sol ingenti ardore torrebatur minimè patientia æstus corpora Gallorum: densis tamen ordinibus nunc alii in alios, nunc in scuta incumbentes, sustinebant impetus Romanorum. Quod ubi animadvertit consul, ad perturbandos ordines eorum C. Livium Salinatorem, qui præerat alariis equitibus, quàm concitatissimos equos immittere jubet: & legionarios equites in subsidiis esse. Hæc procella equestris primò confudit & turbavit, deinde dissipavit aciem Gallorum; non tamen ut terga darent. Obstabant duces, hastilibus cædentes terga trepidantium, & redire in ordines cogentes: sed interequitantes alarii non patiebantur. Consul obtestabatur milites, *Ut paullulum adniterentur: victoriam in manibus esse. dum turbatos Et trepidantes viderent, instarent. si restitui ordines svisissent, integro rursus eos prælio Et dubio dimicatuuros.* Inferre vexillarios iussit signa. omnes connixi tandem avertunt hostem. Postquam terga dabant, & in fugam passim effundebantur; tum ad persequendos eos legionarii equites immissi. Quatuordecim millia Boiorum eo die cæsa sunt: vivi capti mille nonaginta duo; equites septingenti viginti unus, tres duces eorum, signa militaria ducenta duodecim, carpenta sexaginta tria. Nec Romanis incruenta

victoria fuit. supra quinque millia militum ipsorum aut sociorum sunt amissa: centuriones tres & viginti, præfecti sociùm quatuor, & M. Genucius & M. Marcius, tribuni militum secundæ legionis.

VI. Eodem fere tempore duorum consulum literæ allatæ sunt: L. Cornelii de prælio ad Mutinam cum Boiis factò; & Q. Minucii à Pisis, comitia suæ sortis esse. ceterùm adèò suspensa omnia in Liguribus se habere, ut abscedi inde sine pernicie sociorum & damno reipublicæ non possit. Si ita videretur Patribus, mitterent ad collegam, ut is, qui profigatum bellum haberet, ad comitia Romam rediret. si id facere gravaretur, quòd non suæ sortis id negotium esset, se quidem facturum quodcumque senatus censuisset. sed etiam atque etiam viderent, si magis è republica esset interregnum iniri, quàm ab se in eo statu relinqui provinciam. Senatus C. Scribonio negotium dedit, ut duos legatos ex ordine senatorio mitteret ad L. Cornelium consulem, qui literas collegæ ad senatum missas deferrent ad eum; & nunciarent, senatum, ni is ad magistratus subrogandos Romam veniret, potius quàm Q. Minucius à bello integro avocaretur, interregnum iniri passurum. Missi legati renunciârunt, L. Cornelium ad magistratus subrogandos Romam venturum. De literis L. Cornelii, quas scripserat secundum prælium cum Boiis factum, disceptatio in senatu fuit: quia privatim plerisque senatoribus legatus M. Claudius scripserat, *Fortunæ populi Romani & militum virtuti gratiam habendam, quòd res bene gesta esset. Consulis opera & militum aliquantum amissum, & hostium exercitum, cujus delendi oblata fortuna fuerit, elapsum. Milites eò plures perisse, quòd tardius ex subsidiis, qui laborantibus opem ferrent, successissent. Hostes è manibus emissos, quòd equitibus legionariis & tardius datum signum esset, & persequi fugientes non licuisset.*

VII. De ea re nihil temere decerni placuit: ad frequentiores consultatio dilata est. Instabat enim cura alia, quòd civitas fœnore laborabat: & quum multis fœnebris legibus constricta avaritia esset, via fraudis inita erat, ut in socios, qui non tenerentur iis legibus, nomina transcriberent. ita libero fœnore obruebant debitores. Cujus cernendi quum ratio quæreretur, diem finiri placuit, Feralia quæ proximè fuissent: ut qui post eam diem socii civibus Romanis credidissent pecunias, profiterentur; & ex ea die pecuniæ creditæ, quibus debitor vellet legibus, jus creditori diceretur. Inde posteaquam professionibus detecta est magnitudo æris alieni per hanc fraudem contracti, M. Sempronius tribunus plebis ex auctoritate Patrum plebem rogavit, plebesque scivit, ut cum sociis ac nomine Latino pecuniæ creditæ jus idem quod cum civibus Romanis esset. Hæc in Italia domi militiæque acta. In Hispania nequaquam tantum belli fuit, quantum auxerat fama. C. Flaminius in citeriori Hispania oppidum Iluciam in Oretanis cepit: deinde in hiberna milites deduxit. & per hiemem prælia aliquot, nulla memoria digna, adversus latronum magis quàm hostium excursiones, vario tamen eventu, nec sine militum jactura, sunt facta. Majores res gestæ à M. Fulvio. Is apud Toleum oppidum cum Vaccæis Vectonibusque & Celtiberis signis collatis dimicavit: exercitum earum gentium fudit fugavitque: regem Hilermum vivum cepit.

VIII. Dum hæc in Hispania agerentur, comitiorum jam appetebat dies. itaque L. Cornelius consul, relicto ad exercitum M. Claudio legato, Romam venit. Is in senatu quum de rebus ab se gestis differuisset, quoque in statu provincia esset;

questus est cum Patribus conscriptis, quòd tanto bello una secunda pugna tam feliciter perfecto, non esset habitus Diis immortalibus honos. postulavit deinde, ut supplicationem simul triumphumque decernerent. Priùs tamen, quàm relatio fieret, Q. Metellus, qui consul dictatorque fuerat, *Literas eodem tempore, dixit, & consulis L. Cornelii ad senatum, & M. Marcelli ad magnam partem senatorum allatas esse inter se pugnantes: eoque dilatam esse consultationem, ut præsentibus auctoribus earum literarum disceptaretur. Itaque expectasse sese, ut consul, qui sciret ab legato suo adversus se scriptum aliquid, quum ipsi veniendum esset, deduceret eum secum Romam: quum etiam verius esset, Ti. Sempronio imperium habenti tradi exercitum, quàm legato. Nunc videri esse amotum de industria, qui ea quæ scripsisset, præsens diceret, aut argueret coram: & si quid vani afferret, argui posset, donec ad liquidum veritas explorata esset. Itaque nihil eorum, quæ postularet consul, decernendum in præsentia censere.* Quum pergeret nihilo segniùs referre, ut supplicatio decerneretur, triumphanti-que sibi in urbem invehì liceret; M. & C. Titinii tribuni plebis, se intercessuros, si de ea re fieret senatusconsultum, dixerunt. Censores erant priore anno creati Sex. Ælius Pætus & C. Cornelius Cethegus.

IX. Cornelius lustrum condidit. censa sunt civium capita centum quadraginta tria millia septingenta quatuor. Aquæ ingentes eo anno fuerunt: & Tiberis loca plana urbis inundavit. Circa portam Flumentanam etiam collapsa quædam ruinis sunt: & porta Cœlimontana fulmine icta est, murusque circa multis locis de cœlo tactus. Et Ariciæ, Lanuvii, & in Aventino lapidibus pluit. & à Capua nunciatum est, examen vesparum ingens in
forum

forum advolâsse, & in Martis æde confedisse. eas collectas cum cura, & igni crematas esse. Horum prodigiorum causa decemviri libros adire iussi, & novendiale sacrum factum, & supplicatio indicta est, atque urbs lustrata. Iisdem diebus ædiculam Victoriæ Virginis, prope ædem Victoriæ M. Porcius Cato dedicavit, biennio postquam vovit. Eodem anno coloniam Latinam in agrum Thurinum triumviri deduxerunt, Cn. Manlius Vulso, L. Apustius Fullo, Q. Ælius Tubero, cujus lege deducebatur. tria millia peditum iere, trecenti equites: numerus exiguus pro copia agri. Dari potuere tricena jugera in pedites, sexagena in equites. Apustio auctore tertia pars agri dempta est: quò postea, si vellent, novos colonos adscribere possent. vicena jugera pedites, quadragena equites acceperunt.

X. In exitu jam annus erat, & ambitio magis quàm unquam aliàs exarserat consularibus comitiis. multi & potentes petebant patricii, plebeiique: P. Cornelius Cn. filius Scipio, qui ex Hispania provincia nuper decesserat magnis rebus gestis: & L. Quintius Flamininus, qui classi in Græcia præfuerat: & Cn. Manlius Vulso. hi patricii. Plebei autem, C. Lælius, Cn. Domitius, C. Livius Salinator, Manius Acilius. Sed omnium oculi in Quintium Corneliumque coniecti. nam & in unum locum petebant ambo patricii, & rei militaris gloria recens utrumque commendabat. Ceterùm ante omnia certamen accendebant fratres candidatorum, duo clarissimi ætatis suæ imperatores. major gloria Scipionis; & quo major, eo propior invidiæ: Quintii recentior, ut qui eo anno triumphasset. Accedebat, quòd alter decimum jam prope annum assiduus in oculis hominum fuerat; quæ res minus ve-

rendos

rendos magnos homines ipsa satietate facit : consul iterum post devictum Annibalem cenforque fuerat. In Quintio nova & recentia omnia ad gratiam erant. nihil nec petierat à populo post triumphum, nec adeptus erat. Pro fratre germano, non patruele, se petere aiebat: pro legato & partecipe administrati belli. se terra, fratrem mari rem gessisse. His obtinuit, ut præferretur candidato, quem Africanus frater deducebat; quem Cornelia gens, Cornelio consule comitia habente, quem tantum præjudiciū senatus; virum è civitate optimum judicatum, qui matrem Idæam Pessinunte venientem in urbem acciperet. L. Quintius & Cn. Domitius Ænobarbus consules facti. adeò ne in plebeio quidem consule, quum pro C. Lælio niteretur, Africanus valuit. Postero die prætores creati, L. Scribonius Libo, M. Fulvius Centumalus, A. Atilius Serranus, M. Bæbius Tamphilus, L. Valerius Tappus, Q. Salonius Sarra. Ædilitas insignis eo anno fuit M. Æmilii Lepidi & L. Æmilii Paulli. Multos pecuarios damnârunt. ex ea pecunia clypea inaurata in fastigio Jovis ædis posuerunt. Porticum unam extra portam Trigeminam, emporio ad Tiberim adjecto; alteram à porta Fontinali ad Martis aram, quæ in Campum iter esset, perduxerunt.

XI. Diu nihil in Liguribus dignum memoria gestum erat. Extremo ejus anni bis in magnum periculum res adducta est. nam & castra consulis oppugnata ægre sunt defensa: & non ita multo post per saltum angustum quum duceretur agmen Romanum, ipsas fauces exercitus Ligurum insedit. quæ quum exitus non pateret, converso agmine redire institit consul: & à tergo fauces saltus occupatæ à parte hostium erant: Caudinæque cladis memoria

non

non animis modò, sed prope oculis obversabatur. Numidas octingentos ferme equites inter auxilia habebat. eorum præfectus consuli pollicetur, *Se parte, utra vellet, cum suis erupturum. Tantùm uti diceret, utra pars frequentior vicis esset. in eos se impetum facturum; & nihil prius quàm flammam tectis injecturum: ut is pavor cogeret Ligures excedere saltu, quem obsiderent, & discurrere ad opem ferendam suis.* Collaudatum eum consul spe præmiorum onerat. Numidæ equos conscendunt, & obequitare stationibus hostium neminem laceffentes cœperunt. Nihil primo adspectu contemptius. equi hominesque paulluli & graciles: discinctus & inermis eques, præterquam quòd jacula secum portat: equi sine frenis, deformis ipse cursus; rigida cervice & extento capite currentium. Hunc contemptum de industria augentes, labi ex equis, & per ludibrium spectaculo esse. Itaque qui primò intenti paratique, si lacefferentur, in stationibus fuerant, jam inermes sedentesque pars maxima spectabant. Numidæ adequitare, dein refugere sed propius saltum paullatim evehi: velut quos impotentes regendi equi invitos efferrent. postremò subditis calcaribus per medias stationes hostium erupère; &, in agrum latiore evecti, omnia propinqua viæ tecta incendunt. proximo deinde vico inferunt ignem, ferro flammaque omnia pervastant. Fumus primò conspectus, deinde clamor trepidantium in vicis auditus, postremò seniores puerique refugientes tumultum in castris fecerunt. itaque sine consilio, sine imperio, pro se quisque currere ad sua tuenda: momentoque temporis castra relicta erant, & obsidione liberatus consul, quò intenderat, pervenit.

XII. Sed neque Boii, neque Hispani, cum quibus eo anno bellatum erat, tam inimici infestique erant Romanis,

Romanis, quam Ætolorum gens. Ii post deportatos ex Græcia exercitus primo in spe fuerant, & *Antiochum in vacuum Europæ possessionem venturum: nec Philippum aut Nabin quieturos.* Ubi nihil usquam moveri viderunt, agendum aliquid miscendumque rati, ne cunctando senescerent consilia, concilium Naupactum indixerunt. Ibi Thoas prætor eorum, conquestus injurias Romanorum, statumque Ætolix; quòd omnium Græciæ gentium civitatumque inhonoratissimi post eam victoriam essent, cujus causa ipsi fuissent; legatos censuit circa reges mittendos, qui non solum tentarent animos eorum, sed suis quemque stimulis moverent ad Romanum bellum. Damocritus ad Nabin, Nicander ad Philippum, Dicæarchus frater prætoris ad Antiochum est missus. Tyranno Lacedæmonio Damocritus, *ademptis maritimis civitatibus enervatam tyrannidem, dicere: inde militem, inde naves, navalesque socios habuisse: inclusum suis prope muris Achæos videre dominantes in Peloponneso, nunquam habiturum recuperandi sua occasionem, si eam, quæ tum esset, prætermisset: nullum exercitum Romanorum in Græcia esse: nec propter Gythium, aut maritimos alios Laconas, dignam causam existimatuos Romanos, cur legiones in Græciam rursus transmittant.* Hæc ad incitandum animum tyranni dicebantur; ut, quum in Græciam Antiochus trajecisset, conscientia violatæ per sociorum injurias Romanæ amicitix, conjungeret se cum Antiocho. Et Philippum Nicander haud dissimili oratione incitabat. erat etiam major orationi materia, quo ex altiore fastigio rex, quàm tyrannus, detractus erat; quoque plures ademptæ res. *Ad hoc vetusta regum Macedonia fama, peragratuque orbis terrarum victoriis ejus gentis referebatur. Et tutum vel incepto vel eventu se consilium afferre. nam neque ut ante se moveat Philippus, quàm Antiochus cum exercitu transferat*
in

in Græciam, suadere; & qui sine Antiocho adversus Romanos Ætolosque tandiu sustinuerit bellum, ei adjuncto Antiocho, sociis Ætolis, qui tum graviores hostes quàm Romani fuerint, quibus tandem viribus resistere Romanos posse? Adjiciebat, de duce Annibale, nato adversus Romanos hoste, qui plures & duces & milites eorum occidisset, quàm quot superessent. Hæc Philippo Nicander. Alia Dicæarchus Antiocho: & omnium primum, prædam de Philippo Romanorum esse dicere, victoriam Ætolorum; & aditum in Græciam Romanis nullos alios, quàm Ætolos dedisse; & ad vincendum vires eosdem præbuisse. deinde quantas peditum equitumque copias præbituri Antiocho ad bellum essent: quæ loca terrestribus copiis, quos portus maritimis. Tum de Philippo & Nabide libero mendacio abutebatur: paratum utrumque ad rebellandum esse; & primam quamque occasionem recuperandi ea, quæ bello amississent, arrepturos. Ita per totum simul orbem terrarum Ætoli Romanis concitabant bellum. reges tamen aut non moti, aut tardiùs moti sunt.

XIII. Nabis extemplo circa omnes vicos maritimos dimisit ad seditiones in iis miscendas: & alios principum donis ad suam causam perduxit, alios pertinaciter in societate Romana manentes occidit. Achæis omnium maritimorum Laconum tuendorum ab T. Quintio cura mandata erat. itaque extemplo & ad tyrannum legatos miserunt, qui admonerent fœderis eum Romani, denunciarentque ne pacem, quam tantopere petisset, turbaret; & auxilia ad Gythium, quod jam oppugnabatur à tyranno; & Romam, qui ea nunciarent, legatos miserunt. Antiochus rex, ea hieme Raphiæ in Phœnice Ptolemæo regi Ægypti filia in matrimonium data, quum Antiochiam se recepisset, per Ciliciam, Tauro monte superato, extremo jam hiemis Ephesum pervenit: inde principio veris, Antiocho filio misso in Syriam ad custodiam ultimarum partium

partium regni, ne quid absente se à tergo moveretur; ipse cum omnibus terrestribus copiis ad Pisidas, qui circa Sidam incolunt, oppugnandos est profectus. Eo tempore legati Romani, P. Sulpicius, P. Villius, qui ad Antiochum (sicut ante dictum est) missi erant, jussi prius Eumenem adire, Elæam venire; inde Pergamum (ibi regia Eumenis fuit) ascenderunt. Cupidus belli adversus Antiochum Eumenes erat: *gravem, si pax esset, accolam tanto potentiorum regem credens: eundem, si motum bellum esset, non magis parem Romanis fore, quam Philippus fuisset: Et aut funditus sublatum iri, aut, si pax victo daretur, multa illi detracta sibi accessura; ut facile deinde se ab eo sine ullo Romano auxilio tueri posset. Etiam si quid adversi casurum foret, satius esse Romanis sociis quamcumque fortunam subire, quam solum aut imperium pati Antiochi, aut abnuentem vi atque armis cogi.* Ob hæc quantum auctoritate, quantum consilio valebat, incitabat Romanos ad bellum. Sulpicius æger Pergami substitit.

XIV. Villius quum Pisidiæ bello occupatum esse regem audisset, Ephesum profectus, dum paucos ibi moratur dies, dedit operam, ut cum Annibale, qui tum ibi fortè erat, sæpe congrediretur: ut animum ejus & tentaret, si qua posset, & metum demeret periculi ei quicquam ab Romanis esse. His colloquiis aliud quidem actum nihil est: secutum tamen sua sponte est, velut consilio petatum esset, ut vilior ob ea regi Annibal & suspectior ad omnia fieret. Claudius, secutus Græcos Acilianos libros, P. Africanum in ea fuisse legatione tradit: eumque Ephesi collocutum cum Annibale. Et sermonem etiam unum refert, quo quærenti Africano, *quem fuisse maximum imperatorem Annibal crederet, respondisse, Alexandrum Macedonum regem: quod parva manu innumerabiles exercitus fudisset; quodque ultimas oras, quas visere supra spem humanam*

humanam esset, peragrasset. Quærenti deinde, quem secundum poneret; Pyrrhum, dixisse, castra metari primum docuisse. ad hoc neminem elegantius loca cepisse, præsidia disposuisse: artem etiam conciliandi sibi homines com habuisse, ut Italicæ gentes regis externi, quàm populi Romani, tamdiu principis in ea terra, imperium esse mallent. Exsequenti, quem tertium duceret; haud dubiè semet ipsum, dixisse. Tum risum obortum Scipioni, & subjecisse, Quidnam tu diceres, si me vicisses? tum me verò, inquit, & ante Alexandrum, & ante Pyrrhum, & ante omnes alios imperatores esse. Et perplexum Punico astu responsum, & improvisum assentationis genus Scipionem movisse: quòd è grege se imperatorum velut inæstimabilem secrevisset.

XV. Villius ab Epheso Apameam processit. eò & Antiochus, audito Romanorum legatorum adventu, occurrit. Apameæ congressus disceptatio eadem ferme fuit, quæ Romæ inter Quintium & legatos regis fuerat. mors nunciata Antiochi filii regis, quem missum paullo ante dixeram in Syriam, diremit colloquia. Magnus luctus in regia fuit, magnumque ejus juvenis desiderium. id enim jam specimen sui dederat, ut, si vita longior contigisset, magni justique regis in eo indolem fuisse appareret. Quo carior acceptiorque omnibus erat, eo mors ejus suspectior fuit; gravem successorem eum instare senectuti suæ patrem credentem, per spadones quosdam, talium ministeriis facinorum acceptos regibus, veneno sustulisse. Eam quoque causam clandestino facinori adjiciebant, quòd, quum Seleuco filio Lyfimachiam dedisset, Antiocho quam similem daret sedem, ut procul ab se honore eum quoque ablegaret, non habuisset. Magni tamen luctus species per aliquot dies regiam tenuit: legatusque Romanus, ne alieno tempore incommodus obversaretur, Pergamum concessit. Rex Ephesum,

omisso

omisso quod inchoaverat bello, rediit. ibi per luctum regia clausa, cum Minione quodam, qui princeps amicorum ejus erat, secreta consilia agitavit. Minio, ignarus omnium externorum, viresque æstimans regis ex rebus in Syria aut Asia gestis, non caussa modò superiorem esse Antiochum, quòd nihil æqui postularent Romani, sed bello quoque superaturum credebat. Fugienti regi disceptationem cum legatis, seu jam experto eam minùs prosperam, seu mœrore recenti confuso, professus Minio, se quæ pro caussa essent dicturum, persuasit ut à Pergamo arcesserentur legati.

XVI. Jam convaluerat Sulpicius: itaque ambo Ephesum venerunt. Rex à Minione excusatus: & absente eo res agi cœpta est. Ibi præparata oratione Minio; *Specioso titulo, inquit, uti vos, Romani, Græcarum civitatum liberandarum video: sed facta vestra orationi non conveniunt. & aliud Antiocho juris statuisitis, alio ipsi utimini. Quis enim magis Smyrnæi Lampsaceni-que Græci sunt, quàm Neapolitani & Rhegini & Tarentini, à quibus stipendium, à quibus naves ex fœdere exigitis? Cur Syracusas, atque in alias Siciliæ Græcas urbes, prætorem quotannis cum imperio & virgis & securibus mittitis? nihil aliud profectò dicatis, quàm armis superatis vos iis has leges imposuisse. Eandem de Smyrna & Lampsaco, civitatibusque quæ Ioniæ aut Æolidis sunt, causam ab Antiocho accipite. Bello superatas à majoribus, & stipendiarias ac vestigiales factas, in antiquum jus repetit. itaque ad hæc ei responderi velim, si ex æquo disceptatur, & non belli caussa quæritur. Ad ea Sulpicius: Fecit verecundè, inquit, Antiochus, qui, si alia pro caussa ejus non erant quæ dicerentur, quemlibet ista quàm se dicere maluit. Quid enim simile habet civitatum earum quas comparasti caussa? Ab Rheginis & Neapolitanis & Tarentinis, ex quo in nostram venerunt potestatem,*

testatem, uno & perpetuo tenore juris semper usurpato, nunquam intermisso, quæ ex fœdere debent, exigimus. Potesne tandem dicere, ut ii populi non per se, non per alium quemquam fœdus mutaverint; sic & Asiæ civitates, ut semel venerunt in majorum Antiochi potestatem, in perpetua possessione regni vestri permansisse, & non alias earum in Philippi, alias in Ptolemæi fuisse potestate, alias per multos annos nullo ambigente libertatem usurpasse? Nam si, quod aliquando servierunt temporum iniquitate pressi, jus post tot secula asserendi eos in servitutem facit; quid abest quin actum nobis nihil sit, quod à Philippo liberavimus Græciam? & repetant posteri ejus Corinthum, Chalcidem, Demetriadem, & Thessalorum totam gentem? Sed quid ego causam civitatum ago, quàm ipsis agentibus & nos & regem ipsum cognoscere æquius est?

XVII. Vocari deinde civitatum legationes jussit, præparatas jam ante & instructas ab Eumene: qui, quantumcunque virium Antiocho decessisset, suo id accessurum regno ducebat. Admissi plures, dum suas quisque nunc querelas nunc postulationes inferit, æqua iniquis miscentes, è disceptatione altercationem fecerunt. itaque, neque remissa ulla re neque impetrata, æque ac venerant omnium incerti legati Romam redierunt. Rex, dimissis iis, concilium de bello Romano habuit. Ibi alius alio ferocius: quia quo quisque asperius adversus Romanos locutus esset, eo spes gratiæ major erat. Alius superbiam postulatorum increpare, tanquam Nabidi victo, sic Antiocho, maximo Asiæ regum, imponentium leges. quanquam Nabidi tamen dominationem in patriam suam, & patriam Lacedæmonem remissam; Antiocho, si Smyrna & Lampfacus imperata faciant, indignum videri. Alii parvas, & vix dictu dignas belli causas tanto regi eas civitates esse. sed initium semper per jus injusta impetrandi

petrandi fieri: nisi crederent, Persas, quum aquam terramque ab Lacedæmoniis petierunt, gleba terræ & hauſtu aquæ eguiſſe. *Per ſimilem tentationem Romanis de duabus civitatibus ogi. & alias civitates, ſimul duas jugum exuiſſe vidiffent, ad liberatorem populum deſecturas. Si non libertas ſervitute potior ſit, tamen omni præſenti ſtatu ſpem cuique novandi res ſuas blandiorem eſſe.*

XVIII. Alexander Acarnan in concilio erat, Philippi quondam amicus, nuper relicto eo ſecutus opulentiorem regiam Antiochi: & tanquam peritus Græciæ, nec ignarus Romanorum, in eum gradum amicitix regis, ut conſiliis quoque arcanis intereſſet, acceptus erat. Is tanquam non utrùm bellandum eſſet, necne, conſuleretur; ſed ubi, & qua ratione bellum gereretur, *Victoriam ſe haud dubiam proponere animo affirmabat; ſi in Europam tranſiſſet rex, & in aliqua Græciæ parte ſedem bello cepiſſet. Jam primùm Ætolos, qui umbilicum Græciæ incolerent, in armis eum inventurum; anteſignanos ad oſperrima quæque belli paratos. In duobus velut cornibus Græciæ Nabin à Peloponneſo concitaturum omnia, repetentem Argivorum urbem, repetentem maritimas civitates, quibus eum depulſum Romani Lacedæmonis muris incluſiſſent: à Macedonia Philippum, ubi primùm bellicum cani audiſſet, arma capturum. Nōſſe ſe ſpiritus ejus, nōſſe animum: ſcire ferarum modo, quæ clauſtris aut vinculis teneantur, ingentes jamdiu iras eum in peſtore volvere. meminiffe etiam ſe, quoties in bello precari omnes Deos ſolitus ſit, ut Antiochum ſibi darent adiutorem. cujus voti ſi compos nunc fiat, nullam moram rebellandi facturum. Tantum non cunſandum, neque ceſſandum eſſe. in eo enim victoriam verti, ſi & loca opportuna, & ſocii præoccuparentur. Annibalem quoque ſine mora mittendum in Africam eſſe ad diſtringendos Romanos.*

XIX. Annibal non adhibitus in concilium, propter colloquia cum Villio suspectus regi, & in nullo postea honore habitus, primò eam contumeliam tacitus tulit: deinde melius esse ratus, & percunctari causam repentinae alienationis, & purgare se tempore apto, quæsitâ simpliciter iracundiæ causâ, auditaque, *Pater Amilcar*, inquit, *Antioche*, parvum admodum me, quum sacrificaret, altaribus admotum jurejurando adegit, nunquam amicum fore populi Romani. Sub hoc sacramento sex & triginta annos militavi: hoc me in pace patria mea extulit: hoc patria extorrem in tuam regiam adduxit: hoc duce, si tu spem meam destitueris, ubicumque vires, ubi arma esse sciam, huc veniam toto orbe terrarum quærens aliquos Romanis hostes. Itaque si quibus tuorum meis criminibus apud te crescere libet, aliam materiam crescendi quàm ex me quærant. Odi, odioque sum Romanis. id me verum dicere, pater Amilcar & Dii testes sunt. Proinde quum de bello Romano cogitabis, inter primos amicos Annibalem habeto. si qua res te ad pacem compellet, in id consilium alium, cum quo deliberes, quærito. Non movit modo talis oratio regem, sed etiam reconciliavit Annibali. Ex concilio ita discessum est, ut bellum gereretur.

XX. Romæ destinabant quidem sermonibus hostem Antiochum, sed nihil dum ad id bellum præter animos parabant. Consulibus ambobus Italia provincia decreta est: ita ut inter se compararent, fortirenturve, uter comitiis ejus anni præesset: ad utrum ea non pertineret cura, ut paratus esset, si quo eum extra Italiam opus esset ducere legiones. Huic consuli permissum, ut duas legiones scriberet novas, & sociùm ac Latini nominis viginti millia, & equites nongentos. Alteri consuli duæ legiones decretæ, quas L. Cornelius consul superioris anni habuisset, & sociùm ac Latini nominis ex eodem exercitu pedites quindecim millia,

millia, & equites quingenti. Q. Minucio cum exercitu, quem in Liguribus habebat, prorogatum imperium. additum in supplementum, ut quatuor millia peditum Romanorum scriberentur, & centum quinquaginta equites; & sociis eodem quinque millia peditum imperarentur, ccl. equites. Cn. Domitio extra Italiam, quo senatus censuisset, provincia evenit; L. Quintio Gallia & comitia habenda. Prætores deinde provincias sortiti: M. Fulvius Centumalus urbanam, L. Scribonius Libo peregrinam: L. Valerius Tappus Siciliam, Q. Salonius Sarra Sardiniam, M. Bæbius Tamphilus Hispaniam citeriorem, A. Atilius Serranus ulteriorem. Sed his duobus primùm senatusconsulto, deinde plebis etiam scito permutatæ provinciæ sunt. Atilio classis & Macedonia, Bæbio Brutii decreti: Flaminio Fulvioque in Hispaniis prorogatum imperium: Bæbio Tamphilo in Bruttios duæ legiones decretæ, quæ priore anno urbanæ fuissent; ut & sociis eodem millia peditum quindecim imperarentur, & quingenti equites. Atilius triginta naves quinqueres facere iussus, & ex navalibus veteres deducere, si quæ utiles essent, & scribere, navales socios. Et consulibus imperatum, ut ei duo millia sociùm ac Latini nominis, & mille pedites darent Romanos. Hi duo prætores, & duo exercitus, terrestres navalisque, adversus Nabin, apertè jam oppugnantem socios populi Romani, dicebantur parari. Ceterùm legati, ad Antiochum missi, expectabantur: priusquam ii redissent, vetuerat Cn. Domitium consulem senatus ab urbe discedere.

XXI. Prætoribus Fulvio & Scribonio, quibus ut jus dicerent Romæ provincia erat, negotium datum; ut præter eam classem, cui Atilius præfutura erat, centum quinqueres pararent. Priusquam consul prætoresque in provincias proficiscentur,

rentur, supplicatio fuit prodigiorum causa. Capræm sex hædos uno fœtu edidisse, ex Piceno nuntiatus est; & Arretii puerum natum unimanum: Amiterni terra pluisse: Formiis portam murumque de cœlo tacta: & (quod maximè terrebat) consulis Cn. Domitii bovem locutum, ROMA CAVE TIBI. Ceterorum prodigiorum causa supplicatum est: bovem cum cura servari aliquæ aruspices jusserunt. Tiberis, infestiore quàm priore impetu illatus urbi, duo pontes, ædificia multa, maximè circa portam Flamentanam, evertit. Saxum ingens, sive imbribus, sive motu terræ levioze, quàm ut alioqui sentiretur labefactatum, in vicum Jugarium ex Capitolio procidit, & multos oppressit. In agris passim inundatis pecua ablata: villarum strages facta est. Priusquam L. Quintius consul in provinciam perveniret, Q. Minucius in agro Pisano cum Liguribus signis collatis pugnavit. novem millia hostium occidit: ceteros fusos fugatosque in castra compulit. Ea usque in noctem magno certamine oppugnata defensusque sunt. nocte clam profecti Ligures: prima luce Romanus vacua castra invasit. prædæ minus inventum est, quòd subinde spolia agrorum capta domos mittebant. Minucius nihil deinde laxamenti hostibus dedit. ex agro Pisano in Ligures profectus, castella vicosque eorum igni ferroque pervastavit. ibi præda Etrusca, quæ missa à populatoribus fuerat, repletus est miles Romanus.

XXII. Sub idem tempus legati ab regibus Romam reverterunt. qui quum nihil, quod fatis maturam causam belli haberet, nisi adversus Lacedæmonium tyrannum attulissent, quem & Achæi legati annuntiabant contra fœdus maritimam oram Laconum oppugnare; Atilius prætor cum classe missus est in Græciam ad socios tuendos. Consules, quando
nihil

nihil ab Antiocho instaret, proficisci ambo in provincias placuit. Domitius ab Arimino, quā proximum fuit; Quintius per Ligures in Boios venit. Duo consulum agmina diversa latè agrum hostium pervastârunt. primò equites eorum pauci cum præfectis, deinde universus senatus, postremò in quibus aut fortuna aliqua aut dignitas erat, ad mille quingenti ad consules transfugerunt. Et in utraque Hispania eo anno res prospere gestæ, nam & C. Flaminius oppidum Litabrum, munitum opulentumque, vineis expugnavit; & nobilem regulum Corribilonem vivum cepit: & M. Fulvius proconsul cum duobus exercitibus hostium duo secunda prælia fecit. oppida Hispanorum, Vesceliam, Holonemque, & castella multa expugnavit: alia voluntate ad eum defecerunt. tum in Oretanos progressus, & ibi duobus potitus oppidis, Noliba & Cufibi, ad Tagum amnem ire pergit. Toletum ibi parva urbs erat, sed loco munita. eam quum oppugnaret, Vectonum magnus exercitus Toletanis subsidio venit. Cum his signis collatis prospere pugnavit: & fufis Vectonibus, operibus Toletum cepit.

XXIII. Ceterum eo tempore minus ea bella quæ gerebantur, curæ Patribus erant, quàm expectatio nondum cœpti cum Antiocho belli. nam etsi per legatos identidem omnia explorabantur, tamen rumores temere sine ullis auctoribus orti multa falsa veris miscebant. Inter quæ allatum erat, quum in Ætoliam venisset Antiochus, extemplo classem eum in Siciliam missurum. Itaque senatus, etsi prætorem Atilium cum classe miserat in Græciam, tamen quia non copiis modò, sed etiam auctoritate opus erat ad tuendos sociorum animos, T. Quintium, & C. Octavium, & Cn. Servilium, & P. Villium legatos in Græciam misit: & ut M.

Bæbius

Bæbius ex Brutiis ad Tarentum & Brundisium promoveret legiones, decrevit; ut inde, si res posceret, in Macedoniam trajiceret: & ut M. Fulvius prætor classem navium triginta mitteret ad tuendam Siciliæ oram; & cum imperio esset, qui classem eam duceret: (duxit L. Oppius Salinator, qui priore anno ædilis plebis fuerat) & ut idem prætor L. Valerio collegæ scriberet, *Periculum esse, ne classis regis Antiochi ex Ætolia in Siciliam trajiceret: itaque placere senatui, ad eum exercitum quem haberet, tumultuariorum militum ad duodecim millia pedites & quadringentos equites scribere eum: quibus oram maritimam provinciæ, quæ vergeret in Græciam, tueri posset.* Eum delectum prætor non ex Sicilia ipsa tantum, sed etiam ex circumjacentibus insulis habuit: oppidaque omnia maritima, quæ in Græciam versa erant, præfidiis firmavit. Addidit alimenta rumoribus adventus Attali, Eumenis fratris: qui nunciavit, Antiochum regem Hellepontum cum exercitu transisse; Ætolos ita se parare, ut sub adventum ejus in armis essent. Et Eumeni absenti, & præsentì Attalo gratiæ actæ: & ædes liberæ, locus, lautia decreta; & munera data, equi duo, bina equestria arma, & vasa argentea centum pondo, & aurea viginti pondo.

XXIV. Quum alii atque alii nuncii bellum instare afferrent, ad rem pertinere visum est, consules primo quoque tempore creari. Itaque senatusconsultum factum est, ut M. Fulvius prætor literas extemplo ad consulem mitteret, quibus certior fieret senatui placere, provincia exercituque tradito legatis, Romam reverti eum; & ex itinere præmittere edictum, quo comitia consulibus creandis ediceret. Paruit his literis consul; &, præmissis edicto, Romam venit. Eo quoque anno magna

ambitio fuit, quòd patricii tres in unum locum petierunt: P. Cornelius Cn. F. Scipio, qui
Ante Cbr. priore anno repulsam tulerat; & L. Cor-
191. nelius Scipio, & Cn. Manlius Vulso. P.
U.C. 561.

Scipioni, ut dilatum viro tali non negatum honorem appareret, consulatus datus est. additus ei de plebe collega, Manius Acilius Glabrio. Postero die prætore creati L. Æmilius Paullus, M. Æmilius Lepidus, M. Junius Brutus, A. Cornelius Mammula, C. Livius & L. Oppius. utrique eorum Salinator cognomen erat. Oppius is erat, qui classem triginta navium in Siciliam duxerat. Interim dum novi magistratus fortirentur provincias, M. Bæbius à Brundusio cum omnibus copiis transire in Epirum est iussus, & circa Apolloniam copias continere: & M. Fulvio prætori urbano negotium datum est, ut quinqueres novas quinquaginta faceret.

XXV. Et populus quidem Romanus ita se ad omnes conatus Antiochi præparabat. Nabis jam non differebat bellum, sed summa vi Gythium oppugnabat: & insensus Achæis, quòd miserant obsessis præsidium, agros eorum vastabat. Achæi non antea ausi capeffere bellum, quàm ab Roma revertissent legati, ut, quid senatui placeret, scirent; post reditum legatorum, & Sicyonem concilium edixerunt, & legatos ad T. Quintium miserunt, qui consilium ab eo peterent. In consilio omnium ab bellum extemplo capeffendum inclinatæ sententiæ erant: literæ T. Quintii cunctationem injecerunt, quibus auctor erat prætorem classemque Romanam exspectandi. Quum principum alii in sententia permanerent, alii utendum ejus, quem ipsi consuluisent, consilio censerent: multitudo Philopœmenis sententiam exspectabat. Prætor iis tum erat, & omnes eo tempore & prudentia & auctoritate

ritate anteibat. Is præfatus, *Bene comparatum apud Achæos esse, ne prætor, quum de bello consulisset, ipse sententiam diceret; statuere quamprimum ipsos, quid vel-
lent, iussit. Prætores decreta eorum cum fide & cura
exsecuturum, annixurumque ut, quantum in consilio hu-
mano positum esset, nec pacis eos pœniteret, nec belli.*
Plus ea oratio momenti ad incitandos ad bellum
habuit, quàm si aperte suadendo cupiditatem res
gerendi ostendisset. Itaque ingenti consensu bellum
decretum est: tempus & ratio administrandi ejus
libera prætori permissa sunt. Philopœmen, præter-
quam quòd ita Quintio placeret, & ipse existimabat
classẽ Romanam expectandam, quæ à mari Gy-
thium tueri posset. sed metuens, ne dilationem res
non pateretur, & non Gythium solùm, sed præsi-
dium quoque missum ad tuendam urbem amitte-
retur; naves Achæorum deduxit.

XXVI. Comparaverat & tyrannus modicam clas-
sem ad prohibenda, si qua obsessis mari summitte-
rentur, præsidia, tres testas naves, & lembos pri-
steisque; tradita vetere classe ex fœdere Romanis.
Harum ut novarum tum navium agilitatem experi-
retur, simul omnia satis apta ad certamen essent,
profectos in altum quotidie remigem militemquẽ
simulacris navalis pugnæ exercebat. in eo ratus
verti spem obsidionis, si præsidia maritima inter-
clusisset. Prætor Achæorum, sicut terrestrium cer-
taminum arte quemvis clarorum imperatorum vtili
usu vel ingenio æquabat, ita rudis in re navali
erat: Arcas, mediterraneus homo, externorum etiam
omnium, nisi quòd in Creta præfectus auxiliorum
militaverat, ignarus. Navis erat quadrireremis ve-
tus, capta annis octoginta ante: quum Crateri uxo-
rem Nicæam ab Naupacto Corinthum veheret. hu-
jus fama motus (fuerat enim nobile in classe regia

quondam navigium) deduci ab Ægio putrem jam admodum & vetustate dilabentem iussit. Hac tum prætoria nave præcedente classem, quum in ea Patrensis Tiso præfectus classis veheretur, occurrerunt à Gythio Laconum naves: & primo statim incursum ad novam & firmam navem vetus, quæ per se ipsa omnibus compagibus aquam acciperet, divulsa est: captique omnes, qui in nave erant. cetera classis, prætoria nave amissa, quantum quæque remis valuit, fugerunt, ipse Philopœmen in levi speculatoria nave fugit: nec ante fugæ finem, quàm Patras ventum sit, fecit. Nihil ea res animum militaris viri, & multos experti casus, imminuit: quin contra, si in re navali, cujus esset ignarus, offendisset, eo plus in ea, quorum usu calleret, spei nactus, breve id tyranno gaudium se effecturum affirmabat.

XXVII. Nabis, cum prospera elatus re, tum spem etiam haud dubiam nactus nihil jam à mari periculi fore, & terrestres aditus claudere opportunè positis præfidiis voluit. tertia parte copiarum ab obsidione Gythii abducta, ad Pleias posuit castra. Imminet is locus & Leucis & Acris; qua videbantur hostes exercitum admoturi. Quum ibi stativa essent, & pauci tabernacula haberent; multitudo alia casas, ex arundinibus textas, fronde, quæ umbram modò præberet, texissent; priusquam in conspectum hostium veniret Philopœmen, nec opinantem eum improvise genere belli aggredi statuit. Navigia parva in stationem occultam agri Argivi contraxit: in ea expeditos milites, cetratos plerosque, cum fundis & jaculis & alio levi genere armaturæ imposuit. inde littora legens, quum ad propinquum castris hostium promontorium venisset, egressus calibus notis nocte Pleias pervenit: & sopitis vigilibus, ut in nullo propinquo metu, ignem casis ab omni parte

parte castrorum iniecit. Multi prius incendio absumpti sunt, quàm hostium adventum sentirent: & qui senserant, nullam opem ferre potuerunt. Ferro flammaque omnia absumpta, perpauci tamen ex tam ancipiti peste ad Gythium in majora castra perfugerunt. Ita perculsis hostibus, Philopœmen protinus ad depopulandam Tripolim Laconici agri, qui proximus finem Megalopolitarum est, duxit: & magna vi pecorum hominumque inde abrepta, priusquam à Gythio tyrannus præsidium agris mitteret, discessit. Idem Tegeam exercitu contracto, concilioque eodem & Achæis & sociis indicto, in quo & Epirotarum & Acarnanum fuere principes, statuit (quoniam satis & suorum à pudore maritimæ ignominia restituti animi, & hostium conterriti essent) ad Lacedæmonem ducere: eo modo uno ratus ab obsidione Gythii hostem abduci posse. Ad Carias primùm in hostium terra posuit castra. Eo ipso die Gythium expugnatum est. cujus rei ignarus Philopœmen castra ad Barboſthenem (mons est decem millia passuum ab Lacedæmone) promovit. Et Nabis recepto Gythio, cum expedito exercitu inde profectus, quum præter Lacedæmonem raptim duxisset, Pyrrhi (quæ vocant) castra occupavit: quem peti locum ab Achæis non dubitabat. inde hostibus occurrit. Obtinebant autem longo agmine propter angustias viæ prope quinque millia passuum. cgebatur agmen ab equitibus, & maximè à parte auxiliorum; quòd existimabat Philopœmen, tyrannum mercenariis militibus, quibus plurimum fideret, à tergo suos aggressurum. Duæ res simul inopinatæ perculerunt eum: una, præoccupatus, quem petebat, locus: altera, quòd primo agmini occurrisset hostem cernebat. ubi quum per loca confra-

gosa iter esset, sine levis armaturæ præsidio signa ferri non videbat posse.

XXVIII. Erat autem Philopœmen præcipuè in ducendo agmine locisque capiendis solertiæ atque usus: nec belli tantùm temporibus, sed etiam in pace, ad id maximè animum exercuerat. Ubi iter quòpiam faceret, & ad difficilem transitu saltum venisset, contemplatus ab omni parte loci naturam, quum solus erat, secum ipse agitabat animo: quum comites haberet, ab iis quærebat, *Si hostis eo loco apparuisset, quid si à fronte, quid si ab latere, hoc aut illo, quid si à tergo adoriretur, capiendum consilii foret? posse instructos recta acie, posse inconditum agmen, & tantummodo aptum viæ occurrere. Quem locum ipse capturus esset, cogitando aut quærendo exsequebatur: aut quot armatis aut quo genere armorum (plurimum enim interesse) usus: quò impedimenta, quò sarcinas, quò turbam inermem rejiceret. Quanto ea, aut quali præsidio custodiret: & utrùm pergere qua cepisset ire viâ, an ea qua venisset repetere melius esset. Castris quoque quem locum caperet, quantum munimento amplecteretur loci: qua opportuna aquatio, qua pabuli lignorumque copia esset. qua postero die castra moventi tutum maximè iter; quæ forma agminis foret.* His curis cogitationibusque ita ab ineunte ætate animum agitaverat, ut nulla ei nova in tali re cogitatio esset. Et tum omnium primum agmen constituit: dein Cretenses auxiliares, & quos Tarentinos vocabant, equites, binos secum trahentes equos, ad prima signa misit: & jussis equitibus subsequi, super torrentem, unde aquari possent, rupem occupavit. Eò impedimenta omnia, & calonum turbam coniectam armatis circumdedit: & pro natura loci castra communivit. tabernacula statuere

tuere in aspretis & inæquabili solo difficile erat. Hostes quingentos passus aberant. ex eodem rivo utrimque cum præsidio levis armaturæ aquati sunt: & priusquam (qualia in propinquis castris solent) contraheretur certamen, nox intervenit. Postero die apparebat pugnandum pro aquatoribus circa rivum esse. nocte in valle à conspectu hostium averfa, quantum multitudinem locus oculere poterat, condidit cetratorum.

XXIX. Luce orta Cretenfium levis armatura & Tarentini equites super torrentem proelium commiserunt. Latemnaustus Cretenfis popularibus suis, equitibus Lycortas Megalopolitanus præerat. Cretenfes, & hostium auxiliares, equitumque idem genus Tarentini præsidio aquatoribus erant. Aliquamdiu dubium proelium fuit; ut eodem ex parte utraque hominum genere, & armis paribus. Procedente certamine, & numero vicere tyranni auxiliares: & quia ita præceptum à Philopœmene profectis erat, ut modico edito proelio in fugam inclinarent, hostemque ad insidiarum locum pertraherent; effusè secuti fugientes per convallem plerique & vulnerati & interfecti sunt, priusquam occultum hostem viderent. Cetrati ita, quantum latitudo vallis patiebatur, instructi federant, ut faciliè per intervalla ordinum fugientes suos acciperent. Consurgunt deinde ipsi integri, recentes, instructi: & in hostes inordinatos, effusos, labore etiam & vulneribus fessos, impetum faciunt. Nec dubia victoria fuit. extemplo terga dedit tyranni miles: &, hand paullo concitatore cursu, quàm secutus erat, fugiens, ad castra est compulsus. multi cæsi captique in ea fuga sunt: & in castris quoque foret trepidatum, ni Philopœmen receptui cani jussisset; loca magis confragosa, &, quacumque temere processisset, iniqua, quàm hostem metuens.

inde & ex fortuna pugnae & ex ingenio ducis conjectans, in quo tum is pavore esset, unum de auxiliaribus specie transfugae mittit ad eum, qui pro comperto afferret, Achæos statuisse postero die ad Eurotam amnem, qui prope ipsis affluit mœnibus, procedere, ut intercluderent iter; ne aut tyrannus, quum vellet, receptum ad urbem haberet; aut comatus ab urbe in castra portarentur: simul etiam tentaturus, si quorum animi sollicitari ad defectionem à tyranno possent. Non tam fidem dictis perfuga fecit, quàm perculso metu relinquendi castra causam probabilem præbuit. Postero die Pythagoram cum auxiliaribus & equitatu stationem agere pro vallo iussit. ipse, tanquam in aciem cum robore exercitus egressus, signa ocius ferri ad urbem iussit.

XXX. Philopœmen, posteaquam citatum agmen per angustam & proclivem viam duci raptim vidit, equitatum omnem & Cretensum auxiliares in stationem hostium, quæ pro castris erat, emittit. Illi, ubi hostes adesse & à suis se desertos viderunt, primò in castra recipere se conati sunt; deinde, posteaquam instructa acies tota Achæorum admovebatur, metu ne cum ipsis castris caperentur, sequi suorum agmen aliquantum prægressum insistant. Extemplo cetrati Achæorum in castra impetum faciunt, & diripiunt: ceteri ad persequendos hostes ire pergunt. Erat iter tale, per quod vix tranquillum ab hostili metu agmen expidiri posset. Ut verò ad postremos prælium ortum est, clamorque terribilis à tergo paventium ad prima signa est perlatus; pro se quisque armis abjectis in circumjectas itineri silvas diffugiunt, momentoque temporis strage armorum septa via est, maximè hastis; quæ pleræque adversæ cadentes velut vallo objecto iter impediabant. Philopœmen,

loptemen, utcumque possent, instare & persequi auxiliaribus iussis, (utique enim equitibus haud facilem futuram fugam) ipse gravius agmen via patentiore ad Eurotam amnem deduxit. ibi castris sub occasum solis positis, levem armaturam, quam ad persequendum reliquerat hostem, opperiebatur. qui ubi prima vigilia venerunt, nunciantes, tyrannum cum paucis ad urbem penetrâsse, ceteram multitudinem inermem toto sparsam vagari saltu, corpora curare eos jubet. ipse ex cetera copia militum (qui, quia priores in castra venerant, refecti & cibo sumpto & modica quiete erant) delectos, nihil præter gladios secum ferentes, extemplo educit, & duarum portarum itineribus, quæ Pheras, quæque Barbothenem ferunt, eos instruxit; qua ex fuga recepturos sese hostes credebatur. Nec eum opinio fefellit, nam Lacedæmonii, quoad lucis superfuit quicquam, deviis callibus medio saltu se recipiebant. Primo vespere ut lumina in castris hostium conspexere, è regione eorum occultis semitis se tenuerunt: ubi prætergressi ea sunt, jam tutum rati, in patentes vias descenderunt. ibi excepti ab infidente hoste passim ita multi cæsi captique sunt, ut vix quarta pars de toto exercitu evaserit. Philopœmen, incluso tyranno in urbem, insequentes dies prope triginta vastandis agris Laconum absumpsit: debilitatisque ac prope fractis tyranni viribus, domum rediit, æquantibus eum gloria rerum Achæis imperatori Romano; &, quod ad Laconicum bellum attineret, præferentibus etiam.

XXXI. Dum inter Achæos & tyrannum bellum erat, legati Romanorum circumire sociorum urbes; solliciti, ne Ætoli partis alicujus animos ad Antiochum avertissent. minimum operæ in Achæis adeundis consumpserunt; quos, quia Nabidi infesti erant, ad cetera quoque satis fidos censebant esse. Athenas

primùm, inde Chalcidem, inde in Theſſaliam iere: allocutique concilio frequenti Theſſalos, Demetriadem iter flexere. eo Magnetum concilium indictum eſt. Accuratioꝝ ibi habenda oratio fuit: quòd pars principum alienati à Romanis, totique Antiochi & Ætolorum erant: quia, quum reddi filium obſidem Philippo allatum eſſet, ſtipendiumque impoſitum remitti; inter cetera vana allatum erat, Demetriadem quoque ei reddituros Romanos eſſe. Id ne fieret, Eurylochus princeps Magnetum, factioniſque ejus quidam omnia novari Ætolorum Antiochique adventu malebant. Adverſus eos ita diſſerendum erat, ne, timorem vanum iis demendo, ſpes incifa Philipppum abalienaret; in quo plus ad omnia momenti, quàm in Magnetibus eſſet. Illa tantùm commemorata, *cum totam Græciam beneficio libertatis obnoxiam Romanis eſſe, tum eam civitatem præcipuè. Ibi enim non præſidium modo Macedonum fuiſſe, ſed regiam exædificatam: ut præſens ſemper in oculis habendus eſſet dominus. Ceterum nequicquam ea facta, ſi Ætoli Antiochum in Philippi regiam adducerent, & novus & incognitus pro veteri & experto habendus rex eſſet. Magnetarchen ſummum magiſtratum vocant. is tum Eurylochus erat. ac poſtate ea fretus negavit diſſimulandum ſibi & Magnetibus eſſe, quæ fama vulgata de reddenda Demetriade Philippo foret. id ne fieret, omnia & conanda & audenda Magnetibus eſſe. Et inter dicendi contentionem inconſultius eveclius projecit, *Tum quoque ſpecie liberam Demetriadem eſſe: re vera omnia ad nutum Romanorum fieri.* Sub hanc vocem fremitus variantis multitudinis fuit, partim aſſenſum, partim indignationem, dicere id auſum eum. Quintius quidem adeò exarſit ira, ut, manus ad cælum tendens, Deos teſtes ingrati ac perfidi animi Magnetum invocaret. Hac voce præterritis omnibus, Zeno ex principibus unus,*

magnæ

magnæ tum ob eleganter actam vitam auctoritatis, tum quòd semper Romanorum haud dubiè partis fuerat, ab Quintio legatisque aliis flens petiit, *ne unius amentiam civitati assignarent. Suo quemque periculo furere. Magnetæ non libertatem modò, sed omnia, quæ hominibus sancta caraque sint, T. Quintio & populo Romano debere. Nihil quemquam ab Diis immortalibus precari posse, quod non Magnetes ab illis haberent; & in corpora sua citiùs per furorem sævituros, quàm ut Romanam amicitiam violarent.*

XXXII. Hujus orationem subsecutæ multitudinis preces sunt. Eurylochus ex concilio itineribus occultis ad portam, atque inde protinus in Ætoliâ profugit. Jam enim, & id magis indies, Ætoli defectionem nudabant: eoque ipso fortè tempore Thoas princeps gentis, quem miserant ad Antiochum, redierat: indeque Menippum secum adduxerat, regis legatum. qui, priusquam concilium iis daretur, impleverant omnium aures, terrestres navalesque copias commemorando, ingentem vim peditum equitumque venire: ex India elephantos: ad omnia (quo maximè moveri credebant multitudinis animos) tantum advehi auri, ut ipsos emere Romanos possit. Apparebat, quid ea oratio in concilio motura esset. nam & venisse eos, & quæ agerent omnia Romanis legatis deferebantur. & quanquam prope abscissa res erat, tamen non ab re esse Quintio visum est, sociorum aliquos legatos interesse ei concilio, qui admonerent Romanæ societatis Ætolos, qui vocem liberam mittere adversus regis legatum auderent. Athenienses maximè in eam rem idonei visi sunt, & propter civitatis dignitatem, & vetustam societatem cum Ætolis. ab iis Quintius petiit, ut legatos ad Panætolicum concilium mitterent. Thoas primus in eo concilio renunciavit legationem. Menippus post eum intromissus, *Optimum fuisse omni-*
bus,

bus, qui Græciam Asiamque incolerent, ait, integris rebus Philippi potuisse intervenire Antiochum: sua quemque habiturum fuisse, neque omnia sub nutum ditionemque Romanam perventura. Nunc quoque, inquit, si modò vos, quæ inchoastis, consilia constanter perducitis ad exitum, poterit, Diis iurantibus & Ætolis sociis, Antiochus quamvis inclinatas Græciæ res restituere in pristinam dignitatem. Ea autem in libertate posita est, quæ suis fiat viribus, non ex alieno arbitrio pendet. Athenienses, quibus primis post regiam legationem dicendi quæ vellent potestas facta est, mentione omni regis prætermissa, Romanæ societatis Ætolos, meritorumque in universam Græciam T. Quintii admonuerunt, Ne temere eam celeritate nimia consiliorum everterent. Consilia calida & audacia prima specie læta, tractatu dura, eventu tristia esse. legatos Romanos, & in iis T. Quintium, baud procul inde abesse. Dum integra omnia essent, verbis potius de iis, quæ ambigerentur, disceptarent, quàm Asiam Europamque ad funestum armarent bellum.

XXXIII. Multitudo, avida novandi res, Antiochi tota erat: & ne admittendos quidem in concilium Romanos censebant. principum maximè seniores auctoritate obtinere, ut daretur iis concilium. Hoc decretum Athenienses quum retulissent, eundum in Ætoliam Quintio visum est. Aut enim moturum aliquid, aut omneis homines testes fore, penes Ætolos belli culpam esse: Romanos iusta ac prope necessaria sumpturos arma. Posteaquam ventum est eò, Quintius in concilio orsus à principio societatis Ætolorum cum Romanis, & quoties ab iis fides mota fœderis esset; pauca de jure civitatum, de quibus ambigeretur, disseruit. Si quid tamen æqui se habere arbitrarentur, quanto esse satius Romam mittere legatos, seu disceptare, seu rogare senatum mallent, quàm populum Romanum cum Antiocho, lanistis Ætolis, non sine motu magno generis

generis humani & perniciæ Græciæ dimicare? nec ullos prius cladem ejus belli sensuros, quàm qui movissent. Hæc nequicquam, velut vaticinatus Romanus. Thoas deinde ceterique factionis ejusdem, cum assensu omnium auditi, pervicerunt, ut ne dilato quidem concilio, & absentibus Romanis, decretum fieret, quo arcefferetur Antiochus ad liberandam Græciam, disceptatumque inter Ætolos & Romanos. Huic tam superbo decreto addidit propriam contumeliam Damocritus prætor eorum. nam quum id ipsum decretum posceret eum Quintius, non veritus majestatem viri, aliud in præsentia, quod magis instaret, prævertendum sibi esse, dixit: decretum responsumque brevi in Italia, castris super ripam Tiberis positus, daturum. tantus furor illo tempore gentem Ætolorum, tantusque magistratus eorum cepit.

XXXIV. Quintius legatique Corinthum redierunt. inde, ut quæque de Antiocho, nihil per se ipsi moti, & sedentes exspectare adventum viderentur regis, concilium quidem universæ gentis post dimissos Romanos non habuerunt, per apocletos autem (ita vocant sanctius concilium: ex delectis constat viris) id agitabant, quonam modo res in Græcia novarentur. Inter omnes constabat, in civitatibus principes, optimum quemque, Romanæ societatis esse, & præsentis statu gaudere: multitudinem, & quorum res non ex sententia ipsorum essent, omnia novari velle. Ætoli consilium uno die spei quoque non audacis modò, sed etiam impudentis ceperunt, Demetriadem, Chalcidem, & Lacedæmonem occupandi. Singuli in singulas missi sunt principes: Thoas Chalcidem, Alexamenus Lacedæmonem, Diocles Demetriadem. Hunc exsul Eurylochus, de cujus fuga causaque fugæ ante dictum est, quia reditus in patriam nulla spes alia erat, adjuvit. Literis Eurylochi admoniti propinqui amicieque, & qui ejusdem factionis erant, liberos & conjugem

conjugem ejus cum fordida veste, tenentes velamenta supplicum, concionem frequentem adire jubent; singulos universosque obtestantes, ne infontem, indemnatum consensescere exfilio sinerent. Et simplices homines misericordia, & improbos seditiososque immiscendi res tumultu Ætolico spes movit: pro se quisque revocare jubebant. His præparatis Diocles cum omni equitatu (& erat tunc præfectus equitum) specie reducentis exsulem hospitem profectus, die ac nocte ingens iter emensus, quum millia sex ab urbe abesset, luce prima tribus electis turmis, cetera multitudine equitum subsequi jussa, præcessit. posteaquam portæ appropinquabat, defilire omnes ex equis jussit, & loris ducere equos; itineris maximè modo solutis ordinibus, ut comitatus magis præfecti videretur, quàm præsidium. Ibi una ex turmis ad portam relicta, ne excludi subsequens equitatus posset, media urbe ac per forum manu Eurylochum tenens, multis occurrentibus gratulantibusque domum deduxit. Mox equitum plena urbs erat, & loca opportuna occupabantur. tum in domos missi, qui principes adversæ factionis interficerent. Ita Demetrias Ætolorum facta est.

XXXV. Lacedæmone non urbi vis afferenda, sed tyrannus dolo capiendus erat: quem spoliatum maritimis oppidis à Romanis, tunc intra mœnia etiam Lacedæmonis ab Achæis compulsus, qui occupasset occidere, eum totius gratiam rei apud Lacedæmonios laturum. Caussam mittendi ad eum habuerunt, quòd fatigabat precibus, ut auxilia sibi, quum illis auctori-
bus rebellasset, mitterentur. Mille pedites Alexameno dati sunt, & triginta delecti ex juventute equites. Iis à prætore Damocrito in concilio arcano gentis, de quo ante dictum est, denunciatum, *Ne se ad bellum Achæicum, aut rem ullam, quam sua quisque opinione præcipere posset, crederent missos esse. quicquid Alexame-*

num

num res monuisset subiti consilii capere; ad id, quamvis inopinatum, temerarium, audax, obedienter exsequendum parati essent, ac pro eo acciperent, tanquam ad id unum agendum missos ab domo se scirent. Cum his ita præparatis Alexamenus ad tyrannum venit, quem adveniens extemplo spei implevit: Antiochum jam in Europam transisse, mox in Græcia fore; terras, maria, armis, viris completurum. Non cum Philippo rem esse credituros Romanos. numerum iniri peditum equitumque, ac navium non posse: elephantorum aciem conspectu ipso debellaturam. Ætolos toto suo exercitu paratos esse venire Lacedæmonem, quum res poscat: sed frequentes armatos ostendere advenienti regi voluisse. Nabidi quoque & ipsi faciendum esse, ut quas haberet copias, non sineret sub testis marcescere otio: sed educeret, & in armis decurrere cogeret, simul animos acueret & corpora exerceret. consuetudine leviozem laborem fore, & comitate ac benignitate ducis etiam non injucundum fieri posse. Educi inde frequenter ante urbem in campum ad Eurotam amnem cœpere. Satellites tyranni media fere in acie consistebant. tyrannus cum tribus summum equitibus, inter quos plerumque Alexamenus erat, ante signa vectabatur, cornua extrema invisens. in dextro cornu Ætoli erant, & qui ante auxiliares tyranni fuerant, & qui venerant mille cum Alexameno. Fecerat sibi morem Alexamenus, nunc cum tyranno inter paucos ordines circumeundi, monendique eum quæ in rem esse videbantur; nunc in dextrum cornu ad suos adequitandi; mox inde, velut imperato quod res poposcisset, recipiendi se ad tyrannum. Sed quem diem patrando facinori statuerat, eo paullisper cum tyranno vectatus, quum ad suos concessisset, cum equitibus ab domo secum missis, *Agenda*, inquit, *res est, juvenes, audendaque, quam me duce impigre exsequi jussi estis. Parate animos dextrasque, ne quis in eo, quod me viderit*
facientem,

facientem, cesset. Qui cunctatus fuerit, & suum consilium meo interponet, sciat sibi reditum ad penates non esse. Horror cunctos cepit: & meminerant, cum quibus mandatis exissent. Tyrannus ab lævo cornu veniebat. Ponere hastas equites Alexamenus jubet, & se intueri. colligit & ipse animum confusum tantæ cogitatione rei. Posteaquam appropinquabat, impetum facit: & transfixo equo, tyrannum deturbat. Jacentem equites confodiunt. multis frustra in loricam ictibus datis, tandem in nudum corpus vulnera pervenerunt: & priusquam à media acie succurreretur, exspiravit.

XXXVI. Alexamenus cum omnibus Ætolis citato gradu ad regiam occupandam pergit. Corporis custodes, quum res in oculis gereretur, pavor primò cepit: deinde, posteaquam abire Ætolorum agmen videre, concurrunt ad relictum tyranni corpus: & spectatorum turba ex custodibus vitæ mortisque ultoribus facta. Nec movisset se quisquam, si extemplo positis armis vocata in concionem multitudo fuisset, & oratio habita temporis conveniens, frequentibus inde retentis in armis Ætolis, sine injuria cujusquam: sed, ut oportuit in consilio fraude cœpto, omnia in maturandam perniciem eorum, qui fecerant, sunt acta. Dux regia inclusus diem ac noctem in scrutandis thesauris tyranni consumpsit: Ætoli velut capta urbe, quam liberâsse videri volebant, in prædam versi. Simul indignitas rei, simul contemptus, animos Lacedæmoniis ad cœundum fecit. alii dicere, exturbandos Ætolos, & libertatem, quum restitui videretur, interceptam repetendam. alii, ut caput agendæ rei esset, regii generis aliquem in speciem assumendum. Laconicus ejus stirpis erat puer admodum, educatus cum liberis tyranni. eum in equum imponunt, & armis arreptis Ætolos vagos per urbem cædunt. Tum regiam invadunt.

ibi

ibi Alexamenum, cum paucis resistentem, obtruncant. Ætoli circa Chalcicecon (Minervæ est templum æreum) congregati cæduntur. Pauci armis abjectis, pars Tegeam, pars Megalopolim perfugiunt. ibi comprehensi à magistratibus sub corona venierunt.

XXXVII. Philopœmen, audita cæde tyranni, profectus Lacedæmonem, quum omnia turbata metu invenisset; evocatis principibus, & oratione habita, qualis habenda ab Alexameno fuerat, societati Achæorum Lacedæmonios adjunxit: eo etiam facilius, quòd ad idem fortè tempus A. Atilius cum quatuor & viginti quinquere milibus ad Gythium accessit. iisdem diebus circa Chalcidem Thoas per Euthymidam principem, pulsum opibus eorum qui Romanæ societatis erant post T. Quintii legatorumque adventum, & Herodorum Cianum mercatorem, sed potentem Chalcide propter divitias, præparatis ad prodicionem iis qui Euthymidæ factionis erant, nequaquam eandem fortunam, qua Demetrias per Eurylochum occupata erat, habuit. Euthymidas ab Athenis (eum domicilio delegerat locum) Thebas primùm, hinc Salganea processit. Herodorus ad Thronium, inde haud procul in Maliaco sinu duo millia peditum; & Thoas ducentos equites, onerarias leves ad triginta habebat. eas cum sexcentis peditibus Herodorus trajicere in Insulam Atalantam jussus: ut inde, quum pedestres copias appropinquare jam Aulidi atque Euripo sensisset, Chalcidem trajiceret. ipse ceteras copias nocturnis maximè itineribus, quanta poterat celeritate, Chalcidem ducebat.

XXXVIII. Miétio & Xenoclides, penes quos tum summa rerum pulso Euthymida Chalcide erat, seu ipsi per se suspicati, seu indicata re, primò pavidi, nihil usquam spei nisi in fuga ponebant: deinde, posteaquam resedit terror, & prodi & deferi non patriam modò

modò sed etiam Romanorum societatem cernebant, consilio tali animum adjecerunt. Sacrum anniversarium eo fortè tempore Eretriæ Amarynthidis Dianæ erat, quod non popularium modò, sed Carystiorum etiam cœtu celebratur. Eò miserunt qui orarent Eretrientes Carystiosque, *Ut & suarum fortunarum in eadem insula geniti misererentur, & Romanam societatem respicerent, ne sicerent Ætolorum Chalcidem fieri. Eubæam habituros, si Chalcidem habuissent. Græves fuisse Macedonas dominos, multo minùs tolerabiles futuros Ætolos.* Romanorum maximè respectus civitates movit; & virtutem nuper in bello, & in victoria justitiam benignitatemque expertas. itaque quod roboris in juventute erat, utraque civitas armavit misitque. His tuenda mœnia Chalcidis oppidani quum tradidissent, ipsi, omnibus copiis transgressi Euripum, ad Salganea posuerunt castra. inde caduceator primùm, deinde legati ad Ætolos missi percunctatum, quo suo dicto factovè focii atque amici ad se oppugnandos venirent? Respondit Thoas, dux Ætolorum, *Non ad oppugnandos, sed ad liberandos ab Romanis venire sese. Splendidiore nunc eos catena, sed multo graviore vinctos esse, quàm quum præsidium Macedonum in arce habuissent. Se vero negare Chalcidenses aut servire ulli, aut præsidio cujusquam egere.* Ita digressi ex colloquio legati ad suos. Thoas & Ætoli, ut qui spem omnem in eo, ut improvisò opprimerent, habuissent, ad justum bellum oppugnationemque urbis mari ac terra munitæ haudquaquam pares, domum rediere. Euthymidas, posteaquam castra popularium ad Salganea esse, profectosque Ætolos audivit, & ipse à Thebis Athenas rediit. Et Herodorus quum per aliquot dies intentus ab Atalanta signum nequicquam expectasset, missa speculatoria nave, ut, quid moræ esset, sciret; posteaquam rem omisiam à fociis vidit, Thronium, unde venerat, repetit.

XXXIX. Quintius quoque his auditis, ab Corintho veniens navibus, in Chalcidis Euripo Eumeni regi occurrit. Placuit, quingentos milites præsidii causa relinqui Chalcide ab Eumene rege: ipsum Athenas ire. Quintius, quo profectus erat, Demetriadem contendit; ratus Chalcidem liberatam momenti aliquid apud Magnetas, ad repetendam societatem Romanam, facturam. & ut præsidii aliquid esset suæ partis hominibus, Eunomo prætori Thessalorum scripsit, ut armaret juventutem. & Villium ad Demetriadem præmisit ad tentandos animos: non aliter, nisi pars aliqua inclinaret ad respectum pristinae societatis, rem aggressurus. Villius quinquere mi nave ad ostium portus est invehitus. Eò multitudo Magnetum omnis quum se effudisset, quæsit Villius, utrum ad amicos an ad hostes sese venisse mallerent? Respondit Magnetarches Eurylochus, *Ad amicos venisse eum: sed abstinere portu, & finire Magnetas in concordia & libertate esse, nec per colloqui speciem multitudinem sollicitaret.* Altercatio inde, non sermo fuit: quum Romanus, ut ingratos, increparet Magnetas, imminentesque prædiceret clades; multitudo obstreperet, nunc senatum, nunc Quintium accusando. Ita irritum incepto Villius ad Quintium sese recepit. At Quintius, nuncio ad prætorem missio, ut reduceret domum copias, ipse navibus Corinthum rediit.

XL. Abstulerunt me velut de spatio Græciæ res immixtæ Romanis: non quia ipsas operæ pretium esset perscribere, sed quia causæ fuerunt cum Antiocho belli. Consulibus designatis (inde namque diverteram) L. Quintius & Cn. Domitius consules in provincias profecti sunt: Quintius in Ligures, Domitius adversus Boios. Boii quieverunt, atque etiam senatus eorum cum liberis, & præfecti cum equitatu (summa omnium mille & quingenti) consuli dederunt sese.

Ab

Ab altero consule ager Ligurum latè est vastatus: castellaque aliquot capta: unde non præda modò omnis generis cum captivis parta, sed recepti quoque aliquot cives sociique, qui in hostium potestate fuerant. Eodem hoc anno Vibonem colonia deducta est ex senatusconsulto plebei que scito. tria millia & septingenti pedites ierunt, trecenti equites. Triumviri deduxerunt eos, Q. Nævius, M. Minutius, M. Furius Crassipes. quina dena jugera agri data in singulos pedites sunt: duplex equitibus. Bruttiorum proximè fuerat ager: Bruttii ceperant de Græcis. Romæ per idem tempus duo maximi fuerunt terrores; diutinus alter, sed segnior. Terra dies duodequadraginta movit. per totidem dies ferriæ in sollicitudine ac metu fuere. in triduum ejus rei causa supplicatio habita est. Ille non pavor vanus, sed vera multorum clades fuit. incendio à foro Boario orto, diem noctemque ædificia in Tiberim versa arserunt, tabernæque omnes cum magni pretii mercibus conflagraverunt.

XLI. Jam fere in exitu annus erat: & indies magis fama de Antiochi bello, & cura Patribus crescebat. itaque de provinciis magistratuum designatorum, quo intentiores essent omnes, agitari cœptum est. Decrevere, ut consulibus Italia, & quò senatus censuisset (jam esse bellum adversus Antiochum regem omnes sciebant) provinciæ essent. cujus ea fors esset, quatuor millia peditum civium Romanorum, & trecenti equites, sex millia sociùm Latini nominis cum quadringentis equitibus sunt decreta. Eorum delectum habere L. Quintius consul jussus: ne quid moraretur, quo minus consul novus, quò senatus censuisset, extemplo proficisci posset. Item de provinciis prætorum decretum est: prima ut fors duæ, urbanaque & inter cives ac peregrinos
juris-

jurisdictio esset: secunda Bruttii: tertia classis, ut navigaret quò senatus censuisset: quarta, Sicilia: quinta, Sardinia: sexta, Hispania ulterior. Imperatum præterea L. Quintio consuli est, ut duas legiones civium Romanorum novas conscriberet: & sociùm ac Latini nominis viginti millia peditum, & octingentos equites. eum exercitum prætori, cui Bruttii provincia evenisset, decreverunt. *Ædes* duæ Jovi eo anno in Capitolio dedicatæ sunt. Voverat L. Furius Purpureo prætor Gallico bello unam, alteram consul. dedicavit Q. Marcius Ralla duumvir. Judicia in fœneratores eo anno multa severè sunt facta; accusantibus privatos ædilibus curulibus, M. Tuccio & P. Junio Bruto. de multa damnatorum quadrigæ inauratæ in Capitolio positæ in cella Jovis supra fastigium ædiculæ, & duodecim clypea inaurata. & iidem porticum extra portam Trigemina inter lignarios fecerunt.

XLII. Intentis in apparatus novi belli Romanis, ne ab Antiocho quidem cessabatur. Tres eum civitates tenebant; Smyrna, & Alexandria Troas, & Lampascus. quas neque vi expugnare ad eam diem poterat, neque conditionibus in amicitiam perlicere, neque à tergo relinquere trajiciens ipse in Europam volebat. Tenuit eum & de Annibale deliberatio. & primò naves apertæ, quas cum eo missurus in Africam fuerat, moratæ sunt. deinde an omnino mittendus esset, consultatio mota est: maxime à Thoante *Ætolo*, qui, omnibus in Græcia tumultu completis, Demetriadem afferebat in potestate esse. & quibus mendaciis de rege, multiplicando verbis copias ejus, erexerat multorum in Græcia animos, iisdem & regis spem inflabat: omnium votis eum arcessi; concursum ad littora futurum, unde classem regiam prospexissent. Hic idem ausus de Annibale
est

est movere sententiam prope jam certam regis: nam neque dimittendam partem navium à classe regia censebat: neque si mittendæ naves forent, minùs quempiam ei classi, quàm Annibalem, præficiendum. Exsullem illum & Pænum esse, cui mille indies nova consilia vel fortuna sua vel ingenium possit facere. & ipsam eam gloriam belli, qua velut dote Annibal concilietur, nimiam in præfecto regio esse. regem conspici, regem unum ducem, unum imperatorem videri debere. Si classem, si exercitum amittat Annibal, idem damni fore, ac si per alium ducem amittantur. si quid prospere eveniat, Annibalis eam, non Antiochi, gloriam fore. Si verò universo bello vincendi Romanos fortuna detur; quam spem esse, sub rege victurum Annibalem uni subiectum, qui patriam prope non tulerit? Non ita se à juventa eum gessisse, spe animoque complexum orbis terrarum imperium, ut in senectute dominum laturus videatur. Nihil opus esse regi Annibale duce: comite & consiliario eodem ad bellum uti posse. modicum fructum ex ingenio tali neque gravem neque inutilem fore. si summa petantur, & dantem & accipientem prægravatura.

XLIII. Nulla ingenia tam prona ad invidiam sunt, quàm eorum qui genus ac fortunam suam animis non æquant: quia virtutem & bonum alienum oderunt. Extemplo consilium mittendi Annibalis, quod unum in principio belli utiliter cogitatum erat, abjectum est. Demetriadis maximè defectione ab Romanis ad Ætolos elatus, non ultra differre profectionem in Græciam constituit. Priusquam solveret naves, Ilium à mari ascendit, ut Minervæ sacrificaret. Inde ad classem regressus proficiscitur quadraginta tectis navibus, apertis sexaginta: & ducentæ onerariæ cum omnis generis commeatu, bellicoque alio apparatu sequebantur. Imbrum primò
infu-

insulam tenuit: inde Scyathum trajecit. Ubi collectis in alto quæ dissipatæ erant navibus, ad Pteleum primùm continentis venit. Ibi Eurylochus ei Magnetarches, principesque Magnetum ab Demetriade occurrerunt. quorum frequentia lætus, die postero in urbis portum navibus est investus. Copias haud procul inde exposuit. decem millia perditum fuere, & quingenti equites, sex elephanti: vix ad Græciam nudam occupandam satis copiarum, nedum ad sustinendum Romanum bellum. Ætoli posteaquam Demetriadem venisse Antiochum allatum est, concilio indicto, decretum, quo arcesferent eum, fecerunt. Jam profectus ab Demetriade rex, quia ita decreturos sciebat, Phaleram in sinum Maliacum processerat. inde decreto accepto Lamiæ venit, exceptus ingenti favore multitudinis, cum plausibus clamoribusque, & quibus aliis lætitia effusa vulgi significatur.

XLIV. In concilium ut ventum est, ægre à Phænea prætore principibusque introductus, inde facto silentio rex dicere orsus. Prima ejus oratio fuit excusantis, *Quòd tanto minoribus spe atque opinione omnium copiis venisset. Id suæ impensæ erga eos voluntatis maximum debere indicium esse, quòd nec paratus satis ulla re, & tempore ad navigandum immaturo, vocantibus legatis eorum, haud gravatè obsecutus esset; credidissetque, quum se vidissent Ætoli, omnia vel in se uno posita præsidia existimaturos esse. Ceterum eorum quoque se, quorum expectatio destituta in præsentia videatur, spem abunde expleturum. Nam simul primum anni tempus navigabile præbisset mare, omnem se Græciam armis, viris, equis, omnem oram maritimam classibus completurum: nec impensæ, nec labori, nec periculo parsurum, donec, depulso cervicebus eorum imperio Romano, liberam verè Græciam atque in ea principes*

cipes Ætolos fecisset. cum exercitibus commeatus quoque omnis generis ex Asia venturos. In præsentia curæ esse Ætolis debere, ut copia frumenti suis & annona tolerabilis rerum aliarum suppeditetur.

XLV. In hanc sententiam rex cum magno omnium assensu locutus discessit. Post discesum regis inter duos principes Ætolorum, Phæneam & Thoaem, contentio fuit. Phæneas, reconciliatore pacis, & disceptatore de iis, quæ in controversia cum populo Romano essent, utendum potiùs Antiocho censebat, quàm dūce belli. *Adventum ejus & majestatem ad verecundiam faciendam Romanis vim majorem habituram, quàm arma. Multa homines, ne belarent, voluntate remittere, quæ bello & armis cogi non possint. Thoas negare, Paci studere Phæneam: sed discutere apparatus belli velle, ut tædiō & impetus relanguescat regis, & Romani tempus ad comparandum habeant. Nihil enim æqui ab Romanis impetrari posse, toties legationibus missis Romam, toties cum ipso Quintio disceptando satis expertum esse: nec, nisi abscissa omni spe, auxilium Antiochi imploratos fuisse. Quo celerius spe omnium oblato, non esse elanguescendum, sed orandum potiùs regem; ut quoniam, quod maximum fuerit, ipse vindex Græciæ venerit, copias quoque terrestres navalesque arcessat. Armatum regem aliquid impetraturum: inermem non pro Ætolis modo, sed ne pro se quidem ipso, momenti ullius futurum apud Romanos. Hæc vicit sententia, imperatoremque regem appellandum censuerunt: & triginta principes, cum quibus, si qua vellet, consultaret, delegerunt.*

XLVI. Ita dimisso concilio multitudo omnis in suas civitates dilapsa est. Rex postero die cum apocletis eorum, unde bellum ordiretur, consultabat. Optimum visum est, Chalcidem, frustra nuper ab Ætolis tentatam, primùm aggredi: & cele-
ritate

ritate in eam rem magis, quàm magno conatu & apparatu, opus esse. Itaque cum mille peditibus rex, qui ab Demetriade secuti erant, profectus per Phocidem est. & alio itinere principes Ætoli, juniorum paucis evocatis, ad Chæroneam occurrerunt: & decem constratis navibus secuti sunt. Rex ad Salganea castris positus, navibus ipse cum principibus Ætolorum Euripum trajecit. & quum haud procul portu egressus esset, magistratus quoque Chalcidensium & principes ante portam processerunt. Pauci utrimque ad colloquium congressi sunt. Ætoli magnopere suadere, ut *salva Romanorum amicitia regem quoque assumerent socium atque amicum. Neque enim eum inferendi belli, sed liberandæ Græciæ causa in Europam trajecisset; liberandæ verò re, non verbis & simulatione, quod fecissent Romani. Nihil autem utilius Græciæ civitatibus esse, quàm utramque complecti amicitiam. ita enim ab utriusque injuria tutam alterius, semper præsidio & fiducia fore. Nam, si non recepissent regem, viderent quid patiendum iis exemplo foret: quum Romanorum procul auxilium, hostis Antiochus, cui resistere viribus suis non possent, ante portas esset. Ad hæc Mictio, unus ex principibus, Mirari se dixit, ad quos liberandos Antiochus, relicto regno suo, in Europam trajecisset. Nullam enim civitatem se in Græcia nōsse, quæ aut præsidium habeat, aut stipendium Romanis pendat: aut, fœdere iniquo alligata, quas nō lit leges patiatur. Itaque Chalcidenses neque vindice libertatis ullo indigere, quum liberi sint: neque præsidio, quum pacem ejusdem populi Romani beneficio & libertatem habeant. Amicitiam regis non aspernari, neque ipsorum Ætolorum. id primum eos pro amici, facturos, si insula excedant, atque abeant. nam ipsi, certum esse, non modò non recipere manibus, sed ne societatem*

cietatem quidem ullam pacisci, nisi ex auctoritate Romanorum.

XLVII. Hæc renunciata regi ad naves, ubi restiterat, quum essent; in præsentia (neque enim iis venerat copiis, ut vi agere quicquam posset) reverti Demetriadem placuit. ibi, quoniam primum inane cœptum evasisset, consultare cum Ætolis rex, quid deinde fieret. Placuit Achæos & Amynandrum regem Athamanum tentare. Bœotorum gentem aversam ab Romanis jam inde à Brachyllæ morte, & quæ secuta eam fuerant, censebant. Achæorum Philopœmenem principem, æmulatione gloriæ in bello Laconum, infestum invisumque esse Quintio credebant. Amynander uxorem Apamiam, filiam Alexandri cujusdam Megalopolitani, habebat: qui, se oriundum à Magno Alexandro ferens, filiis duobus Philippum atque Alexandrum & filiæ Apamiam nomina imposuerat: quam, regiis inclytam nuptiis, major ex fratribus Philippus secutus in Athamaniam fuerat. Hunc fortè ingenio vanum Ætoli & Antiochus impulerant in spem, quòd is vere regum stirpis esset regni Macedoniæ, si Amynandrum Athamanesque Antiocho conjunxisset. & ea vanitas promissorum non apud Philippum modò, sed etiam apud Amynandrum valuit.

XLVIII. In Achaia legatis Antiochi Ætolorumque coram T. Quintio Ægii datum est concilium. Antiochi legatus prior, quàm Ætoli, est auditus. Is, ut plerique quos opes regiæ alunt, vaniloquus, maria terrasque inani sonitu verborum complevit. Equitum innumerabilem vim trajici Hellesponto in Europam: partim loricated, quos cataphractos vocant: partim sagittis ex equo utentes, & à quo nihil satis testi sit, aversos refugiente equo certius figentes. His equestribus

bus copiis (quanquam vel totius Europæ exercitus in unum coacti obrui possent) adiciebat multiplices copias peditum, & nominibus quoque gentium vix fando auditis terrebat: Dabas, Medos, Elimæosque & Caddusios appellans. Navalium verò copiarum, quas nulli portus capere in Græcia possent, dextrum cornu Sidonios & Tyrios, sinistrum Aradios & ex Pamphylia Sidetas tenere; quas gentes nullæ unquam nec arte nec virtute navali æquassent. Jam pecuniam, jam alios belli apparatus referre supervacaneum esse. scire ipsos, abundasse semper auro regna Asiæ. Itaque non cum Philippo nec Annibale rem futuram Romanis; principe altero civitatis, altero Macedoniæ tantum regni finibus incluso: sed cum magno Asiæ totius partisque Europæ rege. Eum tamen, quanquam ab ultimis orientis terminis ad liberandam Græciam veniat, nihil postulare ab Achæis, in quo fides eorum adversus Romanos priores socios atque amicos lædatur. Non enim, ut secum adversus eos arma capiant, sed ut neutri parti sese conjungant, petere. Pacem utrique parti, quod medios deceat amicos, optent: bello se non interponant. Idem ferme & Ætolorum legatus Archidamus petiit: ut, quæ facillima & tutissima esset, quietem præstarent; spectatoresque belli, fortunarum alienarum eventum sine ullo discrimine rerum suarum opperirentur. Profectus deinde est intemperantia linguæ in maledicta, nunc communiter Romanorum, nunc propriè ipsius Quintii: ingratos appellans, & exprobrans non victoriam modò de Philippo virtute Ætolorum partam, sed etiam salutem: ipsumque & exercitum sua opera servatos. Quo enim illum unquam imperatoris functum officio esse? auspicantem immolantemque, & vota nuncupantem sacrificuli vatis modo in acie vidisse; quum ipse corpus suum pro eo telis hostium objiceret.

XLIX. Ad ea Quintius, Coram quibus magis, quàm apud quos verba faceret, dicere, Archidamum rationem habuisse. Achæos enim probè scire, Ætolorum omnem ferociam in verbis, non in factis esse: & in conciliis magis concionibusque, quàm in acie, apparere. itaque parvi Achæorum existimationem, quibus notos esse se scirent, fecisse: legatis regis, & per eos absenti regi eum se jactasse. Quòd si quis antea ignorasset, quæ res Antiochum & Ætolos conjunxisset, ex legatorum sermone potuisse apparere: mentiendo invicem jactandoque vires, quas non haberent, inflassè vana spe, atque inflatos esse: dum ii ab se Philippum victum, sua virtute protectos Romanos, & quæ modò audiebatis, narrant; vos ceterasque civitates & gentes, suam sectam esse secuturos: rex contra peditum equitumque nubes jactat, & consternit maria suis classibus. Est autem res similima cæne Chalcidensis hospitii mei, hominis & boni & sciti convivatoris. apud quem solstitiali tempore comiter accepti, quum miraremur, unde illi eo tempore anni tam multa & varia venatio; homo, non quàm isti sunt gloriosus, renidens, condimentis ait varietatem illam & speciem ferinæ carnis ex mansueta sue factam. Hoc dici aptè in copias regis, quæ paullo ante jactatæ sint, posse. Varia enim genera armorum, & multa nomina gentium inauditarum, Dabas, & Medos, & Cadusios, Elymæos; Syros omnes esse: haud paullo mancipiorum melius, propter servilia ingenia, quàm militum genus. Et utinam subjicere oculis vestris, Achæi, pessimam concursationem regis magni ab Demetriade, nunc Lamiam in concilium Ætolorum, nunc Chalcidem. Videretis vix duarum male plenarum legiuncularum instar in castris regis. videretis regem nunc mendicantem prope frumentum ab Ætolis, quod militi admetiatur: nunc mutuas pecunias scænere in stipendium quærentem: nunc
ad

ad portas Chalcidis stantem: & mox inde exclusum, nihil aliud quàm Aulide atque Euripo spectatis, in Ætoliā redeuntem. Male crediderunt & Antiochus Ætolis & Ætoli regiæ vanitati. Quo minùs vos decipi debetis, sed expertæ toties spectatæque Romanorum fidei credere. Nam quod optimum esse dicant, non interponi vos bello: nihil imò tam alienum rebus vestris est. quippe sine gratia, sine dignitate præmium victoris eritis.

L. Nec absurdè adversus utrosque respondisse visus est. & facile erat orationem apud faventes æquis auribus accipi. nulla enim nec disceptatio nec dubitatio fuit, quin omnes, eosdem genti Achæorum hostes & amicos, quos populus Romanus censuisset, judicarent: bellumque & Antiocho & Ætolis nunciari juberent. Auxilia etiam, quò censuit Quintius, quingentorum militum Chalcidem, quingentorum Piræeum extemplo miserunt. Erat enim haud procul seditione Athenis res, trahentibus ad Antiochum quibusdam spe largitionum venalem pretio multitudinem, donec ab iis, qui Romanæ partis erant, Quintius est accitus, &, accusante Leonte quodam, Apollodorus auctor defectionis damnatus atque in exilium est ejectus. Et ab Achæis quidem cum tristi responso legatio ad regem rediit. Bœoti nihil certi responderunt. quum Antiochus in Bœotiam venisset, tum quid sibi faciundum esset, se deliberaturos esse. Antiochus, quum ad Chalcidis præsidium & Achæos & Eumenem regem misisse audisset, maturandum ratus, ut & prævenirent sui, & venientes, si possent, exciperent, Menippum cum tribus ferme millibus militum & cum omni classe Polyxenidam mittit. ipse paucos post dies sex millia suorum militum, & ex ea copia, quæ Lamiae repente

colligi potuit, non ita multos Ætolos ducit. Achæi quingenti & ab Eumene rege modicum auxilium missum, duce Xenoclide Chalcidensi, nondum obsessis itineribus, tutò transgressi Euripum, Chalcidem pervenerunt. Romani milites, quingenti ferme & ipsi, quum jam Menippus castra ante Salganea ad Hermæum, qua transitus ex Bœotia in Eubœam insulam est, haberet, venerunt. Mictio erat cum iis, legatus à Chalcide ad Quintium ad id ipsum præsidium petendum missus. qui, posteaquam obsessas ab hostibus fauces vidit, omissio ad Aulidem itinere, Delium convertit, ut inde in Eubœam transmissurus.

LI. Templum est Apollinis Delium, imminens mari: quinque millia passuum à Tanagra abest. minus quatuor millium inde in proxima Eubœæ est mari trajectus. Ubi & in fano lucoque, ea religione & eo jure sancto, quo sunt templa, (asyla Græci appellant) & nondum aut indicto bello, aut ita commisso, ut strictos gladios, aut sanguinem usquam factum audissent, quum per magnum otium milites, alii ad spectaculum templi lucique versi, alii in littore inermes vagarentur, magna pars per agros lignatum pabulatumque dilapsa esset; repente Menippus palatos passim aggressus eos cecidit, ad quinquaginta vivos cepit. perpauca effugerunt: in quibus Mictio parva oneraria nave exceptus. Ea res Quintio Romanisque, sicut jactura militum molesta, ita ad jus inferendi Antiocho belli adjecisse aliquantum videbatur. Antiochus, admoto ad Aulidem exercitu, quum rursus oratores, partim ex suis, partim Ætolos, Chalcidem misisset, qui eadem illa quæ nuper cum minis gravioribus agerent, nequicquam contra Mictione & Xenoclide tendentibus, facile tenuit, ut portæ sibi aperirentur. Qui Ro-
manæ

manæ partis erant, sub adventum regis urbe exceſſerunt. Achæorum & Eumenis milites Salganea tenebant. Et in Euripo caſtellum Romani milites pauci cuſtodizæ cauſſa loci communiebant. Salganea Menippus, rex ipſe caſtellum Euripi oppugnare eſt adortus. Priores Achæi & Eumenis milites, pacti ut ſine fraude liceret abire, præſidio exceſſerunt. pertinaciùs Romani Euripum tuebantur. Hi quoque tamen quum terra marique obſiderentur, & jam machinas tormentaſque comportari viderent, non tulere obſidionem. Quum id quod caput erat Eubœæ teneret rex, ne ceteræ quidem ejus inſulæ urbes imperium abnuerunt. magnoque principio ſibi orſus bellum videbatur, quod tanta inſula & tot opportunitæ urbes in ſuam ditionem veniſſent.



LIBER XXXVI.

EPI T O M E.

I, &c.  Eferuntur apparatus Romanorum contra Antiochum regem, V, &c. et Antiochi contra Romanos. VII. Annibalis de adminiſtrando bello ſententia. XIX, XX. Manius Acilius Glabrio conſul Antiochum apud Thermopylas victum Græcia expulit. XXII, &c. Idemque Ætolos ſubegit. XXXVIII, XXXIX, XL. P. Cornelius Scipio Nafica Conſul Boios Gallos victos in deditionem accepit, & de iis triumphavit. XLI, &c. Præterea navalia certamina proſpera adverſus præfectos Antiochi regis referuntur.

I.



Ublum Cornelium Cn. filium Scipionem & Manium Acilium Glabrimonem consules, inito magistratu, Patres, priusquam de provinciis agerent, res divinas facere majoribus hostiis iusserunt in omnibus fanis, in quibus lectisternium majorem partem anni fieri solet: precarique, quod senatus de novo bello in animo haberet, ut ea res senatui populoque Romano bene ac feliciter eveniret. Ea omnia sacrificia læta fuerunt: primisque hostiis perlitatum est: & ita aruspices responderunt, eo bello terminos populi Romani propagari, victoriam ac triumphum ostendi. Hæc quum renunciata essent, solutis religione animis, Patres rogationem ad populum ferri iusserunt: *Vellent juberentne cum Antiocho rege, quique sceleratam ejus secuti essent, bellum iniri: si ea rogatio perlata esset, tum, si ita videretur consulibus, rem integram ad senatum referrent.* P. Cornelius eam rogationem per tulit. tum senatus decrevit, ut consules Italiam & Græciam provincias sortirentur: cui Græcia evenisset, ut præter eum numerum militum, quem L. Quintius in eam provinciam ex auctoritate senatus scripisset imperâissetve, ut eum exercitum acciperet, quem M. Bæbius prætor anno prior ex senatusconsulto in Macedoniam trajecisset. Et extra Italiam permissum, ut, si res postulâisset, auxilia ab sociis ne supra quinque millium numerum acciperet. L. Quintium superioris anni consulem legari ad id bellum placuit. Alter consul, cui Italia provincia evenisset, cum Boiis jussus bellum gerere, utro exercitu mallet ex duobus, quos superiores consules habuissent; alterum ut mitteret Romam, eaque urbanæ legiones essent paratæ, quò senatus censuisset.

II.

II. His ita in senatu ad id, quæ cujus provincia foret, decretis, tum demum fortiri consules placuit. Acilio Græcia, Cornelio Italia evenit. Certa deinde sorte senatusconsultum factum est, quod populus Romanus eo tempore duellum jussisset cum rege Antiocho esse, quique sub imperio ejus essent: ut ejus rei causa supplicationem imperarent consules; utique Manius Acilius consul ludos magnos Jovi voveret, & dona ad omnia pulvinaria. Id votum in hæc verba præeunte P. Licinio pontifice maximo consul nuncupavit: Si duellum, quod cum Antiocho rege sumi populus jussit, id ex sententia senatus populi que Romani confectum erit, tum tibi Jupiter populus Romanus ludos magnos dies decem continuos faciet, donaque ad omnia pulvinaria dabuntur de pecunia, quantam senatus decreverit. Quisquis magistratus eos ludos quando ubique faxit, hi ludi rectè facti, donaque data rectè sunt. Supplicatio inde ab duobus consulibus edicta per biduum fuit. Consulibus fortitis provincias, extemplo & prætores fortiti sunt. M. Junio Bruto jurisdictio utraque evenit: A. Cornelio Mammulæ Bruttii, M. Æmilio Lepido Sicilia, L. Oppio Salinatori Sardinia, C. Livio Salinatori classis, L. Æmilio Paullo Hispania ulterior. His ita exercitus decreti. A Cornelio novi milites, conscripti priore anno ex senatusconsulto à L. Quintio consule, dati sunt: jussusque tueri omnem oram circa Tarentum Brundisiumque. L. Æmilio Paullo in ulteriorem Hispaniam, præter eum exercitum quem à M. Fulvio proprætore accepturus esset, decretum, ut novorum militum tria millia duceret. & trecentos equites; ita ut in iis duæ partes socium Latini nominis, tertia civium Romanorum esset. Idem supplementi ad C. Flaminium, cui imperium prorogabatur, in Hispaniam citeriorem est

missum. M. Æmilius Lepidus à L. Valerio, cui successurus esset, simul provinciam exercitumque accipere jussus: L. Valerium, si ita videretur, proprætorem in provincia retinere; & provinciam ita dividere, ut una ab Agrigento ad Pachynum esset: altera à Pachyno Tyndarium. Eam maritimam oram L. Valerius viginti navibus longis custodiret. Eidem prætori mandatum, ut duas decumas frumenti exigeret: id ad mare comportandum, devehendumque in Græciam curaret. Idem L. Oppio de alteris decumis exigendis in Sardinia imperatum. Ceterum non in Græciam, sed Romam id frumentum portari placere. C. Livius prætor, cui classis evenerat, cum triginta navibus paratis trajicere in Græciam primo quoque tempore jussus, & ab Atilio naves accipere. veteres naves, quæ in navalibus erant, ut reficeret & armaret, M. Junio prætori negotium datum est, & in eam classem socios navales libertinos legeret.

III. Legati terni in Africam ad Carthaginenses, & in Numidiam ad frumentum rogandum, quod in Græciam portaretur, missi: pro quo pretium solveret populus Romanus. Adeoque in apparatus curamque ejus belli civitas intenta fuit, ut P. Cornelius consul ediceret, *Qui senatores essent, quibusque in senatu sententiam dicere liceret, quique minores magistratus essent, ne quis eorum longius ab urbe Roma abiret, quàm unde eo die redire posset; neve uno tempore quinque senatores ab urbe Roma abessent.* In comparando impigre classem C. Livium prætorem contentio orta cum colonis maritimis paullisper tenuit. Nam quum cogerentur in classem, tribunos plebis appellârunt. ab iis ad senatum reiecti sunt. Senatus ita, ut ad unum omnes consentirent, decrevit,
vacatio-

vacationem rei navalis his colonis non esse. Ostia, & Fregenzæ, & Castrum novum, & Pyrgi, & Antium, & Tarracina, & Minturnæ, & Sinuessæ fuerunt, quæ cum prætore de vacatione certaverunt. Consul deinde Manius Acilius ex senatusconsulto ad collegium fecialium retulit: *Ipsine utique regi Antiocho indiceretur bellum, an satis esset ad præsidium aliquod ejus nunciare? & num Ætolis quoque separatim indici juberent bellum? & num prius societas eis & amicitia renuncianda esset, quàm bellum indicendum?* Feciales responderunt: *Jam ante sese, quum de Philippo consulerentur, decreße; nihil referre, ipsi coram, an ad præsidium nunciaretur. Amicitiam renunciatam videri, quum legatis, toties repetentibus res, nec reddi nec satisfieri æquum censuissent. Ætolos ultro sibi bellum indixisse, quum Demetriadem, sociorum urbem, per vim occupassent: Chalcidem terra marique oppugnatum issent: regem Antiochum in Europam, ad bellum populo Romano inferendum traduxissent.* Omnibus jam satis comparatis, Manius Acilius consul edixit: *Ut quos L. Quintius milites conscripsisset, & quos sociis nominique Latino imperasset, quos secum in provinciam ire oporteret, & tribuni militum legionis primæ & tertiæ, uti omnes Brundisium Idibus Maiis convenirent. ipse ante diem quintum Nonas Maias paludatus urbe egressus est.*

IV. Per eosdem dies & prætores in provincias profecti sunt. Sub idem tempus legati ab duobus regibus, Philippo & Ptolemæo Ægypti rege, Romam venerunt; pollicentes ad bellum auxilia, & pecuniam, & frumentum. ab Ptolemæo etiam mille pondo auri, viginti millia pondo argenti allata. Nihil ejus acceptum. Gratia regibus actæ. & quum uterque se cum omnibus copiis in Ætoliam venturum, belloque interfuturum polliceretur; Ptolemæo

id

id remissum. Philippi legatis responsum; gratum eum senatui populoque Romano facturum, si Manio Acilio consuli non defuisset. Item ab Carthaginensibus & Masinissa rege legati venerunt. Carthaginenses tritici modium mille, hordei quingenta millia ad exercitum, dimidium ejus Romam apportaturos polliciti sunt: id ut ab se munus Romani acciperent, petere se. & classem suorum suo sumptu comparaturos, & stipendium, quod pluribus pensionibus in multos annos deberent, praesens omne daturus. Masinissae legati, quingenta millia modium tritici, trecenta hordei ad exercitum in Graeciam; Romam trecenta millia modium tritici, ducenta quinquaginta hordei, equites quingentos, elephantos viginti regem ad Manium Acilium consulem missurum. De frumento utrisque responsum: ita usum eo populum Romanum, si pretium acciperent. De classe Carthaginensibus remissum, praeterquam si quid navium ex foedere deberent. de pecunia item responsum; nullam ante diem accepturos.

V. Quum haec Romae agebantur, Chalcide Antiochus, ne cessaret per hibernorum tempus, partim ipse sollicitabat civitatum animos mittendis legatis, partim ultro ad eum veniebant: sicuti Epirotae communi gentis consensu, & Elei à Peloponneso venerunt. Elei auxilium adversus Achaeos petebant, quos, post bellum non ex sua sententia indictum Antiocho, primum civitati suae arma illaturos credebant. Mille iis pedites cum duce Cretensi Euphane sunt missi. Epirotarum legatio erat minime in partem ullam liberi aut simplicis animi. Apud regem gratiam initam volebant, cum eo ut caverent, ne quid offenderent Romanos. petebant enim, *ne se temere in causam deduceret, expeditos adversus Italiam pro omni Graecia,*

Et primos impetus Romanorum excepturos. Sed si ipse posset terrestribus navalibusque copiis præsidere Epiro, cupide eum omnes Epirotas Et urbibus Et portibus suis accepturos. si id non posset, deprecari, ne se nudos atque inermes Romano bello objiceret. Hac legatione id agi apparebat, ut siue (quod magis credebant) abstinuisset Epiro, integra sibi omnia apud exercitus Romanos essent, conciliata satis apud regem gratia, quod accepturi fuissent venientem: siue venisset, sic quoque spes veniæ ab Romanis foret, quod, non expectato longinquo auxilio ab se, præsentis viribus succubuissent. Huic tam perplexæ legationi quia non satis in promptu erat quid responderet, legatos se missurum ad eos dixit, qui de iis, quæ ad illos seque communiter pertinerent, loquerentur.

VI. In Bœotiam ipse profectus est, causas in speciem iræ adversus Romanos eas, quas ante dixi, habentem; *Brachyllæ necem, Et bellum à Quintio Coroneæ, propter Romanorum militum cædes, illatum*: re vera per multa jam secula publice privatimque labante egregia quondam disciplina gentis, & multorum eo statu, qui diuturnius esse sine mutatione rerum non posset. Obviam effusus undique Bœotiæ principibus Thebas venit. ibi in concilio gentis, quantum & ad Delium impetu in præsidium Romanum facto, & ad Chalcidem commiserat nec à parvis nec dubiis principiis bellum; tamen eandem orationem exorsus, qua in colloquio primo ad Chalcidem, quaque per legatos in concilio Achæorum usus erat, ut amicitiam secum institui non bellum indici Romanis postularet, neminem, quid ageretur, fallebat. detretum tamen sub levi verborum prætextu pro rege adversus Romanos factum est. Hac quoque gente adjuncta, Chalcidem regressus, præ-

missus

missis inde literis, ut Demetriadem convenirent principes Ætolorum, cum quibus de summa rerum deliberaret, navibus eo ad diem indictam concilio venit. Et Amynder, accitus ad consultandum ex Athamania; & Annibal, jamdiu non adhibitus, interfuit ei concilio. Consultatum de Theſſalorum gente est, quorum omnibus qui aderant voluntas tentanda videbatur. in eo modo diversæ sententiæ erant: quòd alii extemplo agendum; alii ex hieme, quæ tunc ferme media erat differendum in veris principium; & alii legatos tantummodo mittendos; alii cum omnibus copiis eundum censebant, terrendosque metu, si cunctarentur.

VII. Quum circa hanc fere consultationem disceptatio omnis verteretur; Annibal, nominatim interrogatus sententiam, in universi belli cogitationem regem, atque eos qui aderant, tali oratione avertit: *Si ex quo trajecimus in Græciam, adhibitus essem in consilium, quum de Eubœa, de Achæis, de Bæotia agebatur; eam sententiam dixissem, quam hodie, quum de Theſſalis agitur, dicam. Ante omnia Philippum & Macedonas in societatem belli quacunque ratione censeo deducendos esse. nam quòd ad Eubœam Bæotosque & Theſſalos attinet, cui dubium est, quin, ut quibus nullæ suæ vires sint, præsentibus adulando semper, quem metum in consilio habeant, eodem ad impetrandam veniam utantur, simul ac Romanum exercitum in Græcia viderint, ad consuetum imperium se avertant? nec iis noxæ futurum sit, quòd, quum Romani procul abessent, vim tuam præsentis exercitusque tui experiri noluerint? Quanto igitur prius potiusque est Philippum nobis conjungere, quàm hos; cui, si semel in causam descenderit, nihil integri futurum sit; quique eas vires afferat, quæ non accessio tantum ad Romanum esse bellum, sed per se ipsæ nuper susti-*
nere

nere potuerint Romanos? Hoc ego adjuncto (absit verbo invidia) qui dubitare de eventu possim? quum, quibus adversus Philippum valuerint Romani, iis nunc fore videam ut ipsi oppugnentur. Ætoli, qui Philippum (quod inter omnes constat) vicerunt, cum Philippo adversus Romanos pugnabunt: Amynder atque Athamanum gens, quorum secundum Ætolos plurima fuit opera in eo bello, nobiscum stabunt. Philippus tum, te quieto, totam molem sustinebat belli: nunc duo maximi reges, Asiæ Europæque viribus adversus unum populum (ut meam utramque fortunam taceam) patrum certè ætate ne uni quidem Epirotarum regi parem, quicquid tandem erit vobiscum comparatus, geretis bellum. Quæ igitur res mihi fiduciam præbet, conjungi nobis Philippum posse? Una, communis utilitas, quæ societatis maximum vinculum est: altera, auctores vos Ætoli. Vester enim legatus hic Thoas inter cetera, quæ ad exciendum in Græciam Antiochum dicere est solitus, ante omnia hoc semper affirmavit; fremere Philippum, & ægre pati, sub specie pacis leges servitutis sibi impositas. Ille quidem feræ bestię, vinclæ aut clausæ, & refringere claustra cupienti, regis iram verbis æquabat: cujus si talis animus est, solvamus nos ejus vincula, & claustra refringamus, ut erumpere diu coercitam iram in hostes communes possit. Quod si nihil eum legatio nostra moverit: at nos, quoniam nobis eum adungere non possumus, ne hostibus nostris ille adjungi possit, caveamus. Seleucus filius tuus Lyfimachię est: qui si eo exercitu, quem secum habet, per Thraciam proxima Macedoniæ cæperit depopulari, facile ab auxilio ferendo Romanis Philippum ad sua potissimum tuenda avertet. De Philippo meam sententiam habes. De ratione universi belli quid sentirem, jam ab initio non ignorasti. quod si tum auditus forem, non in Eubœa Chalcidem captam, & castellum Euripi expugnatum Romanis,

mani, sed Etruriam Ligurumque & Galliæ Cisalpinæ oram bello ardere, & qui maximus iis terror est, Annibalem in Italia esse audirent. Nunc quoque arceffas censeo omnes navales terrestresque copias. Sequantur classem onerariæ cum com meatibus. nam hic sicut ad belli munera pauci sumus, sic nimis multi pro inopia com meatuum. Quum omnes tuas contraxeris vires, divisam classem partim Corcyræ in statione habebis ne transitus Romanis liber ac tutus pateat: partim ad littus Italiæ, quod Sardiniam Africamque spectat, trajicies: ipse cum omnibus terrestribus copiis in Byllinum agrum procedes. inde Græciæ præsidebis, & speciem Romanis trajecturum te præbens, & si res poposcerit, trajecturus. Hæc suadeo, qui, ut non omnis peritissimus sim belli, cum Romanis certè bellare bonis malisque meis didici. In quæ consilium dedi, in eadem nec infidelem nec segnem operam polliceor. Dii approbent eam sententiam, quæ tibi optima visa fuerit.

VIII. Hæc ferme Annibalis oratio fuit. quam laudârunt magis in præsentia qui aderant, quàm rebus ipsis exsecuti sunt. nihil enim eorum est factum, nisi quòd ad classem copiasque arceffendas ex Asia Polyxenidam misit. Legati Larissam ad concilium Thessalorum sunt missi, & Ætolis Amyndandroque dies ad conveniendum exercitui Pheras est indictus. eodem & rex cum suis copiis confestim venit. Ibi dum opperiretur Amyndandrum atque Ætolos, Philippum Megalopolitanum cum duobus millibus hominum ad legenda ossa Macedonum circa Cynoscephalas, ubi debellatum erat cum Philippo, misit; five ab ipso quærente sibi commendationem ad Macedonum gentem & invidiam regi, quòd insepultos milites reliquisset, monitus; five ab infita regibus vanitate, ad consilium specie amplum, re inane, animo adjecto.

adjecto. Tumulus est in unum ossibus, quæ passim strata erant, coacervatis factus: qui nullam gratiam ad Macedonas, odium ingens ad Philippum movit. Itaque qui ad id tempus fortunam esset in concilio habiturus, is extemplo ad M. Bæbium proprætorem misit, Antiochum in Thessaliam impetum fecisse. si videretur ei, moveret ex hibernis: se obviam processurum, ut quid agendum esset consultarent.

IX. Antiocho ad Pheras jam castra habenti, ubi conjunxerant ei se Ætoli & Amynder, legati ab Larissa venerunt, quærentes, quod ob factum dictumve Thessalorum bello lacefferet eos: simul orantes, ut, remoto exercitu, per legatos, si quid ei videretur, secum disceptaret. Eodem tempore quingentos armatos duce Hippolochō Pheras in præsidium miserunt. hi exclusi aditu, jam omnia itinera obsidentibus regiis, Scotussam se receperunt. Legatis Larissæorum rex clementer respondit; Non belli faciendi, sed tuendæ & stabiliendæ libertatis Thessalorum causa, se Thessaliam intrasse. Similia his qui cum Pheræis ageret missus: cui nullo dato responso, Pheræi ipsi suum legatum ad regem, principem civitatis Pausaniam, miserunt. Qui quæ non haud dissimilia his, ut in causa pari, quæ pro Chalcidensibus in colloquio ad Euripi fretum dicta erant, quædam etiam ferocius egisset; rex etiam atque etiam deliberare eos iussos, ne id consilii caperent, cujus, dum in futurum nimis cauti & providi essent, extemplo pœniteret, dimisit. Hæc renunciata Pheras legatio quum esset, ne paullum quidem dubitârunt, quin pro fide erga Romanos, quicquid fors belli tulisset, paterentur. Itaque & hi summa ope parabant se ad urbem defendendam: & rex ab omni parte simul oppugnare mœnia est aggressus. ut qui satis intelligeret (neque enim dubium

bium erat) in eventu ejus urbis positum esse, quam primam aggressus esset, aut sperni deinde ab universa gente Thessalorum, aut timeri se, omnem undique terrorem obsessis injecit. Primum impetum oppugnationis satis constanter sustinuerunt: deinde, quum multi propugnantes caderent, aut vulnerarentur, labare animi cœpere. Revocati deinde castigationibus principum ad perseverandum in proposito, relicto exteriori circulo muri, deficientibus jam copiis, in interiorem partem urbis concesserunt, cui brevior orbis munitionis circumjectus erat. postremò victi malis quum timerent, ne vi captis nulla apud victorem venia esset, dediderunt sese. Nihil inde moratus rex, quatuor millia armatorum, dum recens terror esset, Scotussam misit. nec ibi mora deditionis est facta, cernentibus Pheræorum recens exemplum, qui, quod pertinaciter primò abnuerant, malo domiti tandem fecissent. cum ipsa urbe Hippolechus Larissæorumque deditum est præsidium. Dimissi ab rege inviolati omnes, quòd eam rem magni momenti futuram rex ad conciliandos Larissæorum animos credebat.

X. Intra decimum diem quàm Pheras venerat, his perfectis, Cranonem profectus cum toto exercitu, primo adventu cepit. inde Cypæram, & Metropolim, & iis circumjecta castella recepit: omniaque jam regionis ejus, præter Atracem & Gyrtonem, in potestate erant. Tum aggredi Larissam constituit: ratus vel terrore ceterarum expugnatarum, vel beneficio præsidii dimissi, vel exemplo tot civitatum dedentium sese, non ultra in pertinacia mansuros. Elephantis agi ante signa terroris caussa jussis, quadrato agmine ad urbem incescit: ut incerti fluctuarentur animi magnæ partis Larissæorum inter metum præsentem hostium & verecundiam absentium sociorum.

rum. Per eosdem dies Amynder cum Athamanum juventute occupat Pellinæum: & Menippus, cum tribus millibus peditum Ætolorum & ducentis equitibus in Perræbiam profectus, Malloceam & Cyretias vi cepit, depopulatusque est agrum Tripolitani. His raptim peractis, Larissam ad regem redeunt: consultanti, quidnam agendum esset de Larissa, supervenerunt. Ibi in diversum sententiæ tendebant: aliis vim adhibendam, & non differendum censentibus, quin operibus ac machinis simul undique mœnia aggredierentur urbis sitæ in plano, à parte campestri undique facilis aditu: aliis, nunc vires urbis, nequaquam Pheris conferendæ, memorantibus; nunc hiemem & tempus anni nulli bellicæ rei, minime obsidioni atque oppugnationi urbium aptum. Incerto regi inter spem metumque legati à Pharsalo, qui ad dedendam urbem suam fortè venerant, animos auxerunt. M. Bæbius interim cum Philippo in Dassaretiis congressus, Ap. Claudium ex communi consilio ad præsidium Larissæ misit: qui per Macedoniam magnis itineribus in jugum montium, quod super Gonnos est, pervenit. Oppidum Gonni viginti millia ab Larissa abest: in ipsis faucibus saltus, quæ Tempe appellantur, situm. Ibi castra metatus latius quàm pro copiis, & plures, quàm quot satis in usum erant, ignes quum accendisset, speciem, quam quæsierat, hosti fecit: omnem ibi Romanum exercitum cum rege Philippo esse. Itaque hiemem instare apud suos caussatus rex, unum tantum moratus diem, ab Larissa recessit, & Demetriadem rediit. Ætolique & Athamanes in suos receperunt se fines. Appius etsi, cujus rei causa missus erat, solutam cernebat obsidionem; tamen Larissam, ad confirmandos in reliquum sociorum animos, descendit: duplexque lætitia

titia erat, quòd & hostes excefferant finibus, & intra mœnia præsidium Romanum cernebant.

XI. Rex Chalcidem à Demetriade profectus, amore captus virginis Chalcidensis Cleoptolemi filia; quum patrem, primò allegando, deinde coram ipse rogando fatigasset, invitum se gravioris fortunæ conditioni illigantem; tandem impetrata re, tanquam in media pace nuptias celebrat: & reliquum hiemis, oblitus quantas simul duas res suscepisset, bellum Romanum & Græciam liberandam, omissa omnium rerum cura, in convivii & vinum sequentibus voluptatibus, ac deinde ex fatigatione magis quàm satietate earum in somno traduxit. Eadem omnes præfectos regiones (qui ubique ad Bœotiam maximè præpositi hibernis erant) cepit luxuria: in eandem & milites effusi sunt. nec quisquam eorum aut arma induit, aut stationem aut vigiliis servavit: aut quicquam, quod militaris operis aut munêris esset, fecit. Itaque principio veris quum per Photidem in Acarnaniam, quò convenire omnem undique exercitum jusserat, venisset; facile animadvertit, nihilo severiore disciplina milites quàm ducem hibernasse. Alexandrum inde Acarnanem & Menippum Macedonem Stratum Ætolia copias ducere jussit: ipse Delphis sacrificio Apollini facto, Naupactum processit. concilio principum Ætolia habito, via, quæ præter Chalcidem & Lyfimachiam fert ad Stratum, suis, qui per Maliacum finem veniebant, occurrit. Ibi Mnesilochus, princeps Acarnanum, multis emptus donis, non ipse solùm gentem regi conciliabat, sed Clytum etiam prætorem, penes quem tum summa potestas erat, in suam sententiam adduxerat. Is quum Leucadios, quod Acarnaniae caput est, non facilè ad defectionem posse cerneret impelli, propter metum Romanæ classis, quæ cum
Atilio,

Atilio, quæve circa Cephalleniam erat, arte eos est aggressus. nam quum in concilio dixisset, tuenda mediterranea Acarnaniæ esse, & omnibus, qui arma ferrent, exeundum ad Medionem & Thyrium, ne ab Antiocho aut Ætolis occuparentur; fuere qui dicerent, nihil attinere omnes tumultuosè concitari: satis esse quingentorum hominum præsidium. eam juventutem nactus, trecentis Medione, ducentis Thyrii in præsidio positus, id agebat, ut pro obsidibus futuri venirent in potestatem regis.

XII. Per eosdem dies legati regis Medionem venerunt. quibus auditis, quum in concione, quidnam respondendum regi esset, consultaretur; & alii manendum in Romana societate, alii non aspernandam amicitiam regis censerent: media visa est Clyti sententia, eoque accepta est, ut ad regem mitterent legatos, peterentque ab eo, ut Medionios super tanta re consultare in concilio Acarnanum pateretur. In eam legationem Mnesilochus, & qui ejus factionis erant, de industria conjecti; clam missis qui regem admoveere copias juberent, ipsi terebant tempus. itaque, vixdum iis egressis, Antiochus in finibus, & mox ad portas erat; & trepidantibus, qui expertes proditiōis fuerant, tumultuoseque juventutem ad arma vocantibus, ab Clyto & Mnesilochō in urbem est inductus: & aliis suæ voluntate affluentibus, metu coacti etiam qui dissentiebant, ad regem convenerunt. quos placida oratione territos quum permulsisset; ad spem vulgatæ clementiæ aliquot populi Acarnaniæ defece-
runt. Thyrium à Medione profectus est, Mnesilochō eodem & legatis præmissis. Ceterum detesta Medione fraus cautiōres, non timidiōres, Thyrienses fecit: dato ei haud perplexo responso, nullam
se

se novam societatem, nisi ex auctoritate Romanorum imperatorum, accepturos: portisque clausis, armatos in muris disposuerunt. Et peropportunè ad confirmandos Acarnanum animos Cn. Octavius missus à Quintio, quum præsidium & paucas naves ab A. Postumio, qui ab Atilio legato Cephalleniz præpositus fuerat, accepisset; Leucadem venit, implevitque spei socios, Manium Acilium consulem jam cum legionibus mare trajecisse, & in Thessalia castra Romana esse. Hunc rumorem quia similem veri tempus anni maturum jam ad navigandum faciebat; rex, præsidio Medione imposito, & in quibusdam aliis Acarnaniae oppidis, Thyrio abscessit, & per Ætoliz ac Phocidis urbes Chalcidem rediit.

XIII. Sub idem tempus M. Bæbius & Philippus rex, jam ante per hiemem in Dassaretiis congressi, quum Ap. Claudium, ut obsidione Larissam eximeret, in Thessaliam misissent; quia id tempus rebus gerendis immaturum erat, in hiberna regressi, principio veris conjunctis copiis in Thessaliam descenderunt. In Acarnania tum Antiochus erat. Advenerunt, Philippus Malloeam Perræbiz, Bæbius Phacium est aggressus. quo primo prope impetu capto, Phæstum eadem celeritate capit. inde Atracem quum se recepisset, Cyretias hinc & Phricium occupat: præditiisque per recepta oppida dispositis, Philippo rursus obsidenti Malloeam se conjungit. Sub adventum Romani exercitus, seu ad metum virium, seu ad spem veniæ quum dedidissent sese; ad ea recipienda oppida, quæ Athamianes occupaverant, uno agmine ierunt. Erant autem hæc, Æginium, Ercinum, Gomphi, Silana, Tricca, Melibœa, Phaloria. Inde Pellinæum, ubi Philippus Megalopolitanus cum quingentis peditibus & equitibus quadraginta
in

in præsidio erat, & circumfidunt, &, priusquam oppugnarent, mittunt ad Philippum qui moneret, ne vim ultimam experiri vellet. Quibus ille satis ferociter respondit, vel Romanis vel Theſſalis se crediturum fuisse; in Philippi se potestatem commissurum non esse. Posteaquam apparuit vi agendum, quia videbatur & Limnæam eodem tempore oppugnari posse, regem ad Limnæam ire placuit: Bæbius restitit ad Pellinæum oppugnandum.

XIV. Per eos fortè dies Manius Acilius consul cum decem millibus peditum, duobus millibus equitum, quindecim elephantis, mari trajecto, pedestres copias Larissam ducere delectos militum tribunos iussit: ipse cum equitatu Limnæum ad Philippum venit. Adventu consulis deditio sine cunctatione est facta: traditumque præsidium regium, & cum iis Athamanes. Ab Limnæa Pellinæum consul proficiscitur. Ibi primi Athamanes tradiderunt sese, deinde & Philippus Megalopolitanus: cui, decedenti de præsidio, quum obuius fortè fuisset Philippus rex, ad ludibrium Regem eum consalutari iussit; ipse congressus fratrem, haud sanè decoro majestati suæ joco, appellavit. Deductus inde ad consulem custodiri iussus: & haud ita multo post in vinculis, Romam missus. cetera multitudo Athamanum aut militum Antiochi regis, quæ in præsidiis deditorum per eos dies oppidorum fuerat, Philippo tradita regi est. fuere autem ad tria millia hominum. Consul Larissam est profectus; ibi de summa belli consultaturus. in itinere ab Pieria & Metropoli legati, tradentes urbes suas, occurrerunt. Philippus, Athamanum præcipuè captivis indulgenter habitis, ut per eos conciliaret gentem, nactus spem Athamanæ potiundæ, exercitum eò duxit, præmissis in civitates

civitates captivis. Et illi magnam auctoritatem apud populares habuerunt, clementiam erga se regis munificentiamque commemorantes: & Amynander, cujus præsentis majestas aliquos in fide tenuisset, veritus ne traderetur Philippo jam pridem hosti, & Romanis meritò tum propter defectionem infensis, cum conjuge ac liberis regno excessit, Ambraciamque se contulit. ita Athamania omnis in jus ditionemque Philippi concessit. Consul ad reficienda maximè jumenta, quæ & navigatione & postea itineribus fatigata erant, paucos Larissæ moratus dies, velut renovato modica quiete exercitu, Cranonem est profectus. Venienti Pharsalus, Scotussa, & Pheræ, quæque in eis præsidia Antiochi erant, deduntur. ex iis interrogatis, qui manere secum vellent, mille volentes Philippo tradit: ceteros inermes Demetriadem remittit. Proërnâ inde recepit, & quæ circa eam castella erant. Ducere tum porro in sinum Maliacum cœpit. Appropinquante faucibus, super quas fiti Thaumaci sunt, deserta urbe juvenus omnis armata silvas & itinera insedit: & in agmen Romanum ex superioribus locis incurfavit. Consul primò mittere, qui ex propinquo colloquentes deterrerent eos à tali furore. posteaquam perseverare in incepto vidit, tribuno cum duorum signorum militibus circummisso, interclusit ad urbem iter armatis, vacuumque eam cepit. tum, clamore ab tergo captæ urbis audito, refugientium undique ex silvis insidiatorum cædes facta est. A Thaumacis altero die consul ad Sperchium amnem pervenit: inde Hypætorum agros vastavit.

XV. Quum hæc agebantur, Chalcide erat Antiochus: qui jam tum cernens, nihil se ex Gæcia, præter

præter amœna Chalcide hiberna & infames nuptias, petisse, Ætolorum vana promissa incusare & Thoantem: Annibalem verò, non ut prudentem tantum virum, sed prope vatem omnium quæ tum evenirent, admirari. ne tamen temere cœpta segnitia insuper everteret, nuncios in Ætoliā mittit, ut omni contracta juventute convenirent. Jam & ipse eò decem millia fere peditum, ex iis qui postea venerant ex Asia expleta, & equites quingentos duxit. Quò quum aliquanto pauciores quàm unquam antea convenissent, & principes tantummodo cum paucis clientibus essent, atque ii dicerent omnia sedulò ab se facta, ut quamplurimos ex civitatibus suis evocarent, nec auctoritate, nec gratia, nec imperio adversus detrectantes militiam valuisse: destitutus undique & ab suis, qui morabantur in Asia, & ab sociis, qui ea, in quorum spem vocaverant, non præstabant, intra saltum Thermopylarum sese recepit. Id jugum, sicut Apennini dorso Italia dividitur, ita mediam Græciam dirimit. ante saltum Thermopylarum in septentrionem versa Epirus, & Perræbia, & Magnesia, & Theffalia est, & Phthiotæ Achæi, & sinus Maliacus: intra fauces ad meridiem vergunt Ætolia pars major, & Acarnania, & cum Locride Phocis, & Bœotia, adjunctaque insula Eubœa, & excurrente in altum velut promontorio Attica terra sita ab tergo, & Peloponnesus. Hoc jugum, ab Leucate & mari ad occidentem verso per Ætoliā ad alterum mare orienti objectum tendens, ea aspreta rupesque interjectas habet, ut non modo exercitus, sed ne expediti quidem facile ullos ad transitum calles inveniant. Extremos ad orientem montes Oetam vocant. quorum quod altissimum est, Callidromon appellatur: in cujus

valle, ad Maliacum sinum vergente, iter est non latius quàm sexaginta passus. Hæc una militaris via est, qua traduci exercitus, si non prohibeantur, possint. ideo Pylæ, & ab aliis, quia calidæ aquæ in ipsis faucibus sunt, Thermopylæ locus appellatur; nobilis Lacedæmoniorum adversus Persas morte magis memorabili, quàm pugna.

XVI. Haudquaquam pari tum animo Antiochus, intra portas loci ejus castris positis, munitionibus insuper saltum impediabat. & quum duplici vallo fossaque, & muro etiam, quæ res postulabat, ex multa copia passim jacentium lapidum permunisset omnia; satis fidens nunquam eâ vim Romanum exercitum facturum, Ætolos ex quatuor millibus (tot enim convenerant) partim ad Heracleam præsidio obtinendam, quæ ante ipsas fauces posita est, partim Hypatam mittit: & Heracleam haud dubius consulem oppugnaturum, & jam multis nunciantibus circa Hypatam omnia evastari. Consul, depopulatus Hypatensem primò, deinde Heracleensem agrum, inutili utrobique auxilio Ætolorum, in ipsis faucibus prope fontes calidarum aquarum adversus regem castra posuit. Ætolorum utræque manus Heracleam sese incluserunt. Antiochum, cui, priusquam hostem cerneret, satis omnia permunita & præsidiis obsepta videbantur, timor deinde incescit, ne quos per imminetia juga calles inveniret ad transitum Romanus. nam & Lacedæmonios quondam ita à Persis circumitos fama erat; & nuper Philippum ab iisdem Romanis. itaque nuncium Heracleam ad Ætolos mittit, ut hanc saltem sibi operam eo bello præstarent, ut vertices circa montium occuparent obsiderentque, ne quæ transire Romanus posset. Hoc nuncio audito, dissensio inter Ætolos
orta

orta est. pars imperio parendum regis atque eundem censebant, pars subsistendum Hieracleæ ad utramque fortunam: ut sive victus à consule rex esset, in expedito haberent integras copias ad opem propinquis ferendam civitatibus suis; sive vinceret, ut dissipatos in fugam Romanos persequerentur. Utraque pars non mansit modò in sententia sua, sed etiam exsecuta est consilium. duo millia Hieracleæ substiterunt: duo, trifariam divisa, Callidromum & Rhoduntiam & Tichiunta (hæc nomina cacuminibus sunt) occupavere.

XVII. Consul, posteaquam infessa superiora loca ab Ætolis vidit, M. Porcium Catonem & L. Valerium Flaccum consulares legatos cum binis millibus delectorum militum ad castella Ætolorum, Flaccum in Rhoduntiam & Tichiunta, Catonem in Callidromum mittit. ipse, priusquam ad hostem copias ad-moveret, vocatos in concionem milites paucis est allocutus: *Plerosque omnium ordinum, milites, inter vos esse video, qui in hac eadem provincia T. Quintii ductu auspicioque militaveritis. Macedonico bello in-exsuperabilis magis saltus ad amnem Aoum fuit, quàm hic. Quippe portæ sunt hæ: & unus inter duo maria clausis omnibus velut naturalis transitus est. munitiones & locis opportunioribus tunc fuerunt & validiores impositæ: exercitus hostium ille & numero major, & militum genere aliquanto melior. Quippe illic Macedones Thracæque & Illyrii erant, ferocissimæ omnes gentes: hic Syri & Asiatici Græci sunt; levissima genera hominum, & servituti nata. Rex ille bellicosissimus, exercitatus jam inde ab juventa finitimis Thracum atque Illyriorum & circa omnium accolarum bellis: hic, ut aliam omnem vitam sileam, is est, qui, quum ad inferendum populo Romano bellum ex Asia in Europam transisset,*

fisset, nihil memorabilius toto tempore hibernorum gesserit, quàm quod amoris causa ex domo privata & obscuri etiam inter populares generis uxorem duxit; & novus maritus, velut saginatus nuptialibus cœnis, ad pugnam processit. Summa virium speique ejus in Ætolis fuit, gente vanissima & ingratiſſima, ut vos prius experti estis, nunc Antiochus experitur. Nam nec convenerunt frequentes, nec contineri in castris potuerunt, & in seditione ipsi inter se sunt: & quum Hypatam tuendam Heracleamque depoposcissent, neutram tutati, refugerunt in juga montium, pars Heracleæ incluserunt sese. Rex ipse, confessus nusquam æquo campo non modo congregi se ad pugnam audere, sed ne castra quidem in aperto ponere, relicta omni ante se regione ea, quam se nobis ac Philippo ademisse gloriabatur, condidit se intra rupes: ne ante fauces quidem saltus, ut quondam Lacedæmonios fama est, sed intra penitus retractis castris. quod quantum interest ad timorem ostendendum, an muris alicujus urbis obsidendum sese incluserit? Sed neque Antiochum tuebuntur angustiae; nec Ætolos vertices illi quos ceperunt. Satis undique provisum antequam præcautum est, ne quid adversus vos in pugna præter hostes esset. Illud proponere animo vestro debetis; non vos pro Græciæ libertate tantum dimicare, (quanquam is quoque egregius titulus esset, liberatam à Philippo ante, nunc ab Ætoliis & ab Antiocho liberare) neque ea tantum in præmium vestrum cessura, quæ nunc in regiis castris sunt; sed illum quoque omnem apparatus, qui indies ab Epheso expectatur, prædæ futurum: Asiæ deinde Syriamque, & omnia usque ad ortus solis ditissima regna imperio Romano aperturos. Quid deinde aberit, quin ab Gadibus ad mare rubrum Oceano fines terminemus, qui orbem terrarum amplexu fuit; & omne humanum genus secundum Deos nomen Romanum veneretur?

tur? In hæc tanta præmia dignos parate animos, ut crassino die bene juvantibus Diis acie decernamus.

XVIII. Ab hac concione dimissi milites, priusquam corpora curarent, arma telaque parant. Luce prima, signo pugnae proposito, instruit aciem consul arcta fronte, ad naturam & angustias loci. Rex posteaquam signa hostium conspexit, & ipse copias eduxit. Levis armaturæ partem ante vallum in primo locavit: tum Macedonum robur, quos Sarissophoros appellabant, velut firmamentum circa ipsas munitiones constituit. his ab sinistro cornu jaculatorum sagittariorumque & funditorum manum sub ipsis radicibus montis posuit, ut ex altiore loco nuda latera hostium incesserent; ab dextro Macedonibus ad ipsum munimentorum finem, quæ loca usque ad mare invia palustri limo & voraginibus claudunt, elephantos cum assueto præsidio posuit: post eos equites: tum, modico intervallo relicto, ceteras copias in secunda acie. Macedones, pro vallo locati, primò facillè sustinebant Romanos, tentantes ab omni parte aditus: multum adjuvantibus qui ex loco superiore fundis, velut nimbum, glandes & sagittas simul & jacula ingerebant. deinde, ut major nec jam toleranda vis hostium inferebat se, pulsi loco intra munimenta subductis ordinibus concefferunt. inde ex vallo prope alterum vallum, hastis præ se objectis fecerunt. & ita modica altitudo valli erat, ut & locum superiorem ad pugnandum suis præberet, & propter longitudinem hastarum subiectum haberet hostem. Multi temere subeuntes vallum transfixi sunt: & aut incepto irrito recessissent, aut plures cecidissent, ni M. Porcius ab jugo Callidromi, dejectis inde Ætolis & magna ex parte cæsis, (incautos enim & plerosque

sopitos oppresserat) super imminentem castris collem apparuisset.

XIX. Flacco non eadem fortuna ad Tichiunta & Rhoduntiam, nequicquam subire ad ea castella conato, fuerat. Macedones, quique alii in castris regiis erant, primò, dum procul nihil aliud quàm turba & agmen apparebat, Ætolos credere visa procul pugna subsidio venire. ceterùm ut primùm signaque & arma ex propinquo cognita errorem aperuerunt, tantus repente pavor omnes cepit, ut abjectis armis fugerent. Et munimenta sequentes impedierunt, & angustiae vallis, per quàm sequendi erant: maximè & omnium, quòd elephanti novissimi agmine erant, quos pedes ægre præterire, eques nullo poterat modo; timentibus equis, tumultumque inter se majorem quàm in proelio edentibus. Aliquantum temporis & direptio castrorum tenuit. Scarphiam tamen eo die persecuti sunt hostem. Multis in ipso itinere caesis captisque, non equis virisque tantùm, sed etiam elephantis, quos capere non potuerant, interfectis, in castra reverterunt: quæ tentata eo die inter ipsum pugnae tempus ab Ætolis, Heracleam obtinentibus præsidio, sine ullo haud parum audacis incepti effectu fuerant. Consul, noctis insequentis tertia vigilia præmissis equitatu ad persequendum hostem, signa legionum prima luce movit. Aliquantum viæ præceperat rex, ut qui non ante quàm Elatiæ ab effuso constiterit cursu. ubi primùm reliquiis pugnaeque & fugæ collectis, cum perexigua manu semiermum militum Chalcidem se recepit. Romanus equitatus ipsum quidem regem Elatiæ affecutus non est; sed magnam partem agminis, aut lassitudine subsistentis, aut errore, ut qui sine ducibus per ignota itinera fugerent,

fugerent, dissipatos oppreſſerunt. nec præter quingentos, qui circa regem fuerunt, ex toto exercitū quifquam effugit: etiam ex decem millibus militum, quos Polybio auctore trajeciſſe ſecum regem in Græciam ſcripſimus, exiguus numerus. quid ſi Antiati Valerio credamus, ſexaginta millia militum fuiſſe in regio exercitu ſcribenti, quadraginta inde millia cecidiſſe, ſupra quinque millia capta cum ſignis militaribus ducentis triginta? Romanorum centum quinquaginta in ipſo certamine pugnae, ab incurſu Ætolorum ſe tuentes non plus quinquaginta interfecti ſunt.

XX. Conſule per Phocidem & Bœotiam exercitum ducente, conſciæ defectionis civitates cum velamentis ante portas ſtabant, metu ne hoſtiliter diriperentur. ceterum per omnes dies, haud ſecus quàm in pacato agro, ſine violatione ullius rei agmine proceſſit; donec in agrum Coronæum ventum eſt. Ibi ſtatua regis Antiochi, poſita in templo Minervæ Itoniæ, iram accendit: permiſſumque militi eſt, ut circumjeſtum templo agrum popularetur. deinde cogitatio animum ſubiit, quum communi decreto Bœotorum poſita eſſet ſtatua, indignum eſſe in unum Coronenſem agrum ſævire. Revocato extemplo milite, ſinis populandi factus: caſtigati tantum verbis Bœoti, ob ingratum in tantis tamque recentibus beneficiis animum erga Romanos. Inter ipſum pugnae tempus decem naves regiæ cum præfecto Iſidoro ad Thronium in ſinu Maliaco ſtabant. eo gravis vulneribus Alexander Acarnan, nuncius adverſæ pugnae, quum perſugiſſet; trepidæ inde recenti terrore naves Cenæum Eubœæ petierunt. ibi mortuus ſepultuſque Alexander. Tres, quæ ex Aſia proſectæ eundem portum tenuerant, naves, audita

exercitus clade, Ephesum redierunt. Isidorus ab Cenæo Demetriadem, si fortè eo deferret fuga regem, trajecit. Per eosdem dies A. Atilius, præfectus Romanæ classis, magnos regios commeatus, jam fretum, quod ad Andrum insulam est, prætervectos, excepit: alias merfit, alias cepit naves. quæ novissimæ agminis erant, cursum in Asiam venterunt. Atilius Piræum, unde profectus erat, cum agmine captivarum navium reiectus, magnam vim frumenti & Atheniensibus & aliis ejusdem regionis lociis divisit.

XXI. Antiochus, sub adventum consulis à Chalcide profectus, Tenum primò tenuit: inde Ephesum transmisit. Consuli Chalcidem venienti portæ patuerunt; quum appropinquante eo Aristoteles, præfectus regis, urbe excessisset & ceteræ urbes in Eubœa sine certamine traditæ: paucosque per dies omnibus perpacatis, sine ullius noxa urbis, exercitus Thermopylas reductus; multo modestia post victoriam, quàm ipsa victoria, laudabilior. Inde consul M. Catonem, per quem quæ gesta essent senatus populusque Romanus haud dubio auctore sciret, Romam misit. Is à Creusa (Thespiensium emporium est, in intimo sinu Corinthiaco retractum) Patras Achaïæ petit; à Patris Corcyram usque Ætoliaæ atque Acarnaniaæ littora legit; atque ita ad Hydruntum Italiaæ trajecit: quinto die inde pedestri itinere Romam ingenti cursu pervenit. ante lucem ingressus urbem, à porta ad prætorem M. Junium iter intendit. Is prima luce senatum vocavit: quò L. Cornelius Scipio, aliquot diebus ante à consule dimissus, quum adveniens audisset prægressum Catonem in senatu esse, supervenit exponenti quæ gesta essent. Duo inde legati jussu senatus in concionem sunt

sunt producti: atque ibi eadem, quæ in senatu, de rebus in Ætolia gestis exposuerunt. Supplicatio in triduum decreta est, & ut quadraginta hostiis majoribus prætor, quibus Diis ei videretur, sacrificaret. Per eosdem dies & M. Fulvius Nobilior, qui biennio antè prætor in ulteriorem Hispaniam erat profectus, ovans urbem est ingressus. argenti bigati præ se tulit centum & triginta millia: & extra numeratum duodecim millia pondo argenti: auri pondo centum viginti septem.

XXII. Acilius consul ab Thermopylis Heracleam ad Ætolos præmisit: *ut nunc saltem, experti regiam vanitatem, respiscerent; traditaque Heraclea, cogitarent de petenda ab senatu seu furoris sui seu erroris venia. Et ceteras Græciæ civitates defecisse eo bello ab optimè de se meritis Romanis: sed, quia post fugam regis, cujus fiducia ab officio decessissent, non addidissent pertinaciam culpæ, in fidem receptas esse. Ætolas quoque, quanquam non secuti sint regem sed arcesserint, Et duces belli non socii fuerint, si pænitere possint, posse Et incolumes esse.* Ad ea quum pacati nihil responderetur, appareretque armis rem gerendam, & rege superato bellum Ætolicum integrum restare, castra ab Thermopylis ad Heracleam movit: eoque ipso die, ut situm nosceret urbis, ab omni parte equo-mœnia est circumvectus. Sita est Heraclea in radicibus Oetæ montis: ipsa in campo, arcem imminentem loco alto & undique præcipiti habet. Contemplatus omnia, quæ noscenda erant, quatuor simul locis aggredi urbem constituit. à flumine Asopo, quà & gymnasium est, L. Valerium operibus atque oppugnationi præposuit: arcem extra muros, quæ frequentius prope quàm urbs habitabatur, Ti. Sempronio Longo oppugnandam dedit: à sinu Maliaco,

quæ aditum haud facilem pars habebat, M. Bæbium; ab altero amniculo, quem Melana vocant, adversus Dianæ templum Appium Claudium opposuit. Horum magno certamine intra paucos dies turres arietesque, & alius omnis apparatus oppugandarum urbium perficitur. & cum ager Heracleensis paluster omnis, frequensque proceris arboribus, benignè ad omne genus operum materiam suppeditabat: tum quia refugerant intra mœnia Ætoli, desertaque in vestibulo urbis erant testa, in varios usus non tigna modò & tabulas, sed laterem quoque, & cæmenta, & saxa, variæ magnitudinis, præbebant.

XXIII. Et Romani quidem operibus, magis quàm armis, urbem oppugnabant: Ætoli contrà armis se tuebantur. nam, quum ariete quaterentur muri, non laqueis, ut solet, exceptos declinabant ictus: sed armati, frequentes quidam ignes etiam, quos aggeribus injicerent, ferebant. fornices quoque in muro erant apti ad excurrendum: & ipsi, quum pro dirutis reficerent muros, crebriores eos, ut pluribus erumperetur in hostem locis, faciebant. Hoc primis diebus, dum integræ vires erant, & frequentes & impigre fecerunt, indies deinde pauciores, & segnius. Etenim quum multis urgerentur rebus, nulla eos res æquè ac vigilæ conficiebant; Romanis in magna copia militum succedentibus aliis in stationem aliorum, Ætolos propter paucitatem eosdem dies noctesque assiduo labore urente. Per quatuor & viginti dies, ita ut nullum tempus vacuum dimicatione esset, adversus quatuor è partibus simul oppugnantem hostem nocturnus diurno continuatus labor est. Quum fatigatos jam Ætolos sciret consul, & ex ratione temporis & quòd ita trans-

transfugæ affirmabant, tale consilium iniit. media nocte receptui signum dedit, & ab oppugnatione simul omnes milites deductos usque ad tertiam diei horam quietos in castris tenuit. inde cœpta oppugnatio ad mediam rursus noctem perducta est: intermissa deinde usque ad tertiam diei horam. Fatigationem rati causam esse Ætoli non continuandæ oppugnationis, quæ & ipsos affecerat, ubi Romanis datum receptui signum esset, velut ipsi quoque hoc revocati, pro se quisque ex stationibus decedebant: nec ante tertiam diei horam armati in muris apparebant.

XXIV. Consul, quum nocte media intermisset oppugnationem, quarta vigilia rursus ab tribus partibus summa vi aggressus, ab una Ti. Sempronium tenere intentos milites signumque expectantes iussit: ad ea in nocturno tumultu, unde clamor exaudiretur, haud dubiè ratus hostes concursuros. Ætoli pars sopiti affecta labore ac vigiliis corpora ex somno moliebantur: pars vigilantes adhuc ad strepitum pugnantium in tenebris currunt. Hostes partim per ruinas jacentis muri transcendere conantur: partim scalis ascensus tentant. adversus quos undique ad opem ferendam occurrunt Ætoli. Pars una, in qua ædificia extra urbem erant, neque defenditur neque oppugnatur: sed qui oppugnarent, intenti signum expectabant, defensor nemo aderat. Jam dilucescebat, quum signum consul dedit: & sine ullo certamine partim per semiruta, partim scalis integros muros transcendere. Simul clamor, index capti oppidi, est exauditus: undique Ætoli, desertis stationibus, in arcem fugiunt. Oppidum victores, permissu consulis, diripiunt: non tam ab ira, nec ab odio, quàm ut miles, coercitus in tot receptis ex
po-

potestate hostium urbibus, aliquo tandem loco fructum victoriæ sentiret. Revocatos inde à medio ferme die milites quum in duas divisisset partes: unam radicibus montium circumduci ad rupem iussit; (quæ, fastigio altitudinis par, media valle velut abrupta ab arce erat; sed adeò prope geminata cacumina eorum montium sunt, ut ex vertice altero conjici tela in arcem possint) cum dimidia militum parte consul, ab urbe ascensurus in arcem, signum ab iis, qui ab tergo in rupem evasuri erant, expectabat. Non tulere qui in arce erant Ætoli primum eorum, qui rupem ceperant, clamorem, deinde impetum ab urbe Romanorum; & fractis jam animis, & nulla ibi præparata re ad obsidionem diutius tolerandam: utpote congregatis feminis puerisque, & imbelli alia turba in arcem, quæ vix capere, nedum tueri multitudinem tantam posset. itaque ad primum impetum abjectis armis dediderunt sese. Traditus inter ceteros princeps Ætolorum Damocritus est: qui principio belli decretum Ætolorum, quo arcessendum Antiochum censuerant, T. Quintio poscenti responderat, *in Italia daturum, quum castra ibi Ætoli posuissent.* ob eam ferociam majus victoribus gaudium traditus fuit.

XXV. Eodem tempore quo Romani Heracleam, Philippus Lameam ex composito oppugnabat; circa Thermopylas cum consule redeunte ex Bœotia, ut victoriam ipsi populoque Romano gratularetur, excusaretque quòd morbo impeditus bello non interfuisset, congressus. inde diversi, ad duas simul oppugnandas urbes, profecti. Intersunt septem millia ferme passuum. & quia Lamia cum posita est in tumulo, tum regionem eà maximè despestat oppidum, quà breve intervallum videtur, & omnia in conspectu sunt; quum enixè, velut proposito certamine, Ro-
mani

mani Macedonesque diem ac noctem aut in operibus aut in proeliis essent, hoc major difficultas Macedonibus erat, quòd Romani aggere & vineis & omnibus supra terram operibus, subtus Macedones cuniculis oppugnabant: & in asperis locis filex sæpe impenetrabilis ferro occurrebat. & quum parum procederet inceptum, per colloquia principum oppidanos tentabat rex, ut urbem dederent: haud dubius, quin, si prius Heraclea capta foret, Romanis se potius quàm sibi dedituri essent; suamque gratiam consul in obsidione liberanda facturus esset. Nec eum opinio est frustrata. confestim enim ab Heraclea capta nuncius venit, ut oppugnatione absteret. Æquius esse, Romanos milites, qui acie dimicassent cum Ætolis, præmia victoriæ habere. Ita recessum ab Lammia est, & propinquæ clade urbis ipsi, ne quid simile paterentur, effugerunt.

XXVI. Paucis, priusquam Heraclea caperetur, diebus Ætoli, concilio Hypatam coacto, legatos ad Antiochum miserunt: inter quos & Thoas idem, qui & antea, missus est. mandata erant, ut ab rege peterent primùm, ut ipse, coactis rursus terrestribus navalibusque copiis, in Græciam trajiceret: deinde, si qua ipsum teneret res, ut pecuniam & auxilia mitteret. id cum ad dignitatem ejus fidemque pertinere, non prodi socios; tum etiam ad incolumitatem regni, non finire Romanos omni cura vacuos, quum Ætolorum gentem sustulissent, omnibus copiis in Asiam trajicere. Vera erant quæ dicebantur: eo magis regem moverunt. Itaque in præsentia pecuniam, quæ ad usus belli necessaria erat, legatis dedit: auxilia terrestria navaliaque affirmavit missurum. Thoan-tem unum ex legatis retinuit, & ipsum haud invitum morantem, ut exactor præsens promissorum adesset.

XXVII.

XXVII. Ceterum Heraclea capta fregit tandem animos Ætolorum: & post paucos dies quam ad bellum renovandum accipiendumque regem in Asiam miserant legatos, abjectis belli consiliis, pacis petendæ oratores ad consulem miserunt. Quos dicere exorsos consul interfatus, quum alia sibi prævertenda esse dixisset: redire Hypatam eos, datis dierum decem induciis, & L. Valerio Flacco cum iis misso, iussit: ei, quæ secum acturi fuissent, exponere; & si qua vellent alia. Hypatam ut est ventum, principes Ætolorum apud Flaccum concilium habuerunt; consultantes, quonam agendum modo apud consulem foret. Parantibus iis antiqua fœderum ordiri, meritaque in populum Romanum, *Abstistere iis Flaccus iussit, quæ ipsi violassent ac rupissent. confessionem iis culpæ magis profuturam, & totam in preces orationem versam. nec enim in causa ipsorum, sed in populi Romani clementia spem salutis positam esse. & suppliciter agentibus iis se adfuturum, & apud consulem & Romæ in senatu. eò quoque enim mittendos fore legatos. Hæc una via omnibus ad salutem visa est, ut in fidem se permitterent Romanorum. Ita enim & illis violandi supplices verecundiam se imposituros: & ipsos nihilo minus suæ potestatis fore, si quid melius fortuna ostendisset.*

XXVIII. Posteaquam ad consulem ventum est, Phæneas legationis princeps longam orationem, & variè ad mitigandam iram victoris compositam, ita ad extremum finivit, ut diceret, Ætolos se suæque omnia fidei populi Romani permittere. Id consul ubi audivit; *Etiam atque etiam videte, inquit, Ætoli, ut ita permittatis.* Tum decretum Phæneas, in quo id disertè scriptum erat, ostendit. *Quando ergo, inquit, ita permittitis, posulo ut mihi Dicæarchum civem vestrum, & Menetam Epirotam, (Naupactum is cum præsidio*

præfidio ingressus ad defectionem compulerat) & Amyndrum cum principibus Athamanum, quorum consilio ab nobis defecistis, sine mora dedatis. prope dicentem interfatus Romanum Phæneas, *Non in servitutem, inquit, sed in fidem tuam nos tradidimus. & certum habeo te imprudentia labi, qui nobis imperes, quæ moris Græcorum non sint.* Ad hæc consul, *Nec hercle, inquit, magnopere nunc curo, quid Ætoli satis ex more Græcorum factum esse censeant: dum ego more Romano imperium inhibeam in deditos modo decreto suo, ante armis victos.* Itaque ni propere fit quod impero, vinciri vos jam jubeo. afferrique catenas, & circumfistere lictores jussit. Tum fracta Phæneæ ferocia, Ætolisque aliis est: & tandem, cujus conditionis essent, sensere. & se quidem, Pheneas, & qui adsint Ætolorum, scire facienda esse quæ imperentur, dixit: sed ad decernenda ea concilio Ætolorum opus esse. ad id petere, ut decem dierum inducias daret. Petente Flacco pro Ætolis, induciæ datæ: & Hypatam reditum est. Ubi quum in concilio delectorum, quos Apocletos vocant, Phæneas & quæ imperarentur, & quæ ipsis prope accidissent, exposuisset; ingemuerunt quidem principes conditioni suæ, parendum tamen victori censebant, & ex omnibus oppidis convocandos Ætolos, ad concilium.

XXIX. Posteaquam verò omnis coacta multitudo eadem illa audivit, adeò sævitia imperii atque indignitate exasperati animi sunt, ut, si in pace fuissent, illo impetu iræ concitari potuerint ad bellum. Ad iram accedebat & difficultas eorum quæ imperarentur: quonam modo enim utique regem Amyndrum se tradere posse? Et spes fortè oblata, quòd Nicander, eo ipso tempore ab rege Antiocho veniens, implevit expectatione vana multitudinem; terra
marique

marique ingens parari bellum. Is, duodecimo die, quàm conscenderat navem, in Ætoliā perfecta legatione rediens, Phaleram in sinu Maliaco tenuit. inde Lamiam pecuniam quum devexisset, ipse cum expeditis vespere prima, inter Macedonum Romanaque castra medio agro, dum Hypatam notis callibus petit, in stationem incidit Macedonum: deductusque ad regem est, nondum convivio dimisso. Quod ubi nunciatum est, velut hospitis, non hostis, adventu motus Philippus, accumbere eum epularique jussit: atque inde, dimissis aliis, solum retentum, ipsum quidem de se timere quicquam vetuit. Ætolorum prava consilia, atque in ipsorum caput semper recidentia, accusavit: qui primū Romanos, deinde Antiochum in Græciam adduxissent. Sed præteritorum, quæ magis reprehendi quàm corrigi possint, oblitum se, non facturum, ut insultet adversis rebus eorum. Ætolos quoque finire tandem adversus se odiā debere; Et Nicandrum privatim ejus dici, quo servatus à se foret, meminisse. Ita datis qui in tutum eum prosequerentur, Hypatam Nican- der consultantibus de pace Romana supervenit.

XXX. Manius Acilius, vendita aut concessa militi circa Heracleam præda, posteaquam nec Hypatæ pacata esse consilia, & Naupactum concurrisse Ætolos, ut inde totum impetum belli sustinerent, audivit; præmisso Ap. Claudio cum quatuor millibus militum ad occupanda juga, quæ difficiles transitus montium erant, ipse Oetam ascendit: Herculi que sacrificium fecit in eo loco, quem Pyram, quòd ibi mortale corpus ejus Dei sit crematum, appellant. inde toto exercitu profectus, reliquum iter satis expedito agmine fecit. Ut ad Coracem est ventum, (mons est altissimus inter Callipolin & Naupactum) ibi & jumenta multa ex agmine præcipitata cum ipsis oneribus

ribus sunt, & homines vexati. Id facile apparebat, quàm cum inerti hoste res esset, qui tam impeditum saltum nullo præsidio, ut clauderet transitum, insecidisset. Tum quoque vexato exercitu ad Naupactum descendit: &, uno castello adversus arcem posito, ceteras partes urbis, divisis copiis pro situ mœnium, circumfedit. nec minus operis laborisque ea oppugnationo, quàm Heracleæ, habuit.

XXXI. Eodem tempore & Messene in Peloponneso ab Achæis, quòd concilii eorum recusaret esse, oppugnari cœpta est. Etenim duæ civitates, Messene & Elis, extra concilium Achæicum erant: cum Ætolis sentiebant. Elei tamen, post fugatum ex Græcia Antiochum, legatis Achæorum leniùs responderant; *dimisso præsidio regio, cogitaturos se, quid sibi faciendum esset.* Messenii, sine responso dimissis legatis, moverant bellum: trepidique rerum suarum, quum jam ager effuso exercitu passim ureretur, castraque prope urbem poni viderent, legatos Chalcidem ad T. Quintium auctorem libertatis miserunt; qui nunciarent, Messenios Romanis, non Achæis, & aperire portas & dedere urbem paratos esse. Auditis legatis, extemplo profectus Quintius, à Megalopoli ad Diophanem prætorem Achæorum misit, qui extemplo reducere eum à Messene exercitum, & venire ad se juberet. Dicto paruit Diophanes: & soluta obsidione expeditus ipse prægressus agmen, circa Andaniam, parvum oppidum inter Megalopolim Messenemque positum, Quintio occurrit. & quum causas oppugnationis exponeret, castigatum leniter, quòd tantam rem sine auctoritate sua conatus esset, dimittere exercitum jussit: nec pacem omnium bono partam turbare. Messeniis imperavit, ut exfules reducerent, & Achæorum concilii essent. si qua haberent, de quibus

bus aut recusare aut in posterum cavere sibi vellent, Corinthum ad se venirent. Diophanem concilium Achæorum extemplo sibi præbere iussit. Ibi de Zacyntho intercepta per fraudem insula questus, postulavit, ut restitueretur Romanis. Philippi Macedonum regis Zacynthus fuerat: eam mercedem Amynandro dederat, ut per Athamaniam ducere exercitum in superiorem partem Ætolie liceret. qua expeditione fractis animis, Ætolos compulit ad petendam pacem. Amynander Philippum Megalopolitaneum insulæ præfecit: postea per bellum, quo se Antiocho adversus Romanos conjunxit, Philippo ad munia belli revocato, Hieroclem Agrigentinum successorem misit.

XXXII. Is post fugam ab Thermopylis Antiochi, Amynandrumque à Philippo Athamania pulsum, missis ultro ad Diophanem prætorem Achæorum nunciis, pecuniam pactus, insulam Achæis tradidit. Id præmium belli suum esse, æquum censebant Romani. non enim Manium Acilium consulem legionesque Romanas Diophani & Achæis ad Thermopylas pugnavisse. Diophanes adversus hæc purgare interdum sese, gentemque: interdum de jure facti differere. Quidam Achæorum & initio eam se rem aspernatos testabantur, & tunc pertinaciam increpitabant prætoris: auctoribusque iis decretum est, ut T. Quintio ea res permitteretur. Erat Quintius sicut adversantibus asper; ita, si cederes, idem placabilis. Omissa igitur contentione vocis vultusque, *Si utilem, inquit, possessionem ejus insule censerem Achæis esse, auctor essem senatui populoque Romano, ut eam vos habere fuereat. ceterum sicut testudinem, ubi collecta in sicum tegumen est, tutam ad omnes ictus video esse; ubi exerit partes aliquas, quodcumque nudavit, obnoxium atque infirmum*

firmum habere: haud dissimiliter vos, Achæi, clausos undique mari, quæ intra Peloponnesi sint terminos, ea & jungere vobis & juncta tueri facile. simul aviditate plura amplectendi hinc excedatis; nuda vobis omnia, quæ extra sint, & exposita ad omnes ictus esse. Assentiente omni concilio, nec Diophane ultro tendere auso, Zacynthus Romanis traditur.

XXXIII. Per idem tempus Philippus rex proficiscentem consulem ad Naupactum percunctatus, si se interim, quæ defecissent ab societate Romana, urbes recipere vellet; permittente eo, ad Demetriadem copias admovit, haud ignarus, quanta ibi tum perturbatio esset. Destituti enim ab omni spe, quum desertos se ab Antiocho, spem nullam in Ætolis esse cernerent; dies noctesque aut Philippi hostis adventum, aut infestiores etiam, quo justius irati erant, Romanorum expectabant. Turba erat ibi incondita regionum: qui primò pauci, in præsidio relictæ, postea plures, plerique inermes ex proelio adverso fuga delati, nec virium nec animi satis ad obsidionem tolerandam habebant. itaque præmissis à Philippo, qui spem impetrabilis veniæ ostendebant; responderunt, patere portas regi. Ad primum ejus ingressum principum quidam urbem excesserunt: Eurylochus mortem sibi conscivit. Antiochi milites (sic enim pacti erant) per Macedoniam Thraciamque, prosequentibus Macedonibus, ne quis eos violaret, Lyfimachiam deducti sunt. Erant & paucæ naves Demetriade, quibus præerat Isidorus. eæ quoque cum præfecto suo dimissæ sunt.

XXXIV. Inde Dolopiam & Aperantiam & Peræbiæ quasdam civitates recepit. Dum hæc à Philippo geruntur, T. Quintius, recepta Zacyntho ab Achaïco concilio, Naupactum trajecit. quæ jam per duos menses (sed prope excidium erat) oppugnabatur:

&

& si capta vi foret, omne ibi nomen *Ætolorum* ad internecionem videbatur venturum. Ceterum quanquam meritò iratus erat *Ætolis*, quòd solos obtrectâsse gloriæ suæ, quum liberaret Græciam, meminerat; & nihil auctoritate sua motos esse, quum, quæ tum maximè acciderant, casura præmonens, à furioso incepto eos deterreret: tamen, sui maximè operis esse credens, nullam gentem liberatæ à se Græciæ funditus everti, obambulare muris, ut facilè nosceretur ab *Ætolis*, cœpit. Confestim à primis stationibus cognitus est; vulgatumque per omnes ordines, Quintium esse. itaque, concursu factò undique in muros, manus pro se quisque tendentes, consonante clamore, nominatim Quintium orare, ut opem ferret ac servaret. Et tum quidem, quanquam moveretur his vocibus, manu tamen abnuvit, quiddam opis in se esse. Ceterum posteaquam ad consulem venit, *Utrum fallit*, inquit, *te, Mani Acili, quid agatur? an, quum satis provideas, nihil id magnopere ad summam rempublicam pertinere censet?* Erexerat exspectatione consulem, &, *Quin expromis*, inquit, *quid rei sit?* Tum Quintius: *Ecquid vides te devictò Antiocho in duabus urbibus oppugnandis tempus terere, quum jam prope annus circumactus sit imperii tui: Philippum autem, qui non aciem, non signa hostium vidit, non solum urbes, sed tot jam gentes, Athamaniam, Perræbiam, Aperantiam, Dolopiam sibi adjunxisse? Atqui non tantum interest nostra, Ætolorum opes ac vires minui, quantum non supra modum Philippum crescere: Et victoriæ tuæ præmium te militesque tuos nondum tot urbes, quot Philippum gentes Græciæ habere.*

XXXV. Assentiebatur his consul: sed pudor, si irritò incepto abscederet obsidione, occurrebat. tota inde

inde Quintio res permiffa eft. Is rurfus ad eam partem muri, qua paullò antè vociferati Ætoli fuerant, rediit. ibi quum impensius orarent, ut mifereretur gentis Ætolorum; exire aliquos ad fe iuffit. Phæneas ipfe principesque alii extemplo egreffi funt. quibus provolutis ad pedes, *Fortuna*, inquit, *vestra facit, ut & iræ meæ & orationi temperem. Evenerunt quæ prædixi eventura. & ne hoc quidem reliqui vobis eft, ut indignis accidiffe ea videantur. Ego tamen, forte quadam nutriendæ Græciæ datas, ne ingratis quidem benefacere abftinam. Mittite oratores, ad confulem, qui inducias tantum temporis petant, ut mittere legatos Romam possitis, per quos fenatui de vobis permittatis. Ego apud confulem deprecator defensorque vobis adero. Ita ut censuerat Quintius, fecerunt: nec aspernatus eft legationem consul. induciisque in diem certam datis, qua legatio renunciari ab Roma poffet, foluta obfidio eft, & exercitus in Phocidem miffus. Consul cum T. Quintio ad Achæicum concilium Ægium trajecit. ibi de Eleis & exulibus Lacedæmoniorum reftituendis actum. & neutra perfecta res: quia fuæ gratiæ refervari eam Achæi, Elei per fe ipfi quàm per Romanos maluerunt Achæico contribui concilio. Epirotarum legati ad confulem venerunt, quos non fincera fide in amicitia fuiſſe fatis conftabat: militem tamen nullum Antiocho dederant. pecunia juviſſe eum inſimulabantur: legatos ad regem ne ipſi quidem miſiſſe inſiciabantur. Iis petentibus, ut in amicitia priſtina eſſe liceret, reſpondit consul, *Se, utrùm hoſtium an pacatorum eos numero haberet, nondum ſcire. Senatum ejus rei judicem fore. Integram ſe cauſſam eorum Romam rejicere. inducias ad id dierum nonaginta dare. Epirotæ Romam miſſi ſenatum adierunt. iis magis**

magis quæ non fecissent hostilia referentibus, quàm purgantibus ea, de quibus arguebantur, responsum datum est; quo veniam impetrâsse, non causam probâsse videri possent. Et Philippi regis legati sub idem tempus in senatum introducti, gratulantes de victoria. iis petentibus, ut sibi sacrificare in Capitolio, donumque ex auro liceret ponere in æde Jovis Optimi Maximi; permissum ab senatu. centum pondo coronam auream posuerunt. Non responsum solùm benignè legatis est: sed Philippi quoque filius Demetrius, qui obses Romæ erat, ad patrem reducendus legatis datus est. Bellum, quod cum Antiocho rege in Græcia gestum est à Manio Acilio consule, hunc finem habuit.

XXXVI. Alter consul P. Cornelius Scipio Galliam provinciam sortitus, priusquam ad bellum, quod cum Boiis gerendum erat, proficisceretur, postulavit ab senatu, ut pecunia sibi decerneretur ad ludos, quos proprætor in Hispania inter ipsum discrimen pugnæ vorisset. Novum atque iniquum postulare est visus. censuerunt ergo, *quos ludos inconsulto senatu ex sua unius sententia vorisset, eos uti de manubiis, si quam pecuniam ad id reservâisset, vel sua ipse impensa faceret.* eos ludos per dies decem P. Cornelius fecit. Per idem fere tempus ædes Matris Magnæ Idææ dedicata est: quam Deam is P. Cornelius advectam ex Asia, P. Cornelio Scipione, cui post Africano fuit cognomen, P. Licinio consulibus, in Palatium à mari detulerat. Locaverant ædem faciendam ex senatusconsulto M. Livius, C. Claudius censores, M. Cornelio, P. Sempronio consulibus. tredecim annis postquam locata erat, dedicavit eam M. Junius Brutus: ludique ob dedicationem ejus facti, quos primos scenicos fuisse Valerius Antias est auctor,

auctor, Megaleſia appellatos. Item Juventatis ædem in circo maximo C. Licinius Lucullus duumvir dedicavit. Voverat eam ſexdecim annis antè M. Livius conſul, quo die Aſdrubalem exercitumque ejus cecidit. idem cenſor eam faciendam locavit, M. Cornelio, P. Sempronio conſulibus. Hujus quoque dedicandæ cauſſa ludi facti: & eò omnia cum majore religione facta, quòd novum cum Antiocho inſtabat bellum.

XXXVII. Principio ejus anni, quo hæc, jam profecto ad bellum Manio Acilio, manente adhuc Romæ P. Cornelio conſule, agebantur; boves duos domitos in Carinis per ſcalas perveniſſe in tegulas ædificii, proditum memoriæ eſt. Eos vivos comburi, cineremque eorum dejici in Tiberim, aruſpices juſſerunt. Tarracinæ & Amiterni nunciatum eſt, aliquoties lapidibus pluiffe: Minturnis ædem Jovis & tabernas circa forum de cælo tactas eſſe: Vulturni in oſtio fluminis duas naves fulmine iectas conflagraſſe. Eorum prodigiorum cauſſa libros Sibyllinos ex ſenatuſconſulto decemviri quum adiffent, renuntiârunt, *Jejunium inſtituendum Cereri eſſe, & id quinto quoque anno ſervandum: & ut novendiale ſacrum fieret, & unum diem ſupplicatio eſſet: coronati ſupplicarent: & conſul P. Cornelius, quibus Diis quibuſque hoſtiis edidiſſent decemviri, ſacrificaret.* Placatis Diis, nunc votis rite ſolvendis, nunc prodigiis expiandis, in provinciam proficiſcitur conſul; atque inde Cn. Domitium proconſulem dimiſſo exercitu Romam decedere juſſit: ipſe in agrum Boiorum legiones induxit.

XXXVIII. Sub idem fere tempus Ligures, lege ſacrata coacto exercitu, nocte improviſo caſtra Q. Minucii proconſulis aggreſſi ſunt. Minucius uſque
ad

ad lucem intra vallum militem instructum tenuit; intentus ne quâ transcenderet hostis munimenta. Prima luce duabus simul portis eruptionem fecit. nec primo impetu, quòd superaverat, Ligures pulsi sunt: duas amplius horas dubium certamen sustinere. Postremò quum alia atque alia agmina erumperent, & integri fessis succederent ad pugnam; tandem Ligures, inter cetera etiam vigiliis confecti, terga dederunt. cæsa super quatuor millia hostium: ex Romanis sociisque minus trecenti perierunt. Duobus fere post mensibus P. Cornelius consul cum Boiorum exercitu signis collatis egregiè pugnavit. Duodetriginta millia hostium cæsa Antias Valerius scribit: capta tria millia & quadringentos: signa militaria centum viginti quatuor: equos mille ducentos triginta: carpenta ducenta quadraginta septem: ex victoribus mille quadringentos octoginta quatuor cecidisse. Ubi ut in numero scriptori parum fidei sit, (quia in augendo eo non alius intemperantior est) magnam victoriam fuisse apparet; quòd & castra capta sunt, & Boii post eam pugnam extemplo dediderunt sese, & quòd supplicatio ejus victoriæ causâ decreta ab senatu, victimæque majores cæsæ.

XXXIX. Per eisdem dies M. Fulvius Nobilior ex ulteriore Hispania ovans urbem est ingressus. argenti transtulit decem millia pondo: bigati argenti centum & triginta: auri centum viginti quinque. P. Cornelius consul, primò obsidibus à Boiorum gente acceptis, agri parte fere dimidia eos multavit: quòd, si vellet, populus Romanus colonias mittere posset. Inde Romam ut ad triumphum haud dubium decedens, exercitum dimisit, & adesse Romæ ad diem triumphi jussit. ipse postero die
quàm

quàm venit, senatu in ædem Bellonæ vocato, quum de rebus ab se gestis differuisset, postulavit, ut sibi triumphanti liceret in urbem invehì. P. Sempronius Blæsus tribunus plebis, non negandum Scipioni, sed differendum honorem triumphi censebat. Bella Ligurum Gallicis semper juncta fuisse: eas inter se gentes mutua ex propinquo ferre auxilia. Si P. Scipio, devictis acie Boiis, aut ipse cum victore exercitu in agrum Ligurum transisset, aut partem copiarum Q. Minucio misisset, qui jam tertium ibi annum dubio detineretur bello, debellari cum Liguribus potuisse. Nunc ad triumphum frequentandum deductos esse milites, qui egregiam navare operam reipublicæ potuissent: possent etiam, si senatus, quod festinatione triumphi prætermissum esset, id restituere differendo triumpho vellet. Juberent consulem cum legionibus redire in provinciam, dare operam ut Ligures subigantur, Nisi illi cogantur in jus judiciumque populi Romani, no Boios quidem quieturos. aut pacem, aut bellum utrobique habenda. Devictis Liguribus paucos post menses proconsulem P. Cornelium, multorum exemplo qui in magistratu non triumphaverunt, triumphaturum esse.

XL. Ad ea consul, Neque se Ligures provinciam sortitum esse, ait, neque cum Liguribus bellum gessisse, neque triumphum de iis postulare. Q. Minucium confidere brevi subactis iis meritum triumphum postulaturum, atque impetraturum esse. se de Gallis Boiis postulare triumphum, quos acie vicerit, castris exuerit: quorum gentem biduo post pugnam totam acceperit in ditionem: à quibus obstrictis abduxerit, pacis futuræ pignus. Verum enimvero illud multo majus esse, quòd tantum numerum Gallorum ceciderit in acie, quòd cum tot millibus certè Boiorum nemo ante se imperator pugnaverit: plus partem dimidiam ex quinquaginta millibus hominum cæsam, multa millia capta: senes puerosque Boiis superesse. Itaque id quem-

quam mirari posse, cur victor exercitus, quum hostem in provincia neminem reliquisset, Romam venerit ad celebrandum consulis triumphum? Quorum militum si & in alia provincia opera uti senatus velit: utro tandem modo promptiores ad aliud periculum, novumque laborem ituros credat, si persoluta iis sine detractione prioris periculi laborisque merces sit, an si spem pro re ferentes dimittant, jam semel in prima spe deceptos? Nam quod ad se attineat, sibi gloriæ in omnem vitam illo die satis quæsitum esse: quo se virum optimum judicatum ad accipendam Matrem Idæam misisset senatus. Hoc titulo, etsi nec consulatus nec triumphus addatur, satis honestam bonoratumque P. Scipionis Nasicæ imaginem fore. Universus senatus non ipse modò ad decernendum triumphum consensit, sed etiam tribunum plebis auctoritate sua compulit ad remittendam intercessionem. P. Cornelius consul triumphavit de Boiis. in eo triumpho Gallicis carpentis arma signaque & spolia omnis generis transvexit, & vasa ænea Gallica: & cum captivis nobilibus equorum quoque captorum gregem traduxit. Aureos torques transtulit mille quadringentos septuaginta. ad hæc auri pondo ducenta quadraginta quinque; argenti infecti factique in Gallicis vasis, non infabre suo more factis, duo millia trecenta quadraginta pondo; bigatorum nummorum ducenta triginta tria. militibus, qui currum secuti sunt, trecentos vicenos quinos asses divisit: duplex centurioni, triplex equiti. Postero die, concione advocata, de rebus ab se gestis, & de injuria tribuni bello alieno se illigantis, ut suæ victoriæ fructu se defraudaret, quum differuisset; milites exauctoratos dimisit.

XLII. Dum hæc in Italia geruntur, Antiochus Ephesi securus admodum de bello Romano erat, tanquam non transituris in Asiam Romanis. quam securitatem

ritatem ei magna pars amicorum, aut per errorem aut assentando, faciebat. Annibal unus, cujus eo tempore ut maxima apud regem auctoritas erat, *Magis mirari se, aiebat, quòd non jam in Asia essent Romani, quàm venturos dubitare. Propius esse in Asiam ex Græcia, quàm ex Italia in Græciam trajicere: & multo majorem causam Antiochum, quàm Ætolos esse. neque enim mari minus, quàm terra pollere Romana arma. jampridem classem circa Maleam esse. Audire sese, nuper novas naves novumque imperatorem rei gerendæ causâ ex Italia venisse. Itaque desineret Antiochus pacem sibi ipse spe vana facere. In Asia, & de ipsa Asia brevi terra marique dimicandum ei cum Romanis esse: & aut imperium adimendum orbem terrarum affectantibus, aut ipsi regnum amittendum. Unus vera & providere & fideliter prædicere visus. itaque ipse rex navibus, quæ paratæ instructæque erant, Chersonesum petit: ut ea loca, si fortè terra venirent Romani, præfidiis firmaret. ceteram classem Polyxenidam parare, & deducere jussit; speculatorias naves ad omnia exploranda circa insulas dimisit.*

XLII. C. Livius, præfectus Romanæ classis, cum quinquaginta navibus testis profectus ab Roma Neapolim, quo ab sociis ejus oræ convenire jusserat apertas naves, quæ ex fœdere debebantur, Siciliam inde petit: fretoque Messanam prætervectus, quum sex Punicas naves ad auxilium missas accepisset, ab Rheginis Locrisque & ejusdem juris sociis debitas exegisset naves, lustrata classe ad Lacinium, altum petit. Corcyram, quam primam Græciæ civitatum adiit, quum venisset, percunctatus de statu belli, (necdum enim omnia in Græcia perpacata erant) & ubi classis Romana esset, posteaquam audivit circa Thermopylarum saltum in statione consulem ac regem esse,

classẽm Piræei stare, maturandum ratus omnium rerum causa, pergit protinus navigare Peloponnesum. Samen Zacynthumque, quia partis Ætolorum maverant esse, protinus depopulatus, Maleam petit: & prospera navigatione usus, paucis diebus Piræum ad veterem classẽm pervenit. Ad Scyllæum Eumenes rex cum tribus navibus occurrit, quum Æginæ diu incertus consilii fuisset, utrũ ad tuendum rediret regnum, (audiebat enim, Antiochum Ephesi navales terrestresque parare copias) an nusquam abscederet ab Romanis, ex quorum fortuna sua penderet. A Piræeo A. Atilius, traditis successori quinque & viginti navibus testis, Romam est profectus. Livius una & octoginta rostratis navibus, multis præterea minoribus, quæ aut apertæ rostratæ aut sine rostris speculatoriæ erant, Delum trajecit.

XLIII. Eo fere tempore consul Acilius Naupactum oppugnabat. Livium Deli per aliquot dies (& est ventosissima regio inter Cycladas, fretis alias majoribus, alias minoribus divisas) adversi venti tenuerunt. Polyxenidas, certior per dispositas speculatorias naves factus, Deli stare Romanam classẽm, nuncios ad regem misit. qui, omiſſis quæ in Hellesponto agebat, cum rostratis navibus, quantum accelerare potuit, Ephesum rediit: & consilium extemplo habuit, faciendumne periculum navalis certaminis foret. Polyxenidas *negabat cessandum; & utique prius consilgendum, quàm classis Eumenis & Rhodiæ naves conjungerentur Romanis: ita numero non ferme impares futuros; ipsum ceteris omnibus superiorem, & celeritate navium & varietate auxiliorum. Nam Romanas naves, cum ipsas inscitè factas immobiles esse, tum etiam, ut quæ in terram hostium veniant, oneratas commeatu venire: suas autem, ut pacata omnia circa se relinquentes,*
nihil

nihil præter militem atque arma habituras. multum etiam adjuturam notitiam maris terrarumque & ventorum: quæ omnia ignaros turbatura hostes essent. Movit omnes auctor consilii, qui & re consilium executurus erat. Biduum in apparatu morati: tertio die centum navibus, quarum septuaginta tectæ, ceteræ apertæ minoris omnes formæ erant, profecti Phocæam petierunt. inde quum audisset appropinquare jam Romanam classem rex, quia non interfuturus navali certamini erat, Magnesium, quæ ad Sipylum est, concessit, ad terrestres copias comparandas. classis ad Cyssuntem portum Erythræorum (tanquam ibi aptius exspectatura hostem) contendit. Romani, ubi primum aquilones (ii namque per aliquot dies tenuerant) cecidere, ab Delo Phanas, portum Chiorum in Ægæum mare versum, petunt. inde ad urbem circumegere naves, commeatuque sumpto Phocæam trajiciunt. Eumenes, Elæam ad suam classem profectus, paucis post inde diebus cum quatuor & viginti navibus tectis, apertis pluribus paullo, à Phocæa ad Romanos, parantes instruentesque se ad navale certamen, rediit. Inde centum quinquaginta tectis navibus, apertis ferme quinquaginta profecti, primò aquilonibus transversis quum urgerentur in terram, cogeantur tenui agmine prope in ordinem singulæ naves ire: deinde, ut lenita paulum vis venti est, ad Corycum portum, qui super Cyssuntem est, conati sunt trajicere.

XLIV. Polyxenidas, ut appropinquare hostes allatum est, occasione pugnandi lætus, sinistrum ipse cornu in altum extendit, dextrum cornu præfectos navium ad terram explicare jubet, & æqua fronte ad pugnam procedebat. Quod ubi vidit Romanus, vela contrahit, malosque inclinat, & simul armamenta componens

nens opperitur insequentes naves. Jam ferme triginta in fronte erant; quibus ut æquaret lævum cornu, dolonibus erectis altum petere intendit: jussis, qui sequebantur, adversus dextrum cornu prope terram proras dirigere. Eumenes agmen cogebat: ceterum ut demendis armamentis tumultuari primum ceptum est, & ipse, quanta maxima celeritate potest, concitat naves. Jam omnibus in conspectu erant. duæ Punicæ naves antecedeabant Romanam classem, quibus obviam tres fuerunt regiæ naves. & ut in numero impari, duæ regiæ unam circumfistunt. & primum ab utroque latere remos detergunt: deinde transcendunt armati, & dejectis cæsisque propugnatoribus, navem capiunt. Una, quæ compari Marte concurrerat, postquam captam alteram navem vidit, priusquam à tribus simul circumveniretur, retro ad classem refugit. Livius, indignatione accensus, prætoriam navem in hostes tendit, adversus quam eadem spe duæ, quæ Punicam unam navem circumvenerant, quum inferrentur, demittere in aquam remos ab utroque latere remiges stabilis navis causa jussit, & in advenientes hostium naves ferreas manus injicere: & ubi pugnam pedestri similem fecisset, meminisse Romanæ virtutis, nec pro viris ducere regia mancipia. Haud paullo facilius, quàm ante duæ unam, tunc una duas naves expugnavit cepitque. Et jam classes quoque undique concurrerant, & passim permixtis navibus pugnabatur. Eumenes, qui extremus commisso certamine advenerat, ut animadvertit lævum cornu hostium ab Livio turbatum, dextrum ipse, ubi æqua pugna erat, invadit.

XLV. Nec ita multo post primum ab lævo cornu fuga cepit. Polyxenidas enim, ut virtute militum haud dubiè superari se vidit, sublatis dolonibus effusè fugere

fugere intendit. mox idem & qui prope terram cum Eumene contraxerant certamen, fecerunt. Romani & Eumenes, quoad sufficere remiges potuerunt, & in spe erant extremi agminis vexandi, satis pertinaciter secuti sunt. posteaquam celeritate navium, utpote levium, suas commeatu onustas eludi frustra tendentes viderunt, tandem abstiterunt, tredecim captis navibus cum milite ac remige, decem demerfis. Romanæ classis una Punica navis, in primo certamine ab duabus circumventa, periit. Polyxenidas non priùs quàm in portu Ephesi fugæ finem fecit. Romani eo die, unde egressa regia classis erat, manserunt: postero die hostem persequi intenderunt. medio fere in cursu obviam fuere iis quinque & viginti testæ Rhodiæ naves cum Pausistrato præfecto classis. Iis adjunctis Ephesum hostem persecuti, ante ostium portus acie instructa steterunt. Posteaquam confessionem victis satis expresserunt, Rhodii & Eumenes domos dimissi: Romani Chium petentes, Phœnicuntem primùm portum Erythrææ terræ præterveſti, nocte anchoris jactis, postero die in insulam ad ipsam urbem trajecerunt. ubi paucos dies remige maximè reficiendo morati, Phocæam transmittunt. Ibi, relictis ad præsidium urbis quatuor quinquereuibz, ad Canas classis venit: &, quum jam hiems appeteret, fossa valloque circumdatis naves subductæ. Exitu anni comitia Romæ habita, quibus creati sunt consules L. Cornelius Scipio & C. Lælius, intuentibus cunctis ad finien-
Ante Cbr.
190.
U.C. 562.
 dum cum Antiocho bellum. Postero die prætores creati, M. Tuccinus, L. Aurunculeius, Cn. Fulvius, L. Æmilius, P. Junius, C. Atinius Labeo.



